



Antoni Guim  
anno

**Y**  
10.

1868

Dougl: 83 verso 25  
9

Quousq; tandem abutere, Catalina, nati-  
entia nostra: quemdui etiam furor  
iste tuus nos eludet? quem ad pri-  
mam sese effrenata jactabit  
audacia?

ubiquitous - ~~now~~  
widest river bed - ~~now~~

*Laurentius*

Lukaszewicz —



三十一

29.

6

四

三



Decolonial Dominique

\*\*  
DE ARTE  
RHETORICA

LIBRI QUINQUE

LECTISSIMIS VETERUM AUTHORUM

ÆTATIS AUREÆ

EXEMPLIS ILLUSTRATI

ET

AD USUM CANDIDATORUM ELOQUENTIAE

ACCOMMODATI.



POLOCIE

In Privilegiata à SUA IMPERATORIA Majestate  
Typographia Coll: Soc: JESU.

Anno Domini 1799.



*Veneror inventa sapientiae, inventoresque  
adire tanquam multorum hæreditatem  
juvat. Mihi ista acquisita, mihi labora-  
ta sunt. Sed agamus bonum Patrem  
familiae, faciamus ampliora, quæ acce-  
pimus. Major ista hæreditas, à me ad  
posteros transeat. Multum adhuc restat  
operis, multumque restabit: nec ulli na-  
to post mille Sæcula præcludetur occa-  
ſio aliquid adhuc adiiciendi. Sed etiam-  
si omnia à veteribus inventa sunt; hoc  
semper novum erit, usus, & inventorum  
ab aliis scientia, & dispositio.*

Seneca Epistola 64.

P-18-0-1371  
8° - 1699



## ELEMENTA RHETORICÆ

Quinque sunt, quæ de Rhetorica generatim,  
ac prolusionis more quæri possunt; scilicet:

1. Quæ sit natura, quis finis Rhetoricæ.
  2. Quæ sit illius materia.
  3. Quæ sunt illius partes.
  4. Quæ sit illius dignitas, vis & utilitas.
  5. Quibus rebus, ac subsidiis possit comparari.
- 

### §. I.

#### *De Natura & Fine Rhetoricæ.*

Rhetorica est ars, seu disciplina bene dicendi; hoc est, ornata, graviter & copiose loquendi.

Rhetori-  
ca quid  
fit?

*Ita Quintilianus Lib: 2.*

Dicitur ars, quia certis quibusdam & nunquam fallentibus præceptis continetur.

Quare  
vocabur  
ars?

Dicitur ars bene dicendi, quia docet, quomodo optimis sententiis, verbisque lectissimis dici possit.

Notatio naturæ & animadversio peperit artem. Cum enim aliqui nativa quadam facultate sine ullo artis subsidio, bene dixissent, alii contra insulſe omnino & male; extiterunt aliqui, qui discrimen illud observant.

Unde  
ars haec  
orta?

2 ELEMENTA RHETORICÆ

rent attentius, atque ita rem sensim ad artem ac præcepta revocarent: unde liquet, non esse eloquentiam natam ex artificio, sed potius artificium ex eloquentia profectum.

Quis finis Rhetoricae?

Finis artis Oratoriæ est, dicere apposite ad persuadendum: quod fit, docendo, delectando, & movendo. Docere necessitatis est, delectare suavitatis, movere vero, seu flectere, victoriæ. Docet Orator, Argumentis & argumentatione: delectat ornato, illustri & apto dicendi genere: movet & flectit amplificatione & affectibus.

§. II.

De Materia Rhetoricae.

Quæ Materia Rhetorica?

Nihil omnino est in rerum natura, de quo ordinate, eleganter, & copiose disserere non possit Orator. Ut enim observat Quintilianus: *Bene dicendi ars, non habet definitam aliquam regionem, cuius terminis septentetur.* Unde ut dicit Aristoteles: Rhetoricae materia est, quælibet quæstio ad dicendum proposita.

Quotuplex Quæstio?  
Quæstio? Quid infinita?

Quæstio, quæ Oratori ad dicendum proponi potest, duplex est: Alia infinita, seu universalis: alia finita, seu singularis. Quæstio infinita, quæ vocatur etiam *Thesis*, est ea, quæ nullis alligatur temporis, loci & personæ circumstantiis, ut si quæreretur generaliter: *Sitne bellum gerendum, vel pax facienda?*

Quid finita?

Quæstio finita, quæ etiam vocatur *Hypothesis*, est ea, quæ universalem quæstionem restringit ad certas quasdam personæ, tem-

po-

poris, loci, reique circumstantias; ut si quæ-  
ratur: sitne hoc anno nobis pax facienda,  
iis, quæ ab hostibꝫ proponuntur, conditi-  
onibus.

Genera quæstionum, in quibus versari po- *Quos*  
test. Orator, tria sunt: Genus judiciale, ge- *sunt*  
nus deliberativum, & genus demonstrativum. *quæsti-*  
*onum*  
In judiciali spectatur accusatio & defensio. *gene-*  
In deliberativo: iusatio & dissusatio. In exor- *raz*  
nativo laus & vituperium.

### §. III.

#### De partibus Rhetoricæ.

Rhetoricæ primariæ partes sunt quatuor: In- *Quæ &*  
ventio, Dispositio, Elocutio & Pronuncia- *quat*  
tio. Quemadmodum sunt quatuor præcipuae *primariæ par-*  
Oratoris partes: *1mo* Argumenta invenire. *tes Rhei-*  
*2do* Inventa disponere. *3to* Disposita verbis *toricæ?*  
exornare. *4to* Exornata pronuntiare.

Est excogitatio rerum verarum, aut veri *Quid in-*  
similium, quæ valeant, tum ad faciendam fi- *ventio?*  
dem, tum ad motus excitandos.

Est rerum inventarum in ordinem distri- *Quid di-*  
butione. *dispositio?*

Est idoneorum verborum & sententiarum *Quid el-*  
ad res inventas accommodatio. *ocutio?*

Est ea vocis ac corporis moderatio, quam *Quid*  
res inventæ ac verba requirunt. *pronun-*  
*catio?*

### §. III.

#### De dignitate & utilitate Rhetoricæ.

Nihil de Rheticæ dignitate, vi ac utili- *Quæ*  
tate addi potest, ad hæc illustria Cice- *Rheticæ di-*  
ronis verba de Oratore: *Quid est, inquit, aut* *gnitas,*  
*tam*

4 ELEMENTA RHETORICÆ

tam admirabile, quam ex infinita multitudine, existere unum, qui id, quod omnibus naturâ sit datum, vel solus, vel cum paucis facere possit? aut tam jucundum cognitu atque auditu, quam sapientibus sententiis, gravibus verbis, ornata oratio, & perpolita? aut tam potens, tamque magnificentum, quam populi motus, judicum religiones, Senatus gravitatem, unius oratione converti?

Quid majus, quid splendidius dicere posset eloquentia, si pro se ipsa loqueretur?

§. V.

*De subsidiis Rhetoricae.*

Quæ  
Rhetori-  
cæ sub-  
sidia?

Quid  
confert  
natura?

Quid  
ars?

Quid ex-  
ercitatio?

Imitatio efficit, ut optimo cuique Authori similes in scribendo, aut dicendo evadamus.

Omnes, de quibus supra, (§. 4.) Rhetoricae partes quatuor potissimum subsidiis comparari possunt, scilicet: Naturâ, arte, exercitatione, & imitatione.

Natura ex parte animi confert celeres motus, ad excogitandum acutos, ad ornandum uberes, ad memoriam firmos ac diuturnos; ex parte vero corporis, confert canoram vocem, solutam linguam, aptamque oris, & totius corporis conformatiōnēm.

Ars excolit, quæ dedit natura, supplet, quæ illi desunt, quæ vero redundant, luxuriantque, castigat atque coercet.

Exercitatio, sive assiduus usus scribendi, vel dicendi conservat, & auget, quæ ars ex-polivit, aut emendavit in natura; multi enim naturæ vitium exercitatione sustulere, ut olim Demosthenes, aliquæ sexcenti.

mus. Et quoniam imitatio, si recte fiat, multum adfert ad eloquentiam, pauci autem sunt, qui imitari sciant, ut par est, ideo de imitandi ratione fusiis tractandum esse existimavimus.

*imo.* Deligatur imitandus summus aliquis & excellens Author, in quem tota mente intuearis. Is autem erit in Poetis Virgilius, qui cæteros omnes Poetas longe post se reliquit: & ut ipse loquitur de Musæo: *Toto vertice supra est.* In Oratoria vero arte deligatur unus Cicero, de quo quam tritum ac pervulgatum, tam verum est illud Quintiliani dictum: *Ille sciat se proficisse, cui Cicero valde placere cæperit;* et in quem bellissime cadit illa Senecæ de illo vox: *Ingenium, quod solum Populus Romanus par Imperio suo habuit.*

*ndo.* Non optimos solum Auctores imitaris, verum etiam, quæ in illis optima sunt, ac præstantissima; unde præ oculis habeas oportet loca illa eximia, in quibus se plurimum amavit Cicero, & in quibus se ipsum videtur quodammodo vicisse, cujusmodi sunt illius pleræque Perorationes: illas inter scribendum lectitabis identidem, ut illarum assidua lectio Tulliani Styli germanum tibi saporem & gustum aspergat.

Ut autem in promptu habeas selectissima illa, quæ subinde imitari possis Ciceronis loca, en eorum indicem:

Præ cæteris insignes sunt Ciceronis Perorationes: Pro Milone, pro Fontejo, pro Ligarior, pro Flacco, pro Quintio, pro Murena; in quibus *omnia eloquentiæ vela* pandit

Ora-

Quæ re-  
cta imi-  
tandi  
ratio &  
via?

Orator, & Auditorum animos penitus videntur incendere: præsertim cum est excitanda commiseratio, ut cum ait pro Fontejo: *Tendit ad vos Virgo Vestalis manus supplices easdem, quas pro vobis Diis immortalibus tendere consuevit . . . .*

Milonianæ Orationis Exordium & Narratio summo in pretio sunt apud omnes peritos rerum æstimatorum. Laudantur etiam summopere 1mæ & 2dæ Catilinariæ exordia: item nobilissimum illud Exordium 2da Philippica. Vide nominatim in hac oratione duos illos vehementissimos locos, ubi Antonio objicit Lupercalia. *Ad Lupercalia veniamus, & impudicæ vitæ fordes exprobrat: Visne igitur te inspiciamus à puerō . . . . Sumpſistine Virilem togam, quam statim muliebrem reddidisti . . . .*

Vide eximum locum, Oratione 2da in Catilinam, in quo Cicero maximum exercitū Catilinarii contemptum inspirare conatur Senatui, populoque metum omnem ejus copiarum eximere. Incipit autem ab his verbis: *. . . . quos pexo capillo nitidos, aut imberbes, aut bene barbatos videtis, manicatos, & talaribus tunicis . . . . hic videre est, quam Orator bene docuerit, qualis sit miles Catilinæ, quam verbis delectis, descriptionibus, jocis, ironiis oblectarit, quam ad contemnendam manum viresque Catilinarias figuris, ac comparatione cum exercitu Romano, animos commoverit.*

Orationi pro Ligario tanta vis ineſt, ut Cæſar, tametsi certum illi ac deliberatum eſſet Ligario non ignoscere, victus tamen de-

denique fuerit, chartaque illi è manibus e-lapsæ ad hæc Ciceronis verba: *Tu, qui o-blivisci nihil soles, nisi injurias....*

His addito in oratione pro Archia hum-aniorum literarum utilitatem & fructum. In oratione pro L. Manilia, virtutes Imperatorias. In Oratione in Verrem, hypotyposim illam, quā mollem libidinosamque impuri Verris vitam describit: *Ita vivebat bonus ille Imperator, hibernis mensibus, ut cum non facile, non modo extra teñum, sed ne extra teñum quidem, quisquam videret....*

Denique Oratio tota pro Marco Marcello, exquisitissimo quedam artificio est elaborata, nihil vero exquisitius, quam laudes illæ, quibus Cæsar is clementiam commendat. *Domi-nisti gentes....* Et cetera plurima, quæ passim in hac Rhetorica sparsa invenies.

*3tio.* Illustria hæc, quæ modo indicata sunt loca, tibi quasi jure tuo poteris vindicare, si *primo*, vim ac pondus sententiæ re-tineas, verba vero, vel omnia, vel majori saltem ex parte immutes. *2do* Si eadem fe-re servando verba, transferas illa, ad alium vel similem, vel contrarium sensum; v.g. di-xit Tullius in Antonium. *O audaciam imma-nem! Tu ingredi illam domum ausus es? tu illud sanctissimum limen intrare?....*

Poteris verba hæc paululum immutata in Judam, hortum ad Christum prodendum sub-euntem, oportune transferre. *3tio* Recte imi-taberis, si figuræ, si periodos, si transitiones, & totum Orationis ductum ac filum potius imiteris quam verba ipsa vel sententias.

*4to.* Laudem habebit imitatio, si proposi-tum

8 ELEMENTA RHETORICÆ  
tum exemplar vel in pauca contrahas, vel  
amplificando fusijs uberiusque dilates.

5to. Laudem denique maximam habitu-  
ra est imitatio; si quos imitaris, eos non di-  
cam adæquare, sed vincere etiam omni ope-  
coneris. Ut ait Quintilianus Libr: 10. Co-  
nandum est aliquid supra eos, quos imi-  
taris.



ARTIS

ARTIS  
RHETORICÆ  
*LIBER PRIMUS.*

*De Inventione.*

**I**nventio est excogitatio rerum verarum, aut *Quid in-*  
*veri similiūm, quæ valeant, tum ad fidem ventio?*  
 faciendam, tum ad motus excitandos.

Res sive rationes quæ ad aliquid proban- *Unde*  
 dum & faciendam fidem valeant, sumuntur *sumun-*  
 ex quibusdam fontibus sive locis Oratoriis, *tur res*  
 quos Tullius appellat. *Argumentoru se- ones?*  
*des, in quibus latent, & ex quibus sunt de-*  
*promenda.*

— Antequam de locis Oratoriis, omnium ra- *Quinam*  
 tionum & argumentorum fontibus differam, *sunt illi*  
 dico primum & copiosissimum omnium fon- *fontes?*  
 tem esse ipsorum Adolescentum ingenia, qui  
 si dextrè à Magistro ducantur, rationes cu-  
 jusvis argumenti, citius sua ipsi in mente,  
 quam in quibusvis aliis fontibus reperient.  
 Hunc igitur fontem ut Eloquentiæ Magister  
 excolat, binas, ternas, aut plures etiam pro-  
 positiones faciliores imprimis, tum selectio-

res discipulis suis proponat: easque, ut suis ipsi rationibus probent, jubeat: tum ulterius interrogando, aliquas ipse insinuet, discipulosque in excogitandis rationibus comitetur, & fulciat. Sit propositio.

*Instituenda ne est peregrinatio ad exter ras nationes?*

Qui è juvenib⁹ affimarit: *instituendam esse*, jubeatur probare; *credibile est diffu rum*: Quia multa disce posſunt apud exter os, quia multa videntur in exteris regionib⁹, quæ non videntur domi.

*Alius forte dicet.* Curiosam, jucundam que rem esse, videre Urbes, Templ⁹, Palatia, diversos homines &c. *Quod si discipulus ha sitet, interrogetur:* An viros eximios noverit, aut audierit, qui ex Exteris rediēre? *hinc formare doceatur rationem, sive argumen tum.* Quia multi eximii homines reversi ab exteris ornant Patriam. *Interrogetur iterum:* Eodem modo Regna omnia & Republicæ reguntur? *Respondebit forte: sanè non eodem.* *Hinc alia conficietur ratio:* Qui nempe per grinantur, diversas Regnorum & Rerum publicarum formas ac species, propriis spe ciant oculis, diversa gubernationum dispiciunt, perdiscuntque genera. *Interrogetur ul terius:* Potestne aliquid apud exter os ob servari, quod sit utile suæ Patriæ? *Item:* Sunt ne apud exter os Viri Sapientes, Doctissimi que? Suntne milites, Duces, & Imperatores bello clari? Suntne admirandi rerum diver sarum Artifices? Suntne Tribunalia, consilia, comitia &c. *Ulterius:* Audistin' ex historia Viros summos peregre sapientiam quæsiſſe?

Pla-

Platonem, Pithagoram, Ciceronem, Hieronymum, Augustinum &c. &c. Ultimis his temporibus de Petro Magno Rossiæ Nostræ Imperatore? Hoc sane modo ad solidas rei cuiusvis rationes inveniendas expeditius forte, quam alio quovis Tyrone Eloquentiae candidati pervenient. Cui quidem rei, id etiam maximopere opitulabitur, si Magister pro occupatione domestica, principio præser-tim, assignet Tyronibus, ut simplices duntaxat rationes unius, duarum, triumque Propositionum afferant, atque illo Elocutionis studio, sed aperte, & distincte, cum particulis: quia, quia.

*Sit pro norma Exemplum-  
E salute Principis, salus & integritas  
Reipublicæ pendet.*

Praelibentur Tyronibus rationes, quas de-scriptas apportent.

*Rationes propositionis,*

*Quia Princeps capit is, Respublica corpo-  
ris instar est, tota itaque istius salus, capi-  
tis stat salute. Quia Princeps pacis & tran-  
quillitatis publicæ conservandæ, justitiæ re-  
ctè administrandæ, tuendis augendisque ci-  
vium opibus, concordiæ inter cives fove-  
ndæ, tollendis dissidiis, periculis, à quovis vi-  
cino Principe Patriæ imminentibus conti-  
nuò avertendis studet, totusque incumbit.  
Quia dignos & idoneos Magistratibus admo-  
vet, bonos præmiis excitat, malos poenis  
& terrore coercet, literatos foyet, pacis ar-  
tes protegit, & amplificat. &c.&c. Princeps  
itaque integræ, hæc omnia nobis integra:*

*Prin-*

Principis boni occasu, hæc omnia occidere  
neceſſe est. *Quia* Principes, si immortales  
habere non poſſunt, ſaltem diutiflme eos  
regnare populi omnes, Regna, & Republi-  
cæ divinitus optant. *Quia* nulla major ja-  
ctura Regnis & Imperiis accidere poſteſt,  
morte & occafu bonorum Principum: &c.&c.

Hæftenas de modo juvandi Adolescen-  
tum ingenia, in inveniendis è naturali uberri-  
moque fonte, intellectu nimirum eorum, ad  
quamvis datam propositionem rationibus.  
Plura exempla ſimilia qui dederat; adeat  
Artem Rhetoricam R. P. Francisci LE JAY So-  
cietatis JESU Libro 4to de Inventione in va-  
riis locis Oratoriis, ſtudioſe & arte elabo-  
rata. Nos ad explicationem Locorum Ora-  
toriorum, unde erui, aut ad quos reduci fo-  
lent rationes, revertimur.

*Quot* ~~+/-~~ *sunt gene-*  
*ra Loco-*  
*rum?* Locorum genera duo ſunt, alii enim pe-  
tuntur ab ipſa re, de qua Quæſtio eſt, & id-  
circo vocantur *intrinſeci* ſeu *inſiti*; alii ex-  
trinſeci? Quid in tra rem, unde etiam vocantur *extrinſeci* ſeu


*remoti*. Sit propositio: *Cupiditates opum,*  
*voluptatum, potentiaeque nimias coercere o-*  
*portet.*

*Quid* ~~extrinſe-~~  
*ci?* *Quia* (ut inquit Cicero) Non modo ſin-  
gulos homines, ſed & universas Familias e-  
vertunt, totam etiam labefactant Republi-  
cam: Ex cupiditatibus, odia, diſfidia, diſcor-  
diæ, ſeditiones, bella naſcuntur. *Hæ ratio-*  
*nes intrinſece & a rebus intimis cupiditati*  
*petitæ ſunt.* Jam ſi dicas: *Magnificè japien-*  
*terque ad rem noſtram Tullius:* Regium eſt,  
inquit, ita vivere, ut non modo homini, ſed  
ne

ne cupiditati quidem servias. *Hæc sententia Tullii extrinsecus petita est; nec enim sententia Tullii, nec Tullius ipse in cupiditate est.*

Loci Oratorii intrinseci sunt sexdecim; scilicet: Definitio, Enumeratio partium, Notatio, Conjugata, Genus, Species, Similitudo, Dissimilitudo, ~~Comparatio~~, Repugnantia, Adjuncta, Antecedentia, Consequentia, Causæ, Effecta, Comparatio.

Hos locos, Eloquentiae Candidatus, in promptu semper, & ut ita loquar, ad maximum habeat, ac ubi res quæpiam ad dicendum proponetur, inspiciat diligenter, & cum judicio felicitat; neque enim semper, nec in omnibus causis, nec ex iisdem locis, eadē argumentorum momenta sunt. *Aristoteles Libr: 2. Cap: 24. & Quintilianus Libr: 5. Cap: 10.*



## CAPUT I.

### DE LOCIS INTRINSECIIS.

§. I.  
*Definitio. operacione*

**D**efinitio est oratio rei nāaturam, vel nominis vim explicans. *Quid Definitionis?*

— Per definitionem igitur res omnes, Personæ, animalia, arbores, virtutes, vitia, artes: item nominum & vocabulorum vis nobis innotescunt. Sic legendo authores incides forte in vocabulum: *Andabata;* nescis, quid no-



nomen illud significet? Definitio: sunt gladiatores, qui clavis oculis digladiabantur. Nescis porro, quid sint gladiatores? Definitio: servi erant, quos Lanistæ artem armorum edocebant, ut postea populi obiectandi causa, in arena pugnarent. Nescis denique, quid sint Lanistæ? Definitio: Magistri armorum, ita à laniando, vel laniana dicti, qui præerant ludis gladiatoriis. Si nili modo per definitiones in aliarum omnium rerum cognitionem venimus.

*Quotuplex definitio?* Definitio duplex est; una propria, sive Logica, altera Oratoria, quæ potius descriptio vocanda est.

*Quid definitio propria?* Definitio propria, sive Logica est, quæ constat genere & differentia. v.g. *Homo est Animal rationale*.

*Genera sunt:* Animal, virtus, vitium, ars, scientia &c. *Differentia* est id, quo inter se species differunt. Ut Leo ab Equo, Aquila ab alauda, temperantia à liberalitate, superbia ab acedia, Poesis à Grammatica.

*Quomodo fit propria definitio?* Propria sive Logica definitio fit, sumendo aliquid rei, quæ definitur, commune cum aliis, deinde addendo aliquid illi unice proprium ac peculiare. Sic Rhetorica definitur:

*Ars bene dicendi.* Quod sit ars, hoc illi commune est cum aliis artibus: cum Grammatica, cum Pœsi & cæteris; quod sit *ars bene dicendi*, hoc unice sibi proprium ac peculiare habet.

*Quid definitio Oratoria seu* Definitio, sive descriptio Oratoria, rem quamquam non tam per genus & differentiam, sicut Logica, sed modis (de quibus mox) sibi propriis ita describit, ut & rei naturam

explicet, & ampliorem ornatui ac amplificationi campum aperiat.

\* Definitio vel descriptio Oratoria sex potissimum modis fieri solet.

~~imo~~. Fit per congeriem multorum nominum, ex quibus in rei cognitionem facilius devenimus. Sic Cicero Lib: 5. Quæstionum Tusculanarum, definit, quid sit Philosophia:

O vitæ Philosophia dux, indagatrix virtutum, vitiorum expultrix, Mater omnium artium; quid est aliud, ut ait Plato, nisi Deorum inventum?

Similiter Libr: 2. de Orat: quid sit Historia:

*Historia est testis temporum, lux veritatis, vita memoriae, Magistra vitæ, nuntia vetustatis.*

Similem definitionem Curiæ Romanae, vide in Oratione pro Milone. Nro 90. Calamitatis in Oratione pro Plancio, Nro 70.

Ipse similiter poteris definire, quid sit Patria:

Quid enim est illa Patria? Locusne duntaxat, in quo primum àrem hausimus, primam lucem aspeximus? at jam & hoc ipso, sacri primique hospitii nomine, quam nobis debet esse jucunda? Verum enimvero illa nostri parens, illa altrix, educatrix, conservatrixque est. Illa vetustissima Majorum nostrorum tot a saeculis sedes, illa certum posteriorum quandoque nostrorum domicilium. Fons illa est paterni, materni, avitique sanguinis, decorum, opum & dignitatis nostræ: non aliam communem Matrem tutricemque, quam hanc propitii nobis dederunt Superi. Ejus in si-

nu vivimus; ornamenta illius nos ornant,  
fertilitas nos ejus nutrit, opibus illius dite-  
scimus, ejus cohonestamur gloria, illius exal-  
tamur trophæis. Quidquid demum Patriæ est,  
nostrum est: imo nos, nos ipsi Patria su-  
mus &c. &c.

\* 2do Fit per congeriem causarum: sic Seneca Epistola 76. ostendit in homine bonum omnium maximum, esse rationem.

Omnia bono suo constant: Vitem fertilitas commendat: sapor vinum, velocitas cervum. In cane sagacitas prima est, si investigare debet feras, cursus, si consequi, audacia, si mordere; id in unoquoque optimum est, cui nascitur. In homine optimum quid est? Ratio: hac antecedit animalia, DEOS sequitur. Ratio ergo perfecta proprium hominis bonum est, cætera illi cum animalibus communia; valet viribus? & Leones. Formosus est? & Pavones. Velox est? & Equi. Non quære, quid in se maximum habeat; sed quid suum: corpus habet? & arbores. Habet impetum & motum? & bestiæ, & vermes. Habet vocem? Sed quanto acutior em aquilæ, gravorem tauri, dulcior em lusciniae. Quid in homine proprium? Ratio: hæc recta & consummata, felicitatem hominis implevit.

Similem definitionem hominis à causa formalis invenies in Cicerone Lib: I. de Legib: Nro 54.

*gib: Nro 54.*  
*3tio. Fit per congeriem effectuum. Ita*  
*Cicero virum bonum definit ab effectis pro*  
*Cæcina, Nro 78. Vereor de tali Kiro, ne*  
*plus citam, quam vos aut sentiatis, aut apud*  
*vos commemorari velitis. Quapropter hoc*  
*di-*

*dicam: nunquam ejus autoritatem nimium valere, cuius prudentiam Populus Romanus in cavendo, non in decipiendo perspexerit: qui juris civilis rationem, nunquam ab æquitate sejunxerit.* &c. Vide ulterius citatum locum.

— Similem belli crudelis ab effectis definitionem, vide 14. Philip: Nro 8. Bellum &c. Bene ab effectis definies peccatum, si dixeris: *Peccatum est pestis animæ, conscientiae labes, vitæ pernicies, naturæ dedecus, Orbis ruina, odium DEI.*

4to. Fit per congeriem similitudinum. Ut si dicas cum Petrarcha. *Pulchritudinem esse blandum hostem, dulcem raptorem, tortorem fraudulentum, laqueum pedibus, oculis velum &c.*

+ Eodem modo à definitione adhortari poteris adolescentem ætati suæ nimium & valetudini fidentem: *Adolescens! ætati nimium & valetudini ne crede. Flos est, cito marcescit, umbra est, momento vanescit, lætum ver & amœnum, sed minime diuturnum, ros matutinus, quem sol oriens exsiccat, pulvis, quem levis aura dissipat.* Observa id genus definitionibus caute admodum utendum esse, & cum mica salis, ut ait Catullus.

— 5to Fit per Adjuncta. Ita Chymicam artem, non minus verè, quam lepidè definies: *Chimia est ars, cuius principium est mentiri, medium laborare, finis mendicare.*

6to Fit definitio per negationem & affirmationem, cum nempe Orator dicit prius, quid non sit res, ut deinde melius intelligatur, quid sit: Ita Cicero in Pisonem Nro

23. & 24. probat Pisonem non fuisse Consulem, definiendo consulatum, quem negat esse positum in lictoribus, in toga, sed in consilio, cæterisque virtutibus. *Tu etiam mentionem facies Consulatus tui, aut te fuisse Romæ Consulem dicere audebis? Quid tu? in lictoribus, in toga, in prætexta esse consulatum putas? .... Animo Consulem esse oportet, consilio, fide, gravitate, vigilantia, cura, toto denique munere Consulatus.*

Omnium elegantissima ratio tractandæ definitionis hæc est, quam postremo hoc loco attulimus, cujus plura exempla invenies: In Oratione Ciceronis pro domo sua. Nro 85. ubi Orator definit primo, quid non sit, deinde quid sit Populus Romanus. Item Philip: 3. Nro 12. item Oratione pro Sextio Nro 67.

Ipse ad formam horum exemplorum definire poteris, verum Christianum, verum Amicum, verum Oratorem. &c. &c.

## §. II

### *Enumeratio partium.*

*Quid Enumeratio partium?*

**E**numeratio partium, est oratio, qua totum in suas partes distribuitur. Ita *Civitas* in fora, plateas, Templa, Palatia, Ædes, fontes, pontes &c. Ita *corpus humanum* in sua: *arbor* in sua membra distribuitur.

Porro sicut multiplex est totum, ita multipliciter etiam argumentum ab enumeratione partium ducitur. Et quidem:

*Modus tractans*

imo Dicitur argumentum ab Enumeratione partium, dum totum quodpiam in quas-

quascunque indiscriminatim partes, ex quibus constat, distribuitur. Talis est in Plinii Panegyrico illustris illa Trajani in urbem ingressus ab enumeratione partium descriptio:

Ergo non ætas quemquam, non valetudo, non sexus retardavit, quominus oculos insolito spectaculo impleret. Te parvuli noscere, ostentare juvenes, mirari senes, ægri quoque, neglegendo medentium imperio ad conspectum tui, quasi ad salutem, sanitatemque prorepere. Alii se satis vixisse Te viso, Te reperto, alii magis vivendum esse sibi praedicabant. Videres reserta tecta, & laborantia, oppletas undique vias, alacrem hinc inde populum &c.

~~2do.~~ Cum totum distribuitur in partes suas *essentiales*, ut vocant Philosophi, ex quibus constat. Ut homo in corpus & Animam; Anima in memoriam, intellectum, & voluntatem.

~~3to.~~ Cum totum distribuitur in eas partes, quas iidem Philosophi *integrantes* vocant, ut corpus, in caput, pedes, brachia. Sic Cicero Oratione in Pisonem, Nro 1. Singulas capitum illius partes enumerat & excutit. Non enim nos color iste servilis, non pilosæ genæ, non dentes putridi deceperunt; Oculi, supercilia, frons, vultus denique totus, qui sermo quidam tacitus mentis est, hic in errorem homines impulit.

~~4to~~ Cum genus dividitur in suas species. Ut virtus in prudentiam, justitiam, fortitudinem, & temperantiam. Habes exemplum hujusmodi enumerationis Oratione pro Flaccio, Nro 80. Etenim, judices, cum omnibus virtutibus me affectum esse cupiam, tamen

di hujus loci?

nihil est, quod malum, quam me & gratum esse & videri; haec est enim virtus non solum maxima, sed etiam Mater omnium virtutum reliquarum. Quid est pietas? nisi voluntas grata in Parentes. Qui sunt boni Civis? Qui belli, qui domi de Patria bene merentes? nisi qui patria beneficia meminerunt. Qui sancti, qui religionem colentes? Nisi qui debitam Diis immortalibus gratiam, jostis honoribus & memori mente persolvunt. Quæ potest esse jucunditas vitæ sublatis amicitiis? quæ porro amicitia potest esse inter ingratos?

4to. Fit enumeratio per causas. Ita Cicero de Officiis libro 2do varias causas adducit, ob quas homines hominibus obstringuntur: Homines hominibus obstringuntur, aut benevolentiae gratia, cum aliqua de causa quenpiam diligunt, aut honoris ergo, si cuius virtutem suspiciunt, aut si cum rebus suis bene consulere arbitrantur, aut cuius opes metuunt, aut à quibus aliquid expellant, aut postremo pretio & mercede ducuntur, quæ sordidissima & inquinatissima est quidem ratio &c.

5to Fit enumeratio per effecta. Ita idem Cicero Oratione 2. in Catilin: Nro 7. per congeriem effectuum scelera Catilinæ enumerat: Quid enim malum, aut sceleris fingi, aut excoxitari potest, quod ille non conceperit? Quis tota Italia veneficus? quis latro? quis scismaticus? quis parricida? quis testamentorum subiector? quis corruptor juventutis? quis corruptus? quis perditus? qui se cum Catilina non familiarissime vixisse, fateatur?

Qnæ  
funt Re-  
gulæ &  
leges Inu-  
meratio-  
nis Par-  
tium?

1ma Regula hæc est: Affirmatis omnibus aut primariis partibus, affirmatur totum. Ita Tullius probat Pompejum esse Summum Imperatorem; primarias optimi Imperatoris virtutes enumerando Ego enim existimo in Summo Imperatore quatuor has res inesse oportere; Scientiam rei militaris, virtutem, auctoritatem, felicitatem. Pergit deinde, & quatuor hæc in Pompejo summa esse probat. Quis igitur hoc homine scientior unquam aut fuit aut esse debuit, qui è ludo atque pueritiae disciplina, bello maximo, atque acerrimis hostibus ad patris exercitum, atque in militia disciplinam profectus est. Deinde de ejus justitia: Cuius legiones sic in Asiam pervenerunt, ut non modo manus tanti exercitus, sed ne vestigium quidem cuiquam pacato nocuisse dicatur. Tum de ejus temperantia. Illum non avaritia ab instituto cursu ad prædam aliquam revocavit, non libido ad voluptatem, non amaritas ad delectationem, non nobilitas urbis ad cognitionem, non denique labor ipse ad quietem. &c.

2da Regula hæc est: Negatis omnibus, aut præcipuis partibus, negatur totum. Sic probat Tullius Antonium non esse Consulem: Negat hoc Brutus Imperator, negat Gallia, negat tota Italia, negat Senatus, negatis vos. Qui igitur illum Consulem nisi latrones putent?

Ut ad similia enumerationum exempla, affuescant Tyrones, attendendum illis imprimis est ad diversa, virtutum, munera, personarum, Magistratum officia. Ut Principis, Senatoris, Præfulis, Dicis, Patris, Do-

mi-

mini, filii, servi, militis, coloni, Mercatoris &c. quæ eorum muneris sunt. Sic v. g. Si vel Judici diligentiam in suo munere iudeas, vel eundem laudes, hæ partes & officia muneris ejus menti occurrent: Judicis officia sunt: Pauperibus ac dicitibus, potentibus perinde ac imbellibus, civibus & externis, amicis & hostibus, æque administrare justitiam. à muneribus quibusvis, majorem in modum abhorrere, gratiæ, nobilitati, potentiae nihil tribuere, præstigi juramenti religionem continuo præ oculis habere; conscientiam cum scientia juris conjungere; meminisse, DEI & Principis munus in judiciorum administratione contineri; dignitatem, honores, capita, fortunas Civium, tranquillitatem publicam & privatam omnium, è recta iustitiae administratione pendere, &c. &c.

## §. III.

*Notatio Nominis & Conjugata.*

**A**d unum idemque caput duos hosce locos propter affinitatem revocamus; quamvis vero uterque non multum valet ad persuadendum, quia tamen non parum valere videtur ad delectandum & ad orationem lepore aliquo & sale condiendam, idcirco ab Oratoribus interdum summis adhibetur.

*Quid Notario nominis?* Notatio nominis est locus, qui verborum originem, vim & significationem inquirit, ut Consul à consulendo, Imperator ab imperando, Senatus a senibus dicitur.

Ita Cicero notatione nominis ludit in festa Verrea, quæ Verres in Sicilia suo nomine

ne institui curaverat: O præclara Verrea! quo enim non accessisti, quo non attuleris tecum istum diem? Etenim quam tu domum, quam urbem adiisti, quod fanum denique, quod non eversum à te, atque extersum reliqueris? quare appellantur sane ista Verrea, quæ non ex nomine, sed ex moribus, naturaque tua constituta esse videantur. 4. Verrina Nro. 52.

Sic etiam pro Roscio Amerino Nro 124. Chrysogonum in avaritiæ suspicionem vocavit Cicero, ludens in ipsius nomine, quod aureum, aut quasi auro genitum significat. *Venio nunc, inquit, ad aliud nomen aureum Chrysogoni &c.*

Notatione nominis utitur Orator, quando in nomine aliquo, laudem, vel dedecus, aut jocum aliquem non scurrilem, ac mimicum, sed liberalem & urbanum invenit. Sic probare posses à notatione nominis *Magistratum oportere esse sapientem*, Nam & ipsum nomen Magistratus à Magistro, seu docente derivatur. Similiter: *Senatores non sint juvenes*. Senatus enim ipse nomen à *Senibus* duxit. Similiter legem, à *legendo* dictam volumus, ut vel ex ipso constet nomine, ideo esse leges, ut ab omnibus legantur, ediscantur, sciantur. *Modestia a modo* provenit, ut igitur modestus sis, modum decentem servare in omnibus debes.

Conjugata sunt, quæ ab uno orta vocabulo, varie commutantur. Ut sapiens, *sapiencia, sapientia, sapienter*; Imperium, *Imperator, imperare*.

Ex hoc conjugatorum loco ingeniose ad,

*Modus  
traetan-  
di hujus  
loci.*

ma.

24 ARTIS RHETORICÆ LIB: I  
modum Cæsarem laudat: Cicero: Oratione  
pro Marcello.

Cæteros quidem omnes victores, jam ante aequitate & misericordia viceras; hodie vero die te ipsum viciisti . . . . Rede igitur unus invictus es, à quo etiam ipsius victoriæ conditio, visque devicta est.

Item Philip: 11. Nro 36. Animadverti,  
dici jam à quibusdam, exornari nimium a  
me Brutum, nimium Cassium ornari . . . Quos  
ego orno? nempe eos, qui ipsi sunt ornamen  
ta Reipublicæ.

Item Verrina 1. Nro 26. Ut mihi non unus  
homo improbus opprimendus sit, id quod  
Siculi petiverunt, sed omnis improbitas, id  
quod Populus Romanus jam diu flagitat,  
extinguenda atque delenda sit.

Item illud Terentii: *Homo sum, humani  
nihil à me alienum puto.* Modus tractandi  
hujus loci, ex ipsius definitione & adductis  
exemplis satis liquet.

#### §. IV.

##### *De Genere & Specie.*

*Quid genus?* **G**enus apud Oratores dicitur illud, quod  
est commune multis, & multa sub se  
complectitur. Ut virtus sub se continet: ju  
stitiam, temperantiam, fortitudinem, pruden  
tiam. Item animal, arbor, avis, tot species  
habent, quot diversa specie animalia, arbo  
res, aves, audiunt.

*Observa.* Tametsi apud Philosophos mul  
tum ponitur discriminis genus inter & spe  
ciem, plerumque tamen apud Oratores, u  
trum-

trumque confunditur ita, ut quidquid habet  
meira infra se, sive specie, sive numero, sive  
quavis alio modo diversa, genus appelleatur;  
sic sub genere: *bonum*, continentur, bona ani-  
mi, bona corporis, bona fortunæ, bona æter-  
na, bona temporalia, bona privata, bona pu-  
blica &c. Sub genere *boni publici* continen-  
tur: Religio, Princeps, Magistratus, pax, ju-  
stitia, concordia Civium, potentia, opes, ar-  
tes, commercia, opificia &c. hæc enim sunt  
Publica cujusque Regni vel Imperii bona.

Eiusmodi genera, quæ & inventioni, &  
solidæ amplificationi inexhaustum fontem a-  
periunt, sunt: *Honestum, utile, justum, ne-  
cessarium, facile, jucundum; & his contraria.*

Sic sub genere honesti, continetur quid-  
quid est: *Laudabile, commendabile, glorio-  
sum, plenum dignitate, conscientiæ conso-  
num, Civile, urbanum, grave, sapiens, pru-  
dens, heroicum &c.* Ut si proponas: *Victis  
salutem dandam esse*, dices id in genere: ho-  
nestum esse; deinde in specie, id esse pul-  
chrum, dignitate plenum, illustre, glriosum;  
quid enim glriosius, quid memoria & laude  
hominum dignius, quam parcere victis, eos-  
demque suæ clementiæ præcones efficere?  
&c. Sub genere justi continetur, quidquid  
est: *Legitimum, pius, religiosum, legibus Di-  
vinis, humanisque statutum, semper servatum,  
bene & recte consultum, naturæ conforme,  
consuetudine firmatum. Gentium sententia &  
opinione probatum.* Sit propositio: *Fædus  
initum servandum esse.* Dices: Fidem fæde-  
ris servare esse æquum, religiosum, Gentium  
sententiâ, opinione & consensu ratum. &c.

Idem

Idem de aliis dicendum, verum à quo-  
cunque ex his rationem sumperis, tota men-  
te connitendum erit, ut si à *juslo* causam  
ducas, quam optimè *rei justitiam* explices;  
si à facili, quām maxime *facilitatem*, si à ne-  
cessario, quām solidissimè *necessitatem* osten-  
das, & prout par est, exaggeres.

*Modus  
tractan-  
di hujus  
loci?*

Hoc argumenti genus, adhiberi frequen-  
tius in exordiis solet, hic enim Orator præ-  
mittit quædam generatim & universe, quæ  
rationem Thesis habent, unde descendit ad  
speciem, sive Hypothesim. Ita Demosthenes  
laudaturus eorum prudentiam ac fortitudi-  
nem, qui pro Patria ceciderant, duo præ-  
mittit virtutis in genere principia: pruden-  
tiam scilicet, & fortitudinem, quarum alte-  
ra, quid sit agendum, præscribit, altera exe-  
quitur.

Habes in Cicerone exemplum argumen-  
ti à genere petiti in Oratione pro Sextio,  
ubi adhortans Judices, ne Clodii potentiam  
metuant, præmittit primo quædam in gene-  
re de Magistratu: *Sudandum est iis, qui Ma-*  
*gistratum gerunt, pro communibus commo-*  
*dis, adeundæ inimicitæ, subeundæ sæpe pro*  
*Republica tempestates, cum multis audacibus,*  
*improbis, nonnunquam etiam potentibus di-*  
*micandum.* Deinde descendit ad speciem, si-  
ve Judices, qui sub genere Magistratus con-  
tinentur: *Quid igitur? Vos ne Regia, imò eti-  
am Divina Autoritate muniti: insolentis*  
*hujus hominis quamvis potentis, vim non*  
*frænatis? altos non compescitis spiritus? Et c.*

Aliud hujus loci pulcherrimum exem-  
plum invenies in Oratione pro Archia Poëta  
Nro

Nro 19. ubi Cicero cum laudandum Archiam suscepisset, quod est hypothesis, rem ad thesim revocat, hoc est: Poesim & Studia humanitatis, generatim & universe laudat. Sit igitur sanctum apud vos humanissimos homines hoc Poetæ nomen &c.

Cavendum hic est Eloquentiae candidato, ne in genere diutius immoretur; puerile enim omnino est, hærere longius in thesi, quam in hypothesis.

Species est res aliqua particularis, quæ sub genere continetur. Sic Cicero ex speciebus libidinis, cupiditatis, avaritiae, infert generatim, per leges omnia flagitia comprimi. Docemur (inquit Lib: I. de Legib:) auctoritate nutuque legum: domitas habere libidines, coercere omnes cupiditates, nostra tueri, ab alienis mentes, oculos, manus abstinere.

Hoc argumenti genere probare poteris, hominem aliquem esse illustrem virtute, scientia, vel optimè muneribus Reipublicæ funatum; vel è contra, hominem flagitiosum: si enumeres species sub genere virtutis, scientiae, & munorum Reipublicæ contentas.

### §. V.

#### Similitudo & Dissimilitudo.

**S**imilitudo est rerum ceteroqui disparium in aliqua ratione collatio & convenientia. v. g. Hydrops & avarus, res inter se longe diversissimæ, in eo convenient, quod neuter satiari possit. Item Consul & Guber-

Quid similitudo?

na-

nator natus, in ratione gubernandi secum convenient. Ut enim hic navium, sic ille Rempublicam regit. Sic etiam umbra & gloria sunt res diversissimæ, in hoc tamen convenient, quod umbra corpus, gloria virtutem comitetur. Unde ait Cicero: *Gloria est umbra virtutis.*

*Modus tractandi hujus loci?* Argumentum à loco hoc, qui magis ornat, quam probat orationem, ducere poteris, querendo, quænam res sit similis cuiusdam naturæ, cum ea, quam explicandam sumis. Sit argumentum: Ingenium ne sterilefcat, excolendum est. Similitudinem duces ab agro, dicesque cum Cicerone 2. Tuscul. *Ut ager, quamvis fertilis, sine cultura fructuosus esse non potest, sic sine doctrina animus.*

Similiter si probare velis: malos, ne noceant aliis, è Republica expellendos esse; sumes similitudinem à membro corporis infecto. Dicesque cum Cicerone Philip: 8. *Ut in corpore, si quid ejusmodi est, quod reliquo corpori noceat, ura ac secari patimur, ut membrorum aliquid potius, quam totum corpus intereat: sic in Reipublicæ corpore, ut totum salvum sit, quidquid est pestiferum, amputetur &c.*

*Quid dissimilitudo?* Dissimilitudo est oratio, quæ ex re dissimili, dissimile aliquid colligit. Ut cum ait Cicero: *Si barbarorum est in diem vivere, nostra consilia sempiternum tempus spectare debent.*

Sit etiam: Sol occidit reditque; vita cum occiderit, redibit nunquam.

Hic

Hic locus tractatur eodem modo ac præcedens, nisi quod Similitudo per affirmationem procedat, Dissimilitudo vero per negationem.

*Modus  
tractan-  
di hujus  
loci*

*Observa.* Conglobatae similitudines, vel dissimilitudines plurimum ornant Orationem, & vehementer moyent. Sic eleganter Cicerro pro Muræna Nro 22. Sulpitium Juris-Consultum Imperatori dissimilem probat, ex dissimili utriusque studio: *Vigilas tu de nocte, ut tuis consularibus respondeas, ille, ut quo intendit, mature cum exercitu perveniat: te gallorum, illum buccinarum cantus exsultata: tu actionem instituis, ille aciem instruit: tu caves, ne tui Consultores, ille ne urbes, aut castra capiantur; ille exercitatus est in propagandis finibus, tu in regendis &c.*

Ad eundem modum, si v. g. bellum civile disvadere velis, dices: Elementa secum ipsi non pugnant, neque se ipsa conficiunt; aqua ignem, non ignis conficit ignem: nulla species rerum animantium se ipsam ad internacionem delere querit; non Leonum, non Ursorum, non Luporum castra castris opponuntur. Sola infelix hominem mutuam sui destructio molitur, sola cohortes, legiones, copias, arma, castra reperit ad inferendum sibi invicem interitum; nec satis est gentes in gentes irruere, etiam in una Gente, Provincia, Civitate, furor insanus sitiensque sanguinis, fraternas in se armat, vertitque manus.

## §. VI.

*Contraria & repugnantia.*

*Quid contraria?*

Contraria sunt ea, quæ in eodem subiecto esse non possunt, vel si fuerint in eodem, necessario inter se pugnant. Ut frigus & calor in eodem loco, sanitas & morbus in eodem corpore.

*Quot contrario-*  
*rum gene-*  
*ra?*

Contrariorum genera quatuor omnino numerantur. Nimirum: Adversa, Relata, Privantia, & Contradicentia.

*Quid ad-*  
*versa?*

Adversa sunt ea, quæ sub eodem genere posita se mutuo ab eodem subiecto expellunt. Ut *virtus & vitium;* *bellum & pax;* *sapientia, & stultitia.* Ab Adversis, sic argumentari poteris cum Cicerone. *Si stultitiam fugimus, sapientiam sequamur, & bonitatem, si malitiam.* Ita etiam Quintilianus: *Malorum causa bellum est? erit emendatio pax.*

*Quid re-*  
*lata?*

Relata sunt, quæ se invicem ita respectant, ut alterum sine altero intelligi non possit. Ut Pater & filius, Dux & miles, Magister & discipulus, qui dat, & qui accipit. Ex hoc genere Cæsarem laudat Cicero in Oratione pro Marcello Nro. 3. *Ex quo profecto intelligi debet. quanta in dato beneficio sit laus, cum in accepto tanta sit gloria.*

*Quid pri-*  
*vantia?*

Privantia sunt ea, quorum alterum est habitus, seu res ipsa habita; alterum privatio ejusdem rei; ejusmodi sunt: Vita & mors, lux & tenebræ, scientia & infætia. Ex hoc loco ita argumentatur Cicero, Catilinaria i. Nro. 20, *Ejus igitur mortis sedet sultores,*

res, cuius vitam si putetis per vos restituī posse, nolitis, & de ejus nece lata quæstio est, qui, si ea de lege reviviscere posset, lata lex nunquam esset.

Contradicentia sunt ea quorum alterum id negat quod alterum affirmat; ut Milo infidiatus est Clodio, Milo non est infidiatus Clodio. Habes hujus loci exemplum in Cicerone pro Milone Nro 2. Nam illa præsidia, quæ pro templis omnibus cernitis, et si contra vim collocata sunt, afferunt tamen Oratori horroris aliquid, ut in foro & in judicio, quanquam præsidiis salutaribus & necessariis septi sumus, tamen ne non timerem quidem. sine aliquo timore possimus.

Quocunque ex dictis nomine veniunt contraria; tribus potissimum modis tractari solent:

imo Cum verba verbis opponuntur: Exempluin habes apud Ciceronem Catil: 2. Nro 25. Ex hac parte pugnat pudor, illinc petulantia: hinc pudicitia, illinc stuprum: hinc fides, illinc fraudatio: hinc honestas, illinc turpitudo: hinc continentia, illinc libido: denique æquitas, temperantia, fortitudo, prudentia, virtutes omnes certant cum iniquitate, cum luxuria, cum ignavia, cum temeritate, cum vitiis omnibus &c.

2do. Cum membra membris opponuntur. Ut Cicero Verrina 5. à Nro 2. ad 7. Nam qui hoc sibi sumpsit, ut corrigat mores aliorum, ac peccata reprehendat, quis huic ignorat, si qua in re ipse ab religione offici declinarit. . . . Furem aliquem ac rapacem accusabis? vitanda tibi semper erit omnisa-

*Quid contra  
tra licen-  
tia?*

*Modus  
trahant-  
dihujus  
loci.*

varitiae suspicio; Maleficum quempiam adduxeris aut crudelē? cavendum erit semper, ne qua in re asperior, qui inhumānior fuisse videare. Corruptorēm, adulterum? Providendum diligenter, ne quod in vita vestigium libidinis appareat. Omnia postremo, quæ vindicaris in altero, tibi ipsi vehementer fugienda sunt. Etenim non modo accusator, sed ne objurgator quidem ferendus est is, qui, quod in altero vitium reprehendit, in eo ipso deprehenditur . . . &c.

Simile-pulcherriūmque exemplum iuvenies Oratione pro Cælio Nro 12. Neque ego unquam fuisse tale monstrum in terris ullum puto (de Catilina loquitur) tam ex contrariis diversisque inter se pugnantibus naturæ studiis, cupiditatibusque conflatum . . .

**31** 3tio. Cum periodis periodi opponuntur. Sic Cicero Oratione pro Manilia Nro 11: Majores Vestri s̄cēpe Mercatoribus & Naviculatoribus injuriōsius trattatis, bella gesserunt; Vos tot Civium Rom: millibus, uno nuncio atque uno tempore necatis, quo tandem anima ēsse debetis? . . . Illi Civium Romanorum libertatem imminutam non tulerunt: vos vitam erēptam negligetis? Ius legationis verbō violatum, illi persecuti sunt: vos legatum Populi Romani omni supplicio interfictum inultum relinquētis? Videte ergo, ne, ut illis pulcherrimum fuit tantam vobis gloriam relinquere; sic vobis turpissimum sit, illud, quod accepistis, tueri ac conservare non posse &c.

## §. VII.

## Adjuncta.

**A**djuncta sunt ea, quæ cum re, de qua a- *Quid ad-*  
*gitur, non necessario, sed probabiliter juncta?*  
 conjuncta sunt. Ut sunt tituli hominum, insi-  
 gnia, armæ, &c. sine quibus homo esse po-  
 test.

Adjunctorum genera, tria vulgo nume- *Quot ad-*  
 rantur: *imo* Adjuncta rei, ut *locus, tempus junctor-*  
 &c. *2do* Adjuncta animi, ut *vitia, virtutes rum ge-*  
*3to* Adjuncta corporis, ut *pulchritudo, de- nera?*  
*formitas, robur, vestis, habitus.* Uno verbo,  
 omnia quæ rem quoctunque modo circumstant,  
 sive præcedunt, sive comitantur, sive con-  
 sequantur, appellantur adjuncta; tritoque  
 illo versiculo comprehenduntur. *Quis, quid,*  
*ubi, quibus auxiliis, cur, quomodo, quando.*

Personam designat, ad quam revocantur: *Quis?*  
 nomen, genus, stemma, conditio, ætas, fama,  
 bona animi, ut virtutes, artes, scientiae, in-  
 genium, indeoles; bona corporis, ut forma,  
 figura, pulchritudo, valetudo, robur; item  
 mala animi & corporis: ut vitia, deformi-  
 tas, &c.

Designat rem, de qua in oratione agitur, *Quid?*  
 estque id ipsum, quod orator narrat, lau-  
 dat, vituperat, gratulatur, gratias refert,  
 accusat, defendit, suadet, vel dissuadet.

Designat locum, qui est: Sacer, profanus, *Ubi?*  
 privatus, publicus, saluber, pestilens, asper,  
 planus, domi aut foris, in urbe aut rure, pe-  
 regre, vel in Patria, in via publica, in platea,  
 in Schola, Palaestra, ergastulo, terra, mari,  
 aere &c., C2 Desi-

*Quibus auxiliis?* Designat auxilia personæ, vel rei; ministros, comites, famulos, amicos, hostes, instrumenta quoque, ut ensem, clypeum, tormenta bellica, hastam, loricam, securim, malleum, calamam &c. quibus homines tanquam adminiculis & instrumentis ad agendum utuntur.

*Cur?* Designat causas, quæ in re, de qua agitur, occurunt, v. g. an amicitia, malignitate, amore, vindicta, odio, commiseratione, voluntate propria, an suasu vel jussu, justis vel iustis rationibus, vi muneric & officii, nec ne? factum aliquid vel faciendum sit.

*Quomodo?* Designat modos, quibus res agitur Ut decenter, indecore, piè, impiè, sobriè, ebriè, deliberatè, casu, palam, secretò, sincerè. astutè, joco, serio, juxta vel extra ordinem.

*Quando?* Designat tempus; ut saeculum, annum, mensem, diem horam, diluculo, mane, meridie, vespere, nocte, æstate, hyeme, verè, autumno, in juventute, virili ætate, senectute, belli, pacis tempore; Consule, Principe hoc vel illo; tempore præterito, præsenti, futuro, longo, brevi; nunquam, semper, saepius, raro, nunc, primum? &c.

*Modus trattandi hujus loci.* Adjuncta citato superius versiculo, & sanguillatim explicato comprehensa, uberrimam cogitationum, rationum, & amplificationum materiam suppeditant; quorum in omnibus Ciceronis Orationibus, præsertim narracionibus, copia ingens in promptu est. Ineptum tamen & puerile omnino esset, velle studio, & ubivis, ab his omnibus rationes eruere; sed ea duntaxat diligenda sunt, quæ ad rem proprius faciunt. Vide quam egregie à solis dun-

duntaxat adjunctis loci, Hannibal Italianam ingressus milites suos ad pugnam adhortetur Livii libro 21.

*Dextra levaque duo maria claudunt. Nullam, ne ad effugium quidem navem habemus. Circa Padus amnis major ac violentior Rhodano, à tergo Alpes urgent, vix integris vobis, ac vigentibus transitæ, hic vobis vincendum, aut moriendum Milites est . . . . Nil usquam nobis relatum est, nisi quod armis vindicaverimus. Illis timidis & ignavis licet esse, qui receptum habent, quos ager suus, quos sua terra per tutam ac pacata itinera fugientes accipient. Volis necesse est fortibus viris esse, & omnibus inter victoriam mortemque certa desperatione abruptis, aut si fortuna dubitabit, in prælio potius, quam in fuga mortem oppetere. Si hoc bene fixum omnibus destinatumque in animo est; iterum dicam vicistis. &c.*

Habes etiam illustre Adjunctorum exemplum in toto exordio Ciceronis pro Milone, ubi ab Adjunctis, Quis? cur? ubi? quibus auxiliis, seu personæ, loci, militum, causisque, ob quas miles locatus sit, initium orationis sumpsit.

Aliud in eadem Oratione Nro 54. *Si haec non gesta audiretis sed picta &c.*

### §. VIII.

#### *'Antecedentia Consequentia.'*

*A*ntecedentia sunt ea. quibus positis, necessitate est alia consequi: ut Ortus est sol, ergo dies est; Natus es homo, ergo procul dubio morieris.

Con-

Quid  
Anti-  
cedentia?

*Quid  
Conse-  
quentia?* Consequentia sunt ea, quæ rem necessario consequuntur. Ut pæna sequitur culpam.

— *Observa.* Hic non intelligi necessitatem omnino physicam, qualis inter causam & effectum intercedit: sed necessitatem etiam probabliter tantum cum re conjunctam. v. g. Flores protulit hæc arbor, ergo & fructus feret.

*Modus  
tractan-  
di hujus  
logi?* — Tyronem ad facilius ex hoc loco eruendas rationes, sequentes quæstiones summopere juvabunt: Quid est, quod rem (de qua tractaturus est) antecessit? quid prius vel olim observatum fuit? qui mos, quæ consuetudo, quæ opinio, sententia, hac de re antea præcessit? quid tale præteritis temporibus fuit? &c. Sic, quidquid ab antiquis moribus, usibus, exemplis, præjudicatis, à majorum laudibus & gloriose factis sumitur, ab antecedentibus probari dicitur.

— Ita Cicero Oratione pro Sextio, Gubernatores Reipublicæ, & inter hos Scaurum ad constanter defendendam Rempublicam, sperto cuiuscunque periculi metu, adhortatur: *Propugnatores Reipublicæ qui esse voluerunt, omnia Reipublicæ causa perferunt; qui sunt tales, qualis Pater tuus M. Scaure fuit, qui a Graccho usque ad Q. Varium seditiosis omnibus restitit, quem nulla unquam vis, nullæ minæ, nulla invidia labefecit. Aut qualis Quintus Metellus Patruus Matris tuæ, qui de Civitate maluit, quam de sententia dimoveri. . . . Aut qualis nuper Q. Catullus, quem nec periculi tempestas, neque honoris aura potuit unquam de suo cursu, aut spe, aut metu dinovere. Hæc imitamini, qui dignitas tem*

tem, qui laudem, qui gloriam queritis; hæc ampla sunt, hæc Divina, hæc immortalia; hæc fama celebrantur, monumentis annalium mandantur, posteritati propagantur &c.

Similiter ad eliciendas à consequentibus rationes querendum est Tyronibus? Quid ex hac re, quam tractandam suscipiunt, vel post hanc rem futurum est? quid sequi potest? quid prævideri, quid expectare oporteat? Et sane nemo solidius ratiocinatur, quam qui ex re, quam suadet vel dissuadet, quæ consequentia manare possunt, ostendit; ejusmodi enim argumenta in summi momenti propositionibus ac consiliis plurimum valent.

Habes egregium exemplum à consequen-  
bus in Oratione pro Marco Marcello. Cæ-  
sar dixerat se satis naturæ, satis gloriæ vi-  
xisse, Cicero monet Cæsarem, ne putet se fa-  
tis Patriæ vixisse, curetque ordinare ac con-  
stituere Rempublicam, ostenditque secuturam  
inde Reipublicæ pacem, Cæsari vero glo-  
riam immortalem, præclara de eo postero-  
rum judicia &c. Nec vero hæc tua vita di-  
cenda est, quæ corpore & Spiritu contine-  
tur; Illa inquam, illa vita tua est, quæ vi-  
gebit memoria sæculorum omnium, quam po-  
steritas alet, quam ipsa æternitas semper  
tuebitur. Huiq te ostentes oportet, quæ qui-  
dem, quæ miretur, jam pridem multa habet,  
nunc etiam, quæ laudet, expectat. Obslupe-  
scunt posteri certe: Imperia, Provincias, Rhe-  
num, Oceanum, Nilum, pugnas innumerabiles,  
incredibiles victorias, monumenta, mu-  
nera, triumphos audientes & legentes tuos;  
sed nisi hæc Urbs stabilita tuis consiliis &  
insti-

*institutis erit: vagabitur modo nomen tuum  
longe atque late, sedem quidem stabilem, &  
domicilium certum non habebit. Erit inter  
eos etiam, qui nascentur, sicut inter nos fuit  
magna dissensio, cum alii laudibus ad Cœlum  
res tuas gestas efferent, alii fortasse aliquid  
requirent, idque vel maximum: nisi belli Ci-  
viles incendium salute Patrīce restinxeris; ut  
illud fati fuisse videatur, hoc consilii. Servi  
igitur iis etiam Jūdicibus, qui multis post  
sæculis de te judicabunt, & quidem haud scio,  
an incorruptius quam nos, nam & sine amo-  
re, & sine cupiditate, & rursus sine odio, &  
sine invidia judicabunt. &c. Quod illustrius  
consequentium exemplum?*

## S. IX.

## Causæ.

*Quid  
causa?*

**C**ausa est, vi cuius aliquid fit. Ut vnlus  
est causa mortis, quia vi sua mortem parit.

*Quotu-  
plex cau-  
sa?*

Causa quadruplex numeratur à Philoso-  
phis; scilicet: *Efficiens, materialis, forma-  
lis & finalis.*

*Quid ef-  
ficiens?*

Causa efficiens est, à qua aliquid fit, ut  
DEUS, à quo mundus, sol, à quo dies; Arti-  
fex, à quo artefactum fit. &c.

*Quid  
materi-  
alis?*

Causa materialis est, ex qua aliquid fit.  
Ut Marmor, ex quo statua, aurum, ex quo  
nummi, Uvæ, ex quibus fit vinum &c.

*Quid  
forma-  
lis?*

Causa formalis est ratio quædam & for-  
ma, per quam res aliqua in sua natura ita  
constituitur, ut per eandem à cæteris di-  
stingvatur; sic anima est forma hominis, quia  
homo

homo per animam sit rationalis, per rationem autem à cæteris animantibus distinguitur.

— *Observe.* Forma alia est naturalis & interna, alia artificialis & externa; per primam res una ab altera distinguitur interne; ut *Adamus non est silex; est igitur interna forma alia Adamantis; alia Silicis.* Per alteram res una ab alia distinguitur externe; ut ex uno eodemque Marmore Statua Viri & feminæ, ex uno eoderaque Auro Calix & patena, ex iisdem coloribus pulchra & diffinis imago. &c.

+ Causa finalis est, præpter quam aliquid *Quid fit?* Ita Beata in Cælis vita, est causa finalis *nalis?* hominis, quia agit omnia ut eam acquirat. Victoria, causa finalis belli &c.

— Nulla omnino propositio est, quæ non ex hoc loco probari, copiosissimeque amplificari possit; cum nihil omnino universis in rebus sit, quod non suas habeat causas: præter ipsum DEUM, quæ est prima omnium efficiens causa, Ipse à nullo principium ducens. Jam præter DEUM, aliæ causæ efficientes investigandæ sunt. Unde nimis aliquid oritur? unde pullulat? unde venit? unde principium & originem derivat? Neque enim ad omnem Philosophiæ rigorem Oratori causa efficiens sumenda est, sed sufficit, quod aliquid occasio aut causa movens sit, ut ab ea, suam propositionem probare tanquam à causa efficiente possit. Sic Cicero probat veram amicitiam inter probos duntaxat viros rep̄iri, ( ait enim in Lelio ) *Virtus, virtus inquam & conciliat amicitias, & conservat; in*

*Modus  
transan-  
di hujus  
loci.*

*à causa  
efficien-  
te.*

*ea est enim convenientia rerum, in ea stabilitas, in ea constantia. Virtus cum se extulit, & ostendit lumen suum, & idem asperxit agnoscitque in alio, ad id se admoveat, vicissimqne accipit illud, quod in altero est: ex quo eorum exardescit, sive mutuus amor, sive amicitia.*

Similiter si v. g. probare velis *Munera judicii non esse acceptanda*. Quære unde proveniunt? Ab illo scilicet, qui vel de cause suæ justitia dubitat; vel qui male indigneque opinatur de integritate judicis. Item si probare velis: *Malis exemplis moveri nos non oportere*. Quare? Quia proveniunt ab hominibus temerariis, levibus, impiis. Eodem modo probares cum Cicero intemperantiam esse vitandam. *Intemperantia effatum corpus tradit senectuti, ergo diligenter vitanda est*. Talibus & aliis id genus exemplis doceantur Tyrones, non esse rem adeo ut putant difficilem à Causa efficiente argumenta eruere.

Verum & à causa finali, non difficilior neque minor rationum copia eruitur; quid enim facilius, quam à fine, propter quem aliquid fit, vel propter quem aliquid suadetur vel dissuadetur, momenta & rationes adducere? Sit Proposito: *Leges improbe injusteque interpretandas non esse*. Quære, quis finis legum? non iniustitia certe, sed justitia; quæ est fundamentum boni publici. Unde dices cum Cicero: *A majoribus (inquit Cicero in Vatin:) nostris nulla alia causa leges inventæ sunt, insi ut suos Cives incolues conservarent*. Idem Libr: 2do de Legib:

Ad

*Ad salutem Civium, Civitatumque incolumentatam, vitamque hominum & quietam & beatam, conditæ sunt leges.*

Ita idem Cicero Oratione pro Milone Nro 32. à Causa finali probat Clodium struxisse insidias Miloni, quia spes emolumenti Clodium respiciebat, non Milonem. Quoniam igitur pactio probari potest, insidias Miloni fecisse Clodium &c.

Locus à causa Materiali & formalis externa potissimum obtinet in laudationibus Urbiū, Templorum, Palatiorum, Aedium, Hortorum, rerum arte effectarum, item Artium, scientiarum &c. Exempla causæ Materialis habes Verrina 6ta. Nro 64. Ubi Cicero exag- gerat furtum Verris à Materia Candelabrum, quæ rapuerat, quod nimurum gemmis & Auro constabant Candelabrum è gemmis clarissimis opere mirabili perfectum &c.

a Causa  
Materia-  
li & for-  
malis ex-  
terna.

Jam vero à causa formalis interna; Sic differere poteris cum Cicerone. Excellens est animi natura, ergo voluptatibus servire non debet. Si considerare velimus, quæ sit in à Causa  
hominis natura excellentia & dignitas, intel- formali  
ligemus, quam sit turpe diffluere mollitie, & inter- na.  
delicate ac molliter vivere, quamque honestum sit, parce, continent, sobrie. Itaque vicius cultusque corporis ad valetudinem referantur & ad vires, non ad voluptatem &c. Libr: Imo Officiorum Nro 106.

### §. X.

#### Effecta.

*E*ffecta seu effectus sunt ea, quæ oriuntur ex causis; unde sequitur, tam multa ea sicut effeta? esse,

Quid

sunt ef-  
feta?

## 42. ARTIS RHETORICÆ LIB: I.

esse, tamque varia, quam variæ multæque sunt causæ, imo quia effecta suis causis plerumque notiora sunt, ideo multo frequenter apud Oratores est eorum usus.

*Modus  
tractan-  
di hujus  
loci.*

Locus hic plurimum valet in genere demonstrativo, nihil enim tam proprie in quopiam laudatur, vel vituperatur, quam propria ipsius facta, merita, res gestæ. Laudaturus itaque quempiam, considera: Quidnam ille erga Religionem, erga Patriam, erga Principem, Senatum, Cives, exercitum, quid toga, quid sagio, quid in tribunalibus commissisque negotiis, quid erga familiam, quid erga amicos, clientes, &c. fecerit. Quibus ornatus sit virtutibus, scientiis, artibus? quid sapienter dixit, scripsit, consuluit, aggressus est, perfecit? hæc enim omnia, tanquam proprii cuiusvis personæ considerantur effectus. Similiter in omni re alia, quam in propositione probandam assumis, cogita, quid res hæc efficit? quid ex ea effluit, quem ex se fructum, quæve damna indubitanter adfert, qui actus sint hujus rei, hujus virtutis hujus viti? quidve ex iis proveniat? &c. Sic Cicero laudat ab effectis Cæsarem pro Marco Marcello: *Domuisti gentes inmanitate barbaras, multitudine innumerabiles, locis infinitas, omni copiarum genere abundantes; sed tamen ea vicisti, quæ & naturam, & conditionem, ut vinci possent, habebant; nulla est enim tanta vis quæ non ferro ac viribus debilitari frangique possit. At animum vincere, iracundiam cohibere, victoriam temperare, adversarium nobilitate, ingenio, virtute præstantem, non modo*

*ex-*

*extollere jacentem, sed etiam amplificare pristinam ejus dignitatem: hæc qui facit, non ego eum cum summis viris comparo, sed simillimum Diis judico*

Idem Cicero ut excitet voluptatis odium, & ab ea deterreat; exhibet perniciosos ejusdem effectus Libro de Senectute Nro 40. &

41. *Hinc Patriæ prodiciones, hinc Rerum publicarum eversiones, hinc clandestina cum hostibus consilia; nullum denique scelus, nullum magnum facinus esse, ad quod suscipiendum non libido voluptatis impelleret.*

... *Cumque homini sive natura, sive quis DEUS nihil mente praestabilius dedisset: huic divino muneri ac dono, nihil tam esse inimicum, quam voluptatem; nec enim dominante libidine temperantiae locum esse omnino, nec in voluptatis regno virtutem posse consistere....*

Ita pariter Eloquentiæ dignitatem, utilitatem ac jucunditatem, ab effectis commendat Libr: 1. de Oratore Nro 30, 31, 32.

### §. XI.

#### Comparatio.

**C**omparatio est oratio, quia duo vel plura *Quid comparatio?* in tertio aliquo, quod illis commune est, conferuntur. Ut: *Catoni licuit sequi bellum Civile, igitur & Ciceroni licebit.*

+ Commune est enim ambobus sequi bellum civile.

+ Res, inter quas instituitur *comparatio, Modus tractata vel* maiores sunt, hoc est veri similiores, *dihujus quibus scilicet id, de quo agitur, potiori ju-* *re loci.*

re convenient; vel minores, idest minus veri similes, quibus non æque res aliqua convenient, ac convenit ei, cum qua conferuntur; vel æquales in gradu veritatis. Hinc triplex est comparationis gênu. Nempè: à majori ad minus, à minori ad majus, à pari ad par.

*Quomodo* + Comparatio à Majori ad minus fit, quando minus probabile concluditur ex magis majori ad probabili. Sic dicit Terentius: *Quem fert, minus? si parentem non fert suum.* Sic Cicero: *Quid faceres domi tuæ, cùm alienæ tam sis insolens.*

+ Idem Divinatione in Verrem Nro 40. ita disputat contra Cæciliū: *Quod si ego hæc propter magnitudinem rerum ac difficultatem aſsequi non potui, qui in omni vita nihil aliud egi: quād longe tu te ab iis rebus abesse arbitrare, quas non modò antea non cogitasti, sed ne quidem, cùm in eas ingredieris, quæ, & quantæ sint suspicere potes?*

*Quomodo* + Comparatio à minori ad majus fit, quando magis probabile ex minus probabili concluditur. Sic Cicero pro Lege Manilia Nro 11. Populum Romanum hortatur ad tuendam Imperii dignitatem: *Majores nostri sæpe mercatoribus ac navicularoribus injuriosius traditis, bella gesserunt; vos tot Civium Romanis, uno nuntio atque uno tempore necatis, quo tandem animo eſſe debetis? Legati quod erant appellati superbius, Corinthum Patres vestri totius Græciae lumen extinſum eſſe voluerunt; vos eum Regem inultum eſſe patiemini; qui legatum Populi Romani Consularem vinculis ac verberibus, atque omnis*

omni suppicio excruciatum necavit? Illi Ci-  
vium Romanorum libertatem imminutam non  
tulerunt; vos vitam erectam negligetis? . . .  
Videte, ne, ut illis pulcherrimum fuit, tantam  
vobis Imperii gloriam relinquere; sic vobis  
turpissimum sit, illud, quod accepistis, tueri,  
ac conservare non posse.

Habes similia argumenta petita à minori ad majus Pro Cæcinna Nro 45. pro Plan-  
cio Nro 26. pro Milone Nro 80. In Piso-  
nem Nro 18,

Comparatio à pari fit, quando pariter *Quomodo à pari?*  
probabile ex pariter probabili colligitur.  
Ita Cicero pro Roscio Amerino Nro 50. pre-  
bat, non esse probro vertendum Roscio, quod  
subigendæ terræ operam dederit, quia id  
multi alii opibus & dignitate præstantes fe-  
cerint: *Ne tu Etrusci accusator ridiculus es-*  
*ses, si illis temporibus natus es*, *cum ab*  
*aratro arcessebantur, qui Consules fierent.*  
*Etenim qui præesse agro flagitium putas,*  
*profetto illum Attilium, quem sua manu spar-*  
*gentem senen, qui missi erant, convenerunt,*  
*hominem turpissimum atque inhonestissimum*  
*judicares. At hercule! Majores nostri longe*  
*aliter & de illo, & de ceteris talibus viris*  
*judicabant: suos enim agros studiose colebant,*  
*non alienos cupide appetebant. Et.*

Similia à pari exempla vide pro Murena  
Nro 31. Philippica 5. Nro 25. Catilinaria 1.  
Nro 17.

*Observa:* Locum hunc sæpiissime cum aliis  
convenire, uti cum antecedentibus, cum ef-  
fectis, cum exemplis. *Et.* Quomodounque  
tamen rationes ab eo ducantur, ad rem cer-  
te

te probandam sunt solidissimæ; nihilque se-  
re homini naturalius ac promptius, quam  
ad comparationes recurrere, quas ut facilius  
instituas, ex te ipso quære: Quodnam a-  
liud huic, de quo tractas, majus, minus, æ-  
quale? quod huic simile? in quo eadem vir-  
tus? idem vitium? quid in historia, vel me-  
moria hominum tale, cum quo res hæc, a-  
etio hæc, persona hæc comparari posset? si  
res hæc ibi hunc produxit effectum; cur  
hic non eundem producat? &c. Si tamen  
comparatio inter homines instituenda sit, ca-  
ve, ne pueriliter aut nimium uni tribuas, aut  
demas alteri.

## CAPUT II.

## DE LOCIS EXTRINSECIS, SEU REMOTIS

*Quid sunt Loci extrinseci seu remoti?* Loci extrinseci seu remoti sunt, qui ali-  
unde, quam ex natura rei, de qua quæ-  
stio est, petuntur, neque pendent ab arte ut  
excogitentur, sed ut tractentur. Horum lo-  
corum in genere judiciali præcipuus est usus.  
*Quot sunt?* Sex assignantur à Quintiliano: Leges seu  
præjudicia, Fama, Tabulæ, Jusjurandum,  
Tormenta, Testes.

## § I.

## Leges seu præjudicia.

*Quid sunt Leges seu præjudicia?* Præjudicia constant legibus, ex quibus pa-  
res aliquando causæ sunt judicatæ. Ut  
Cicero pro Roscio Amerino Nro 64. Ter-  
racinenses sine magnis & probatis causis de-  
par-

parricidio judicare noluerunt; ergo nec Romani debent judicare.

A legibus sive præjudiciis, aut confirmatur sententia, aut refutatur. Si confirmanda est sententia: probandum est *imo*. Leges ac præjudicia esse vincula Reipublicæ, Regnum fundamenta, justitiae nervos, libertatis asylum. *2do* Commandandi sunt illi, à quibus latæ sunt leges. *3to* Recensenda sunt damna, quæ consequentur, si leges impune violenterunt. *4to* Juvabit interdum afferre ipsa legis verba.

Sic Cicero pro Cluentio Nro 146. à necessitate & dignitate legum discurrit: *Ut tibi concedam, hoc indignum esse, quod cuiusmodi sit, jam videro, tu mihi concedas neceſſe est, multo esse indignius in ea Civitate, quæ legibus continetur, discedi à legibus.* Hoc enim vinculum est hujus dignitatis, qua fruimur in Republica, hoc fundamentum libertatis, hic fons æquitatis, mens, & animus & consilium, & sententia Civitatis posita est in legibus. Ut corpora nostra sine mente, sic Civitas sine lege suis partibus ut nervis, ac sanguine & membris uti non potest. Legum Ministri, Magistratus, Legum interpretes judices, Legum denique idcirco omnes servi sumus, ut liberi esse possimus.

Si refutanda est sententia à lege, Probandum est: vel antiquatam esse legem & amplius non valere: vel lex legi opponenda: vel demonstranda necessitas agendi contra legem.

Ita Cicero pro Rabirio Nro 13. eludit legem, ostendendo eam non esse amplius in

*Modus  
traſtan-  
di hujus  
loci.  
Quomo-  
do con-  
firma-  
tur sen-  
tentia à  
lege?*

usu: Tunc mihi etiam legis Porciæ mentionem facies ... Caput obnubito, arbori infeli ci suspendito .. Quæ verba, Quirites, jam pridem non solum tenebris vetustatis in hac Republica; verum etiam luce libertatis oppressa sunt.

Et pro Milone Nro 10. Legem scriptam per legem naturalem destruit; necessitatemque contra eam agendi ostendit. *Est enim hæc, Jūdices, non scripta, sed nata lex, quam non didicimus, accepimus, legimus; verum ex natura ipsa arripiuimus, hausimus, expressimus; ad quam non docti, sed facti, non instituti, sed imbuti sumus; ut si nostra vita in aliquas insidias, si in vim, si in tela aut latronum, aut inimicorum incidisset, omnis honesta ratio esset expediendæ salutis. Silent enim leges inter arma, nec se expeditari jubar, cum ei, qui expeditare velit, ante iusta pœna luenda sit, quam justa rep̄etenda.*

Similia exempla invenies pro Domo sua Nro 43, 47, & 53.

### §. II.

#### F a m a.

*Quid est fama? Modus tractandi* **F**ama est sermo multitudinis, habens autoritatem, nisi malitia, vel nimia credulitas irreperserit.

*Hujus loci. Quonodo confirmatur sententia à fama?* Si tibi causæque tuæ faveat fama, dices: magnam esse vim, atque authoritatem famæ, cui optimus quisque tam impense studet. Probabis famam vix unquam decipi, est enim velut omnium hominum testimonium. Quæres rationes, per quas sparsæ famæ veritas confirmetur.

Exem-

Exemplum ex hoc loco petitum invenies in Panegyrico Trajani, Plinii junioris: *Cæsar, tales nos crede, qualis fama cuiusque est, huic aures, huic oculos intende, ne respi- cias clandestinas existimationes, melius omnibus, quām singulis creditur; singuli enim de- cipere & decipi possunt; nemo omnes, nemini- nem omnes se fellerunt.*

Contra vero, si tibi causæque tuæ fama Quomo-  
adversetur, illam refutabis ostendendo famæ  
levitatem & inconstantiam, quæ saepe viris  
integerrinis maculas asperserit. Demonstra-  
do, rumores ejusmodi esse opus hominum o-  
tiosorum, qui amant falsa in vulgus sparge-  
re. Afferendo rationes, quibus famæ falsitas  
demonstretur.

Sic Cicero pro Plancio Nro 56. rogat Judices, ne disseminatis rumoribus fidem habeant: *Illud unum vos magnopere oro, at- que obsecro, cum hujus, quem defendo, tum communis periculi causa, ne fictis auditioni- bus, ne disseminato, dispersoque sermoni for- tunas innocentium subjiciendas putetis . . . . Nihil est tam volucre, quam maledictum, ni- hil facilius emititur, nihil citius excipitur, nihil latius dissipatur.*

Similia exempla invenies pro Cælio Nro 38. Pro Milone Nro 46.

### § III.

#### *T a b u l æ.*

**N**omine tabularum intelliguntur omnia te-  
stimonia scripto exarata, quibus paœta  
conventa, contractus, testamenta, vel quid-  
vis aliud ejusdem generis continetur.

*Modus  
traſtan-  
di hujus  
loci.  
Quomo-  
do con-  
firma-  
tui ſen-  
tentia à  
tabulis?*

50 ARTIS RHETORICÆ LIB: I.

Sententiam à tabulis confirmabis *imo:* per Comparationem; conferendo testimonium scriptum cum fama, cæterisque testibus, & quærendo rationes, quibus probetur, plus habere roboris & authoritatis testimonium scriptum, quam aliud quodlibet. *2do.* Per frequentationem consequentium, ostendendo, non posse violari testimonium scriptum, & relatum in tabulas publicas, quin hæreat æterna labes ipsis tabulis publicis impressa; adeoque nullum fore jus, quod non possit infringi; si enim violator tabularum fuerit ignobilis: nemo erit deinceps, qui fe id imponè facturum non speret; si autem nobilis: ostendetur, pessimum apud posteros exemplum fore, si scelus impunitum relinquatur. *3to:* Per negationem exaggerari potest vis & authoritas tabularum, ad exemplum Ciceronis pro Sextio Nro 10. Non recito vobis Decretum officio aliquo expressum vicinitatis, aut clientelæ, aut hospitii publici, aut ambitionis, aut commendationis gratiæ; sed recito memoriam perfundi periculi, prædicationem amplissimi beneficii, vicem officii præsentis. testimonium præteriti temporis.

Simile à tabulis exemplum habes Oratione pro Milone: Quodsi duodecim tabulae nocturnum furem, quoquo modo, diurnum autem, si se telo defendeſit, interfici impune voluerunt; quis est, qui, quoquo modo quis interfecitus sit, puniendum putet, cum videat aliquando gladium nobis ad occidendum hominem ab ipsis porrigi legibus?

Eodem modo Cicero pro Archia Nro 9. commendat tabulas, quibus constabat Archiam domicilium Romæ habuisse.

Sen-

Sententiam à tabulis refutabis *imo.* Quæ *re-*  
*rendo* aliquod testimonium scriptum, quod  
 tabulis opponatur, & ejus authoritatem am-  
 plificando. *2do* Ostendendo eas, non esse inte-  
 gras, aut incorruptas, talibus enim fides de-  
 rogatur. Ita Cicero pro Cluentio Nro 91.  
 corruptas tabulas esse contendit, propter  
 quasdam lituras in ipsis comprehensas: *Quod*  
*Cajus Verres, Prætor Urbanus, homo sanctus*  
*ac diligens subscriptionem ejus in eo codice*  
*non haberet, qui tum interlitius proferebatur.*

## §. IV.

*Jusjurandum.*

**J**usjurandum est affirmatio vel negatio rei *Quid est*  
 alicujus, Deo in Testem vocato, ritu reli-  
 gioso facta.

Sententiam tuam à jurejurando confir-  
 mabis, *imo.* Demonstrando, quām inviolabi-  
 le debeat esse promissum, quo Deo quis ob-  
 stringitur; nefas enim est pacta cum homine  
 violare, quanto magis cum Deo. *2do* Recen-  
 fendo pænas, quæ jurisjurandi violatores  
 sequi solent; experiuntur enim homines in  
 se plerumque perfidos, qui Deo perfidi ex-  
 titerunt, jam vero semper sceleris conscién-  
 tiā crūciantur. *3to* Demonstrando magnam  
 jurantis vel autoritatem, vel probitatem.

Exemplum hujus loci habes in Cicerone  
 Libr: 3. de Officiis Nro 111. *Nullum vincu-*  
*lum ad astringendam fidem jurejurando*  
*Majores arctius esse voluerunt. Id indicant*  
*leges in duodecim tabulis, indicant sacra,*  
*indicant fædera, quibus etiam cum hoste de-*

vin-

*vincitur fides; indicant notationes, ianmad-  
verſionesque Censorum, qui nulla de re di-  
ligentius, quam de jurejurando judicabant.*

Eo loci pluribus confirmat Cicero: neminem, fidem vel hosti datam, & juramento firmatam, posse frangere.

*Quomo-  
do refu-  
tatur  
ſenten-  
tia à ju-  
rejuran-  
do?* Sententiam à jurejurando refutabis; *imo Demonstrando aliquod jusjurandum op-  
poni legibus, vel juri scripto, vel naturali.  
2do Ostendendo id, quod juratum est, ini-  
quum esse. 3to Probando id, de quo agi-  
tur, non contineri expreſſe in jurejurando,  
nec fuiffe hanc jurantis mentem. 4to De-  
monstrando juramentum auc ex impruden-  
tia emissum, aut metu extortum. 5to Con-  
vincendo jurantem admissi aliquando perju-  
rii. Ita Cicero pro Comædo Nro 46. Qui  
mentiri ſolet, pejerare conſuevit; nam qui  
ſemel à veritate deflexit; is non maiore re-  
ligione ad perjurium, quam ad mendacium  
perduci conſuevit.*

Similiter pro Rabirio Posthumo: *Ubi ſe-  
mel quis pejeraverit; ei credi poſtea, etiamsi  
per plures Deos juret, non oportet.*

Similiter differit Salvianus Libr: 4. *Plu-  
res invenias, qui ſc̄pius pejerent, quam qui  
omnino non jurent.*

*Quid  
ſunt tor-  
menta  
ſive  
Quæ-  
ſio?*

*Quomo-  
do con-*

### §. V.

#### *Tormenta ſive quæſtio.*

**T**ormenta ſunt Cruciatus, vi quorum veritas  
à reis extorquetur.

Dices *imo*. Antiquissimam hanc eſſe ve-  
ritatis eliciendæ rationem, & à sapientiſſi-  
mis

mis Majoribus usurpatam. 2do Vix aliam es-  
se in tanta nostrorum temporum dissimula-  
tione, veritatis extorquendæ viam. 3to Po-  
teris argumentari a minori ad majus: Si me-  
tus quæstionis sæpe veritatem exprimit,  
quanto magis ipsa quæstio.

*firmen-  
dus hic  
locus?*

Cicero de quæstione ita loquitur in To-  
picis Nro 74. Facit necessitas fidem, quæ  
cum à corporibus, tunc ab animis nascitur.  
Nam & verberibus, tormentis, igni fatigati,  
quæ dicunt, ea videtur veritas ipsa dicere.  
Et quæ à perturbatione animi sunt, dolore,  
cupiditate, iracundia, metu, quia necessita-  
tis vim habent, afferunt auctoritatem & fi-  
dem.

Dices periculosam esse fallacemque con-  
fessionem, quæ tormentorum vi exprimitur;  
quandoquidem compertum est, bene multos  
innocentes vi tormentorum, ac metu dolo-  
ris ad falsa dicenda persæpe fuisse adactos:  
poterisque hoc loco usurpare sapientissimam  
illam Hugonis Grotii sententiam: *Mentie-  
tur, qui ferre poterit, mentietur, qui ferre  
non poterit.*

*Quomo-  
do ifir-  
mandus  
hic lo-  
cus?*

Confirmabis etiam ex Cicerone Libro Par-  
titionum Nro 50. Sæpe etiam quæstionibus  
resistendum est, quod & dolorem fugientes  
multi in dolore ementiti persæpe sunt, mori-  
que maluerunt, falsum satendo, quam insi-  
ciando dolere . . . . alii autem, aut natura cor-  
poris, aut consuetudine dolendi, aut metu mor-  
tis, vini tormentorum pertulerunt: alii emen-  
titi sunt in eos, quos oderunt.

Aliud exemplum habes pro Silla Nro 78.  
*Quæstiones servorum, ac tormenta nobis ac-*  
*cusa-*

*cusator minitatur, in quibus, quamquam nihil periculi suspicatur; tamen illa tormenta gubernat dolor, moderatur natura cuiusque cum animi tum corporis, regit quæstor, corrumpit spes, infirmat metus, ut tantis rerum angustiis, nihil veritati loci relinquatur.*

## §. VI.

## T e s t e s .

*Quid sunt Testes?* **T**estes sunt, qui de re, quæ vocatur in controversiam, voce vel scripto testimonium ferunt.

*Modus traditio- di hujus loci.* **S**ententiam à Testibus confirmabis, si ostendas *imo*. Testes esse oculatos. *2do* esse juratos. *3tiq* Esse viros probos, atque integrerrimos. *4to* Esse illustres ac primarios. *5to* Non spe, nec cupiditate ad ferendum testimonium inductos.

*Quomodo con- firmatur sen- tia à testibus?* **I**ta Cicero pro Comædo Nro 44. commendat Testes: *Manilio & Lucio negas esse credendum? Dic, uude! Est tuæ arrogantiæ, contumaciæ, vitæque universa vox. Quid exspectas? quām mox ego Lucium & Maniliū dicam ordine esse Senatores, aetate grandes natu, natura sanctos & religiosos, copiis rei familiaris locupletes & pecuniosos.*

Similia exempla invenies Divinatione in Verrem Nro 13. Pro Archia Poëta Nro 6. Verrina 7 Nro 156, & 165.

*Quomodo refu- tatur sen- ten-* **R**efutabis sententiam à Testibus, si dicas: *1º Testes esse homines vel infames, vel leves ac futilis, vel servos, domesticos, amicos, aut quomodocunque suspectos. 2do Si ostendas,*

das, illos non secum ipsis cohaerere, sed pugnantia loqui. *3to* Si graviores testes illis opponas. *4to* Si probes, illos esse homines infimae sortis, atque egestissimos, qui facile subornari potuerunt.

Ita Cicero adversus Flaccum testimonia confutat ab iis ipsis, qui ea tulerunt Nro 6. *At, à testibus lœditur?* antequam dico, à quibus, quā spe, quā vi, quā re concitatis, quā levitate, quā egestate, quā audacia præditis: dicam de genere universo ēe.

Similia exempla leges Pro Roscio Amerino Nro 104. Pro Ligario Nro 16. Pro Murena Nro 58.

*Nota.* Veteres inter testimonia referabant etiam Oracula, seu Deorum voces; Auspicia, seu auguria, quæ erant testimonia ex avium volatu, cantu, pastuque. Vaticinationes, quæ erant responsa Vatum: Responsa denique Sacerdotum & Haruspicum, qui vel interpretabantur somnia, vel ex extorum inspectione futura conjiciebant, unde etiam vocabantur Conjectores.

### §. VII.

#### *Uetus Locorum in genere.*

*Definitionis* usus est, non tantum ut obscuræ rei adferatur notitia, aut involuta aliqua quæstio explicetur; sed etiam ad amplificationes & descriptiones; præsertim harum, quæ dantur per causas & effecta, per negationem & affirmationem.

*Notatio nominis*, ad vim & originem verborum, aut ad allusiones, & jocos adhibetur.

*Enn.*

*Enumeratio* partium ad totum, explicatis partibus, clare oculis subjiciendum, & distribuendum, & amplificandum servit.

*Genus* valet ad fuse dicendum, avocando Orationem ab hypothesi ad thesim. Magna enim est vis in natura generis bene exposita.

*Similitudo* & *dissimilitudo* lucem adfert rebus, ornatum argumentis, animis voluptatem.

*Comparationis* usus assurgit per exempla ad magnos motus.

*Repugnantium* usus est in amplificationibus ad refellendum & probandum; item per Antitheta ad ornatum Orationis, gratiam & varietatem: tum ut res una per contrarium melius eluceat.

*Adjuncta* late ac eleganter patent. Nam illa animi & corporis, & fortunæ, ad laudandum & vituperandum: illa temporis & loci, ad narrandum, probandum, confutandum, describendum, vim habent magnam & splendorem.

*Antecedentium* & *consequentium* idem usus, præfertim ad svadendum & dissyadendum.

*Per Causas* & *Effecta* amplificamus. Ac genus quidem deliberativum ex rerum bene, vel male gestarum causis constat; in Deliberativo & Judiciali per effecta & causas copiose probamus, confutamus, describimus.

*Loci extrinsecis*, ut *Præjudiciis* utimur ad confirmandum & refellendum, si accedit authoritas, in aliis verò, ut: *Fama*, *Tormentis*, *Tabulis*, *Jurejurando*, *Testibus*, *Personæ*.

sonarum probitas, vel improbitas spectari, &  
rerum circumstantiae expendi debent.

## CAPUT III.

DE SECUNDA INVENTIONIS PARTE, SEU DE  
MOTIBUS EXCITANDIS.

**O**ratoris munus ac partes sunt, primum ut persvadeat doceatque Audientium animos; deinde ut eosdem moveat, inflammet, ac flectat. Diximus iu prima hujuscē libri parte de argumentis ad docendum & ad fidem faciendam idoneis; postulat nunc insti-tuti nostri ratio, ut motuum, sive affectuum concitandorum (quae inventionis pars præcipua est) fontes aperiamus, dicamusque, qua ratione faces ac stimuli sint Auditorum animis subjiciendi, quod in Oratore præcipuum est; cum plerumque homines magis affectu, quam ratione ducantur: nec semper, quod approbant, bonum sequuntur. Sed antequam affectus omnes singillatim persequamur; pauca quædam de illorum natura numeroque præmittimus.

Affectus est quidam animi impetus, quo *Quid* impellimur. vehementius ad aliquid vel apest affectus?

Sunt, qui quatuor tantum statuunt affectus; duos circa bonum, nempe: *spem & gaudium*, & duos circa malum, scilicet: *Tristitia & metum*. Philosophi plerumque undecim assignant, quinque tribuunt appetitui irascibili, sex appetitui concupiscibili. Ap-pe-

petitus concupisibilis complectitur tres affectus circa bonum, scilicet: *Amorem, desiderium, & gaudium*; tres circa malum, nempe: *Odium, fugam & tristitiam*. Appetitus irascibilis continet duos affectus circa bonum, nempe: *Spem & desperationem*; & tres circa malum, scilicet: *iram, audaciam, & timorem*. De his ita dicemus, ut primo illorum definitionem afferamus, deinde quomodo sint excitandi, quām accuratissime præcipiamus.

## §. I.

## De Amore.

*Quid est amor?* **A**mor est affectus, quo alicui bene volumus, eique bene facimus, non nostra, sed illius causa. Ex qua definitione patet, tres omnino esse germani amoris conditiones, siue dotes, 1. ut ei, quem amamus, optemus bona. 2. Ut eadem illi pro virili parte procuremus. 3. Ut ita simus animati non propter propriam utilitatem, sed illius causa, quem diligimus. Nam ut ait Cicero: *si ad fructum nostrum referemus, non ad illius commoda. quem diligimus: non erit ista amicitia, sed mercatura quædam utilitatum suarum.*

*Quomodo conciliatur amor?* Amoris conciliandi causæ, ac viæ præcipuae sunt: *imo. Excellens quædam, & rara virtus.* Ita Cicero Fonteio conciliat amorem à variis virtutibus, & vitæ probitate Nro 30. *Frugi igitur hominem, frugi inquam, & in omnibus vitæ partibus moderatum ac temperatum, plenum pudoris, plenum*

*num officii, plenum religionis, videtis possum in Vesta fide ac potestate: atque ita, ut commissus sit fidei, permisus potestati. Videamus igitur, utrum sit æquius, hominem honestissimum, Virum fortissimum, Civem optimum dedi inimicissimis, atque immanissimis nationibus, an reddi amicis; præsertim cum tot res sint, quæ vestris animis, pro hujus innocentis salute postulant.*

Invenies in Curtio Libr: 4. egregium hujus affectus exemplum. Ubi Darius roget Deos, ut Alexandrum, hostem licet suum, Regni successorem habeat. *Dii Patrii, pri-  
mum mihi stabilitate Regnum: deinde si de me  
jam transactum est: precor, ne quis Asice Rex  
sit, quam iste, tam justus hostis, quam mi-  
sericors vixit. &c.*

~~+udo~~ Utilitas & collata beneficia. Ita Cicerone Miloni benevolos mirifice facit Judices, ob ejus in Patriam beneficia: *Me qui-  
dem, Judices, exanimant & interimunt hæ vo-  
ces Milonis, quas audio assidue, & quibus in-  
tersum quotidie. O frustra suscepti mei labo-  
res, o spes fallaces, o cogitationes inanes!  
Ego cum Tribunus plebis &c. Tandem infert:  
Hiccine Vir Patriæ natus, usquam, nisi  
in Patria morietur? .... O terram illam be-  
atam, quæ hunc Virum excepit ... &c.*

Vide totam hanc pro Milone perorationem, quæ tota amorem spirat. Similiter vide perorationes pro Flacco & pro Cnejo Plancio.

*3tio Nulla re magis comparatur amor,  
quam amore mutuo, ut monet pervulgata  
illa Senecæ vox: Si vis amari, ama: & illa*

Pli-

Plinii ad Trajanum: *Habes amicos; quia amicus ipse es.* Peritè etiam Cicero Epistola I. ad Brutum: *Clodius Tribunus plebis valde me diligit . . . quod cum mihi persuasum sit, non dubito, quin illum quoque judices à me amari.* Nihil enim mihi minus hominis videtur, quam non respondere in amore eis, à quibus provocere.

Egregium tractati hoc modo amoris exemplum tibi subjicio ex sermone Divi Ambrosii, in obitu Satyri fratri sui.

*Nunquam totus in me fui, sed in altero nostri pars major amborum. Atque utinam, ut memoriae, ut gratiae, ita etiam vitae, hoc quidquid est, quod spiramus, aut spirare possemus. Ego te frater hæredem feceram, Tu hæredem me reliquisti; ego te superstitem optabam, Tu me superstitem dimisisti. Quid mei successor hæredis? quid agam meæ vitae superstes? quid agam exsors hujus, quod cupio luminis . . . O amaridies, qui interruptam copulam perditis! o flebiles noctes, quæ tam bonum confortem, & individuum mihi comitem perdidistis! Para hospiti consortium, & quemadmodum hic nobis omnia fuere communia; ita illuc quoque dividuum nesciamus: nec quæso cupientem Tui deserat, properantem expellat, festinat adjuva: & si diutius tibi morari videor, accerse. Neque enim unquam prolixius abfuimus à nobis; Tu solebas revisere, nunc, quoniam redire non potes, nos ad te ibimus, æquum est, ut officium rependamus. &c.*

Sunt & plurimæ aliæ amoris conciliandi causæ, verum omnes ad tres superius indica-

dicatas revocantur, tales sunt: Comitas & mansuetudo, morum similitudo, bonorum & malorum communitas, periculorum, quæ obita fuerunt, paritas: studiorum & exercitiorum communio. &c. &c.

## §. II.

*De Odio.*

**O**dium est affectus Animi aversantis id, quod malum est, aut tale esse putatur.

Odium excitatur à contrariis amori capitibus. *imo.* Vitiis & improbitate vitæ. *2do* Illatis injuriis. Hujus affectus mirificum habes exemplum apud Cornelium Tacitum, in vita Agricolæ, ubi magnanimus ille Galgacus, suorum Britannorum animos aduersus Romanos irritare conatur sequenti eximia oratione:

*Raptore urbis, postquam cuncta vastantibus desuere terræ; Et mare scrutantur. Si locuples hostis est, avari: si pauper, ambitiosi. Quos non Oriens, non Occidens satiarerit. Soli omnium opes, atque inopiam pari affectu concupiscunt. Auferre, trucidare, rapere falsis nominibus Imperium: atque ubi solitudinem faciunt, pacem appellant. Liberos cuique, ac propinquos suos, natura charissimos esse voluit; hi per delectus alibi servituri auferuntur. Bona fortunasque in tributum egerunt, in annonam frumentum..... Britannia servitatem suam quotidie emit, quotidie pascit &c.*

Plurima alia hujus affectus exempla invenies in Cicerone, imprimis in Oratione pro

pro Quintio Nro 56. in qua Nevium fraudulentum vocat in odium. Oratione pro domo sua Nro 104. in qua invisam reddit religionem Clodii. Philippica 2da. contra Antonium. Item VII. Verrina in ejus tota peroratione odium conflat Verri.

Concitat̄ etiam odium à personæ lēdentis indignitate, à dignitate personæ lēsæ, à comparatione probitatis unius, cum improbitate alterius; ut habes in Cicerone: Ex hac parte pugnat pudor, illinc petulantia, hinc pudicitia, illinc stuprum, hinc pietas, illinc audacia &c.

*Quomo-* Odium extinguitur *imo*. Precibus & la-  
*do ex-* chrymis. *2do*. Explicatione incommodorum,  
*tingui-* quæ ex odio percipiuntur. *3to*. Causarum  
*tur odi-* um? odii in meliorem partem explicatione. Pro  
*um?* exemplo sit illa gravis, & plena majestatis  
 Oratio Volumiæ Matris ad Coriolanum filium; sic autem bona, & salutis Patriæ amantissima, Mater orditur:

*Qualem domi conditionem, Fili, tua nobis*  
*fuga reliquerit, vel ex ipsa veste vultuque*  
*satis conjicere potes. Cogita nos fæminarum*  
*miserrimas ad te sordidatas venisse; quibus,*  
*quod jucundissimum natura spectaculum de-*  
*derat, fortuna luduosisimum fecit. Mihi, ut*  
*filium, huic, ut virum Patriæ superbū ho-*  
*stem videat. Quæ autem cæteris in calamiti-*  
*tibus solatio esse solent, fusæ ad Deos pre-*  
*ces, illæ nos in summas angustias conjiciunt.*  
*Neque enim licet simul & Patriæ victoriam,*  
*& a Diis tibi poscere salutem; sed quæ no-*  
*bis hostes imprecentur, hoc afflictæ postu-*  
*lare cogimur, ut aut Patria careamus, aut*  
*te*

te orbentur Mater, Coniux & liberi. Ego vero non expectabo, donec mihi fortunam hanc decernat fatalis belli necessitas: verum nisi persuasero, ut tu extinctis odiis & dissensionibus utriusque partis benefactor esse malis, quam perditior, sic habeto: Tibi per cadaver demortuae Parentis ad Patriæ expugnationem esse transcendendum. Absit, ut ego illam diem expectem, qua vel triumphari de filio a civibus, vel filium de Patria triumphantem videam.... Bellum ut vides incertum, hoc habet certi, ut aut vittor Patriæ, Furia futurus, aut vittus, per iracundiam, atque impudentiam amicissimos homines censoris in summum discrimen adduxisse. Quid siles, Fili? An vero censes deorum omnia odio tuo permettere, Matri vero pro tantis rebus deprecanti, nihil? Hoc sine magni animi est, injuriarum tam pertinaciter meminisse, pietatem vero in parentes tot nominibus renerandam, colere & revereri indignum?.... Et quidem infelix Patria satis jam pœnarum dedit, Matri vero nullam gratiam retulisti; adeo in ulciscendis injuriis, quam in remunerandis beneficiis promptior es, & acrior. &c.

Ad hanc facundæ Matris Orationem, nihil, quod responderet, habuit Coriolanus; nisi voces illas: Quo me adegisti Mater? vicisti.

### §. III.

#### *De timore.*

Timor est perturbatio animi, nata ex opinione mali impendentis.

E

Ti

metus  
sive timor?

*Quomo-  
do exci-  
tatur ti-  
mor?* Timor excitatur *imo.* mali impendentis magnitudine. *2do* mali & periculi vicinitate.

Prioris exemplum habes Catilinaria *ii.*  
*Nro 4.* *Videor mihi hanc urbem videre, lu-*  
*cem orbis terrarum, atque arcem omnium*  
*gentium, subito uno incendio contidinetem.*  
*Cerno animo sepultam Patriam, miseros at-*  
*que insepultos acervos Civium. Versatur mihi*  
*ante oculos aspectus Cethegi in vestra cæ-*  
*de banchantibus. Quapropter de summa salu-*  
*te vestra, Populique Romani, de vestris con-*  
*jugibus ac liberis, de fanis ac templis, de li-*  
*bertate ac salute Italice, deque universa Re-*  
*publica decernite diligenter, ut instituistis,*  
*ac fortiter.*

A vicinitate periculi habes exemplum pro Murena Nro 85. Sed quid tandem fiet, si haec elapsa de manibus nostris, in eum annum, qui consequitur, redundarint? Illa pestis immanis, importuna, Catilina prorumpet qua poterit, & jam Populo Romano minatur, in agros suburbanos repente advolabit, versabitur in castris furor, in Curia timor, in foro conjuratio, in campo exercitus, in agris vasitas, onni autem in sede ac loco ferrum flammamque metuenius.

Excitatur etiam timor magnitudine, aut vicinitate mali privati: improbitate & mala conscientia adversariorum; potestate nocendi in hoste, vel in quovis alio, ut Judice, &c.

*Quomo-  
do seca-  
tur ti-  
mor?* Nulla re magis sedatur timor, quam spe & confidentia; multa timoris remedia praescribit egregius morum Magister Seneca; inter alia docet, corrigendum esse judicium præpostorum de malis, quæ plerumque opini-

nione tantum nostra talia sunt. Sic autem habet: *Plura sunt, quæ nos terrent, quām quæ premunt, & s̄p̄ius opinione, quām re laboramus.* Illud tibi præcipio, ne sis miser ante tempus; cum illa, quæ velut imminentia expavisti, fortasse nunquam ventura sint; certe nondum venerint. Quædam ergo nos magis torquent, quam debeat: quædam torquent, cum omnino non debeat.

## §. IV.

## De Spe &amp; Audacia.

**S**pes est gaudium ex opinione imminentis boni.

Spes excitatur *imo.* Honestate & magnitudine boni. *2do* Certis præfidiis ad bonum comparandum, qualia sunt: opes, vires, industria, prudentia, amicorum potentia, adversariorum imbecillitas: expectatus favor Divinus, gloriæ cupiditas, æquitas eauæ.

Ita Alexander diuturnis laboribus frateros militum animos spe erigit, & hortatur apud Curtium Lib: 9. *Vestrás manus intueror, vestram virtutem, rerum, quas gesturus sum, vadeim habeo. Quandiu vobiscum in acie stabo, nec meos, nec hostium exercitus numeravero. Vos modo animos mihi plenos alacritatis ac fiduciae adhibete, non in timore operum laborumque nostrorum, sed in exitu stamus. Pervenimus ad solis ortum & Oceanam: nisi obstat ignavia, inde victores, perdomito fine terrarum revertemur in Patriam. Nolite (quod pigri agricultæ solent) maturos fructus per inertiam amittere è mu-*

Quid est  
Spes?  
Quomo-  
do spes  
exita-  
tur?

nibus. Majora sunt periculis præmia, dives eadem & imbellis est regio: Digni estis, qui opes, quas illud mare littoribus invehit, referatis in Patriam, digni, qui nihil inexpertum, nihil metu omissum relinquatis. &c.

*Quid est audacia?* Ad Spem pertinet audacia, seu confiden-tia. Est autem audacia affectus quidam ani-mi adversus futurum malum, quamvis ar-duum ac difficile, (quod tamen vinci possit) insurgentis; concitatur iisdem motivis, qui-bus spes. Ita Idem Alexander apud Curtium Libr: 7. Trecentos milites ad superandam petram, unde quaque arduam, præruptam, ne callibus quidem ullis perviam, ac proinde omnino expugnatu difficillimam, adhortatur.

Vobiscum, inquit, o Juvenes & mei æquales, Urbium invictarum ante monumenta superavi; montium juga perenni nive obruta emensus sum; angustias Cilicæ intravi; Indiæ sine laßitudine vim frigoris sum perpeſsus. Et mei documenta vobis dedi, & vœstra habeo. Petra, quam videtis, unum aditum habet, quem barbari obſident, cætera negligunt, nullæ vigilæ ſunt, niſi quæ caſtra noſtra ſpectant. Invenietis viam, ſi ſolerter rimati fueritis aditus ferentes ad cacumen. Nihil tam alte natura constituit, quo virtus non poſſet eniti. Experiendo, quæ cæteri despe-raverunt, Asiam habemus in potestate. Eva-dite in cacumen, quod cum ceperitis, candi-dis velis ſignum mihi dabitis: ego copiis ad-motis, hostem in nos à vobis convertam. Præmium erit ei, qui primus occupaverit ver-ticem, talenta X. uno minus accipiet, qui pro-ximus ei venerit: eademque ad X. homines  
ſer-

*Servabitur portio. Certum habeo vos, non tam liberalitatem intueri meam, quam voluntatem.*

Plura hujus affectus exempla invenies In Cicerone Catilinaria II. tota. Item Verri- na VII. Nro. 176. Philip: IV. Nro. 10.

### §. V.

#### De Misericordia.

Misericordia est dolor animi, & ægritudo quædam ex malo alterius, præsertim immerito laborantis. In hoc excitando commiserationis affectu triumphare solet magni Oratoris industria. Siquidem ut vulgo dicitur: *Lachrymæ auditorum sunt laus Oratoris vel maxima.*

Quid est  
misericordia?

Variæ ac multiplices sunt artes conciliandæ misericordiæ & commiserationis, has inter præcipua est *ima*. Si is, qui malum patitur, eo plane indignus esse dicatur; *ada*. Si de Patria, si de nobis bene meritus fuisse ostendatur. *3tia* Si calamitatis magnitudo, vel diuturnitas, ceteræque hujusmodi circumstantiæ luculenter exponantur. *4ta*. Si tristia quædam recentis miseriæ signa monumentaque ob oculos Auditorum ponantur: ut cruentæ vestes, vel ipsum occisi cadaver, aut imago. Sic Marcus Antonius prolata Julii Cæsaris Veste pugionibus ac gladiis perforata, sanguineque cruenta, Romanam plebem ita accedit, ut ad Conjuratorum ædes inflammandas, è vestigio provolaverit. Ita Brutus confossum & cruentatum Lucreciæ corpus Populo Romano proposuit. Sic Clo-

Quomo-  
do mis-  
ericordia  
concili-  
tur?

til-

tildis Clodovæ filia dure & inclementer habita à Marito Almarico Visigothorum Rege, cum sudarium suo imbutum sanguine ad fratres suos Francorum Reges misisset; immagine illud bellum excitavit, quo res Visigothorum penitus attritæ delectæque fuerunt. Potens est sane illud, unde miserationem accersas, cum plerumque visu magis, quam auditu homines commoveantur.

+ Pulcherrimum ciendæ commiserationis exemplum subjicio ex Libro I. Livii; ubi miro artificio usus est Horatius Senior, ut Filium ob interficētam sororem, parricidii reum, ab imminentि morte liberaret.

Hincine, quem modo decoratum, ova-temque vix torid, incedentem vidisti, Quirites eum sib furca vinclum, inter verbera & cruciatus videre potestis? Quod vix Albano-rum oculi, tam deformè spectaculum ferre possent. Æ. lictor, colliga manus, quæ paulo ante armatae. Imperium Populo Romano pepererunt. Æ. caput obnube Liberatoris Urbis hujus, arbori infelici suspende; verbera vel intra Pomærium, modo inter illa pilæ & spolia hostium: vel extra Pomærium, modo intra sepulchra Curiatiornm. Quo enim ducere hunc Juvenem potestis, ubi non sua decora eum, à tanta fæditate supplicii vindicent?

Plurima & pulcherrima commiserationis exempla invenies in Cicerone, Oratione pro Fortejo Nro 37. pro Sextio Nro 57. pro Rabirio Posthumo Nro 45. Actione 7. In Verrem Nro 158. & 160. pro Domo sua Nro 59. &c.

## §. VI.

## De Ira &amp; indignatione.

Ira est sui propter contemptum ulciscendi cupiditas cum dolore coniuncta. Unde non multum differt ab odio, quod est ira quædam inveterata.

Ira incenditur commemoratione illatæ injuriæ, præsertim si injuria sit cum contemptu coniuncta. Sic Cicero pro Anerino Nro 146. Chrysogono Judices infenos reddit, quod Roseum maledictis persequeretur.

Quod si tibi causa nulla est, cur hunc miserum tanta calamitate affici velis? si tibi omnia sua, præter animam tradidit, nec sibi quidquam paternum, ne monumenti quidem causa reservavit; per Deos immortales quæ ista tanta crudelitas est? quæ tam ferocius immanisque natura? quis unquam prædo fuit tanus nefarius? quis Pirata tam barbarus, ut cum integrum prædam sine sanguine habere posset, cruenta spolia detrahere mallet? Scis hunc nihil habere, nihil audere, & tamen oppugnas eum, quem neque metuere potes, neque odire debes.

Indignatio est dolor perceptus ob secundas res bona que alterius, qui hac felicitate judicatur indignus.

Indignatio excitatur impo. Si vitæ prioris fordæ & vilitas, eum prætentis temporis opibus, potentia, & arrogantia præsertim conferantur. adi Si hominis, in quem indignamur vitia, cum ejus, cui antefertur, virtutibus comparentur. Ex primo capite Tul-

lius

Quid est  
ira?Quomo-  
do in-  
condi-  
tur ira?Quid  
est indi-  
gnatio?Quomo-  
do exci-  
tatur in-  
digna-  
tiō?

ius indignationem ita movet in Vatinium:  
*Atque illud tenebricosissimum tempus ineuntis  
 ætatis tuæ patior latere . . . . Deinde com-  
 memorat, ut homo vilis & obscurus, paula-  
 tim ad honores accesserit, tandemque illa  
 subjungit: Te cognati respuunt, Tribules exe-  
 crantur, vicini metuunt, affines erubescunt.*

Similiter divitias Chrysogoni inique par-  
 tas, & præpostoram en.ptionem bonorum  
 varie indignatur Cicero pro Rofcio Ameri-  
 no Nro 133.

Item Praefecturam Class: Rom: commis-  
 sam homini Syracusano Cleomeni Verrina  
 VII. Nro 82.

### §. VII.

#### *De Mansuetudine.*

*Quid est mansuetudo? Mansuetudo seu lenitas, ac clementia est motus oppositus iræ; desiniturque: Iræ Quoniam remissio atque mitigatio.*

*Mansuetudo conciliatur:*

*In iusto mansuetudo conciliatur: In iusto Ingenua quadam culpæ confessio-  
 ne ac dolore! Ita Cicero Cæarem iratissi-  
 mum licet, tamen Ligario placavit Oratio-  
 ne pro Lig: Nro 30. *Ad judicem sic agi so-  
 let; sed ego ad Patrem loquor; erravi, te-  
 mere feci, pœnitet: ad clementiam tuam con-  
 fugio: delicti veniam peto, ut ignoscas, oro.**

*Supplici animi demissione: Ita Ci-  
 cero pro Murena Nro 86. *Vester est supplex,  
 Judices, Vestram fidem obtestatur: miseri-  
 cordiam implorat, vestram potestatem ac ve-  
 stras opes intuetur.**

*Plurimum valet ad conciliandam  
 cle-*

clementiam, si is, qui peccavit, ostendatur: non dedita opera, non dolo malo peccasse; sed vel incautus, vel errore humano deceptus, vel necessitate adactus. Sic Cicero pro Deiotaro, pro Ligario, pro Marcello, non in vetudine veniaque dignos probat illos, qui praeter voluntatem in Cæsarem aliquid deliquerunt. Et quidem pro Marcello Nro 12. Atque hoc C. Cœsaris judicium P. C. quam late pateat, atterit: omnes enim, qui ad illa arma, fato sumus, nescio, quo, Reipublicæ misero funestoque compulsi; et si aliqua culpa tenemur erroris humani, à scelerare certe liberati sumus. Nam cum M. Marcellum, deprecantibus vobis, Reipublicæ conservavit: memet mihi & item Reipublicæ, nullo deprecante; reliquos amplissimos Viros & sibi ipsis & Patriæ reddidit: quorum & frequentiam, & dignitatem hoc ipso in confessu videtis. Non ille hostes induxit in Curiam, sed judicavit à plerisque ignoratione potius, & falso atque inani metu, quam cupiditate ciuii bellum esse suscepsum.

## §. VIII.

## De Æmulatione.

**A**nulatio est dolor ex aliena felicitate susceptus, non quod illi contigerit, sed quod nos illa careamus. Ita Magnus ille Alexander cum ad Achillis tumulum adstitisset, æmulatus est ejus felicitatem, dicens: O fortunate Adolescens, qui tuæ virtutis Homerum præconem inveneris.

Quid est  
æmula-  
tio?

Æmulatio differt ab invidia; quia hæc

vitiosa est & turpis, facitque nos velle, ne alter bonis potiatur; illa autem bona est, laudabilis & honesta, utpote quæ nos excitat, ut ipsi quoque bona, quæ in aliis videmus, consequamur.

*Quomo<sup>do</sup> con-  
citat<sup>ur</sup> emula-  
tio?* *Æmulatio* concitat<sup>ur</sup> *imo*. Explicatis pre-clare gestis majorum, Parentum virtutibus, nominis gloria. *2do*. Propositis illustribus exemplis Virorum illustrium.

*3to*. Promissa decoris & famæ amplificatione.

Ita Cicero Oratione pro Sextio Nro 136. Romanam Juventutem excitat ad æmulationem Clarorum Virorum: *Vos Adolescentes, & qui nobiles estis, ad Majorum vestrorum imitationem excetabos, & qui ingenio, & virtute nobilitatem potestis consequi, ad eam rationem, in qua multi homines novi & honore & gloria floruerunt, cohortabor. Hæc est una via, mihi credite, & laudis & ceteritatis & honoris.... Hæc imitamini, per Deos immortales, qui dignitatem, qui laudem, qui gloriam queritis. Hæc ampla sunt, hæc Divina, hæc immortalia: hæc fama celebrantur, monumentis annalium mandantur, posteritati propagantur. Est labor, non nego, pericula multa, fateor; multæ insidiae sunt bonis &c.*

### §. IX.

#### *De pudore.*

*Quid est pudor?* Pudor est animi dolor, ex re, quæ famæ labem inferre potest.

Pud.

Pudor excitatur *imo.* Explicata rerum turpitudine. Quomo-  
do exci-  
tatur

*zio.* Declarata animi remissione & neglig- *pudor?*  
gentia in rebus gerendis.

*3'io.* Injustitia facinoris patefacta.

Sic Cicero Qratione VII. pudorem con-  
citat ab inope & infirma Classe Populi Ro-  
mani, portu egrediente Præfecto Cleomene,  
luxurioso Prætore Verre Nro 85. *Egredi-*  
*tur præclara Classis in speciem, sed inops &*  
*infirma . . . . O tempus miserum atque ac-*  
*cerbum Provinciæ Sicilicæ! o casum illum*  
*multis innocentibus calamitosum, atque fune-*  
*stum! o iustus nequitiam ac turpitudinem*  
*singulariem! Una atque eadem nox erat, qua*  
*Præ oramoris turpissimi flamma, ac Classis*  
*Populi Romani Prædonum incendio con fla-*  
*grabat . . . . Proh Dii immortales! pira-*  
*ticus Mioparo, cum Imperium Populi Ro-*  
*mani, nomen ac fasces essent Sgracensis, usq-*  
*ue ad forum Syracusanum, & ad omnes ur-*  
*bis crepidines accessit, quo neque Carthagi-*  
*nensium gloriissimæ classes, cum mari plu-*  
*rimum possent, multis bellis sæpe conatae*  
*nunquam aspirare potuerunt . . . . O spe-*  
*ctaculum miserum atque acerbum! ludibrio*  
*esse Urbis gloriam, Populi Romani no-*  
*men. &c.*

### §. X.

#### De Gaudio.

**G**audium est motus animi, quo ferimur in *Quid est?*  
bonum præsens. Unde oritur delectatio *gaudi-*  
& quædam animi quies & tranquillitas. *um?*

**Gau-**

*Quomo-  
do exci-  
tatur  
gaudi-  
um?*

Gaudium excitatur *imo*. Insperato bono,  
novitate & insolentia rei. *2do*. Commuta-  
tione malæ fortunæ. *3to* Virtute, & bona  
conscientia.

Hunc gaudii affectum excitat Cicero O-  
ratione in Pisonem Nro 52. dum redditus sui  
celebritatem ac lætitiam describit:

*Unus ille dies, mihi quidem immortalita-  
tis instar fuit, cum in Patriam redii, cum  
Senatum egressum vidi, Populunque Romani-  
num universum: cum mihi ipsa Roma prope  
convulsa sedibus suis ad conservatorem suum  
progredi visa est, quæ me ita accepit, ut  
non modo omnium generum, ætatum, ordi-  
num omnes Viri ac Mulieres, omnis fortu-  
na ac loci; sed etiam mænia ipsa vidarentur,  
& testa Urbis ac templæ lætari.*

Vide hunc affectum fusius tractatum in  
Oratione ad Populum: & post redditum ad  
Quirites, & in exordio Orationis II. in Ca-  
tilinam.

### §. XI.

#### *Usus Affectionum in genere.*

*In affectuum usu illud generatim est observan-  
dum, quod monet Cicero de Oratore Lib: 2.  
Ut omnes motus, quos Orator adhibere volet  
Judici; in ipso Oratore impressi atque inusti  
esse videantur. Neque enim facile est perfice-  
re, ut irascatur, cui tu velis, Judex, si tu ipse  
id lente ferre videare; neque ut oderit eum,  
quem tu velis, nisi te ipsum flagrantem odio ante  
viderit; neque ad misericordiam adducitur,  
nisi ei tu, signa doloris tui, verbis, sententiis,  
voce,*

voce. vultu, collachrymatione denique ostendaris. Ut enim nulla materia, tam facilis ad exardecendum est, quæ nisi admoto igne, ignem concipere possit; sic nulla est mens tamen ad comprehendendam vim oratoris parata, quæ possit incendi, nisi inflammatus ipse ad eam & ardens accesserit.

1mo. Igiter si affectum sive lenem, sive violentum ciere voles; pone Auditoribus obertos, omnia bona malave, quæ rei, vel personæ, de qua tractas insunt, vel inesse videntur, idque sufficienti copia & celeritate. Ad hoc præstandum valere debes acie ingenii, qua multa ad scopum opportuna in re detegas: valere debes torrente sermonis, & apta vocis contentione; ne frigidiuscula dictione omnem vim elidas.

2do. Plurimum proderit diligens obseratio, quonam affectu magis quivis sexus, ætas, conditio hominum moveatur. Sic pueri & adolescentes lætiores affectus amant: è contra Viri ac Senes gravioribus delestantur. Item vis concipiendi vivide imagines rerum, hominumque iratorum, querentium, lætitia gestientium, supplicantium, quos fit, ut absentia velut coram intueamur. Hoc probe intellexerat celeberrimus ille Græcus nomine Polus, qui Athenis acturus fabulam Sophoclis, cum repræsentandus esset dolor Electræ gestantis cineres Orestis, clanculum eruit è tè pulchro cineres ossaque filii, quem amaverat unice, urnamque detulit in Scenam; sicque dum lugere videretur aliena mala, deflebat sua.

3to Ad movendum non accedas, antequam

quam de themate proposito, manifestis argumentis demonstrato, fidem auditoribus feceris. Voluntas enim ad incognitum non inclinatur, aut certe commotio momentis rationum non innixa, in ventos abit.

4to. Adhibebis in affectibus crebras, acutas, & vibrantes sententias: ipsosque affectus, pro rerum varietate varie immutabis. Sit pro exemplo variandorum affectuum, Materia, quam suggero.

*Mater deplorat Filium in bello occisum.*

Affectus amoris.

**Q**uis sit animus Matris in liberos, quotus quisque intelligit: tum denique ego amare filium didici, cum infelicissime in bello perdidii. O misera sors orbitatis meæ! o spes fallaces! o frustra susceptæ curæ! An idecirco te genueram fili, ut esse, quem tristi morte sublatum lugere? Ego, cum te forma & ætate florenrem videbam, mihi certam salutem pollicebar. Putavi, speravi, credulam eventus fecellit. Nunc doleo, omnia ex spe & voluptate, ad calamitatem & orbitatem excidisse. Itaque, fili, tua morte Matris vitam abstulisti: ipsique vivæ flentique funus duxisti; neque enim te mortuo, diu superstes esse possum.

Desideri.

Ego te non requiram, Nati? aut possim tui unquam oblivisci? aut aliquid à me, praeter suspiria & lacrymas habebis? Ipsæ, ipsæ dulces lachrymæ, nisi letus jacundi, quibus animi dolor & desiderium tui, Nati, explabitur. O non amaræ dies, quibus charum filium animo & recordatione complectar, aspi-

aspiciam, alloquar, osculabor! o non flabiles noctes, quæ nullius, aut modici somni somnium & comitem non importunum referetis?

Quantum, quamque immane monstrum  
esse bellum, & apud quos conceptum dice-  
mus? Vah portentum! vah labes! vah gur-  
ges & Charybdis infausta! Quod hominum  
sanguinem gustasti, vel potius exforbuisti?  
quot fortis viros, robur Patriæ, quot clara-  
ros juvenes, florem nobilitatis, quot adultos  
liberos, spem ac delicias familiarum, quos  
ad fortunam vita servabat, crudelissime con-  
trucidasti. Nunquam ego immanitatem tu-  
am tacebo, quam in me Parentem, ac meum  
fatum adhibuisti: nunquam imprecari tibi,  
exprimare, & persequi te desiriam.

Perhorrescite, Matres, detestata jam pri-  
dem bellâ: has voragini scopulosque filio-  
rum nostrorum fugite. Nulla jam tot annis  
jaetura & clades existit, nisi bello, nulla vis,  
nulla cædes, nullum flagitium sine bello.  
Precul bellum è sinibus nostris, quod omnis  
Mater fugit oculis, respuit animo, recor-  
datione perhorrescit.

Cernitis percussorem filii, an sola Ma-  
ter video? non videtis furorem hostium?  
non repentinum impetum? Non versatur ante  
oculos vestros in cæde nefarius Miles?  
non padeat barbarus, non suis manibus intentatensem?  
non filii jugulum præcidit?  
Perditissime mortalium, quid te sceleratius?  
istam ego furiam non exagitabo? non repe-  
tam sanguinem filii? Non vindicem Deum  
appellabo?

Ah miles! Sic te alloquitur filius, sic tuam  
gra-

*suetu-  
dinus.*

graviter saucius fidem implorat: Quoniam varius est exitus & anceps belli fortuna, & Mars fortissimum sœpe ex acie tollit; noli mecum sic agere, gloriæ non satis vixi, noli juvenilem, atque in herba adhuc spem refecare. Da, precor, aliquid vel hosti, permitte supplici, cede afflito. Per viðricem hanc dextram, quam apprehendo, per belli pericula, quorum & ipse es particeps, per deus & nomen, quod magno labore quærimus, te oro, te flagito, te obtestor!

*Commi-  
seratio-  
nis.*

Adestis, amici, verum quo tandem animo adestis? utrum ego amens sum, & plus quam satis est doleo, in tanta calamitate & morte Filii? An vos quoque hic obitus & mæror, pari sensu doloris afficit? Nam si non ad amicos, si non ad homines, verum ad bestias, aut etiam, ut longius progrediar, si in aliqua desertissima solitudine ad saxa & scopulos, hæc conqueri, ac deplorare vellem, tamen omnia muta atque inanimata tam crudeli morte filii moverentur. Nunc vero cum pietatem & amicitiam vestram obtestor, non vereor, ne non misericordiam tribuatis aliquam fortissimo juveni, in ætatis flore pro Patria pereimpto.

*Indi-  
gnatio-  
nis.*

Dii immortales! quoniam fato fieri dicam, ut fortis occidatur ab inerti, strenuus ab ignavo, clarus ab abjecto; hoc vero quis ferat? meticulosum militem egregii Ducis cruenta spolia prædari, gloriari, insolenter in juvenis cæde bacchari, & tanquam, si palmarum facinus edidisset, exultare gaudio, triumphum petere, acclamatione, ac plausu improborum efferri?

Etsi

Etsi omnis spes mea, fili, cum salute tua  
occupuit, erigo me nonnunquam, & futura  
prospicio, quasi fortunata sit mors tua. Com-  
municabo, ni fallor, cum gloria tua, veniam  
in partem meritorum, triumphabit Mater de-  
morte filii; negat enim Patria, pro qua for-  
titer occidisti, negat se ingratam esse: ne-  
gat superstitem Matrem carere propositis  
honoribus debere. Hæc illa me spes alit &  
excitat; vives in gloriofa Matre filius; quid  
perdiderim, non reputabo, quid morte tua  
acquisierim, id æstimo.

Ego te mortuum complector, fili, nec me  
solam tuæ mortis commiserantem, sed co-  
mitem habebis. Utinam hoc pectus gladiis  
objicere & adversa, fili, tua vulnera recipere  
potuisssem, nullam ego acerbitatem, dolorem  
nullum, nullam vim pertimuissem, ut te modo  
manibus armatorum hominum eripere valu-  
isssem. Quin, nunc mori non refugio, immo la-  
cesso mortem & provoco, ut nos ocius uno  
eodemque tumulo conjungat.

Actum est, periit, nequidquam homines  
Superosque implorem. Mors immanseta mi-  
tigari non potuit, nec jam precibus infer-  
nus recludetur, neque ab hoc ejecto cadave-  
re quidquam mihi opis expecto. Omnia  
sunt in hoc funere misera. Quid restat? aut  
mortis consilium, aut vita morte acerbior.

Vos testor, Cælites, ego quidem bello-  
rum rabiem, ac furorem in istis armorum mo-  
tibus semper filio putavi esse fugiendum.  
Signa & tubæ, pulsataque tympana præsa-  
gienti Matri, metum semper acque horro-  
rem incutiebant. Tum si quis è commilitoni-

*Conf-  
dentia  
seu Au-  
dacia.*

*Despo-  
ratio-  
nis.*

*Timo-  
ris.*

bus filii in pugna cæsus audiebatur, augēbatur metus mali appropinquantis. Cum interim animus languore corporis ac timore cœibilitatus, incidit in varia visa & incerta, quorum perturbatione, tristes sœpe extiterunt species somniorum, quæ flebilem hanc mortem portenderunt.

*Gau-* Quid! ego lugeam illum? qui se defleri  
*dii.* vetat. Vivit filius inter Cælites, & qui ex-  
tremum spiritum in victoria effudit, Hero-  
um est sedem & locum consecutus. O for-  
tunata mors! o felicem & beatam diem, quem  
mihi, & Patriæ, & Filio natalem Superi esse  
voluerunt! Itaque quod ne optandum est ho-  
mini, immortalitatem quandam hic per te, &  
tecum, fili, videor assecuta.

*Æmu-* Generosi Juvenes, quorum erectos atque  
*latto-* alacres animos bellum excitat ad pugnam;  
*nis.* respicite, respicite ad meum filium, ejusque  
res gestas imitamini. Hanc vobis sanguine  
suo viam signavit & laudis, & fortitudinis,  
& immortalitatis. Sic ille se, non sibi, aut  
matri natum, sed Patriæ, sed gloriæ esse vo-  
luit: sic in acie fortiter occumbere maluit,  
quam redire turpiter.

FINIS LIBRI PRIMI.



AR.

# ARTIS RHETORICÆ LIBRI PRIMI

## TABULA PRIMA

Inferenda Pag: 80.

### RHETORICA

Est ars bene dicendi. pag: 1.

Ejus partes Sunt:

#### INVENTIO

Est excogitatio rerum verarum aut verisimilium, quæ valeant tum ad fidem faciendam, tum ad motus excitandos. Pag: 9.

#### SUMITUR.

Ex locis Oratoris tum intrinsecis ab ipsa re, tum extrinsecis extra rem, de qua quæstio est, petitis Pa: 12.

Est Oratio rei naturam vel nominis vim explicans. Est duplex: Logica, & Oratoria. Logica rem jejunè per genus & differentiam describit: Oratoria rem amplificat, & exornat. Pag: 13. 14.

Est Oratio, qua totum aliquod in suas partes distribuitur. Pag: 18.

Notatio nominis verborum originem, vim & significationem inquirit. Conjugata sunt quæ ab uno orta vocabulo variè commutantur. Utitur illis Orator, quando in nomine vel verbo quopiam, laudem, vel dederus, aut jocum aliquem urbanum & liberale invenit. Pag: 22. 23.

Similitudo est rerum cæteroqui disparium in aliqua ratione collatio & convenientia. Pag: 27. Diffimitudo est Oratio, quæ ex re diffimili diffimile aliiquid colligit. Pag: 28. Similitudines & diffimilitudines conglobatae vehementer movent, & plurimum ornant Orationem. Pag: 29.

Adjuncta sunt ea, quæ cum re, de qua agitur, non necessario, sed probabilitate conjuncta sunt. Adjunctorum genera tria potissimum numerantur, nempe: adjuncta rei, adjuncta animi, adjuncta corporis; omnia tritò illò versiculò comprehenduntur. Quis, quid, ubi, quibus auxiliis, cur, quomodo, quando? Pag: 33. 34.

Causa est, cuius vi aliquid fit; quadruplex numeratur. Efficiens; a qua; Materialis, ex qua; formalis, juxta quam; finalis propter quam aliquid fit. Pag: 38.

Effecta sunt ea, quæ oriuntur ex causis. Unde sequitur tam multa ea esse, tamque varia, quam variae multæque sunt causæ.

Pag: 41.

#### DISPOSITIO.

Est rerum inventarum in ordinem distributione. Pag: 81.

#### LOCI ORATORII INTRINSECI SUNT 16.

Definitio, Enumeratio partium, Notatio, Conjugata, Genus, Species, Similitudo, Diffimitudo, Comparatio, Repugnancia, Adjuncta, Antecedentia, Consequentia, Causæ, Effecta, Comparatio. Pag: 13.

1. Per congeriem multorum nominum. 2. Per congeriem Causarum. 3. Per congeriem effectuum. 4. Per congeriem similitudinum. 5. Per Adjuncta. 6. Per negationem & affirmationem. Pag: 15. 16. 17.

1. Cum totum quodpiam in quascunque indiscriminatum partes ex quibus constat distribuitur. 2. Cum totum distribuitur in partes suas essentiales: 3. Cum totum distribuitur in partes integrantes. 4. Cum genus dividitur in suas Species. 5. Fit Enumeratio per causas. 6. Per effecta. Pag: 19. 20.

Genus apud Oratores dicitur illud, quod est communè multis & multa sub se complectitur. Ejusmodi genera Oratoria sunt: Honestum, utile, justum, necessarium, facile, jucundum, & his contraria. Pag: 24. 25. Species est res aliqua particularis, quæ sub genere continetur: ut fides, spes, charitas, sub genere virtutis. Pag: 27.

Contraaria sunt ea, quæ in eodem subiecto esse non possunt: sunt vel adverbia, vel privantia vel contradicentia. Pag: 30. Tractantur tribus potissimum modis, nempe: dum verba verbis, membra membris, periodi periodis opponuntur. Pag: 31. 32.

Antecedentia sunt ea, quibus positis necesse est alia consequi. Pag: 35. Consequentia sunt, quæ necessario consequuntur. Pag: 36.

Comparatio est Oratio, qua duo vel plura in tertio, quod illis commune est, conferuntur. Genus illius triplex est, nempe: A majori ad minus, a minori ad majus, a pari ad par. Pag: 43. 44.

#### ELOCUTIO.

Est idoneorum verborum & sententiarum ad res inventas accommodatio. Pag: 141.

#### LOCI ORATORII EXTRINSECI SUNT 6.

Leges seu præjudicia, Fama, Tabulæ Jusjurandum, Tormenta, Testes. Pag: 46.

Præjudicia constant legibus, ex quibus pares alioquin causa sunt judicatae. Pag: 46. A legibus sententia confirmatur. Probando *imo*. Leges esse vincula Reipublicæ, Regnum fundamentalia, Libertatis Asylum. 2d. Commendando illos a quibus sunt late. 3tib. recensendo damna ex legum violatione secutura, 4to. Verba legis affredo. A legibus sententia refutatur. Probando vel antiquatam esse legem, vel legem legi opponendo.

Fama est fermo multitudinis, habens autoritatem, nisi malitia, vel nimia credulitas irrefremit. Pag: 48.

A fama sententia confirmatur: probando eam vix unquam decipi posse, ostendendo illius autoritatem, querendo rationes, quibus famæ veritas confirmetur. Pag: 48.

A Fama sententia refutatur: Ostendendo illius levitatem & inconstantiam, afferendo rationes, quibus famæ falsitas demonstretur. Pag: 49.

Tabulæ sunt testimonia scripto exarata, quibus pacta conventa, contractus, testamenta & cætera ejusmodi continentur. Pag: 49.

A Tabulis sententia confirmatur ostendendo quanta sit authoritas & robur testimonii scripti.

A tabulis sententia refutatur: vel tabulis tabulas opponendo, vel ostendendo illas non esse integras aut non omnino incorruptas. Pag: 50. 51.

Jusjurandum est affirmatio vel negatio rei alij, Deo in testem vocato, ritu religioso facta. P. 51.

A Jurejurando sententia confirmatur: Ostendendo jurantis probitatem & autoritatem, Demonstrando, quam in violabile debeat esse promissum, quod Deo quispiam obfringitur; recensendo pœnas, quæ jurisrandi violatores sequi solent. Pag: 51.

A jure jurando sententia refutatur: demonstrando juramentum aut metu extortum aut ex imprudentia emissum, Ostendendo id, quod juratum est, iniquum esse, convincendo jurantem admissi aliquando perjurii. Pag: 52.

Tormenta sunt cruciatus, vi quorum veritas a reis extorquetur. Pag: 52.

Testes sunt, qui de re quæ vocatur in controversiam, voce, vel scripto testimonium ferunt. Pag: 54.

A testibus sententia confirmatur. Ostendendo testes esse oculatos, juratos, esse viros probos, nullus spes aut cupiditate ad testimonium inducitos. A testibus sententia refutatur: Ostendendo illos esse infames, vel leves, aut servos, aut quomodounque suspectos, non esse secum ipsi cohærentes, esse homines fortis infimæ aut egentissimos, qui facile subornari potuerunt. Pag: 55.

#### PRONUNTIATIO.

Est vocis ac gestus pro rerum verborumque varietate apta conformatio. Pag: 254.

#### AFFECTUS PRÆCIPUI SUNT.

Amor, desiderium, gaudium, odium, æmulatio, tristitia, spes, mansuetudo, ira, audacia, timor. Pag: 58.

Amor est affectus, quo alicui bene volimus non nostrâ sed illius causâ. Pag: 58.

Amor conciliatur 1. excellenti & rara virtute. 2. utilitate & collatis beneficiis. 3. Amore matuð. Pag: 59.

Odium est affectus animiaversantis id, quod malum est, aut tale esse putatur. Pa: 61.

Odium excitatur 1. Vitiis & improbitate vitæ. 2. Illatis injuriis. Pag: 71.

Timor est perturbatio animi nata ex opinione mali impendens. Pag: 63.

Excitatur 1. Mali impendens magnitudine. 2. Mali vicinitate. Pag: 64.

Spes est gaudium ex opinione imminentis boni. Pag: 65.

Excitatur 1. Honestate & magnitudine boni. 2. Certis praesidiis ad bonum comparandum; ut sunt: opes, vires Industria &c. Pag: 65.

Ira est sui, propter contemptum, ulciscendi cupiditas. Pag: 60.

Ira incenditur 1. commemoratione illicitæ injurie. 2. Ejus cui irascimur vitiis & indignitate. Pag: 69.

Mansuetudo sive lenitas, est motus oppositus iræ.

Conciliatur 1. Ingenua culpæ confessione. 2. Supplici animi demissione. 3. Si is, qui peccavit, ostendatur non dedita operâ peccasse, sed incautus, vel necessitate adactus, vel errore humano deceptus. Pag: 71.

Æmulator: est dolor ex aliena felicitate suscepitus, non quod illi contigerit, sed quod nos illâ careamus. Pag: 71.

Concitat: 1. Explicatis præclare gestis majorum. 2. Promissa decoris & famæ amplificatione. Pag: 72.

Pudor: est animi dolor ex re, quæ famæ labem inferre potest. Pag: 73.

Excitatur 1. Explicata rerum turpitudine. 2. declarata animi remissione. Pag: 73.


Misericordia est dolor animi & ægritudo quædam ex malo alterius. Pag: 67.

Conciliatur 1. Si is, qui malum patitur, illò planè indigens esse dicatur. 2. Si de Patria, si de nobis bene meritus esse ostendatur. 3. Si tristia quedam recentis miseræ signa ob oculos Auditorum ponuntur. Pa: 67.

Gaudium: est motus animi, quo ferimur in bonum præsens: unde oritur delectatio, & quædam animi quietes & tranquillitas. Pag: 73.

Excitatur 1. Insperato bono. 2. Commutatio malæ fortunæ. 3. Virtute & bonâ conscientiâ.







# ARTIS RHETORICE

*LIBER SECUNDUS.*

## *De Dispositione.*

**D**ispositio est rerum inventarum in ordinem distributio.

Nempe ubi ad propositam quæstionem, vel ex lectione Authorum, vel ex felicioris ingenii fonte, plurima tum ad fidem faciendam, tum ad motus excitandos inveneris, & annotando congesseris; primæ dispositionis partes erunt, inventa omnia mature examinare; ex illis præclara præcipue, pulchra, nervosa, & quod vel maximum est, rete ad rem collineantia feligere; selecta in ordinem redigere, qui non minus necessarius est ad persvationem, quam instructio exercitūs ad pugnam & victoriam: & in aedificio lapidum, cæmentique apta compositio, ad ædium opportunitatem & elegantiam.

*Quid est  
Disposi-  
tio?*

Ordo enim in oratione præstat, ut illa audias: tur libentius, audita intelligatur facilius, intellecta firmius inhæreat.

*In quo sita est dispositio?* Dispositio in eo sita est, quod ipsâ natu: râ duce agimus, ubi cum aliis tractandum, aut ab illis quidpiam pétendum est. *1mo.* Præmittimus aliquid, quo benevolentiam ipsorum nobis conciliemus. *2do.* Exponimus breviter negotium, cuius causâ venimus. *3to.* Momenta causæ ac rationes asserimus, cur id contendamus. *4to.* Denique instamus, precamur, promittimus, ut assen: sum extorqueamus. Et hæc dicitur dispositio naturalis, utpote, quæ non tam arti, quam soli naturæ instinctui innititur. Altera est dispositio artificiosa, quæ à longo usu & ar: te petitur.

*Quis-nam Or: do ser: vandus est in di: spositio: ne arti: ficiosa. Sive Quo: num sunt Uratio: nis Par: tus?* Sicut naturalis, sic artificiosæ dispositio: nis partes, in quavis Oratione, præcipue sunt quatuor. I. Exordium. II. Narratio. III. Confirmatio, seu Contentio. IV. Peroratio. Exordio præparamus Auditorem. Narratione rem & causam exponimus. Cot: tentione cùm nostra tuemur & defendimus; tum adversariorum, si quæ adsunt, objecta refellimus. Peroratione concludimus.

Sunt, qui non quatuor duntaxat, sed sex omnino velint esse Orationis partes. Nempe Exordium, Propositionem cum Divi: fione, Narrationem, Confirmationem, Con: futationem & Perorationem. Nos nullam ha: rum rejicimus. Sed Propositionem cum sua partitione ad Exordium: Confirmationem ve: ro ad confirmationem revocamus.

## CAPUT I.

## DE EXORDIO.

**E**xordium est pars Orationis, Auditorum animos idoneè comparans ad reliquam dictionem. Unde quod in humano corpore caput, quod in ædibus vestibulum est; hoc est Exordium in Oratione. Atque adeo præcipua quadam cura, diligentiaque est elaborandum, naturæ ipsius instar, quæ in singendo, atque ornando capite, potissimum desudare consuevit. Unde etiam Exordium Difficillima pars Orationis vocatur à Tullio, recteque advertit Polybius: Fieri non potest, ut finem consequatur, qui principium non recte fuerit auspicatus.

## §. I.

## De variis Exordii generibus.

**E**xordium duplex est: aliud justum ac legitimum, quod etiam temperatum appellatur; aliud est vehemens & abruptum, sive ex abrupto.

Exordium temperatum illud est, quo Auditorum animi, artificiosa quadam verborum conciliatione præparantur.

Exordium ex abrupto est illud, quo Orator, quasi quodam abreptus impetu, Auditores repentina & inopinato motu percellit. Tale est celebratissimum illud Ciceronis in Catilinam: *Quousque tandem abutere*

Quid est  
Exordi-  
um?

Quotus-  
plex est  
Exor-  
dium?

Quid E-  
xordi-  
um tem-  
pera-  
tum?

Quid es  
abru-  
pto?

Ca-

Catilina patientia nostra? &c. & aliud in  
Pisonem: Jam ne vides bellua &c.

*Quot modis fit exordium ex abrupto?* Exordium ex abrupto fit *imo*. Per licentiam, seu per liberiorem quandam loquendi modum. Sic Mutius Scævola deprehensus in Porsennæ castris, ita eum ex abrupto alloquitur: *Romanus sum Civis: C. Mutium vocant. Hostis hostem occidere volui; nec ad mortem minus animi est, quam fuit ad cœdem; & facere, & pati fortia, Romanum est &c.* Liv: Libr: 2.

*Coriolanus filius Coriolanum ex abrupto alloquitur: (\*)* *Sinc, priusquam complexum accipio, sciam, ad hostem, an ad filium venerim; captiva Mædia in terne in castris tuis sim? In hoc me longa exilium vita & infelix senecta traxit, ut exulet te, auctus, Patriæ pesta bellum intulit. perveneras, ingredienti fines, ira cecidit?* Non tibi, quamvis infesto animo & minaci Non cum in conspectu Roma fuit, succurrerit: intra ista mænia, domus ac Penates mei sunt; Mater, conjux, liberi &c

Liv: Libr: 2.

*3tio. Fit per Emphasim, vel per illustrē aliquam figuram, quæ statim animos feriat.* Sic Darius adversam in præliis fortunam expertus, jam tertio redintegrata cum Alexandro pugna. milites suos alloquitur: *Terrarum, quas Oceanus hic alluit, illinc claudit Helleponus. paulo ante domini; jam non de gloria, sed de salute, & quod saluti præponitis, de libertate, pugnandum est. Hic dies Imperium, quo nullum amplius veditas,*

*tas, aut constituet, aut finiet ... Ventum est eo, unde pulsis nec fugæ quidem locus est. Omnia tam diutino bello exhausta post tergum sunt: non incolas suos, urbes: non cultores, habent terræ. Conjuges quoque & liberi sequuntur hanc aciem, parata hostibus præda, nisi pro carissimis pignoribus corpora opponitis &c Curtius Lib: 4.*

Exordium ex abrupto potissimum usurpatur, vel in summa aliqua gratulatione & laetitia, vel in summa quapiam offensione, aut indignatione; his enim potissimum Orator extra se quodammodo rapi videtur: extra hæc exordia ex abrupto plerumque vitiosa audiunt.

Quan-  
donam  
usur-  
pandum  
est E-  
xordi-  
um ex  
abru-  
pto?

### §. II.

#### De Virtutibus ac vitiis Exordii.

**E**xordii dotes ac virtutes, quatuor vulgo recensentur: *Proprietas, Cura, verecundia, brevitas.*

Quot  
sunt E-  
xordii  
dotes ac

Proprietas Exordii in eo consistit, ut sit cum reliqua Oratione conjunctum, hoc est: ex re quasi natum, & ex ipsis causæ visceribus ita depromptum, ut ex ipsius natura, quodammodo videatur efflorescere. Porro per viscera causæ intelliguntur Adjuncta: vel Personæ, quæ dicit, vel loci, ubi dicit, vel eorum, apud quos dicit, vel temporis, quo dicit, vel materiae, de qua dicit.

virtu-  
tes?  
In quo  
consistit  
propri-  
etas E-  
xordii?

Cura Exordii in eo posita est, ut sit accuratum, acutum, sententiis instructum. Ut monet Cicero: *Vestibula aditusque ad causam facias illustres.* Prima quippe Orato-

In quo  
posita  
est E-  
xordii  
cura?

ris

ris commendatio proficiscitur ab Exordio,  
quodsi negligentius tractatum fuerit, reliqua  
omnia fastidiet, & nauseabit Auditor.

*In quo exordii verecundia in eo consistit: Ut  
Orator dicere incipiens, præferat ingenu-  
um quendam pudorem, quem in Oratore  
summo L. Crasso tantopere laudabat Cice-  
ro: Fuit, inquit, in L. Crasso pudor quidam,  
qui non modo non obesset ejus Oratio-  
ni, sed etiam probitatis commendatione pro-  
dasset. Et ipse etiam Tullius sic de se con-  
ficitur Lib: I. de Oratore: In principiis di-  
cendi tota mente, atque omnibus artibus  
contremisco. Sciebat nempe, summus ille di-  
cendi artifex & doctoꝝ, offendere solere audi-  
torum animos, si Orator, velut exultans si-  
bique præsidens ad dicendum accedat.*

*In quo* Brevitas Exordii in eo consistit, ut reli-  
*confi-* quæ Orationis magnitudini sit accommodatum:  
*flat bre-* utque inani verborum circuitu non produ-  
*vitas E-*catur longius, quam par sit; neque enim Pi-  
*xordii?* gmaeo corpori Gyganteum caput aptandum  
est. Nolim tamen Orationi cæteroqui lon-  
giusculæ brevissimum, ut nonnulli solent, af-  
figatur exordium; dedecent enim vicissim in-  
gentem Basilicam exiguae fores.

**Quæ sunt i-** Primum Exordii vitium est, si sit commune, hoc est, si causis aliis, & fortasse etiam contrariis possit accommodari. Ejusmodi exordia lepidè comparantur ephippio, quod ex quo s bene multis accomodaretur. Secundum vitium est, si sit procul accessitum, longiusque petitum. Tale fuit inepti cuiusdam cau- fidici, qui de lite inter duos vicinos acturus, exordium petivit ab Adamo, vixque ad diluvii tempora tandem pervenit. **Ter.**

Tertium vitium, si pluribus verbis aut sententiis ultra, quam reliquæ orationis brevitas postulat, producatur. In enormia id genus proæmia bellissime quadrat facetum illud Diogenis ad Myndios, ( qui suo oppidulo magnificas & grandes fores affixerunt ) dictum: *Viri Myndii, portas claudite, ne Urbs exeat.*

## §. III.

*De variis Exordiorum fontibus.*

**E**x plurimis & variis, unde derivari solent exordia, fontibus, præcipui sunt sequentes:

~~Amo~~ Exordium recte dicitur, ab Adjunctis Personæ, rei, loci, ac temporis. Atque hic erat fons perquam familiaris Ciceroni, qui hinc ferme solebat exordiri. Sic in Oratione pro M. Cælio exorditur à temporis insolentia; quippe die festo, contra quam fieri solet. causam dicere cogebatur. Exordium Milonianæ dicitur à persona adversariorum, qui armati forum obsidebant, à persona Pompeji Judicis, ab insolita judicii forma. Pro Rege Dejotaro dicit exordium ab angustiis loci, in quo habita fuit Oratio, nempe in ædibus Cæsaris.

Habes illustre exemplum ab adjunctis Personarum in Livio. Ubi Philippus Rex Macedonum, inter duos filios suos, quorum unus alterum parricidii accusabat; à sua Parentis persona sic exorsus est: *Sedeo miserrimus Pater judex inter duos filios; accusatorem parricidii, & reum; aut confitii, aut ad-*

admissi criminis labem apud meos inventurus.  
Nam pridem quidem, hanc procellam imminentem timebam, cum vultus inter vos minime fratnos cernerem, cum voces quasdam exaudirem; sed interdum spes animum subibat, deflagrare iras vestras, purgari suspiciones posse. &c.

+ 2do. Dicitur Exordium à rotunda simplicique rei expositione, sine fuso; & sine ullo in speciem artificio. Ita Cicero pro Ligario: *Novum crimen, C. Cæsar,* & ante hunc diem inauditum, propinquus meus ad te Q. Tubero detulit &c.

+ 3to. Dicitur exordium à Contrario, cum prima fronte ea videmur dicere, quæ causæ nostræ sunt omnino contraria, & adversariis faventia; ut scilicet eos, nihil minus cogitantes, in nostram sententiam trahamus: in quo sane est artis & industriæ plurimum.

Ita Alexander apud Curtium milites suos cohortatus, ut secum audacter pergant ad extremas Jndiæ partes, primo videtur probare illorum studia, qui redditum in Patriam cogitabant: *Magnitudinem rerum, quas gessimus, milites, intuentibus vobis, minime mirum est* & desiderium quietis, & satietatem gloriæ occurrere. .... Itaque si crederem satis, certam esse possessionem terrarum, quas tanta velocitate domuimus; ego vero, milites, ad Penates meos, ad Parentem, sororesque & cæteros Cives, vel renitentibus vobis, erumperem, ut potissimum parta vobiscum laude & gloria fruerer; ubi nos uberrima victoriæ præmia expectant, liborum, conjugum, parentumque lætitia, pax, quies

quies, rerum per virtutem partarum secura  
possessio, &c.

Deinde mutata sensim velificatione in contrariam sententiam callidissime descendit: *Quid? creditis, tot gentes alterius imperio ac nomine assuetas, non sacris, non moribus, non commercio linguae nobiscum cohaerentes, eodem prælio domitas esse, quo viæ sunt? Vestris armis continentur, non suis moribus; Et qui presentes metuant, in absentia hostes erunt &c.*

4to. Dicitur exordium ab insigni quopiam effato & dicto, vel ab illustri exemplo. Exemplum hujus habes in Sallustio; ubi Catilina suos conjuratos ad impium bellum cohortatur hoc effato:

*Compertum habeo, milites, verba viris virtutem non addere, neque ex ignavo strenuum, neque fortem ex timido exercitum oratione Imperatoris fieri. Quanta cujusque animo audacia, aut natura moribus inest, tanta in bello patere solet. &c.*

5to. Duci potest exordium ab insigni aliqua quaestione. Ita Tullius suum de inventione Rhetorica librum auspicatur: *Sæpe & multum hoc mecum cogitavi, bonine, an malo plus attulerit hominibus & civitatibus copia dicendi, ac summum eloquentiae studium. &c.*

6to. Praeclare admodum dicitur Exordium à Suspensione, quæ mirifice præparat Auditorum animos magnæ alicujus rei expectatione, & acuit vehementi cupiditate sciendi, quid demum sit illud, quod pollicetur Orator: Ita Cicero Verrina I.

*Quod*

Quod erat optandum maxime, *Judices*, & quod unum ad invicem *Vestri ordinis*, infamiamque *judiciorum* sed etiam maxime pertinebat; id non humano consilio, sed prope divinitus datum, atque oblatum vobis summo *Reipublicæ tempore* videmus. Inveteravit enim jam opinio perniciosa *Reipublicæ*, vobisque periculosa, quæ non modo Romæ, sed apud exteris nationes omnium sermone percrebuit: his *judiciis*, quæ nunc sunt, *PECUNIOSUM hominem*, quamvis sit nocens, nullum posse damnari &c.

Denique, quodvis exordium ab ipsis causæ visceribus, (ut superius innuimus) hoc est ab intimis causæ principiis, trahendum est, & in illo solerter jacienda sunt argumentorum & affectuum illa semina, quæ in reliqua oratione retractata, fusiū explicentur. Id vero non difficulter efficies, si ex Quintiliani & Ciceronis præcepto, diligenter intuearis: Apud quos, pro quibus, contra quos, quo loco, tempore, quo rerum statu, dicendum sit tibi: quid *Auditores*, vel *Judices* sentire credibile sit, quis sit *Orationis tuae* scopus, quid petas, quid consequi velis? Hæc ubi perspecta tibi mature fuerint: ipsa te Magistra Natura facile docebit, unde sit tibi capiendum orationis Exordium.

#### §. IV.

##### *De officio & fine exordii.*

*Quod-*  
*nam est* *E*xordii officium ac finis est triplex, scilicet: reddere Auditorem benevolum, at*officium,* tentum & docilem.  
*Quis finis*  
*Exordit?*

Au-

Auditor benevolus redditur ex quadriplici capite: *imo* à Persona Oratoris ipsius. *2do* à Persona Adversariorum. *3to* à Persona Auditorum vel Judicium. *4to* à Persona illitis, pro quo dicitur.

Auditor benevolus redditur à persona Oratoris ipsius, si Orator modestiam, pudorem, probitatem & ingenuum quendam candorem ore potius & reipsa præseferat, quam verbis ostentet. Poterit tamen interdum sua merita, suum officium, suas virtutes, sed parce omnino, ac sine arrogantia commendare, quod mirifice facit Tullius in Oratione pro Archia, suo quondam Magistro: *Si quid est in me ingenii, Judices, quod sentio, quam sit exiguum: aut si qua exercitatio dicendi, in qua me non inficiar mediocriter esse versatum; aut si hujuscce rei ratio aliqua ab optimarum artium studiis ac disciplina professa, à qua ego nullum confiteor etatis meæ tempus abhorruisse; earum omnium rerum, vel imprimis sic A. Licinius frumentum à me repetere prope jure suo debet.* Nam quoad longissime potest mens mea respicere spatum præteriti temporis, & pueritiae memoriam recordari ultimam, inde usque repetens, hunc video mihi principem, & ad suscipiendam & ad ingrediendam rationem horum studiorum extitisse. Quod si haec vox hujus hortatu præceptisque conformata, nonnullis aliquando saluti fuit: à quo id accepimus, quo cæteris opitulari, & alios servare possemus; huic professo ipsi, quantum est situm in nobis, & opem & salutem ferre debemus.

*Quomo-  
do colli-  
gitur  
benevo-  
lentia à  
persona  
adver-  
sarii  
rum?*

Colligitur benevolentia à persona Adversariorum *imo*: Si Orator dicat: se illortum aut nimiam eloquentiam, aut gratiam reverenteris; sicque illam reddat suspectam Judicibus; quod pulchre admodum facit Cicero pro Quintio: *Quæ res in Civitate duæ plurimum possunt, hæ contra nos ambæ faciunt in hoc tempore, summa gratia, & eloquentia, quarum alteram C. Aquilii vereor, alteram me tuo &c.*

*2do.* Si illos in odium & in invidiam adducere, vitiorum, quibus laborant, commemoratione conetur; quod sæpius fecisse Ciceronem legimus; Sic pro Deiotaro: *Cru-  
delem Castorem, ne dicam sceleratum & im-  
pium; qui nepos avum in discrimen capitinis adduxerit, adolescentiæque suæ terrorem in-  
tulerit ei, cuius senectutem tueri & tegere  
debebat.*

Quod si Adversarius sit vir bonus, notæque probitatis ac fidei; eundem Ciceronem imitaberis, qui cum pro Murena diceret, Catonemque Virum antiquæ virtutis haberet adversarium, non quidem in ejus vita moribusque quidquam culpavit; sed tamen ut illi quoquo demum modo fidem detraheret; se etiam Stoicorum, cui se Cato totum addixerat, irridere cœpit, idque tam acute & facete, ut judicium risu dissolvetur, & Cato ipse dixerit: *Quàm ridiculum habemus Con-  
sulem.* Aut etiam facies, quemadmodum se cit Valerius Tribunus Plebis, qui habens etiam adversarium causæ suæ Catonem; ita orsus est: *Si privati tantummodo ad svadendum disvadendumque id, quod à vobis ro-*

gatur processent, ego quoque cum satis di-  
lum pro utraque parte existimarem, taci-  
tus suffragia vestra expellasset. Nunc cuin  
Vir gravissimus Consul Portius Cato, non  
auctoritate solum, quæ tacita fatis momenti  
habuisset, sed oratione etiam longa & accu-  
rata inseccatus sit rogationem nostram; ne-  
cessè est paucis respondere. Rem defendam,  
non nos &c.

Captatur benevolentia à persona Audi-  
torum, vel Judicium *imo*. Si eis confidere  
videatur Orator. Ut Cicero pro Roscio Ame-  
rino. *2do* Si suam causam cum eorum uti-  
litate conjungat. Ut idem passim in Phi-  
lippicis. *3to*. Si eorum justitiam, fidem, au-  
thoritatem, & alias dotes, maxime quæ ad  
rem Oratoris sunt, commendet. Ut in exor-  
dio pro Milone Cicero Pompejum laudat à  
sapientia, justitiaque, cum ait: *Sed me recreat,*  
*& resicit Cnei Pompeji sapientissimi, & ju-*  
*stissimi viri consilium, qui projecto nec ju-*  
*stitiae suæ putaret esse, quem reum senten-*  
*tis judicum tradidisset, eundem telis mili-*  
*tum dedere: nec sapientiæ, temeritatem con-*  
*citatæ multitudinis auctoritate publica ar-*  
*mare.*

Captatur benevolentia à persona clientis,  
si illius innocentiam virtutemque commendes:  
si illius calamitatem, amicorum inopiam, &  
solitudinem conqueraris. Ita Cicero pro Ro-  
scio Amerino.

Cicero de Invent: Lib: 1. Tum dicit esse  
insinuatione, sive captatione benevolentiae  
utendum, cum genus causæ admirabile est,  
à quo alienatus est animus eorum, qui au-

Quomo-  
do ca-  
ptatur  
benevo-  
lentia à  
persona  
Audito-  
rum veb  
Judi-  
cum?

Quomo-  
do à per-  
sona cli-  
entis, si-  
ve illius,  
pro quo

dicitur?  
An semi-  
per capa-  
tanda  
est ad-  
di-

*ditorum* dituri sunt. *2do* Si sit humile, quod negligit ab Auditore, & non magnopere attendendum videtur. *3to*. Si sit anceps, in quo aut judicatio dubia est, aut causa & honestatis & turpitudinis particeps, quæ & benevolentiam pariat & offendit. *4to*. Si sit obscurum, in quo aut tardi Auditores sunt, aut difficilioribus ad cognoscendum negotiis causa implicita est. In his igitur opus est insinuatione, seu exquisitiōe quadam arte, qua Orator subdole quodammodo & latenter in Auditorum animos irrepat. Exemplis pleraque Ciceronis exordia, quenque erudiant. Ceterū de captanda benevolentia, non multum laborandum est in illis causis, quæ per se sunt honestæ.

## §. V.

*De paranda attentione & docilitate.*

*Unde conciliatur attentio?*

**A**ttentio conciliatur partim promissione, partim petitione. Promissione quidem, si polliceamur nos esse dicturos de rebus vel novis, vel magnis, vel utilibus, vel jucundis. Ita Cicero pro Rabirio.

*Sic enim existimare debetis, Quirites, post hominum memoriam, rem nullam magis periculosa, magis ab omnibus vobis providendam, nec à Tribuno plebis suscepit, neque à Consule defensam, neque ad Populum Romanum esse delatam &c.*

Nolim tamen montes, ut ajunt, aureos in ipso dicendi initio semper polliceatur Orator; imò si satis appareat, rem, de qua agitur, esse aut communem, aut exilem & ab-

je-

ectam; plus efficiet si rotunde flatim & ingenue profiteatur, se se in re omnino tenui laborare, quam si grandia nequidquam polliceatur. Sic Cicero Philippica VII. *Parvis de rebus, sed fortasse necessariis consulimur, Patres Conscripti, de Appia via, &c de moneta &c.* Hoc eodem artificio apud Quintilianum pauper quidam utitur, accusans divitem, qui veneno per flores pauperis sparso, apes ejus interemierat: *Unum, inquit, oro, ne cui minor dignitate vestra videatur causa litis meæ. Ante omnia enim non debetis expellere, uti pauper magna perdiderim: sed quantum sit, quod abstulerit mihi dives, minus est, quod reliquit &c.*

Secunda conciliandæ attentionis ratio, est *petitio*. Cum scilicet Auditores rogamus, ut studiose ac diligenter velint attendere; sic Cicero pro Sexto Roscio. *Quapropter vos oro, atque obsecro, Judices, attente, bonaque cum venia verba mea audiatis.* Quamvis autem sub ipsum exordium postulari communiter soleat attentio; licebit tamen eandem in ipso etiam Orationis cursu interdum postulare, cum scilicet Auditoris animus initio arrectus, passim languescere incipit. Hoc egregie praestitit Tullius pro Cluentio.

*Vos, quæso, ut quemadmodum adhuc me attente audistis, ita, quæ reliqua sunt, auditatis. Profetto nihil à me dicetur, quod non dignum hoc conventu & silentio, dignum vestris studiis, atque auribus esse videatur.*

Tribus maxime rebus comparatur in Au-

do Com-

*paratur imo.* Si Brevem te fore promissas, stes-  
*dociti-* que promissis. Ut enim eleganter & ingenio-  
se monet Tullius: multo satius est, ut Ora-  
tor desinat, quam si deficiat, & ut Auditor  
cum desiderio, quam cum fastidio ac satie-  
tate recedat.

*2do.* Comparabitur docilitas, si dilucide  
simpliciterque proponas, qua de re disti-  
rus sis. Ita Cicero pro Lege Manilia. *Di-*  
*cendum est enim de Cn: Pompeji singulari*  
*eximiaque virtute.*

*3to.* Fiet docilis Auditor, si tuam Ora-  
tionem in duo, vel tria ad summum capita  
perspicue partiatis, ut cum ait Tullius Rhi-  
lippica VII. *Cur pacem nolo? quia turpis*  
*est, quia periculosa, quia esse non potest;*  
*quæ tria dum explico, peto à vobis P. C.*  
*ut eadem benignitate, qua soletis, verba mea*  
*audiatis,*

Sed quoniam permagni interest ad elo-  
quentiam, quemadmodum proponat, & oratio-  
nem suam partiatur Orator: & quia hic lo-  
cus est in Rhetorica longe difficillimus tyro-  
nibus præsertim, de utroque capite accu-  
ratius differemus.

### §. VI.

#### *De Propositione.*

*Quid est Propositione,* est brevis dicendorum in Ora-  
*propositio?* tione enunciatio.

*Quæ sunt Propositionis virtutes ac dotes quinque*  
*Proposi-*  
*tionis vir-*  
*tutes ac vulgo assignantur.* Nempe: ut sit simplex,  
*dates?* clara, copiosa, nova, & utilis.

Una

Una simplexque dicitur illa Propositio, *Quid est quæ constat una simplicique sententia; v. g.* *Pax est confienda.* Item hæc: *Injuriæ sunt condonandæ.* Ex unitate Propositionis, omnino pendet unitas Orationis, semperque meminisse debet Orator eximii illius, nunquamque satis inculcandi Horatiani præcepti: *Denique sit quodvis simplex duntaxat & unum.*

Clara Propositio est illa, quæ non modo nullo labore & industria adhibita intelligitur ab omnibus; sed etiam ita proponitur, ut non possit non intelligi; quemadmodum est hæc: *Otium est fugiendum.*

Copiosa Propositio illa est, quæ & amplam dicendi segetem suppeditat, & tractari ac ornari facile potest. Recte enim monet Horatius: ne jejunum dicendi sumas argumentum; & quæ desperas, tractata nitescere posse, relinquas.

Novitatem habebit propositio, si argumentum ita proponatur, ut ex trito vulgarique fiat inusitatum, & Auditorum animos statim, ac auditur, ipsa novitate percellat; v. g. Tritæ ac vulgares sunt istæ propositiones: *Homo multorum sibi malorum auctor est.* *Mali aliquando sunt utiles virtuti.* *Mors minus dura accidit miseris, quam felicibus.* Fient vero novæ, & singulari quadam attenione dignæ, si primam sic efferas: *Nemo luditur, nisi à se ipso.* Secundam: *Virtutem plus interdum improbis debere, quam probis.* Tertiam: *Felicitatis quoddam genus est, infelicem mori.*

Caveant tamen Tyrones, ne dum in pro-

positione novitatem àcupantur, in pueriles, ut sit, ineptias, futileque paradoxa incidant; quemadmodum ille, qui novitatis illecebra male captus, hoc proposuit: *Divum Josephum toti Trinitati supparem esse;* & alter, qui paupertatem & afflictionem, ipsa Paradisi gloria jucundiorum esse, probandum suscepit.

*Quæ Propositiones illæ, quæ magis activæ sunt, quam contemplativæ. Porro contemplativæ dicuntur illæ, quæ in sola cogitatione versantur; quemadmodum ista: *Stultorum infinitus est numerus.* Activæ vero dicuntur illæ Propositiones, quarum finis est aliquid efficere: v. g. Ferenda sunt amicorum vitia.*

### §. VII.

#### *De Divisione.*

*Cur ad Divisio five partitio tribus potissimum debetur in Oratione: 1mo in Oratione. Quia lumen affert Orationi. 2do. Quia ju-  
Divisio vat memoriam Oratoris & Auditorum. 3tio five partitio? Quia levat audiendi fastidium; recreatur enim animus admonitione singularum partium Orationis: quemadmodum viatorem reficiunt spatia, certis lapidibus & intervallis distincta.*

*Quæ Leges divisionis quatuor sunt præcipuae: sunt Di- 1ma est: ut Divisio sit plena, hoc est, ut par- visionis tes illius, five membra, omnino complectan- leges fi- to dotos?tur, & adæquent Propositionem, quæ divi- ditur. 2da est: ut membra illa sint opposita, neque unum in altero contineatur. 3tia Ut*

Ut divisio habeat partes duas, tresve ad summum. Si enim nimium concisa sit, & ut loquitur Fabius, nimium articulosa, offendet orationi tenebras, parietque obscuritatem illam, contra quam fuit inducta. *4ta.* Ut sit plana, simplex, & quasi obvia; non vero ad artis & ingenii ostentationem longius accersita. Quatuor hasce dotes, & hanc præfertim postremam animadvertere facile potes in Orationibus Tullii, qui nullum in divisionibus quærere solet Ornatum. Ut pro Lege Manilia: *Primum mihi videtur de genere belli, deinde de magnitudine, tum de Imperatore diligendo esse dicendum. Et pro Quintio: Nego fuisse causam, cur postularet: nego ex editio possidere potuisse: nego posse disse.* Hæc tria dum dixero, perorabo.

Ex his quæ hucusque de Exordio & Propositione dicta sunt, facile vel ipsi advertent Tyrones, quod ille, qui velit recte aliquid, solide quæ scribere, aut dicere, necessario debet: imprimis propositionem concipere; de hac concepta continuo cogitare, ut illam exponat, explicet, probet, ab ea in decursu non recedat, vel paululum digressus, ad eandem redeat, eam pro scopo reliquæ Orationis, in quem omnia argumenta colliment, habeat. Et quemadmodum in exordiendo cogitandum est, quatenus exordium naturale & proprium sit Propositioni; ita æque curandum est, ut Propositio naturaliter & eleganter ex Exordio media quadam, prudenti & industria transitione effluat. Porro Propositio aut verbis expressis enunciatur, qualia sunt: *Traffabo de hac vel illa re: ostendam hoc*

hoc vel illud, Hoc erit Orationis argumentum. Ita judico, ita sentio, ita statuo. Et similibus. Aut absque ejusmodi aperta enunciatione, ita res ipsa proponitur; ut facile Auditor intelligat hac de re Oratorem actum. Prioris modi exemplum capere potes ex hac Oratione Terentii, qui accusatus apud Tacitum de amicitia cum Sejano infelici Ministro Tiberii Cæsaris, sic imprimis exorditur. *Fortunæ quidem meæ fortasse minus expediet, agnoscere crimen quam abnuerre...* Deinde sic ad Propositionem descendit: *Sed utcunque casura res est, fatebor: Et fuisse me Sejano amicum, & ut eßem expetiſſe: & postquam adeptus eram, lætatum &c.*

Posterioris exemplum habes in Plinio, ubi Legati Manlii seditione se se purgaturi, sic incipiunt: *Deos, hominesque testamur, Imperator, nos arma neque contra Patriam cepiſſe: neque, quo periculum aliis faceremus; sed uti corpora nostra ab injuria tutarentur, qui miseri, egentes, violentia atque crudelitate fæeneratorum, plerique Patria, sed omnes fama, atque fortunis extorres sumus. &c.* Hic quivis videt facile, quæ sit in ista oratione Propositio.

Generatim dicendo, quocumque demum modo Propositiones efferantur; semper debent esse planissimæ, clarissimæ, intellectu perfaciles: verbis, quam fieri potest per paucis, propriisque constare. Vitanda est in illis omnis affectata sublimitas ac obscuritas, omnes allegoriæ & Antonomasiæ pueriles. Id & omnia Ciceronis præcepta docent, & omnes ejusdem Propositiones probant, & convincent:

CA-

## CAPUT II.

## DE NARRATIONE.

**N**arratio Oratoria definitur à Cicerone: rerum explicatio, & quædam quasi sedes, ac fundamentum constituendæ fidei.

Quintilianus Lib: 4. Cap. 2. Duplicem esse plex tradit: Unam ipsius cauæ; Alteram rerum ad causam pertinentium. Narratio causæ, seu expositio rei, de qua status est, fit simpliciter, sine arte & amplificatione. Ut est hæc Miloniana: *Milo autem, cum in Senatu fuisset eo die, quoad Senatus dimissus est, dominum venit; calceos & vestimenta mutavit, paupisper, dum se uxor (ut sit) comparat, commoratus est &c.* Narratio vero rerum, quæ pertinent ad causam, fit ornata & copiose: habetque saepe probationis vim. Ut est eadem Miloniana ab illo loco: *Obviam fit ei Clodius, usque ad finem. Similis est Narratio pro Lege Manilia, simplex nimirum: de genere & magnitudine belli; ornata & copiosa, de deligendo Imperatore.*

## §. I.

## De Virtutibus Narrationis.

**N**arrationis dotes quatuor à Tullio recentur: Perspicuitas, probabilitas, brevitas, & favitas.

Narratio perspicua fiet *imo*. Si temporum servetur ordo adeo, ut quod primum, gestum rationis? *Quomodo fiet* est

Quid est  
Narratio?  
Quotu-  
tio Ora-  
toria?

Quotnam  
sunt vir-  
tutes sive  
dotes nar-  
ratoris?

+  
perspi-  
cua  
Narrati-  
o?

est, primum etiam referatur. 2do Si verbis propriis & usitatis utamur. 3to Si res non interrupte narretur. 4to Denique si diligenter vitetur omnis verborum ambiguitas, qualis esset ista: *Ajunt Regem Pyrrhum Romanos viciisse*. Ex qua quis victor, quis victus sit, nemo intelliget. Quantum porro eniti, ac contendere debeat Orator, ut perspicue narret & aperte, facile intelligere poterit ex aureo illo Quintiliani præcepto: *Prima sit Orationis virtus perspicuitas . . . Dilucida & negligenter quoque audientibus aperata sit . . . ut in animum, tanquam sol in oculos, etiam si non intendatur, incurrat. Quare non ut intelligere possit Auditor, sed ne omnino possit non intelligere, curandum.*

Ita Cicero Catilinaria III. Nro 3. utitur aperta Narratione atque dilucida, rebus, personis, temporibus, locis distincta.

### §. II. *De probabilitate Narrationis.*

+  
Quomo-  
do fiet  
proba-  
bilis  
Narrati-  
o?

Probabilis fiet narratio *imo*. Si is, qui narrat, sit notæ probitatis & fidei. 2do. Si rei gestæ seriem exponat sine fuso; quia simplicitate nimicum, atque candore plus longe valebit ad persuadendum, quam calamistris, lenociniis, & hyperbole. 3to Si nihil adferat fidei absonum, & quod abhorreat à communi hominum sensu. Quodsi forte rei vere, sed incredibili fidem facere velis, usurpare poteris sapiens illud cuiusdam veteris Authoris dictum: *Multa esse vera, quæ tamen non sunt veri similia, & probabile*

bile omnino esse, quam plurima contra probabilitatem contingere. 4to. Denique si clare aperteque exponas rerum circumstantias, & adjuncta personarum, locorum ac temporum; unde vel maxime pendet facti probabilitas. Ita Cicero pro Roscio Amerino: Nro 39. Patrem occidit Roscius, qui homo? Adolescentulus corruptus, & ab hominibus nequam induitus? Annos natus magis quadragesita, vetus videlicet sicarius, homo audax, & saepe cœde versatus? at hoc ab accusatore ne dici quidem audistis. Luxuries igitur hominem, & aeris alieni magnitudo, & indonita crimi cupiditas ad hoc scelus impulerunt? De luxuria purgavit Erucius, cum dixit, hunc ne in convivio quidem ullo fere interfuisse. Cupiditates porro, quæ possunt esse in eo, qui, ut ipse Accusator objecit, ruri semper habitarit, & in agro colendo vixerit, quæ vita maxime disjuncta à cupiditate, & cum officio conjuncta. In quo exemplo vide est, quantam faciunt probabilitatem adjuncta Personarum, temporis, ætatis ac loci. Similia exempla habes Pro Quintio Nro II. Pro Archia Poeta: Pro Flacco Nro 21. & pro Milone Numero 25, 45, 54, 57. Docet præterea Quintilianus. Lib: I. Cap I. Ut credibilior fiat narratio, semina quædam probationum spargere, verum sic, ut narrationem esse meminerimus, non probationem ac proinde argumenta probationis adhibenda esse simplicissima & brevissima. Ut si narrares, aliquem oblato sibi à quopiam veneno periisse, dicere posses: *Sanus bibit, statim concidit, livor ac tumor confessim est infuscatus &c.*

§. III.

## §. III.

## De brevitate Narrationis.

*+ Quid fa-* Narratio brevis erit: Si *imo* narrandi ini-  
*lis opus* tium altius, & ab ævo, ut ajunt, non re-  
*est: ut* petas, quemadmodum ineptus ille, quem  
*brevis* ridet Horatius: *Qui gemino bellum Troja-*  
*sit Nar-* *nun orditur ab ævo.* *2do* Si imitiles cir-  
*ratio?* cumstantias, quæ nihil faciant ad rem, in nar-  
*cum* rationem non infarcias. Qualis effet hæc:  
*In partum veni, navem paratam a pexi, de-*  
*pretio conveni, sublatæ sunt Anchoræ, è por-*  
*tu solvi;* satis enim erat dixisse: *è portu sol-*  
*vi,* reliqua nec cognitioni, nec utilitati ser-  
*viunt.*

Vide tamen, ne cum Horatio, dum brevis  
*esse* laboras, obscurus fias, aut aliquid eo-  
*rum,* quæ rem præcesserunt, quæ comitata,  
*quæ* subsecuta sunt, omittas. Ac proinde ob-  
*servandum* est illud Fabii monitum: *Vitan-*  
*du,* inquit ille, *est illa Sallustiana brevitas,*  
*& abruptum orationis genus..... Narratio*  
*undiue præcisa, non tam narratio vo-*  
*cari potest, quam confusio.* Et illud Quintili-  
*ani:* *Non tamen inornata debet esse bre-*  
*vitas, alioquin fit indocta.*

Pro exemplo sit Narratio Philipp: IV.  
*Nro 3. Cæsar adolescens, pene potius puer,*  
*incredibili ac divina quadam mente, atque*  
*virtute, tum cum maxime furor arderet An-*  
*tonii, cumque ille à Brundusio crudelis & pe-*  
*pifer reditus timeretur, nec postulantibus,*  
*nec opinantibus quidem nobis, quod fieri*  
*posse non videbatur, firmissimum exercitum*  
*invi-*

invicto genere veteranorum militum, comparauit, patrimoniumque suum effudit; quamquam non sumus usi eo verbo, quo decuit, non enim effudit, sed in salute Reipublicæ collectavit. In quo exemplo vides brevitatem pulcherrimo cum ornatu coniunctam. Simile exemplum vide Verrina III. Nro 66 ab his verbis: *Invitantur, mature veniunt.* Item Philipp: XIII. Nro 3. ab his verbis: *Hoc vero quid est?*

## §. IV.

## De suavitate Narrationis.

**S**vayis reddetur narratio *imo*. Si efferatur *verbis* leniter & numerose sonantibus. *Qua ratione* *svavis redditur narratio?*

*2do* Si adhibeantur certæ quædam narrandi formulæ Tullio perfamiliares; cum v. g. pro tempore præterito, præsens usurpatur, cum plures infinitivi, subandito verbo, subjunguntur, ut cum ait: *Rex primum nihil metuere, nihil suspicari, dies unus & alter intercedere.* Item cum stylus Narrationis sit per incisa, & non per periodos: cum non eodem tenore, sed parva pressa, magna subtiliter, atrocia invidiose, tristia miserabiliter, læta jucunde efferuntur; quo sit, ut variatio sermonis effugiat tedium, & sine satietate delectet. *3to* Si quæ narramus, sint magna, nova, & inexpectata, hoc est: si narratio habeat admirationes, exitus inopinatos, interpositos motus animorum: ut dolorem, lætitiam, metum, cupiditatem &c. *5to* Si diversis (de quibus in sequenti Libro) figuris illuminetur; harum præcipuae sunt: Hypotypo-

106 ARTIS RHETORICÆ LIB: II.  
posis, Suspensio, sive Sustentatio, Exclamatio,  
& Communicatio. En earum exempla:

imo. Narratio historica per hypotypo-  
sim, ex Livii Lib: I.

*Horatiorum pugna cum Curiatiis.*

„ Datur signum, infestisque armis velut  
„ acies terni juvenes magnorum exercitu-  
„ um animos gerentes concurrunt. Nec  
„ his, nec illis periculum suum, sed publi-  
„ cum imperium servitiumque obversatur  
„ animo: futuraque ea deinde Patriæ fortu-  
„ na, quam ipsi fecissent. Ut primo statim  
„ concursu increpue arma, micantesque  
„ fuisse gladii, horror ingens spectantes  
„ perstringit, & neutro inclinata spe, tor-  
„ pebat vox spiritusque. Consertis deinde  
„ manibus, cum jam non motus tantum, cor-  
„ porum, agitatioque anceps telorum, armo-  
„ rumque; sed vulnera quoque, & sanguis;  
„ spectaculo essent, duo Romani super ali-  
„ um alius, vulneratis tribus Albanis, ex-  
„ pirantes corruerunt. Ad quorum casum  
„ cum clamasset gaudio Albanus Exercitus,  
„ Romanas legiones jam spes tota, nondum  
„ tamen cura deseruerat, exanimis vice  
„ unius, quem tres Curiati circumsteterant.  
„ Forte is integer fuit, ut universis solus  
„ nequaquam par, sic adversus singulos fe-  
„ rox. Ergo ut segregaret pugnam eorum,  
„ capessit fugam, ita ratus secururos, ut  
„ quemque vulnera affectum corpus sine-  
„ ret. Jam aliquantum spatii ex eo loco,  
„ ubi pugnatum est, aufugerat, quum respi-  
„ ciens, videt magnis intervallis sequentes;  
unum

„ unum haud procul ab sepe abesse; in  
„ eum magno impetu redit. Et dum Alba-  
„ nus exercitus inclamat Curiatiis, ut opem  
„ ferant fratri, jam Horatius cæso hoste vi-  
„ ctor secundam pugnam petebat; tum clা-  
„ more, qualis ex insperato faventium so-  
„ let, Romanū adjuvant militem suum, &  
„ ille defungi prælio festinat. Prius itaque  
„ quam alter, qui nec procul aberat, con-  
„ sequi posset, & alterum Curiatum confi-  
„ cit. Jamque æquato Marte singuli supe-  
„ rerant, sed nec spe, nec viribus pares;  
„ alterum, intactum ferro corpus & gemi-  
„ nata victoria serocem in certamen ter-  
„ tium dabant: alter fessum vulnere, fessum  
„ cursu trahens corpus, vietusque fratrum  
„ ante se strage, victori objicitur hosti; nec  
„ illud prælium fuit. Romanus exultans,  
„ duos, inquit, fratrum Manibus dedi, ter-  
„ tium, causæ belli hujuscce, ut Romanus Al-  
„ bano imperet, dabo. Male sustinenti ar-  
„ ma gladium superne jugulo defigit: ja-  
„ centem spoliat. Romani ovantes ac gratu-  
„ lantes Horatium accipiunt, eo majore cum  
„ gaudio, quo prope metum res fuerat.

Vide, quam vivis, spirantibusque, ut ita  
loquar, coloribus hæc narratio pingitur, magis-  
que spectari, & oculis quasi subjici, quam  
audiri, vel legi videntur.

Narrationis Oratoriæ per hypotyposim  
invenies exemplum Verrina VII. Nro 160. &  
161. Cædebatur virginis &c. Item Tusculano-  
rum Lib: 5. De Damocle Dionysii Siracusarum  
Tyranni Parasito pulcherrimam leges narra-  
tionem historicam. Cum quidam ex absentia-  
toribus Damocles &c.

+ 2do Usurpatur plerumque in narrationibus suspensio, sive sustentatio, qua Orator ad sibi conciliandam attentionem, & ad excitandos Auditorum animos, illos tenet aliquandiu suspensos & incertos, quid dicturus sit. Ita Cicero Verrina VII. Nro 10. *Etiamnum mihi expectare videmini, Judices, quid deinde saltum sit?.. Quid deinde? quid cœsetis? furtum fortasse, aut prædam expectatis aliquam? Nolite usque quoque eadem querere... Expedite facinus, quam vultis improbum: vincam tamen expectationem omnium &c.*

3to Interciduntur saepe Narrationes exclamationibus ad motum vehementissimis. Illustris est illa pro Cluentio Nro 15. De Saffia Matre, ubi Cicero inter narrationem hæc interserit: *O Mulieris scelus incredibile, & præter hanc unam in omni vita inauditum! o libidinem effrænatam & indomitam! o audaciam singularem! non timuisse, si minus vim Deorum, hominumque famam, at illam ipsam noctiem, facesque illas nuptiales, non limen cubiculi, non parietes denique ipsos superiorum testes nuptiarum. Perfregit, ac prostravit omnia cupiditate ac furore: vicit pudorem libido, timorem audacia, rationem amentia &c.*

+ 4to. Valet denique plurimum in amplificandis & ornandis Narrationibus Communicatio, qua Orator, causæ suæ confidens, deliberat cum illis ipsis, apud quos, vel contra quos dicturus est, illos nimirum consilens, quid acturus sit, vel etiam quid ipsimet in simili causa essent acturi. Ita Cicero Verrina VII. Nro 15. per summam fiduciam vi-

de-

detur consilia sua communicare cum Adversario tuo Verre, illumque quasi consulere in hunc modum: *Si tu apud Persas, aut in extrema India deprehensus Verres, ad supplicium ducerere, quid aliud clamitares, nisi te civem esse Romanum?* & si tibi ignoto apud ignotos, apud Barbaros, apud homines in extrenis atque ultimis gentibus positos, nobile & illustre apud omnes nomen tuæ Civitatis profuisset: ille, quisquis erat, quem tu, in crux rupiebas, qui tibi esset ignotus, cum Civem se Romanum esse diceret, apud te Prætorum, si non effugium, ne moram quidem mortis, mentione atque usurpatione Civitatis asequi potuit. Simile exemplum vide pro Cluentio Nro 51. *Si de prædiis tuis ageretur &c.*

Narrationis genus triplex est: alia est enim Narratio Poetica, alia Historica, alia Civilis & Oratoria. Narratio Poetica rem fictam exponit; Historica rem gestam. Civilis & Oratoria rem exponit, quæ quandoque in controvèrsiam adducitur.

Inter tria hæc Narrationis genera, hoc primum intercedit discriimen: quod Historicus & Orator ordinem temporis, & rei gestæ seriem in narrando sequantur, & servent, contra, quam facit Poeta, qui etiam à fine, aut à medio rem solet ordiri. 2do. Quod Historicus veritatem consecetur, Orator veri similitudinem; Poeta vero commentitiis etiam fabulis veritatem aspergat. 3to Quod Historica Narratio sit ferme simplex, brevis ac nuda: Oratoria sit ornatiō & fusior: Poetica vero ornamentis abundet & omni-

& omnibus artis coloribus piëta sit atque polita.

*Quando* In genere Judiciali, opus est semper Narratione historica: similiter in genere Demonstrativo utendum est frequenter Narrationibus historicis, verum curandum, ne enti debet narratorem? xili filo, sed ornate & magnifice pertexantur. In genere vero Deliberativo, ordinarie locum habent Narrationes Oratoriæ, & plerumque eorum vices obit ipsa generalis propositio.

---

## CAPUT III.

### DE CONFIRMATIONE.

*Quid est Confirmatio?* Confirmatio est illa pars Orationis, in qua firmamenta, seu robora causæ afferuntur. *Quot sunt partes Confirmationis?* Confirmationis partes duæ sunt: *1ma* Est Confirmatio proprie dicta, in qua ea, quæ pro nobis sunt, firmamus ac stabilimus. *2da* Est Confutatio, in qua contrarias Adversariorum rationes refellimus. Hinc liquet, Confirmationem esse præcipuam ac potissimum Orationis partem, totamque persuadendi spem in ea unice sitam esse. Unde etiam Confirmatio ab Aristotele *fides* nuncupatur.

*Quomodo tractatur Confirmatio?* Confirmatio tractatur per Argumenta, & argumentationes. Est autem Argumentum probabile inventum ad faciendam fidem. *Unde pertinet Argumentatio?* Argumentatio vero, est fusior & artificiosa ipsius argumenti dilatatio.

*Unde pertinet Argumentatio?* Argumenta sive rationes, quibus Orator propositionem suam confirmat, petuntur à

locis Oratoriis tum intrinsecis, tum extrinsecis, de quibus dictum est à nobis Libr: I.

Argumenta firmiora partim in principio collocanda sunt; quia tunc vel maxime attendit Auditor; partim in fine, quia quæ postremo dicuntur, altius inhærent; imbecilliora vero collocanda sunt in medio; ut ita magis eorum lateat infirmitas.

Quatuor sunt præcipuae argumentationum species, seu modi, quibus tractari solent Argumenta. Scilicet: *Syllogismus* seu *ratiocinatio*, *Enthymema*, *Inductio*, *Dilemma*. His adde Soritem & Epicherema.

## §. I.

De *Syllogismo*.

**S**ylogismus est argumentatio ex duabus propositionibus conclusionem necessario inferens. v. g. *Omnis ars honesta est amplectenda*; *Rhetorica est ars honesta*; *Ergo Rhetorica est amplectenda*.

Prima Syllogismi propositio dicitur Major, seu simpliciter propositio; quoniam id proponit, in quo est vis ad probandum. Talis est in adducto Syllogismo hæc: *Omnis ars honesta est amplectenda*.

Secunda vocatur Minor, seu assumptio; quia aliquid assumit ex prima ad probandum conclusionem. Talis est hæc altera in eodem syllogismo: *Rhetorica est ars honesta*, assumit enim ex Majore: *est ars honesta*; Conclusio seu complexio est ipsa quæstio illata ex superioribus, scilicet Majore & minore. Ut hæc: *Ergo Rhetorica est amplectenda*.

menta  
ad con-  
firman-  
dum i-  
donea?  
Quo or-  
dine col-  
locanda  
sunt ar-  
gumen-  
ta in  
confir-  
matio-  
ne?  
Quot  
sunt ar-  
gumen-  
tationum  
species?  
Quid est  
*Syllogis-  
mus* seu  
*Ratioci-  
natio*?

*Quotplex est syllogismus?* Syllogismus duplex distinguitur, alius Philosophicus, alius Oratorius. Syllogismus Philosophicus est argumentatio constans tribus propositionibus distinctis & explicatis, quæ sic inter se connectuntur, ut concessis duabus primis, nempe majore & minore, necessario concedenda sit tertia; quæ consequentia dicitur. v. g. *Sapiens est ille, qui sapienter loquitur, & sapienter tacet. Sed qui tacenda loquitur, & dicenda tacet, neque loquitur neque tacet sapienter. Ergo sapiens non est.*

Syllogismus Oratorius est Ratiocinatio constans quinque partibus, certo inter se ordine connexis, quas ita recenset Tullius Libr: I. de Inventione Nro 67. Quinque sunt igitur partes ejus argumentationis, quæ per Ratiocinationem trahantur: *Propositio*, per quam breviter locus is exponitur, ex quo vis omnis oportet emanet ratiocinationis: *Propositionis approbatio*, per quam id, quod breviter expositum est, rationibus affirmatum, probabilitus & apertius sit. *Assumptio*, per quam id, quod ex Propositione ad ostendendum pertinet, assumitur. *Assumptionis probatio*, per quam id, quod assumptum est, rationibus probatur: *Complexio*, per quam id, quod conficitur ex omni argumentatione, breviter exponitur.

Hæc sunt igitur Syllogismi Oratorii partes. *1ma* *Propositio*. *2da* *Propositionis probatio*. *3ta* *Assumptio* *4ta* *Assumptionis probatio*. *5ta* *Complexio*, sive *Conclusio*. En insigne hujus argumentationis exemplum ex eodem Libro Ciceronis.

Melius accurantur, quæ consilio geruntur, quam quæ sine consilio administrantur.

Domus ea, quæ ratione regitur, omnibus præpositior est rebus & apparatiōnēs, quam ea, sitionis quæ temerè & nullo consilio administratur, probat.

Exercitus is, cui præpositus est sapiens & tio. callidus Imperator, omnibus partibus commodius regitur, quam is, qui stultitia & temeritate alicujus administratur. Eadem navigii ratio est; nam navis optime cursum conficit ea, quæ scientissimo gubernatore uitatur.

Nihil autem omnium rerum melius, quam mundus administratur.

Nam & signorum ortus & obitus definitum quendam ordinem servant, & annuae commutationes non modo quadam ex necessitate semper eodem modo fiunt: verum ad utilitates quoque rerum omnium sunt accommodatae: & diurnæ nocturnæque vicissitudines, nulla in re unquam mutatae, quidquam vocuerunt.

Quæ signa sunt omnia, non mediocri quodam consilio naturam mundi administrari.

En quam copiose Cicero pertractat, quod philosophus jejune in hunc fere modum disseret:

Illud Divina providentia administratur, quod optime administratur. Sed Mundus optime administratur. Ergo Mundus Divina providentia administratur.

Aliud exemplum dabit Oratio pro Lege Manilia Nro 47. ubi hanc Philotophicam

Affum-  
ptio.

Affum-  
ptio.

Comite-  
xio five  
Conclu-  
sio.

argumentationem: in diligendo Imperatore non bellicæ tantum virtutis, sed etiam felicitatis ipsius ratio habenda est. Sed Pompejus bellicam virtutem cum felicitate consociat. Ergo Pompejus est Imperator diligendus. ita Cicero conficit Ratiocinatione Orationaria:

*Propositiō.* Ego sic existimo, Maximo, Marcello, Scipioni, Mario, & cæteris magnis Imperatoribus non solum propter virtutem, sed etiam propter fortunam sc̄pius imperia mandata atque exercitus fuisse commissos.

*Propositiōnis probatio.* Fuit enim profecto quibuscdam summis Viris quædam ad amplitudinem, & gloriam, & ad res magnas bene gerendas divinitus ad juncta fortuna.

*Affumptionis probatio.* De hujus autem hominis felicitate, qua dū nunc agimus, hic utar moderatione dicendi, non ut in illius potestate fortunam positam esse dicam, sed ut præterita meminisse, reliqua sperare videamus; ne aut invisa Diis immortalibus oratio nostra, aut ingratia videatur.

*Affumptionis probatio.* Itaque non sum prædicaturus, Quirites quantas ille res domi militiæque, terra mari que, quantaque felicitate gesserit: ut ejus semper voluntatibus non modo Cives assenserint, socii obtemperarint, hostes obedierint, sed etiam venti tempestatesque obsecundarint. Hoc brevissime dicam, neminem unquam tam impudentem fuisse, qui à Diis immortalibus tot & tantas res tacitus auderet optare; quod & quantas Dii immortales ad Cn: Pompejum detulerunt.

Qua-

Quare, cum bellum ita necessarium sit, <sup>Complexio.</sup>  
ut negligi non possit: ita magnum, ut accu-  
ratissime sit administrandum: Et cum ei Im-  
peratorem praeficere possitis, in quo sit exi-  
mia belli scientia, singularis virtus, clarissi-  
ma auctoritas, egregia fortuna; dubitabitis,  
Quirites, quin hoc tantum boni, quod à Diis  
immortalibus oblatum Et datum est, in Rep-  
ublicam conservandam, atque amplificandam  
conferatis?

Similiter in Miloniana hoc instituit ar-  
gumentum, quod ratiocinatione perfecta di-  
lata, atque exornat: *Licet occidere insidi-  
atorem; Clodius fuit insidiator; Ergo licuit  
Clodium occidere.*

Nam Propositionem: *Licet occidere insi-  
diatorem*, primum exponit eandemque pro-  
bat multis exemplis à Nro 7. ad 23.

Deinde dilabitur ad Assumptionem, nem-  
pe: *Clodius fuit insidiator*. Cujus probatio-  
nem alert in tota cædis narratione, quam  
ita comparat, atque instruit, ut ex singulis  
rerum adjunctis appareat, Clodium fuisse in-  
sidiatorem, à Nro 24. ad Nrum 32.

Sequitur Complexio, qua concludit, jure  
Clodium occisum fuisse.

Atque tria hæc Ciceronianæ argumen-  
tationis exempla, ut exactam & perfectam  
ad traditas supra leges Ratiocinationem re-  
ferunt, sic expeditam ad similes alias confi-  
ciendas monstrant viam.

Syllogismum Oratorium nequaquam ne-  
cessum est, semper quinque constare partibus.  
Si enim perspicua est vel Propositio, vel Af-  
fumptio; tunc illius probatio omittitur. Ita

*An sem-  
per  
qui-  
que it-*

Ci-

*tis par-tiis* ARTIS RHETORICÆ LIB: II.  
*tibus* Cicero Philippica VII. Nro 9. Qua pacem  
*consta-* cum Antonio nullam esse posse disputat  
*re debet* hanc ponit Propositionem: Nulla pax turpis  
*Syllo-* Populo Romano cum ullo mortalium esse  
*gismus* Crato- debet; cui propositioni, utpote per se nota  
*rius?* nullam probationem subjicit; sed statim ad  
assumptionem descendit: at cum Antonii  
pax nulla, nisi turpis esse potest; hancque  
pluribus probat Nro 10. 13. 14. Tandem con-  
cludit: alienos ab hac pace omnium animo  
esse oportere.

*Sem-* Philosophus semper tres Syllogismi Pro-  
*por ne-* positiones eo ordine collocat, ut primum  
*positus* semper locum Major, Minor alterum, ter-  
*parti-* tium Conclusio occupet; eumque ordinem  
*um Or-* formam appellat. Oratoris autem pleru-  
*do in-* que in eo posita est industria, ut eum ordi-  
*syllo-* nem invertat, tum ut artem suam tegat, tum  
*gi-* ut continuam argumentationis similitudinem  
*fma for-* quæ satietatis mater est, evitet. Quemadmodum dicit Cicero Libro 2 De Oratore  
*vandus?* Tractatio autem varia esse debet, ne aut cognoscat artem, qui audit, aut defatigetur  
similitudinis satietate. Integrum itaque erit  
Oratori, primo loco assumptionem & ipsius  
Probationem: tum Propositionem cum sua  
probatione in argumentatione collocare: at  
etiam à probatione vel Propositionis vel ad  
sumptionis, imò etiam ab ipsa complexione  
initium argumentationis sumere. Sic Ciceron  
desensurus Roscium Amerinum, hunc syllogismum conceperat:

*Propo-* Quicunque parricidii suspectus est, is ad  
*fitio.* dacissimus, sceleratissimusque sit oportet. Pro-  
batio Propositionis: est enim hoc crimen eorum.

norme tum testimonio naturæ, tum præjudicio judicium & decretis suppliciis

Hujus notæ non est Roscius Amerinus. *Affum-*  
Probatio Assumptionis: non enim est audax,<sup>p. 2.</sup>  
non luxuriosus, non avarus,

Ergo non est de parricidio suspectus.<sup>Com-</sup>  
Verum in dispositione & elocutione hu-<sup>plexio.</sup>  
jus argumenti à probatione Propositionis  
orditur hoc modo.

Occidiſſe Patrem Sex: Roscius arguitur.  
Sceletum. Dii immortales! ac nefarium fa-  
cinus, atque ejusmodi, quo uno maleficio sce-  
lera omnia complexa eſe videantur. Etenim  
si vultu ſæpe lreditur pietas, quod ſupplicium  
ſatis acre reperietur in eum, qui mortem  
obtulerit Parenti, pro quo mori ipsum, si  
res poſtularet, jura Divina atque humana  
cogebant.

Deinde ponit Propositionem.

In hoc tanto, tam atroci, tam singulari  
maleficis, quod ita raro extitit, ut si quando *Propo-*  
*sitio.*  
auditum sit, portenti ac prodigii ſimile nu-  
m̄eretur; quibus tandem te, C. Eruci, argu-  
mentis accusatorem censes uti oportere? non-  
ne & audaciam ejus, qui in crimen vocatur,  
singularem offendere: mores feroci, imma-  
nemque naturam, & vitam vitiis flagitiisque  
deditam, & denique omnia ad perniciem pro-  
fligata atque perdita?

Quorum tu nihil in Sex: Roscium, ne obji-  
ciendi quidem cauſa contulisti. *Affum-*  
*ptio.*

Patrem occidit Sextus Roscius. Qui ho-  
mo? Vide reliqua Capite II. §. II. hujus  
Libri *Proba-*  
*tio af-*  
*fumpti-*  
*onis.*

*Complexio.* Quæ res igitur tantum istum furorem  
Sexto Rofcio objicit?

Exemplum secundum suppeditat Catilinaria I. Ubi Cicero hanc argumentationem proponit:

Omnis perniciosus Civis occidendum est; nam exempla majorum hoc probant. Sed Catilina est perniciosus Civis; nam est conjurator. Ergo Catilina jure occidendum est.

Sic vero in Eloctione ordinem invertit, & incipit à probatione minoris sive assumptionis. *Quousque tandem abutere Catilina patientia nostra?... Patere tua consilia non sentis?... Quid proxima, quid superiore nocte egeris, ubi fueris, quos convocaveris? &c.* Tum statim infert complexionem. *Ad mortem te Catilina jam pridem duci oportebat &c.* Denique inferius subjungit Majorem, sive Propositionem: *Fuit, fuit quondam illa virtus, ut Majores nostri, suppliciis acroribus perniciosum Civem, quam hostem coercent.*

Plura ejusmodi artificiosæ immutationis exempla in plurimis Tullii orationibus invenies; hoc in universim observa: Quo cautiis turbatur ordo argumentationis; eo tutior erit usus artificij.

### §. II.

#### *De Enthymemate.*

*Quid est Enthymema?* **E**nthymema est ratiocinatio imperfecta, cui deest alterutra ex primis propositionibus Syllogismi.

En-

Enthymema duas habet partes, quarum una vocatur Antecedens; altera Consequens. v. g. *Omnis artes sunt expetendæ, Ergo Eloquentia est expetenda.*

*Quomo-  
do sit  
Enthy-  
mema?*

Fit Enthymema omittendo vel Propositionem, vel assumptionem; sive, ut Logici loquuntur, omittendo majorem vel minorem, sic in dicto exemplo omissa est minor, nempe haec: *Sed Eloquentia est Ars.* Hanc si restitueris, ex imperfecta Ratiocinatione perfectam efficies, scilicet: *Omnis Artes sunt expetendæ; sed Eloquentia est ars; Ergo est expetenda.*

Ratio tractandi Enthymematis duplex est: *Quæ-  
rima Si contrahantur duæ partes in unam.* nam est ratio *Habes hujus exemplum pro Milone Nro 41.* tractan-  
*Ubi duas partes hujus Enthymematis: Mi-* di En-  
*lo non voluit occidere Clodium, cum potuit thyme-  
id impune facere: Ergo non est credendus matis?*  
*id voluisse, cum exequi sine summo suo pe-  
riculo non potuit. Cicero sic contrahit in*  
*unum: Quem igitur cum omnium gratia no-  
luit, hunc voluit cum aliquorum querela?  
quem loco, quem tempore, quem impune non  
est ausus, hunc injuria, iniquo loco, alieno  
tempore, periculo capitatis non dubitavit oc-  
cideri?*

Altera ratio tractandi Enthymematis est, si utraque ejus pars fusius explicetur. Sic Cicero pro eodem Milone, utramque hujus Enthymematis partem: *Nolle Clodium vi-  
vere; Ergo non debetis eum afficere pæna,* qui clodium occidit, sic fusius explicat Nro 79. *Quoniam modo vos ille vivus afficeret,  
qui mortuus inani cogitatione percussit? quid*  
*sp ipse*

*si ipse Cn. Pompejus, qui ea virtute ac sapientia est, ut ea potuerit semper, quæ nemo præter illum, si is inquam potuisset, ut de Clodii morte quæstionem ferre, sic eum ab inferis excitare: utrum putatis facturum fuisse? Etiam si propter amicitiam vellet illum ab inferis revocare; propter Rempublicam non fecisset. Ejus igitur mortis sedetis ultores, cujus vitam si putetis per vos restituiri posse, nolleatis. Et de ejus nece lata quæstio est, qui si eadem lege reviviscere posset, lata lex nunquam esset . . . .*

*Cur En-* Tribus potissimum de causis Enthymemate sæpius utuntur Oratores, quam Syllogismo. *Ima* Est, ut occultent artificium. *odo* Ut ne in locis communibus ianum vagetur Orator; utpote cum unius tantum antecedentis probationes in Enthymemate adferantur. *3tia* Ut validius percellant Adversarios, illosque punctim, ut ajunt, cæsimque feriant. Unde etiam Enthymema *Faculum ac telum* Oratoris vocari solet. Vide quomodo Tullius Enthymemate feriat Antonium Philippica V. Nro 3.

*Pacem vult Antonius? Arma ponat, roget, deprecetur; neminem æquiorem me repcriet . . . Nihil est profecto, quod dari possit bellum gerenti, erit fortasse aliquid, quod concedi possit roganti. Quasi diceret: Non arma ponit Antonius; Ergo non vult pacem.*

### §. II.

#### *De Inductione.*

*Quid est Inductio?* Inductio est argumentatio, quâ ex multis singularibus enumeratis, Propositio universalis infertur. Sic

Sic Seneca magnifica variarum rerum enumeratione, concludit solam in homine virtutem esse laudandam: *Navis bona dicitur, non quœ prius coloribus picta est, nec cui argenteum, aut aureum rostrum est; sed quœ ficiabilis est, firma, velox, & consentiens vento. Gladium bonum dices, non cui deauratus est balteus, nec cui vagina geminis distinguitur; sed cui ad secundum subtilis est acies. Regula non quam formosa, sed quam recta sit queritur. Ergo in homine quoque, nihil ad rem pertinet, quantumaret, à quam multis salutetur; sed quam bonus sit.*

Ratio tractandæ Inductionis triplex est, Quæ-  
nam est  
ratio  
tractan-  
dæ in-  
ductio-  
nis?  
**1mo** Fit Inductio enumeratione partium sub uno genere. v. g. Prudentia, justitia, fortitudo, temperantia laudanda est. Ergo omnis virtus est laudanda.

**2do.** Fit Inductio plurium similitudinum, seu comparationum congestione. Sic Cicero dum probare conatur: *Ad novos casus temporum, novorum consiliorum rationes esse accommodandas; plurima recentlet, tum ex veteribus petita, ut Scipionem Africanum, in quo nova multa constituta fuerant: tum ex recentioribus, ut Marium; deinde quæ in ipso Pompejo constituta sunt, ut concludat à similibus & comparationibus contra Catullum pro Lege Manilia Nro 61. In ipso Cn. Pompejo, in quo novi nihil constitui vult Q. Catullus, quam multa sunt nova, summaque Catulli voluntate constituta, recordamini. Quid tam novum, quam Adolescentulum privatum, exercitum difficile Reipublicæ tempore confidere? confecit; huic præesse? præfuit; rem.*

*rem optime ductu suo gerere? gesit. Quid tam præter consuetudinem, quam homini per adolescenti, cuius à Senatorio gradu ætas longe abesse, Imperium atque exercitum dari? Siciliam permitti, atque Africam, bellumque in ea administrandum? Fuit in his Provinciis singulari innocentia, gravitate, virtute, bellum in Africa maximum consecit, victorem exercitum deportavit. In quo exemplo observa, (quod ab omnibus commendatur;) optimum esse illud Inductionis genus, quod per vibratas interrogations & Antitheta tractatur.*

*3tio Fit induc̄tio per Congeriem plurium exemplorum, ut Cicero eleganter Paradoxo I. Romulus fratrem secum regnarem ferre non potuit, neque Pompejus Cæsarem, nec Augustus Antonium; Ergo nullus æquo animo fert consortem Imperii.*

Fit etiam Inductio, cum ab uno simili ducitur argumentum ad aliud; verum hæc est induc̄tio imperfecta, vocarique solet Exemplum. Cujusmodi habes in Miloniana, ubi probat Tullius: non esse condemnandum Milonem, quod Clodium occiderit: cum nec Horatius ob sororem necatam fuerit condemnatus. Sic autem exemplum hoc illustrat: Negant intueri lucem fas esse ei, qui à se hominem esse occisum fateatur. In qua tandem urbe hoc homines stultissimi disputant? nempe in ea, quæ primum judicium de capite vidit M. Horatii fortissimi viri, qui nondum libera Civitate, tamen Populi Romani comitiis liberatus est, cum sua manu sororem esse interfactam fateretur.

#### §. IV.

§. IV.  
*De Dilemmate.*

**Dilemma** est argumentum constans duabns partibus, quæ utrumque adversarium capiunt. Sic Medea Creonti: *Si judicas? cognosce, si regnas? jube.* Pulcherrimum est illud Dilemma, quo Tertullianus purgat Christianos, & inculcat Trajanum, qui illos conquiri vetuerat, oblatos vero puniri iussierat:

*Negat inquirendos ut innocentes, & mandat puniendos ut nocentes. Parcit, & saevit, dissimulat, & animadvertisit. Quid temetipsum censura circumvenis? Si damnas, cur non & inquiris? Si non inquiris, cur non & absolvis?*

Duplex est ratio tractandi Dilemmatis, *prima*: cum utraque ejus propositio nude & sine ullo ornatu effertur. Tale est illud Ciceronis Philip. V. Nro 15. *Legatos decernitis? Si ut deprecentur? contemnet: Si ut imperetis? non audiet.*

Altera ratio tractandi dilemmatis, cum amplificatione figurata utraque illius pars exornatur.

Sic Cicero Verrina I. probat Cæciliū non esse idoneū Verris accusatorem hoc dilemmate, Nro 31. *Tu Cæcili, quid facies? utrum hoc tantum crimen prætermittes? an objicies? si objicies, id ne alteri criminī dabis, quod eodem tempore, in eadem Provincia tu ipse fecisti? Audebis ita accusare alterum, ut quo minus tute condemnare, recusare non possis? Sin prætermittes, qualis erit ista*

*ista tua accusatio, quæ domestici periculi metu, certissimi & maximi criminis non modo suspicionem, verum etiam mentionem pertimescat?*

Plura hujusmodi Dilemmata invenies Philip: II. Nro 31. Verrina IV. Nro 155. In Pison: Nro 56. Pro Corn: Balb: Nro 13.

*Quo ratione solvit Dilemma? Si totum Dilemma reterqueas in adversarium. Tale est celeberrimum illud Protagoræ Rhetoris cum suo versipelli discipulo, in Areopago contendentis. Cum enim se illius disciplinæ quidam adolescens tradidisset, grandemque pecuniae summam illi ex pactione suisset. pollicitus ea lege, ut primam omnium, quam esset habiturus, litem obtineret: Discipulus plane ac perfecte præceptis artis eruditus, mercedem Magistro omnino negat. Litem itaque ei sic intendit Magister.*

*Debes, inquit, omnino mercedem, quo res cunque vertant. Si enim vicero? debes ut condemnatus. Si viceris? debes ex pædo. Dilemma hoc ita invertit Discipulus versipellis: Imo, inquit, quo res cunque vertant, nihil habebis. Si enim causam vicero? ex judicum sententia nihil debeo; si vero causa cado? jam tibi ex pæcis debeo nihil.*

Altera ratio diluendi dilemmatis est, cum aut una duntaxat illius pars infirmatur, aut ostenditur aliquid medium inter duas illius propositiones intercedere. Sic cum servus quidam ab herbo suo percussus, hoc illum repentino dilemmate petiisset:

*Si sum improbus, cur mea uteris opera? Si probus, cur, aut quorū tandem me per-*

*entis?* Hujus alteram partem sic diluit Herus: *Non te percutio quia probus es; sed ut ex improbo fias aliquando próbus.*

Similiter in hoc Dilemmate Ciceronis: *Mortem non esse timendam ex eo, quod animus vel pereat cum corpore, vel post mortem aeternum beatus est futurus;* ostendere poteris, intercedere medium, ~~non~~: *Animum post mortem corporis posse esse perpetuo infelicem & miserum.*

## § V

*De Sorite & Epicheremate.*

*Quid est  
Sorites?*

Sorites est series & veluti catena multarum propositionum, ex quibus, gradatim & acervatim collectis, eruitur aliqua conclusio. Ita Cicero per Soritem probat id solum esse bonum, quod est honestum, Quæstionum Tusculæ Lib: V. Nro 45. Etenim quidquid est, quod bonum sit, id expetendum est: quod autem expetendum, id certe approbandum: quod vero approbaris, id gratum appetumque habendum; ergo etiam & dignitas ei tribienda est; quod si ita est, laudabile sit neceſſe est. Bonum igitur omne laudabile est; ex quo efficitur, ut, quod sit honestum, id sit solum bonum.

Nota: hoc argumentandi genus plurimum valet ad amplificationem Conclusionum; si rebus antea probatis, in unam veluti catenam multæ argumentiones coacervantur. Exemplum, in quo te exerceas, sit sequens: *Prodigiis juvenibus Curatores dandi sunt a Principe; nam prodigentia ipsorum maximo est*

*est damno humanæ societati.* Ad quod probandum has poteris coacervare Propositiones: Propositio *1ma* Juvenes in libertatem emancipati, siueque juris domini facti, prudenter, quæ seris nonnisi annis venit, carent: in vitia proni sunt, adulatoribus & parasitis stipantur, eisque se totos dedunt. *2da* Hi adulatores persuadent juvenibus, eos esse opulentos & divites, ac proinde lautissime illis esse vivendum. *3ta* Sic persuasi juvenes, Conviviis, voluptatibus, luxui vestrum, ludis, equis, canibus indulgendo, pecuniam prodigunt. *4ta* Reditibus propriis in hæc exhaustis, debita contrahunt, & Patrimonia onerant. *5ta* Contractis debitibus & oneratis Patrimonii in egestatem incident. *6ta* Egestate pressi, eam, quam cepere vivendi rationem, quibusunque demum etiam indignissimis & omnino illicitis modis continuant; hinc ad vicinorum boha & pagos jura sibi causasque configunt, creditores exagitant, denique ad seditiones, imo ad bella etiam Civilia vehementer aspirant, in iisque future melioris fortunæ spes suas collocant. Hæ omnes antecedentes propositiones, quarum una ex alia effluit, quia veræ sunt, verissima etiam est Consequentia: *Ergo prodigentia Juvenum pernitiosa est humanæ Societati, ac proinde prodigiis ejusmodi Juvenibus Curatores sunt dandi.*

Nota secundo: Cavendum esse diligenter, ne in illa serie propositionum admittatur aliqua vel falsa vel ambigua; hoc enim si fiat, tota argumentationis vis corruit, ut exemplo sequenti patebit.

(Cer-

Certum est bibliopolam multos libros frequenter evolvere; qui multos libros frequenter evolvit, multum studet, qui multum studet, procul dubio fit doctissimus; igitur bibliopola est doctissimus.

Patet in hac argumentatione, consequentiam esse falsissimam; idque ex eo, quod vox illa *evolvere* ambiguam patitur significacionem, hoc est: vel scienter & attente legere, vel solis duntaxat manibus versare.

Epicherema est Enthymema contractum, cuius duæ propositiones in unam conferuntur. Ita Cicero Pro Plancio. Nro 49. *Sed cur ego sic ago? quasi non comitiis jam superioribus sit Plancius designatus Aedilis.* Item pro Dejotaro: *Sine causa Dominum servus accusat.* In hac enim una propositione, continentur hæ duæ: Non debet servus temere & sine causa Dominum accusare. Ergo servus Dejotari non debet illum apud Cæsarem incusare.

### §. VI.

#### *De Confutatione.*

Confutatio est illa Confirmationis pars, in qua rationes contra nos pugnantes refellimus.

Locus confutationis varius esse solet in oratione; nonnunquam enim tantum refutamus adversarium, aliquando, postquam confirmavimus propositionem nostram, pergimus ad confirmationem. Denique prius nonnunquam adversarium confutamus; tum deinde causam nostram confiramus. Triplicis

I

hu-

*Quid est  
Epicher-  
rema?*

*Quid est  
Confu-  
tatio?*

*Quoniam  
loco col-  
locanda  
est Con-  
futatio?*

+ hujus collocationis exempla, in variis Ciceronis Orationibus invenies.

*Qui ordo servandus in Confutatione?* Ordo is erit in refellendo, quem adversarius in objiciendo tenuit, maxime ubi in refutatōne tota Oratio versatur; ut in defendendo eo, qui accusatus est, aut in falsis opinionibus oppugnandis. Plerumque tamen in pluribus argumentis refellendis contrarius solet esse ordo illi, quem in confirmatione observamus. Nam primo & ultimo loco infirmissima adversarii argumenta collocari solent, potentissima in medio.

*Quotuplex est modus inducendi et confutandi?* Ex innumeris aliis confutandi modis & tres praecepui sunt sequentes:

*Fit confutatio negatione facti, cum se licet rem allatam ab adversario falsam omnino esse dicimus, aut illam absurdam, incredibilem, repugnantem esse demonstramus.* Sic Cicero pro Quintio rem negat aperte: *Negamus te bona Quintii, Sexte Nevii, postea editio Praetoris.* Sic etiam pro Roscio Nro 39. Postquam probavit, nulla esse in Roscio vitia, quæ illum ad occidendum Patrem suum impellerent; sic confutat adversarium: *Quæ res igitur tantum istum furorem Sexto Roscio objecit? Patri, inquit, non placebat; Patri non placebat? quam ob causam? necesse est enim eam quoque justam, & magnam, & perspicuam fuisse; nam ut illud incredibile est mortem oblatam esse Patri à filio, sine plurimis, & maximis causis; sic hoc verisimile non est, odio fuisse Parenti filium sine causis multis, magnis & necessariis. Rursus igitur eodem revertamur, & quæramus, quæ tanta vitia fuerint in uno*

nico filio, quare is Patri displiceret: at per spicuum est nullum fuisse. Pater igitur amens, qui odisset eum sine causa, quem procrearat. At is quidem fuit omnium constans. Ergo illud jam perspicuum profectio est; si neque amens Pater, neque perditus filius fuerit: neque odii causam Patri, neque sceleris Filio fuisse.

Plura hujusmodi Confutationis exempla vide in Orationibus Ciceronis pro Cælio Nro 55, 56, 58. Pro Cluentio Nro 173. Pro Dejotaro Nro 15.

2do. Fit Confutatio excusatione facti. Cum scilicet factum non negamus, sed aut jure factum fuisse contendimus, aut quod criminis ab adversario vertitur, id virtuti dandum esse ostendimus, aut fatendo crimen, rogamus, ut vel precibus amicorum, vel ipsius personæ accusatæ meritis & officiis venia concedatur. Sic Cicero pro Rabirio Saturnii mortem, quæ illi objiciebatur, adeo non expavescit ut scelus, ut potius illius auctorem exoptet fuisse Rabirium: *Arguis occi- sum esse à C. Rabirio L. Saturnium. Et id C. Rabiri, multorum testimonis, Q. Hor- tensio copiosissime defendantे ante falsum esse docuit. Ego autem si mihi esset inte- grum, susciperem hoc crimen, agnoscerem, confiterer. Utinam hanc mihi facultatem cau- sa concederet, ut possem hoc prædicare, C. Rabirii manu L. Saturnium hostem Populi Rom: interfictum.*

Plura hujusmodi exempla invenies pro Milone Nro 84. Pro Cluentio ab his ver-

bis: Quid? negasne illud judicium esse corruptum? Non. Pro Ligario Nro 36.

**F**3tio Fit confutatio retorsione facti, cum scilicet, aut factum in adversarios detorquemus, & sic suis ipsos ( quod Ciceroni frequentissimum est ) argumentationibus jugulamus: aut alia pari, vel etiam majori re objecta, eosdem laceffimus. Sic Cicero pro Roscio Nro 44. Vides Eruci, quantum distat argumentatio tua abs re ipsa, atque à veritate. Quod consuetudine Patres faciunt, id quasi novum reprehendis; quod benevolentia fit, id odio factum criminaris: quod honoris causa Pater filio suo concessit, id eum supplicii causa fecisse dicis. Neque tu hæc non intelligis, sed usque eo, quid arguas non habes, ut non modo tibi contra nos dicendum putas, verum etiam contra rerum naturam, contraque consuetudinem hominum, contraque opinionem omnium.

Plura ejusmodi exempla invenies eadem Oratione Nro 80. Pro Sextio Nro 47, 84. Pro Rabir: Nro 23. Item pro Ligario probat, quod Tubero accusator Ligarii, in eadem causa fuit, cuius Ligarium accusabat.

Denique utile est nonnunquam in confutatione jocos, sales, & facetias adhibere, quæ si nec in nimiam scurrilitatem degenerent, nec in atrocius maledictum, mirum quantum causæ prosunt, & animos auditorum exhilarant. Sic manifeste constat, non alia re, quam jocorum opportunitate L. Flaccum in manifestissimis criminibus accusatum, severitati judicium à Cicerone ereptum.

Sic idem Cicero in Fannium jocatur Oratione-

tione pro Q. Roscio. Qui id circa capite & superciliis semper est ratis, ne ullum pilum viri boni habere videatur.

Item Erucium Roscii accusatorem hac ironia belissime perstringit; Quæso, Eruci, ut hoc in bonam partem accipias; non enim exprobrandi causa, sed admonendi gratia dicam: si tibi fortuna non dedit, ut Patre certo nascerere, ex quo intelligere posses, qui animus patrius in liberos esset; at natura certe dedit, ut humanitatis non parum haberes.

Ipse etiam Demosthenes, licet grandis magis severusque Orator, quam venustus festivusque videatur; jocis tamen & cavillationibus interdum satis libenter indulxit; quorum duo exempla subjungimus. Cum Demostheni objecisset Æschines, quod inter dicendum manum in sinu contineret, hoc venustissimo ejus sermonem exceptit scommate: Non dedecet, inquit, manum iu sinu habentem concionari; sed dedecet manum in sinu habentem legationem obire. Alludens, quod Æschines auro corrumpi se passus erat in legatione sua ad Philippum Macedoniæ Regem.

Nec minus scite, cum quidam Pitheas, qui ob furti suspicionem male audiebat, exprobrasset, quod ejus Oratio oleum & lucernam redoleret: Scio, inquit Demosthenes, tibi molestos esse, qui nocte lucernam accendunt. Alludens fures tenebras amare.

### §. VII.

*De Usu & venustate Argumentationum.*

Syllogismus, seu ratiocinatio servit exor. *Quis est usus ar-*  
*na-*

gumen-  
tatio-  
num?

132 ARTIS RHETORICÆ LIB: II.

nationi & amplificationi, ubi res ampla dicenda est, ac fuse per theses probationesque explicanda.

Enthymemate sœpissime utuntur Oratores, quia efficax est & breve ad probandum.

Inductio delectat, & est vulgo apta propter similitudines & exempla.

Dilemma utrumque urget, capitque adversarium. Sorites, si sine sophisinate sit, est valida & fortis argumentatio.

Quibus modis redditur venusta redditur argumentatio. *1mo.* Si argumentationes venusta quapiam varietate distinguantur; qua in re mirabilis est Cicero, qui semper ita variat argumentationes, ut dum unum argumentum effert Syllogismo, mox alterum Enthymemate, tertium Sorite, 4tum Inductione, Dilemmate, aut exemplo mirifice efferat.

*2do.* Si singulæ argumentationis partes diversis verborum & sententiarum figuris (de quibus Lib: III, tractabimus) exornentur.

*3to.* Si argumentationes ipse aptis transitionibus & digressiōibus connectantur. Porro cum aptis hujusmodi transitionibus ut plurimum laborent Tyrones Eloquentiae Candidati, juvat aliquot earum ex Cicerone formulas, ad varias orationis partes accomodataas adserre.

*Transitiones in Narrationibus.*

Pro Ro-  
feio.

**A**tque ut facilius intelligere possitis ea, quæ facta sunt indigniora esse, quam hæc sunt, quæ dicimus, ab initio res, quemadmodum gesta fit, vobis exponemus. *Ibi-*

*dem.*

*dem:* Omnia in hac causa sunt misera atque indigna, tamen hoc nihil neque indignius neque acerbius proferri potest.

Atque ut inde Oratio mea proficiat, *Pro Le-*  
unde haec omnis causa ducitur, bellum gra-*ge Ma-*  
ve &c. *Ibidem:* Causa quae sit videtis, nunc  
quid agendum sit, considerate. *Ibidem:* Quo-*nilia.*  
niam de genere belli dixi, nunc de magni-  
tudine pauca dicam. *Ibidem:* Reliquum est, ut  
de felicitate pauca dicamus. Ego enim sic  
existimo &c.

Quae quoniam in Senatu illustrata, pate-*In Cati-*  
facta, comperta sunt per me, vobis jam ex-*linam*  
ponam breviter, ut & quanta & quam ma-*II.*  
nifesta, & qua ratione investigata & compre-  
hensa sint, scire possitis.

Id quo facilius facere possitis, dabo ope-*Pro*  
ram, ut à principio rem, quemadmodum ge-*Quinc-*  
sta & contracta sit, cognoscatis. *tio.*

Quam spem nunc habeat in manibus, &  
quid moliatur breviter jam, Judices, expo-  
nam; sed prius, ut ab initio res ab eo con-  
stituta sit, quælo, cognoscite. Primum &c  
*In Verrem II.* Quantam potestatem habue-  
rit, videtis, quas res gesserit, cognoscite.

Sed antequam de accusatione ipsa dico, *Pro De-*  
de accusatorum spe pauca dicam. *jotaro.*

Exposui profectionis consilium, nunc *In An-*  
reversionis, quæ plus admirationis habet, *toni-*  
breviter exponam. *uu.*

Quæ cum sunt gravia, Judices, tam illud *Pro Mu-*  
acerbissimum est, quod habet accusatores. &c. *rena.*

*Transitiones in partitionibus Propositionum.*

*D*e me autem ipso vereor, ne arrogantis sit, *Pro Le-*  
apud

*ge a-  
graria.* apud vos dicere: ingrati tacere. Quare adhibebitur à me certa ratio. &c.

*Pro  
Quin-  
tin.* Etenim rem facilius totam accipietis, si hæc memineritis, & me facile vestra existimatione revocabitis, si extra hos cancellos egredi conabor, quos mihi ipse circumdedi.

*Pro  
Cluen-  
tio.* Quamobrem alteram partem cause sic agemus, ut vos doceamus: alteram sic, ut oremus: in altera diligentia vestra nobis adjudicanda est, in altera fides imploranda.

*In An-  
tonium.* Sed cum mihi P. C. & pro me aliquid, & in M. Antonium multa dicenda sunt, alterum peto à vobis, ut pro me dicente benigne: alterum ipse efficiam, ut contra illum cum dicam attente audiatis,

*Pro Ro-  
scio.* His de rebus tantis, tamque atrocibus, neque satis me commode dicere, neque satis graviter conqueri, satis libere vocifera-ri posse intelligo. Nam commoditati ingenium, gravitati ætas, libertati tempora sunt impedimento.

*In Ver-  
rem IV.* Magna videor dicere, attendite etiam, quemadmodum dicam:

*Pro  
Sex-  
tio.* Itaque si aut acrius egero, aut liberius, quam qui ante me dixerunt, peto à vobis, ut tantum Orationi meæ concedatis, quantum & pio dolori, & justæ iracundiæ concedendum putetis.

### Transitiones in Confirmationibus & Con- futationibus.

**A**d confirmationem, sive causam rei probandæ transitur nonnunquam simpliciter per particulas causales: *Nam, Etenim, Enim vero,*

*verò, siquidem. Item Et recte, Recte enimvero,  
Et profecto sapientissime, nec levibus de cau-  
sis &c.*

Verum saepius fiunt transitiones ad Confirmationes & Confutationes figuratae; en aliquot earum formulas.

Adeste modo animis, qui corporibus adeftis. *Item:* Nunc vos appello, quotquot adeftis, utilitatein expendite. *Item:* Quamobrem sapientiae vestrae erit P. C. videre hoc fædus sine magna turpitudine vestra peragi non posse. Age vero de periculo modo differamus.

Ego vos Auditores hujus rei arbitros & udices volo. *Item:* Vestrum facio judicium Auditores. *Item:* Ea vestris ingenii conjecturisne coimmitto.

Tanta vis probitatis est, ut eam vel in hoste diligamus! *Item:* Quam vellem ad illas pulcherrimas Epulas me invitassem!

Quæ ego nisi tanta esse fatear, ut ea vix cuiusquam mens aut cogitatio capere possit, amens sim; sunt tamen alia majora.

Nisi vero errasse Demosthenen fateamur. *Item:* Credo insipiens erat Horatius.

Grave dictu, sed dicendum tamen.

Argumenti prioris. De exercitatione & consuetudine dixi, age sis nunc de ratione videamus.

Sed ut eo revertatur, unde digressa est Oratio. *Item:* Sed quorsum tam multa de Cæcilio? quorsum? Nempe ut intelligatis. *Item:* Sed ad propositum revertamur. Ad Confutacionem fit saepe translatio per particulas: *Verum tamen, sed, enimvero, verum enimvero, sed enim.*

*Per A-  
postro-  
phiu-*

*Per  
Commu-  
nicatio-  
nem.*

*Per E-  
piph-  
onem a.*

*Per In-  
clemen-  
tum.*

*Per Iro-  
niam.*

*Per Li-  
centi-  
am.*

*Per Re-  
petitio-  
nem.*

*Per Re-  
vocati-  
onem.*

*Di-*

*Quid est Digressio?* Digressio est rei alienæ quidem, sed ad utilitatem causæ pertinentis, extra ordinem excurrens tractatio; ut si eximiæ aliquujus fortitudinis factum explicas, ad laudes eorum, qui similia patravunt, cum iudicio excurris, & apta transitione ad rem tuam te recipis. Adverte tamen, quod res, ad quam excurritur, debet cohædere cum causa, nec debet esse per vim & temere inserta.

Exempla digressionis vide pro Quintio Nro 44. Pro Roscio Nro 55 Item Verrina II. Ubi Cicero in Siciliæ laudes, & alibi saepius in suas digreditur.

## CAPUT IV.

### DE PERORATIONE.

*Quid est Peroratio?* Peroratio sive Epilogus, est ultima Orationis pars, in qua id, quod tota Oratione expetebat Orator, majori vehementia evincere & obtinere contendit.

*Quot partibus consistat peroratio?* Peroratio duabus constat partibus: scilicet Enumeratione & Motu, sive affectuum commotione.

#### §. I.

##### De Enumeratione.

*Quomodo numeratio in Peroratione fit?* Numeratio fit, cum ea, quæ per totam Orationem varie sparsa sunt, summatim colligimus, & sub uno veluti aspectu ponimus. Fit antem:

Vel

Vel simplici repetitione rerum, quæ dicta sunt per Orationem: Exemplum sit Pro Legge Manilia Nro 49. Quare cum ē bellum ita necessarium sit, ut neglegi non possit; ita magnum, ut accuratissime sit administrandum; ē cum ei Imperatorem praeficere possitis, in quo sit eximia belli scientia, singularis virtus, clarissima authoritas, egregia fortuna; dubitabilis Quirites, quin hoc tantum boni, quod à Diis immortalibus oblatum ē datum est, in Reripubl: conservandam, atque amplificandam conferatis?

Vel enumerando ea, quæ ab Adversario dicta sunt: Exemplum sit pro Amerino Nro 145. Praedia mea tu possides, ego aliena misericordia vivo. Concedo. Et quod amamus cœquus est, et quia necesse est. Mea domus tibi potet, mihi clausa est; fero. Familia mea maxima utcris, ego jervum habeo nullum; patior et ferendum puto. Quid vis amplius? quid insequeris? quid oppugnas? qua in re tuam voluntatem laedi à me putas? ubi tuis commodis officio? quid tibi obfluo? &c.

Vel conferendo argumentum Adversarii cum nostris: Exemplum vide Oratione III de Lege Agrar: Nro 15.

Fit denique Enumeratio per Interrogationem, cuius exemplum vide Pro Amerino Nro 152. vel per Præteritionem, ut pro Cluentio Nro 188.

In hac autem Enumeratione duo hæc vel maxime sunt observanda: imo ut cursim & raptim ea duntaxat repeatas, in quibus causa potissimum consistit, & quæ maxime ve-  
lis.

lis Auditerum animis inhaerere. Si enim omnia minutatim repetas, Non erit hæc peroratio, sed nova quædam Oratio inquit Fabius.

2do. Quæ disperse diffusæque dicta sunt, ita summatim enumerabis, ut ea cum novo aliquo pondere dicantur, figurisque illuminentur, & ornentur sententiis.

## §. II.

*De Affectionum commotione*

**A**ltera Perorationis pars, munusque alterum est, affectionum concitatio, quod quidem ita proprium est illius, ut propterea Peroratio *Sedes affectionum* à Magistris Artis appelletur; quod nempe in eo potissimum loco debeat Orator omnia Orationis vela pandere, omnes Eloquentiæ fontes aperire, & Auditorum animis quasi faces stimulansque subjecere. Atque in hac parte incredibilem quandam admirationem habuit eloquentia Ciceronis, qui dum peroraret, non incendebat modo Judices, & Auditores, sed ardere ipse quodammodo videbatur, ac præsertim, quando concitanda erat erga reos commiseratio, ita ut non raro plangore & lamentatione forum compleverit. Verum cum de his motibus satis fuse in Libro I. egimus, hic breviter, quinam pro variis dicendi generibus adhibendi sint, indicamus.

Cum laudamus, excitandi sunt motus: *Amoris, gratulationis, admirationis, lœtitiae.*

Cum vituperamus: *Odii, invidiæ, contemptus, pudoris.*

Cum

Cum deliberamus de re facienda, excita  
tanda est *spes*, de re fugienda, excitandus est  
*tumor*, & *periculi metus*.

Cum accusamus: *Odium, invidiam & in-*  
*dignationem* movere debemus.

Cum defendimus: *Amorem & misericor-*  
*diam.*

Hic tamen cavendum est, ne in rebus levi-  
oribus vehementiores motus concitentur,

Denique Peroratio sit brevis, ne inflam-  
matus Auditor refrigerescat, vel alio animus  
rapiatur. Ut enim observat Tullius: *Lachry-  
mæ cito arescant, & animorum incendia ce-  
leriter restinguuntur.*

### §. III.

#### *De Artificio componendæ Orationis.*

**T**ribus potissimum rebus constat artificium  
conficiendæ Orationis, scilicet: Exordio,  
Contentione, & Peroratione. Narratio enim,  
( si genus judiciale excipis ) non semper,  
nec ubique adhibetur.

Exordium continet prima quasi semina  
argumentationum, amplificationum, affectu-  
um, in reliqua Oratione tractandorum.

Contentio continet quæstionem, seu pro-  
positionem brevem & distinctam, ad quam  
seligenda sunt ex locis Oratoriis duo, triavè  
argumenta præcipua, quibus & proposita  
quæstio niti, & in quæ quasi in suas partes  
Oratio distribui possit. Tum accedent argu-  
mentationes, uti Syllogismus, Enthymema,  
Inductio &c. Singulas autem argumentatio-  
nis partes, cum Amplificatio rerum ac ver-  
bo-

borum exornare, tum aptæ transitiones colligere debent. Ad extremum affectum commotio, interdum per totam orationem spargitur.

Peroratio colligit vehementius per Orationem sparsa, ac primum argumentationes strictim, ac sapienti quadam confusione recenset, deinde sparsos per Orationem affectus resumit, adauget, & ad summum perducit. Nonnunquam etiam nova, sed brevi argumentatione, aut gravi quoipiam dicto vel effato, tanquam forti telo ad finem reservato, Auditorem vincit.

Ad hæc perficienda proderunt non parum, ut opinor, hucusque dicta; sed magis proderit continua bonarum Orationum lectio, meditatio, & sollicita, quomodo intus à magnis ingeniiis disposita sint, consideratio.

#### FINIS LIBRI SECUNDI.



# ARTIS RHETORICÆ

## LIBRI II. TABULA II.

### DISPOSITIO

Inferenda Pag: 140.

Est rerum inventarum in ordinem distributio pag: 81.  
Partes ejus præcipuae sunt quatuor. pag: 82.

#### EXORDIUM

Cum Propositione & Partitione, seu Divisione.

Exordium est pars Orationis Auditorum animos idoneè comparans ad reliquam dictionem. Pag: 83.

Aliud dicitur Exordium justum ac legitimum, quod etiam temperatum appellatur; aliud ex abrupto. Pag: 83.

Exordium temperatum illud est, quo Auditorum animi artificiosa quadam verborum conciliacione præparantur.

Exordium ex abrupto est illud, quo Orator, quasi quodam abreptus impetu Auditores repentinò & inopinato motu percellit. Pag: 83.

Quatuor vulgo recensentur: Proprietas, Cura, Verecundia Brevitas. Pag: 85.

Proprietas Exordii in eo consistit, ut sit cum reliqua Oratione conjunctum, hoc est; ex ipsius causa visceribus depromptum, scilicet: ab adjunctis vel personæ, quæ dicit, vel loci ubi dicit, vel eorum, apud quos dicit, vel temporis, quo dicit, vel materia, de qua dicit. Pag: 85.

Cura Exordii in eo posita est, ut sit accuratum, acutum, sententiis instrutum. Pag: 86.

Verecundia Exordii in eo consistit, ut Orator dicere incipiens preferat ingenuum pudorem.

Brevitas Exordii in eo consistit, ut reliqua Orationis magnitudini sit accommodatum. Pag: 86.

Tria potissimum recensentur:

Primum est, si sit commune ita, ut aliis, & fortassis etiam contrariis causis possit accommodari.

Secundum est, si sit procul acerbitum, longiusque petuum.

Tertium est, si pluribus verbis aut sententiis, ultra, quam reliquæ orationis brevitas postulat, producitur. Pag: 86: 87.

Exordii officium ac finis triplex est, nempe: Reddere Auditorem benevolum, attentum & docilem. Pag: 90.

Benevolus redditur.

1. à Persona Oratoris ipsius.  
2. à Persona adversiorum.  
3. à Persona Auditorum vel Jūdicū.  
4. à Persona illius, pro quo dicitur. Pag: 91.

Attentus redditur.

1. Promissione rerum novarum, magnarum, & utilium.  
2. Petitione studiosi & diligentis auditū. P. 94.

Docilis redditur.

1. Brevitate.  
2. Simplicitate.  
3. Partitione. Pag: 96.

#### PROPOSITIO

Est brevis dicendorum in Oratione enuntiatio. Quinque potissimum numerantur, Nempe: ut sit simplex, clara, copiosa, nova, utilis.

Simplex est, quæ constat una & simplici sententia.

Clara est, quæ ita proponit, ut nequidem possit ab Auditoribus non intelligi.

Copiosa est, quæ amplam dicendi Segetem suppeditat.

Nova est, si argumentum ita proponatur, ut ex trito vulgarique fiat inusitatum.

Utilis est, quæ plus habet activitatis, quam contemplationis. Pag: 97. 98.

Divisio Propositionis tribus de causis adhibetur.

1. Quia lumen affert Orationi.

2. Quia juvat memoriam Oratoris & Auditorum.

3. Quia levat audiendi fastidium. Pag: 98.

#### NARRATIO

Narratio est rerum explicatio, & quædam quasi fides ac fundamentum constituantur fidei. Pag: 101.

Alia Poëtica, alia Historica, alia Civilis five Oratoria.

Narratio Poëtica rem factam exponit. Historica rem gestam. Civilis five Oratoria rem exponit, quæ quandoque in controversiam adducitur. Pag: 109.

Inter tria narrationum genera, triplex etiam intercedit discriben.

1. Historicus & Orator ordinem temporis & rei gestæ seriens in narrando sequuntur. Poeta etiam a fine aut a medio rem solet ordiri.

2. Historicus veritatem confessatur. Orator verisimilitudinem. Poeta communitatis etiam fabulis veritatem aspergit.

3. Narratio Historica sit ferme simplex, brevis, ac nuda. Oratoria sit ornatrix & fusior. Poetica omnibus artis coloribus & ornamentis abundat. Pag: 109.

Narrationis dotes seu virtutes quatuor potissimum a Cicerone recensentur.

1. Perspicuitas.  
2. Probabilitas.  
3. Brevitas.  
4. Suavitas. Pag: 101.

1. Si temporum servetur ordo & series.  
2. Si verbis propriis & usitatis efficiatur.  
3. Si res non interrupte narretur.  
4. Si vitetur verborum ambiguitas. Pag: 202.

1. Si is qui narrat, sit notæ probitatis & fidei.  
2. Si rei gestæ seriens exponat sine fuso.  
3. Si nihil adferat fidem absolum, quod abhorreat a communii hominum sensu.  
4. Si clarè aperte exponat rerum circumstantias, & adjuncta persona locorum, ac temporum, ex quibus maxime pendet facti probabilitas. Pag: 103.

1. Si narrandi initium altius, & ab ævo ut ajunt, non petatur.  
2. Si inutiles circumstantiae, quæ nihil ad rem faciant, refescuntur. Pag: 105.

1. Si efficeratur verbis leniter & numero sonantibus.  
2. Si adhibeantur certæ quædam narrandi formulæ Tullio perfamiliares.  
3. Si narrentur nova, magna & inexplicata.

4. Si stylus Narrationis per incisa potius, quam per periodos instituat, nec eodem tenore omnia, sed parva pressæ, magna subtiliter, atrocia invidiose, tristia miserabiliter, læta jucunde efficerantur.

5. Si Narratio diversis figuris illuminatur, quarum præcipue sunt: Hypotaxis, Suspensio, sive luctentatio, Exclamatio, & Communicatio. Pag: 106.

*Natalis 13. X. 1814. M. Iuli. D. 16.*

*Klary 1814. M. Iuli. D. 16.*

#### CONFIRMATIO

Cum Confutatione,  
Confirmatio est illa pars Orationis, in qua firmamenta ac robora cause afferuntur. Pag: 110.

Prima, quæ etiam Confirmatio proprie dicta audit, est: in qua ea, quæ pro nobis sunt, firmantur ac stabiluntur. Secunda, est Confutatio, in qua contrarie Adversariorum rationes refelluntur. Utique tractatur per argumenta & argumentationes. Pag: 110.

Argumentum est probabile inventum ad faciem fidem.

Argumentatio est fusior & artificiosa ipsius argumenti dilatatio.

Utrumque pertinet a locis Oratoriis, tum intrinsecis, tum extrinsecis. Pag: 111.

Argumentationum species præcipue sunt quatuor. Scilicet Syllogismus seu Ratiocinatio, Enthymema, Inductio, Dilemma; His affines adduntur: Sorites & Epicherema.

Syllogismus est argumentatio ex duabus Propositionibus conclusionem necessarij inferens. Prima Propositione dicitur Major seu simpliciter Propositione, quia id proponitur in quo est vis ad probandum. Sesquida dicitur Minor seu assumptione, quia aliud assumitur ex prima ad probandum Conclusionem. Tertia dicitur Complexio, estque ipsa questione ex duabus præcedentibus legitime illata.

Syllogismus duplex distinguitur. Alius Philosophicus, alius Oratorius. Philosophicus constat tribus tantum partibus. Majore, Minore, & Conclusione. Oratorius constat quinque partibus, nempe: Majore, & majoris probatione. Minore & minoris probatione, denique Conclusione. Interduum in Oratorio etiam omittitur vel majoris vel minoris probatio. Pag: 112. 113. 115.

Enthymema est ratiocinatio imperfecta, cui deest alterutra ex primis Propositionibus Syllogismi. Constat duabus partibus, quarum una vocatur Antecedens, altera Consequens. Fit omitendo vel Propositionem, vel assumptionem, prout hæc aut illa clarior & evidenter fuerit. Pag: 118.

Fit Argumentatio, qua ex multis singularibus enumeratis, Propositione universali infertur. Fit tripliciter. 1mo. Enumeratione partium sub eodem genere contentarum. 2do. Congettione plurium similitudinum & comparationum. 3to. Congerie plurium exemplorum. Pag: 120. 121.

Est argumentatio constans duabus partibus, quæ utrinque ad adversariorum capiunt. Fit dupliciter. 1mo. Cum utique ejus propositio nude & sine ullo ornato effertur. 2do. Cum amplificatione figurata utrique vel alterutra illius pars exornatur. Pag: 123.

Sorites est series & veluti catena multarum Propositionum, ex quibus gradatim & acervatim collectis eruitur aliqua Conclusionis. Pag: 125.

Epicherema est Enthymema contractum, cuius duæ Propositiones in unam conseruntur. Pag: 127.

#### PERORATIO

Peroratio sive Epilogus, est ultima pars Orationis, in qua id, quod tota Oratione expetebat Orator, maiori vehementia evincere contendit. Pag: 136.

Peroratio duabus partibus constat; nempe: Enumeratione & Motu, sive Affectuum commotione. Pag: 136.

Enumeratione fit, cum ea, quæ per totam Orationem varie sparso sunt, summatim colligimus, & sub uno veluti aspectu ponimus.

1. Simplici repetitione rerum, quæ dicta sunt per Orationem.
2. Enumerando ea, quæ ab adversario dicta sunt.
3. Conferendo argumenta Adversarii cum nostris.
4. Per Interrogationem vel Præteritionem. Pag: 137.

Affectum commotio ita propria est Perorationi, ut propterea Peroratio, Sedes Affectuum a Magistris artis appellatur, quod nempe in eo potissimum loco debeat Orator Auditorum animis, quasdam quasi faces stimulosque subjecere. Pag: 138.

In laude excitantur affectus. Amoris, gratulationis, admirantis, latitiae.

In Vituperatione. Odii, invidie, contemptus, pudoris, In Deliberatione.

Spei, timoris, Amulationis. In Accusatione.

Odii, invidiae, indignationis. In Defensione.

Mansuetudinis, Misericordia, Amoris. Pag: 139.

Tribus potissimum rebus constat artificium conficiendæ Orationis, nempe: Exordio, Contentione & Peroratione.

Exordium.

Continet prima quasi semina argumentationum, amplificationum, affectuum, in reliqua Oratione sparsum.


Contentio.

Continet quæstionem seu propositionem brevem & distinctam, ad quam feliciter sunt duo triave argumenta præcipua, quibus & propositiona quæstio niti, & in quæ, quasi in suas partes Oratio distribui possit.

Peroratio.

Colligit vehementius, per Orationem sparso, Argumentationes stridentes, & contentiones recenset; Affectus per Orationem sparso resumit, auget, & ad summum perducit. Pag: 139. 140.





# ARTIS RHETORICÆ

*LIBER TERTIUS*

*De Elocutione.*

Hactenus de solida inventione, & recta inventorum dispositione tractavimus, restat, ut de inventorum & dispositorum Elocutione, quæ tertia Rheticæ & potissima Eloquentiæ pars est, agamus. Neque enim ad *bene dicendum* sufficit, bene cogitare, cogita-  
taque recte disponere, sed necesse est insuper, cuncta, quæ mente volvimus, verbis delectis, ac propriis cuique idiomati dicendi modis exponere, eademque certis quibusdam Eloquentiæ ornamentis sobrie adhibitis adspergere, ac veluti sale quodam condire.

Porro quod verborum delectum spectat, illa imprimis sint propria; secundo perspicua; tertio ornatum Orationi afferant est necesse.

Proprietas verborum consistit in puro sermone & elegantia idiomatis, quo in Elocutione utimur. Perspicuitas orationi facile

con-

conciliabitur, si verba non sint à communi n-  
su remota; si eorum connexio non sit proli-  
xior; si vitentur longiores interjectiones, de-  
nique si neque inanis verborum multiplici-  
tas congeratur, neque verbum aliquod, quod  
necessarium est, subtrahatur.

Jam vero ornatum Elocutioni adferunt  
Tropi & Figuræ.

## C A P U T I

### DE T R O P I S .

*Quid est Tropus?* **T**ropus est verbi, vel orationis à propria  
significatione ad aliam cum virtute qua-  
dam ac dignitate translatio, ut cum dicimus:  
*lætas segetes*, verbum lætus à propria signi-  
ficatione, qua lætos homines dicimus, ad se-  
getes cum virtute transfertur.

*Quotuplex est Tropus?* Tropi duplices sunt, alii in uno verbo,  
alii in pluribus, seu in oratione.

### §. I.

#### De Tropis in uno verbo positis.

*Quot sunt Tropi in uno verbo?* Tropi in uno verbo sunt septem, scilicet:  
Metaphora, Syncedoche, Metonymia,  
Antonomasia, Catachresis, Matalepsis, Ono-  
matopæja.

### M E T A P H O R A .

*Quid est Metaphora?* Metaphora est translatio vocis à propria  
significatione ad alienam. Ut cum ait  
Tullius: *Parietes hujus Curiæ tibi gratias agere gestiunt.*

Va-

Varii cum Quintiliano varios Metaphoræ Unde-  
fontes deducunt, hos omnes ad quatuor revo-  
camus.

*1mo.* Fit Metaphora: Cum à re quapiam animata ad rem aliam animatam, verbum substantivum, aut adjективum transferimus. Ut cum ait Livius: *Scipionem à Catone solitum allatrari.*

*2do* Fit Metaphora: Cum inanimata pro aliis inanimatis ponuntur. Ut Habent pro Gubernaculo: *Frænum pro Lege, &c.*

*3to* Fit Metaphora: Cum inanimata trans-feruntur ad animata. Ut cum ait Cicero: *Contra ejectionem Nausfragorum manum, florem Italiae ac robur educite.*

*4to* Præcipuam quandam venustatem habet Metaphora, cum rebus inanimatis sensuque carentibus sensum quendam animosque, ac veluti vitam damus. Ut Cicero pro Ligario: *Quid enim tuus ille, Tubero, distridus in acie Pharsalica gladius agebat? cuius latus nunc ille petebat? qui Jesus erat armorum tuorum?* &c.

Caveat Orator, ne frequenter utatur Metaphora; frequens enim illius usus plurimum affert satietatis atque fastidii. *2do.* Metaphora non sit inverecunda. *3to* Non sit nimis humilis; ut si Consulem *Aarigam Civitatis* vocares.

*4to* Non sit nimis Poética; ut si pro *Gavrulo, Architæ crepitaculum* in Oratione poneretur.

*5to* Ne sit nimis dissimilis; ut *Cauda Orationis, pro Epilogo: Vagina Animæ, pro Corpore: Saxeæ Mundi verrucæ, pro Rupibus.*

Juvat hic selecta Verborum, substantivo-  
rum, & Adjectivorum Metaphoricorum exem-  
pla ex Clasicis Authoribus in gratiam Ty-  
ronum adferre.

## VERBA METAPHORICA.

*Ex Ci-  
cerone.* Idem tumulus, qui corpus contexerat, no-  
men meu obruit. Gloria brevitatem vitae con-  
solatur. Quos ferro trucidare oportebat,  
nōndum voce vulnero, Silent leges inter ar-  
ma. &c.

*Ex Livio.* Hærente in ipsis visceribus urimur bel-  
lo. Venandi studium homines, per mives ac  
pruinas, in montes silvasque rapit. Lætitia  
luxuriat. Luxuria marcat. Frangere hostis au-  
daciā. Lacerat invidia Principes.

*Ex Cur-  
tio.* Conscientiæ notas in ipso ore deprehen-  
dere. Vires discrimini bellorum offerre. Fa-  
tiamur varietate fortunæ. Fluvius quidquid  
alluit, floribus vestit. Incaluit mero. Sene-  
ctus corpora solvit. Languentem revocavit  
animam. Surdas jam dudum aures pulso &c.

## SUBSTANTIVA METAPHORICA.

*Ex Ci-  
cerone.* Vita rustica parsimoniae magistra est. Pon-  
dus verborum non sustinebat. Fons pe-  
rennis gloriæ. Fortunæ cursus. Lucretiosissi-  
mi belli semen fecisti. Libidinosi veræ lau-  
dis gustum non habent. Orationis vela pan-  
dere.

*Ex Livio.* Insolentia sermonis offenderunt aures.  
Tua vestigia laudis sequar. Belli procellæ.  
Ludibrium fortunæ.

*Ex Cur-  
tio.* Incertæ famæ captare auram. Sævitia  
maris. Juvenis primo ætatis flore pubescens.

Ar-

Armatōrum frequens *globus*. Illa disciplina paupertate *magisira* stetit &c.

## ADJECTIVA METAPHORICA

*Muta* solitudo crimen indicavit. *Victoria* naturā *insolens* ac *superba*. *Effrænata* audacia. *Vaga* & *volubilis* fortuna.

*Insanabile* ingenium. Legis *superbæ* vincula. *Labantem* fortunam sustinuit.

*Laxata* vis morbi. *Præceps* Senectus. *Pertinax* fortuna. *Segnes* aquæ. *Infractus* animus. *Emerita* arma.

## SYNECDOCHE.

Synecdoche est deductio unius ex alio.

Fit octo modis.

*Ex Ci-  
cerone.*

*Ex Li-  
vio.*

*Ex Cur-  
tio.*

*Quid est  
Synec-  
doche?*

1mo Ponitur pars pro toto: ut, *Mucro* pro gladio, *tectum* pro domo, *vela* pro navibus.

2do Totum pro parte: ut, *silvam* cædere, pro liguis. *Formosissimus Annus*, pro vere. *Mari* imperat.

Modus hic solis ferme Pòétis familiaris est.

3to Unus. pro pluribus: ut, *Phryx* plagiis emendatur, pro Phryges. *Hostis* imminet Urbi, pro hostes.

4to Plures pro uno: ut, Cicerones & Demostenes nostra fert ætas. Oratores visi sumus; huc etiam revocantur formulæ: Nós Rex, Nos Imperator.

5to Pro genere species: ut, *Eurus*, vel *Aquilo*, pro quolibet vento. *Massicum*, *Phalenum*, pro vino. *Qui Curios* simulant, pro frugalibus.

6to Pro Specie genus: ut, *Consul hostem* jubet urbe exire; id est: Cicero Catilinam. Est in milite *virtus*; id est: fortitudo.

7mo Materia pro re, ut: *Ferrum*, pro Ense, *aurum* pro nummis, *Pinus* pro navi.

8vo Antecedens pro Consequente, vel contra: ut, Pecora domum redeunt, pro *vespere*. Jam hirundo redierat, pro *vere*. Ciconiae avolant, pro *autumno*.

*Exempla ex Cicero.* Pro capite alterius causam dicere. *Mucronem* à jugulis rejecimus. *Ferro* rem assequi censuerunt. Sua testa defendere. De focus vestris judicandum est. Ad puerorum incunabula pertinet.

*Ex Licio.* In singulas horas capite dimices tuo. *Ferrum* timet. In tuo capite periclitabantur.

*Ex Curio.* Fastigium hoc per ignes ferrumque petitur. Multa cedro ædificata erat Regia. Mensas auro onerare. Tot Civium animas trahis tecum in casum.

*Ex Plinio.* Non trabibus aut saxis nomen, sed monumentis æternæ laudis inciditur. *Rhenum* & *Euphratem* admirationis famâ conjunxit.

### M E T O N Y M I A .

*Quid Metonymia?* Metonymia est tropus, quo unum ex alio intelligitur.

Fit quinque modis.

1mo Cum Causa ponitur pro effectu. Ut Martem spirat; id est bellum. Ruris in se habet plurimum; id est morum rusticorum. Sub Jove frigido; id est aere. Sic etiam dicimus: Pro igne Vulcanum; pro aqua Neptunum: Pro tellure Vestam, pro tempore Saturnum:

rdo

pro ventis *Æolum*, pro somno *Morpheum*. Verum hæc potius sunt Poëtica, quam Orationia.

*2do* Cum effectus ponitur pro causa. Ut *victoria* naturâ insolens; idest, vîctor. *Diligentia* coronatur; idest diligens. *Scelus & sacrilegium* deprehensum; idest, scelestus & sacrilegus.

*3to* Continens pro Contento. Ut, *Athenæ* scientiarum inventrices; idest, Athenienses. *Urbs* bene morata, idest incolæ Urbis. *Sæculum* felix; idest, homines hoc sæculo viventes. *Rhetorica* diligens vel pigra; idest, Rhetores.

*4to* Posseſſor pro re posſeſſa. Ut, Hannibal ad portas; idest Milites Hannibalis. Ardet Ucalegon; idest, domus Ucalegonis.

*5to* Signum pro re signata. Sic ponuntur signa Regionum pro ipsis Regionibus: ut, *Lilia*, pro Gallia: *Aquila biceps*, pro Austria: *Cornua lunæ*, pro Turcia.

Item signa Populorum à fluviis. Ut *Rhenus*, pro Germanis. *Nilus*, pro Ægyptiis. *Euphrates* pro Parthis: *Ganges* pro Indis: *Tyberis*, pro Romanis: *Tagus*, pro Hispanis: *Thamesis* pro Anglis: *Jordanus* pro Palæstinis. &c. Sic etiam signa scientiarum, pro scientiis. ut, *Pallium Philosophiæ*, *Thrysus Rhetoricæ*: *Laurus Poëticæ*, *Soccus Comicæ*: *Cothurnus Tragicæ Artis*. Item illa: *Oliva*, vel *Toga*, pro pace: *Laurus* pro victoria: *Fasces* pro Magistratu &c.

Semper mea consilia paci & togæ sacra Exempla fuerunt. Illa vita est, quam posteritas alet. ex Cicerone. quam æternitas ipsa tuebitur. Opressa vir-  
tute

148 ARTIS RHETORICÆ LIB: III.  
tute 'audacia est. Martis manubias Musis  
consecrare. In Cinere urbis & Sanguine. Re-  
pente Cælum terrāque ademerunt. Quale  
bellum nulla unquam barbaria gessit.

*Ex Livio.* Vario Marte pugnatum est, Dandus est  
invidiæ sanguis. Superbas medius fidius au-  
res habemus. Sorte quadam nutriendæ Græ-  
ciam datus.

*Ex Curtio.* Quot ille tūm extinxit faces, quot con-  
didit gladios. Captiuū Aurum. Viētus con-  
tinentiā hostis. Paupertas nostra velocior  
erit, quam exercitus tuus. Emoriēte terra.

*Ex Plinio.* Quibus erat mos paludamento mutare  
prætextam. Magnus pudor erat fascibus. Ma-  
gnum siccū dedecus, magnum Reipublicæ  
vulnus impressum Orienſ triumphis, Occidens-  
que lustratus. Animadverto. Deos tam acen-  
ratis adorantium precibus, quam innocentia  
lætari: gratioremque existimari, qui delubris  
eorum pucram castamque mentem, quam qui  
meditatum carmen intulerunt.

#### ANTONOMASTA.

*Quid est Antonomastia?* Antonomastia est tropus, in quo pro vero  
nomine ponitur aliquid rei per excellen-  
tiā conveniens. Ut Eversor Carthaginis,  
pro Scipione. Asiæ domitor pro Alexandro:  
Romanæ Eloquentiæ Princeps, pro Cicero-  
ne. Conditor Urbis pro Romulo. Item: Rex  
Catholicus, pro Hispaniæ, Rex Apostolicus pro-  
Hungariæ: Rex fidelissimus, pro Lusitaniæ Re-  
gibus.

*Quid est Catachresis?* CATACHRESIS, METALEPSIS, ONOMA-  
TOPÆJA.

Catachresis est abusio vocis, nempe quan-  
do vocabulo alieno proinde, ac proprio uti-  
mur.

mur. Sic *Parricidam* ( qui proprie Patris interfectorum significat ) vocamus etiam eum, qui matrem aut sororem interfecit, cum Matricida & Sororicida non recte latine dicantur. Tale est etiam illud Plinii: *Lanianda Patrice viscera præbuimus*; Et illud Ciceronis: *Orationis vela pandere.*

Metalepsis est tropus, quo ex una significatione ad aliam, veluti per gradus ascendiunt. Ut, cum dixit Virgilius: *Post aliquot mea regna videns, mirabor Aristas;* id est post aliquot annos. Nam ex aristis spicas, ex segetibus æstates, & ex æstatibus annos intelligimus. Similia sunt etiam: *Tertia messis erat, Primæ tanugiris ætas;* id est juventus. Venit ad *albentes comas;* id est ad senectutem.

Nota: hic tropus parcissime apud Oratores usurpatur.

Onomatopæja est fictio vocis, ad rem significatam nativa aliqua soni similitudine accendentis. Ut Rivus *murmurat*: Ether *immugit*: *Gemituque ejulatuque tota persona*bat regio.

*Quid  
Meta-  
lepsis.*

*Quid O-  
nomato-  
pæja.*

### §. II.

*De tropis, qui in pluribus verbis sive in Oratione fiant.*

Tropi in pluribus verbis, sive in Oratione tres numerantur; Scilicet: Allegoria, Hyperbole & Ironia.

*Quot sunt  
tropi in  
pluribus  
verbis.*

### ALLEGORIA

Allegoria est plurium Metaphorarum continuatio, seu tropus, quo aliud verbis dicitur, aliud re ipsa intelligitur.

*Quid est  
Allegoria.*

Ne-

*Exempla  
ex Cicero-  
ne.*

Neque tam sui timidus, ut qui in maximis turbinibus ac fluctibus navem Reipublicæ gubernasse, salvamque in portu collocaſsem, frontis tuæ nubeculam pertimescerem; alios ego vidi ventos, alias animo prospici procellas: aliis impendentibus tempeſtibus non cessi, sed his unum me pro omnium salute obtuli. *In Pisonem.* Invenies pulcherrima Allegoriæ exempla pro Milone Nro 5. Pro Marcello Nro 4. Pro Murena Nro 35.

*Ex Livio.* Non itatu *tranquillo navigamus*; sed jam aliquot procellis *submersi* pene sumus. Ex naufragiis prioris culpæ cladisque emerſimus. Ea tandem *vulnera attingo*, quæ, nisi tacta traxataque, sanari non possunt. Aluistis hoc intendum, quo nunc ardetis.

*Ex Curtio.* Impone felicitati tuæ frænos, facilius illum *reges*. Et præteritæ fortunæ fastigium capio, & præsentis jugum pati possum. Quod Imperium sub uno staro potuislet, dum à pluribus sustinetur, ruit; non revirescet, solum, sed etiam florebit Imperium.

Observandum maxime est, ut Allegoria sibi conſer, ideſt, ut quo genere cæperis translationem, eodem ſintias. Quis enim non improbaret ſequentem Allegoriam: *Invidiæ incendio deflagravi, ac demum ejus fluctibus demersus sum;* in qua initium ab incendio ſumptum, tempeſtate & fluctibus concluditur.

### H Y P E R B O L E.

*Quid eſt  
Hyper-  
bole.*

Hyperbole eſt tropus, quo res plus æquo vel augetur, vel minuitur.

*Pom.*

Pompejus sc̄epius cum hoste conflixit, quau<sup>m</sup> Exempla  
quisquam cū inimico concertavit: plura<sup>ex Cicero-</sup>  
bella ges̄it, quam cæteri legerunt: Fines ve-<sup>ne.</sup>  
seri Imperii non terræ, sed Cæli regionibus  
terminavit. Nonne ipsum caput, & superci-  
lii illa penitus abrāsa olere malitiam, & cla-  
mitare calliditatem videntur? nonne ab imis  
unguis, usque ad verticem summum, ex  
fraude, fallaciis, mendaciis constare totus  
videtur? qui idcirco capite & superciliis sem-  
per est rasis, ne ullum quidem pilum viri  
boni habere videatur.

Plura & illustria ejus tropi exempla in-  
venies Pro Marco Marcello Nro 4. Pro Le-  
ge Manilia Nro 28. Philip: II. Nro 67. Ver-  
rina VII. Nro 144.

Plura, quam sol videt loca, victoriā lu-  
strare. Trahi extra sidera & solem.

*Ex Curtio.*

Fingenti mihi Principem, quem æquata<sup>Ex Plinio.</sup>  
dis potestas diceret, nunquam voto concipe-  
re succurrit similem huic, quem videmus...  
Princeps, qui terrarum fæcunditatem, nunc  
huc, nunc illuc, ut necessitas posceret, trans-  
ferret... Omnia tam prona, tamque ceden-  
tia virtutibus tuis, ut subsediſſe montes, flu-  
mina exaruisse videantur.

### IRONIA.

Ironia est tropus contrarium significans, *Quid est*  
cum illusione. Ut si de timido ac fugaci mi-  
lite dices: O virum strenuum, & columen  
exercitus nostri! quem nullus unqam ho-  
stis viderit. Aut de rustico & iurbano: En-  
scitum hominem & urbanum! delicias meras,  
& leporem! Frequens est Cicero in Ironia,  
præ-

præsertim si jocari in aliquem mordacius voluerit; eximia est inter cæteras hæc Milonianæ: Sed stulti sumus, inquit, qui *Drusum*, qui *Africanum*, *Pompejum*, nosmetipſos cum *Pultio*. Clodio conferre audeamus. Tolerabilita fucrunt illa; Clodii mortem a quo animo ferre nemo potest: luget senatus, mæret Equeſter ordo, tota Civitas confecta senio est: squatulent municipia, afflitantur Colonia: agri denique ipſi, tam beneficū, tam singularē, tam mansuetum ciuen desiderant. Similis est etiam illa in Verrem: *Integritas*, credo, te tua purgavit, pudor eripuit, vita antea tua servavit. Et.

Quibus in exemplis simulatio tota fit in singulis verbis, à sua significatione in contrariam mutatis; nam quid de Clodio & Verre senserit Cicero, abunde patet ex ejusdem contra utrumque Orationibus.

Porro Ironia fit, vel simpliciter per contemptum, ut Cicero in Antonium: *Tu homo sapiens, diserto quid dicis?* Et, *O præclarum cuiusdam Ovium, ut ajunt, lupum!* vel per sarcasmum, quæ est irrisio amarissima; ut pro Cælio: *Quod facerem vehementius, nisi militi intercederent inimicitiae cum iſtius mulieris viro; fratrem volui dicere, semper hic erro.* Vel per scomma; ut pro Roscio Amerino Nro 44. *Quæſo, Eruci, ut hoc in bonam partem accipias, non enim exprobrandi causa, sed commonendi gratia dicam.* Et.

Observandum autem, Ironiam facile intellegi vel ex modo, quo pronuntiatur, qui irrisioneſonat, vel ex persona, aut rei natura, verbis, quæ proferuntur contraria.

## §. III.

*Uſus Troporum in genere.*

**U**ſurpat̄ vel in laude, vel in vituperio, vel *Metony-  
etiam cum rem inanimatam oculis sub-  
jicere volumus.* Ut Cicero in Verrem Nro  
3. *Quas res luxuries in flagitiis, crudelitas  
in suppliciis, avaritia in rapinis, superbia in  
contumelias, efficere potuifset &c.* Ubi vitia  
pro ipsis sceleratis personis sumuntur.

Adhibetur vel dum ipsum adversarium *Ironia.*  
irridemus, vel dum, ne ipsius argumenta val-  
eant, ea in risum convertimus. Sic Cicero  
in Pisonem Nro 58, *Non est integrum Cne-  
jo Pompejo consilio uti tuo; erravit enim,  
non gustarat illam tuam Philosophiam &c.*

Non parum confert, vel ad laudem, vel *Meta-  
vituperium, ut patet ex adductis exemplis.  
phora,*

Uſurpat̄ ad delectationem, dummodo *Allego-  
non sit nimia.* *rnia.*

Adhibetur, vel propter penuriam alicujus *Antono-  
vocis, vel ad ornatum.* *mnia*

Adhibetur, vel ut aliquid ultra condignum *Hyper-  
augeatur, vel infra condignum minuatur.* *bole.*

Monendi hic sunt Adolescentes, ne ni-  
mis tropos in Oratione quærinent, ipsimet  
naturaliter influant necesse est; longeque  
plura fine tropis esse efferenda.

## C A P U T II.

## DE FIGURIS VERBORUM.

**F**igura est loquendi modus illustrior, à com- *Quid est  
muni consuetudine remotus.* *Fi- Figura?*

Figuræ duplices sunt: aliæ verborum, sententiarum aliæ, hæ in sententiis, illæ in verbis vim habent & elegantiam.

Figuræ verborum sunt:

1. Per Adjectionem
2. Per Detractionem
3. Per Similitudinem

} Vocab,

§. I.

*Figuræ per Adjectionem.*

*Quæ ver-  
borum fi-  
guræ sunt  
per Adjectionem?* Figuræ verborum per Adjectionem sunt præcipue: nimirum: Repetitio, Conversio, Complexio, Conduplication, Gradatio, Synonymia, Traductio, Polyfynetheton.

R E P E T I T I O

Repetitio, est figura, in qua ab eodem vocabulo sœpius inchoatur Oratio.

*Quid est Repetitio?* *I' il agis, nihil moliris, nihil cogitas,* Exempla quia ego non modo non audiam; sed etiam ex Cicerone. non videam, planeque sentiam. Pro Quintio ne.

Nro 82. Quid hæc amentia, quid hæc festinatio, quid hæc maturitas tanta significat? non vim? non scelus? non latrocinium? non deinde omnia potius, quam jus, quam officium, quam pudorem? Ibidem Nro 51, & 52.

*Ex Livio.* Metius est dustor itineris hujus, Metius hujus machinator belli, Metius fæderis Romani Albanique ruptor.

*Ex Cur-  
tio.* Illam indeolem, qua omnes reges antecepsit, illam in subeundis periculis constantiam, in rebus motiendis velocitatem, in deditos fidem, in captivos clementiam, haud tolerabili vini cupiditate fædavit.

Ni.

Nihil severitati ejus, hilaritate, nihil gravitati, simplicitate, nihil majestati humilitate, detrahitur jam firmitas, jam proceritas corporis, jam honor capitatis, jam dignitas oris, nonne Principem ostentant.

Ex Plinio.

## CONVERSIO

*verba*

Conversio est figura Repetitioni prorsus contraria, in qua saepius eodem vocabulo clauditur oratio. Ut illud Philippica II. Nro 55. *Doletis tres exercitus Populi Romani interficere? interfecit Antonius; desideratis clarissimos Cives? eos quoque vobis eripuit Antonius; auctoritas hujus Ordinis afflita est? afflixit Antonius.* Item ad Herennium Lib: 4. *Ex quo tempore concordia de Civitate sublata est, fides sublata est, amicitia sublata est, Respublica sublata est.*

Quid est  
Conver-  
sio?

Item in Vatinium Nro 37. *Atque illud etiam audire a te cupio; quare, cum ego legem ex Senatus Consulto de ambitu tulerim, sine vi tulerim, salvis auspiciis tulerim, tu eam esse legem non putas?*

## COMPLEXIO.

Complexio est figura, quae Repetitionem simul & Conversionem complectitur; cum nimicum ab eadem voce inchoatur, & eadem saepius finitur Oratio. Sic Cicero ad Herennium: *Quem Senatus damnarit, quem Populus Romanus damnarit, quem omnium existimatio damnarit, eum vos sententiis vestris absolvetis? Et pro Lege Agraria: Quis legem tulit? Rullus, quis maiorem Populi partem suffragiis privavit? Rullus; quis comitiis praefuit? idem Rullus.*

Quid est  
Comple-  
xio?

Sic

Sic etiam Plinius: *Si iero ad fratrem invitatus, moriendum est; si recepero intra januam commissatum fratrem, moriendum est: nec eundo, nec manendo insidias evito.*

Nota: Tres præcedentes figuræ mirum in modum valent in exaggerandis virtutibus ac vitiis, faciuntque, ut acrior sit ac vehementior oratio; quia tamen statim incurront in oculos, propterea non sunt diutius continuandæ, sed satius est, ut aliarum figurarum admixtione temperentur. Plura illarum exempla invenies:

Divinatione in Verrem Nro 21. Pro Roscio Nro 13. Pro Lege Manilia Nro 40. In Rullum Nro 9. Catilinaria ima Nro 1. Philip: 2da, Nro 19. Pro Mil: Nro 59, 94 & 100.

#### C O N D U P L I C A T I O .

*Quid est  
Condu-  
plica-  
tio?*

Conduplicatio est ejusdem vocis, aut plurium geminatio, idque vel initio Orationis; ut Catilinaria ima: *Vivis, & vivis, non ad deponendam, sed ad confirmandam audaciam.* Vel in medio, ut Philip: 2da: *Etiam audes horum in conspectum venire, Proditor Patriæ, proditor, inquam, Patriæ, venire audes in horum conspectum?* Vel in fine, ut pro Sextio: *Ademit Albino saceri nomen mors filiæ, sed charitatem illius necessitudinis & benevolentiam non ademit.*

Interdum etiam tota sententia, alio quopiam interjecto repetitur; ut Verrina VII. *Quid Cleomenes facere potuit, (non enim possum quempiam insinuare falso) quid inquam Cleomenes magnopere facere potuit-*

Exem-

Exempla alia:

*'Accede, lictor, accede. Virtute cepistis locum, virtute oportet evadere.* Ex Lilio.

*Illa suum, illa neptium vicem flebat, illi aureos torques, illi vestem auro distinctam habebant.* Ex Curtio.

*Nuncupare vota & pro æternitate imperii, & pro salute Principum, imò pro salute Principum, ac propter illos, pro æternitate imperii solebamus.* Ex Plinio.

Hæc figura ad vehementiam & savitatem Orationis plurimum confert.

### GRADATIO.

Gradatio est figura, qua per rerum incrementa, ceu per gradus quosdam vel ascenditur ad summum, vel descenditur ad infimum.

*Africano virtutem, industria, virtus gloriam, gloria cœmulos comparavit. Ad Héren: Item pro Roscio: In urbe luxuries cretur, ex luxuria existat avaritia necesse est: ex avaritia crumpat audacia, inde omnica scelerata ac maleficia gignuntur. Item lepidum illud ad Atticum: Si dormis, experciscere; si stas ingredere; si ingrederis, curre; si curris aduola.* Exempla ex Cicero, ne.

Plura exempla Ciceronis vide pro Quintio Nro 95. Verri: VII. Nro 75. Pro Milone Nro 61. Pro Archia Nro 4. Pro Sextio Nro 32.

*Scies Regum majestatem difficilius à summo fastigio ad medium detrahi, quam à mediis ad ima præcipitari.* Ex Lilio.

Ma-

*Ex Plinio.* *Magnum erat, cum promitteres, majus postquam præstitisti.*

Hæc figura, cum affectatam artem sapiat, rarius est usurpanda; adhibetur tamen interdum ad venustatem, & ad vim addendam Orationi.

## SYNONIMIA.

*Quid est Synonymia?* Synonymia est figura, qua plura idem ferre significantia congeruntur instandi urgen-  
dique gratiâ.

*Exempla ex Cicero-ne.* *An vero vos soli ignoratis, vos hospites in hac urbe versamini, vestræ peregrinantur aures, neque in hoc pervagato Civitatis sermone vagantur?*

Item Catil: 2da Nro 1. Tandem aliquando Catilinam furentem audacia, scelus anhelantem, pestem Patriæ nefarie molientem, ex urbe vel ejecimus, vel emisimus, vel ipsum egredientem urbe prosecuti sumus; abiit, excessit, erupit, evasit.

Plura hujus figuræ Ciceronis exempla vide Catilinaria 1ma Nro 10. Post redditum in Senatu Nro 1. Pro Milone Nro 33. In Pisone Nro 47.

Observa: In hac figura magnum imprimis habendum esse verborum delectum, ne orationem potius onerent, quam ornent; secundo ut verba, quæ extremo loco ponuntur, sint graviora prioribus, imò etiam aliquid paulo diversum sonent.

## TRADUCTIO.

*Quid est Traductio?* Traductio est variata casibus, aut generibus, aut modis, aut temporibus ejusdem vocabuli repetitio. *Eum-*

*Eum tu hominem appellas, qui si fuisset homo, nunquam hominis vitam tam crudeliter petiisset Lib: 4 ad Heren: Ibidem: Divitias sine divitium esse, tu vero virtutem prefer divitiis; nam si voles divitias cum virtute comparare, vix satis idoneae tibi divitiae videbuntur, quæ virtutis pedissequæ sint.*

Ad hanc figuram etiam revocatur, cum idem vocabulum in diversa significatione repetitur. Ut Cicero ad Heren: Nro 19. *Cur eam rem tam studiose curas, quæ multas tibi dabit curas. Item: Amari jucundum est, si curetur, ne quid insit amari.*

*Qui aliis exemplo esse debetis, aliorum exempli peccatis potius, quam alii vestro rebbe faciunt.* Ex Livio.

## POLYSINDETOM

Polysindeton est figura conjunctionibus abundans.

*Tæque, tuique similes, tibique charos & aspernor, & adverfor, & execror; nec timeo minas, quæ jactas, nec terrent me pericula, quæ denuncias. Item: Et justitia, & liberalitate, & fortitudine cæteros omnes Imperatores superavit.*

*Quotiescumque Patria in mentem venit. Ex Livio. hæc omnia occurrebant: colles, campique, & Tiberis, & assuta oculis regio, & hoc Cælum, sub quo natus educatusque essem.*

*In tui adoptione, non servitus nostra, sed libertas, & salus, & securitas fundabatur.* Ex Plinio.

## §. II.

## De Figuris per detractionem.

L

Fi-

*Quæ sunt figuræ per detractionem?* Figuræ per detractionem quatuor sunt sequentes: Reticentia, Adjunctio, Disjunctionem? & Syneciosis.

## RETICENTIA.

*Quid est Reticentia?* Reticentia est figura, in qua vox omisſa, commode ex cæteris intelligitur.

*Exempla ex Cicero.* *Vix è domo discesserat, micerere servi, lugere filii, conjux misera lamentari; supple, cœperunt.*

Item: *Sermo nullus, nisi de te. Supple, facilius est.*

Item: *Sed vos, qui tandem? Supple, estis.*

Item: *Hancine hominem? hancine impudentiam? hancine audaciam? Supple, feremus.*

*Ex Curtio.* *Rex unus tanti mali patiens, circuire milites, contrahere dispersos. allevare prostratos. Supple, cœpit.*

Item: *Fluctuare animo Rex, & modo suum, modo Parmenionis consilium perpendere.*

*Ex Plinio.* *Habitus ille, parcus fortasse, quam decuit optimum Principem, sed non parcus, quam optimum patrem. Supple, vixit.*

Item: *Iter illi sœpius in forum, frequenter tamen in campum. Supple erat.*

Hæc figura, ob suam brevitatem frequentissima est in narrationibus.

## ADJUNCTIO.

*Quid est Adjunctio?* Adjunctio est figura, in qua ad unum verbum plures sensus referuntur.

*Exempla ex Cicero.* *Vicit pudorem libido, timorem audacia, rationem amentia. Pro Quintio.*

ne. Pro Lege Manil: *Non eum avaritia ab instituto cursu, ad prædam revocavit, non libido ad*

*ad voluptatem, non amoenitas ad delectationem, non nobilitas urbis ad cognitionem, non denique libertas ipsa ad quietem.*

*Non senibus, non fæminis, non infantibus* Ex Curtio.  
*parcitur.*

*Reddita est amicis fides, liberis pietas, ob-* Ex Plinio.  
*sequium servis.*

*Certare cum fugacibus feris cursu, cum audacibus robore, cum callidis astu, non mediocre pacis decus habebatur.*

### DISJUNCTIO

Disjunctio sive dissolutio est figura, in qua *Quid est Disjun-*  
conjunctiones & particulæ tolluntur, ut in- *tio?*  
citior feratur Oratio.

*Hæc studia literarum adolescentiam a-* Exempla  
*lunt, senectutem oblectant, secundas res or-* ex Cice-  
*ront, adversis perfugium ac solatium præ-* rone.  
*bent, delectant domii, non impediunt foris,*  
*pernoctant nobiscum, peregrinantur, rusti-*  
*cantur.*

*Ex Livilo.*  
*Visite! prædam abigi, sumare incensa pas-*  
*sim teæta, ager uritur, urbs obsidetur, belli*  
*gloria penes hostes est.*

*Devehunt ipsi, quod terra genuit, quod si Ex Plinio.*  
*dus aluit, quod annus tulit.*

### SYNECOSIS.

Synecosis est figura, quæ duas res con- *Quid est*  
trarias uno verbo conjungit. *Synecosis?*

*Tam deest avaro, quod habet, quidam quod* Exempla  
*non habet.* ex Cice-  
rone.

*Item: Pessima re est: & nimia servitus, &*  
*nimia libertas.*

*Item: Mavult commemorari de se, cum*  
L2 pos-

*poſet perdere, neperciffe; quam cum parcere potuifſet, perdiſſe.*

*Ex Livio.* Plebicolæ, qui vos nec in armis, nec in otio eſſe ſinunt.

*Ex Curtio.* Hæc tecum, quam ſine te cum his, loqui malui.

Nota: Hæc figura plurimum confert ad acutas brevesque ſententias & allusiones.

### §. III.

#### De Figuris per Similitudinem.

*Quæ ſunt figuræ per similitudinem?* Fignræ per similitudinem tres in primis numerantur; nempe: Paronomasia, ſimiliter cadens, & ſimiliter - definiens.

#### PARONOMASIA.

*Quid eſt Paronomasia.* Paronomasia eſt figura, qua voces pene ſimiles, ac colludentes usurpantur in ſenu diſimiili.

*Exempla ex Cicerone.* Consul ipſe parvo animo & pravo, facie magis, quam facetiis ridiculus. Ad Atticum.

Item in Antonium: Cum in gremio mimarum mentum & mentem deponeres.

Et alibi: De hujus urbis, atque adeo Orbis extio cogitat.

Item Philip. 3. Ex aratore factus Orator.

*Ex Livi.* Plebis ritum, quo oneratus magis, quam honoratus fui, primus antiquo abrogoque.

*Ex Curtio.* Quid iniquius, quam me, qui, ſi tibi non paruiſſem, jure daturus fui pœnas; nunc peri- re, qui parui.

#### SIMILITER CADENS.

*Quid eſt ſimiliter cadens?*

Similiter cadens eſt vocabulorum per eos- dem

dom casus, vel per eadem tempora expressorum, syavis quidam concentus.

*Quid tam commune, quam spiritus vivis,  
terra mortuis, mare fluctuantibus, littus ej-*

*etis? Pro Roscio Amerino.*

Exem-  
pla ex  
Cicerone.  
ne.

Item in Rullum: *Contemni populi Romani  
majestatem, vexari Rempublicam, deludi vos-*

*metissos patiemini?*

Hac est eadem familia, cuius vi compulsi  
sacrū montē cēpistis: hæc, adversus  
quam tribunitium auxilium vobis compara-  
stis: hæc, propter quam Aventinum insedistis.

Ex Li-  
vio.

*Eripite viscera mea ex vinculis, restituite  
mihi pignora, pro quibus ipsi mori non recu-  
fasti, credite parentes, liberos tendere ad vos  
manus.*

Ex Cur-  
tio.

Quām modicus erat cultus, quām parcus Ex Pia-  
comitatu, quām civilis incessu.

nio.

### SIMILITER DESINENS.

Similiter desinens est figura, in qua plura Orationis membra eodem modo terminantur, ut apud Quintilianum: *Ejusdem non  
est, & facere fortiter, & vivere turpiter.*

Quid est  
Simili-  
ter desi-  
nens?

Exem-  
pla ex  
Cicerone.  
ne.

*Itaque non sum prædicaturus, quantas res  
ille domi militiaeque, terra marique, quantas  
que felicitate gesserit, ut ejus voluntatibus  
non modo cives semper obseruent, socii ob-  
temperarint, hostes obseruent, sed etiam ven-  
ti tempestatesque obseruantur. Pro Lege  
Manilia.*

Et Verrina III. Nro 9. *Cum fana spoliā-  
rit, cum tot homines innocentes necarit, cum  
Cives Romanos morte, cruciitu, cruce affe-  
rit, cum prædonum duces accepta pecunia di-  
miserit.*

Agit-

*Ex Li-* Agite, ubi curiam circum federitis, inse-  
vio. stum feceritis, carcerem principibus impleve-  
ritis; egredimini extra portam.

*Ex Cur-* Hi territos regere non poterant, Equi cre-  
tio. bra jactatione cervicum jugum excusserant,  
currus everterant.

---

## CAPUT III.

## DE FIGURIS SENTENTIARUM.

*Quid*  
*sunt fi-* Figuræ Sententiarum sunt illa Orationis or-  
*guræ* namenta, in quibus, juxta Quintilianum  
*sen-tem-* Libr: 9. Cap: 2. maxime Elocutio sita est; quæ-  
*tiarum?* que non in verbis, sed in ipsis sententiis col-  
locatam habent suam dignitatem.

## §. I.

## De Interrogatione, Responsione &amp; Subjectione.

## INTERROGATIO.

*Quid in-* Interrogatio est vehemens non tam sci-  
*terro-* scitandi, quam instandi potius, & urgendi  
gatio? gratia suscepta percontatio. Hujus figuræ,  
tot sunt apud Ciceronem exempla, ut in sin-  
gulis pene ejus paginis occurrant. Fit antem.

*imo.* Interrogando de eo, quod negari  
non potest. Ut Cicero Catilin: I. Nro 1. Pa-  
ttere consilia tua non sentis? Confriccam jam  
harum omnium conscientia teneri conjuratio-  
nem tuqm non vides? Quid proxima, quid  
superiore nocte egeris, ubi fueris, quos con-  
vocaveris, quid consilii cœperis, quem no-  
strum ignorare arbitraris?

Et

Et Verrina VII. Nro 146. *An dices hominem non esse a te interemptum, quem palam & in ipsa Civitatis luce occidisti?*

2do. Quærendo de eo, cui respondere sit difficile. Ut Cicero pro Plancio: *Quid tales? quid dissimulas? quid tergiversaris? Etiam atque etiam insto, atque urgeo, insector, posco, atque adeo flagito crimen; quamcumque tribum, inquam, delegeris, quam tulerit. Plancius, tu ostendito, si poteris, vitium.*

3tiō. Jocando & irridendo. Ut pro Roscio Amer: Nro 54. *Quid affers, quare id factum putemus? vere nihil potes dicere. Finge aliquid saltem, commode; ut non plane videaris id facere, quod aperte facis, hujus miseri fortunis, & horum virorum talium dignitati illudere. Exhæredare filium voluit: quam ob causam? nescio. Exheredavitne? non. Quis prohibuit? Cogitabat. Cogitabat? Cui dixit? nemini. &c.*

4to. Invidiam alicui accersendo; ut pro Sextio Nro 17. *Quid dicam? Consules? Hoc cine ut ego apellem nomine eversores hujus imperii, proditores vestræ dignitatis, hostes bonorum omnium, qui ad delendum senatum, affligendum Equestrem ordinem, extinguedanda omnia jura, atque instituta majorum, se illis fascibus, cæterisque insignibus summi honoris, atque imperii ornatos esse arbitrabantur?*

Plura hujus figuræ exempla vide pro Cælio Nro 71. Pro Flacco Nro 19. Pro Cluentio Nro 62.

*Quæ tristitia, hæc, milites? quæ insalita Ex Li-  
cunctatio est?... quid Arma habetis? quid vio-  
bel-*

*bellum intulisti? in otio tumultuosi, in bel-  
lis segness; quid hic stantibus spei est?*

## RESPONSIo.

*Quid est Responsio est figura, qua aliquid interro-  
ganti aliud, quod utilius est, respondetur. Ut  
Cicero: An fustibus vapulasti? Et innocens  
quidem. Item. Hominem occidisti? Imo la-  
tronem & parricidam.*

Plura & longiora ejus figuræ exempla  
vide Pro Roscio Amerino Nro 143. Pro Mu-  
rena Nro 73. Pro Flacco Nro 4.

## SUBJECTIO.

*Quid est Subjectio est figura, qua Orator vel inter-  
rogat se ipsum, & respondet sibi, vel dum in-  
terrogat alium, non expectat ejus respon-  
sum, sed aliquid de suo addit. Ita Cicero pro  
Lege Manilia Nro 61.*

*Quid tam novum, quām Adolescentulum  
privatum, exercitum difficile Rēpublicæ tem-  
pore confidere? confecit: huic præse? præ-  
fuit: rem optimè dulci suo gerere? gesit.*

Item de Harusp.: Respon: Nro 23. Tu me-  
am domum religiosam facere potuisti? ecqua-  
viente? quād invaseras. Quād manū? quād di-  
sturbaras: quād voce? quād incendi iusseras:  
quād legē? quam in illa tua quidem impuni-  
tate scripsers.

Habes alia hujus figuræ exempla: Pro  
Quintio Nro 43 44. 79. Pro Roscio Amerino  
Nro 54. 74. In Rullum Nro 45. Verr: IV.  
Nro 192.

*Ex Li-  
vio. Pro Deum fidem! quid vobis vultis? Tri-  
bunos plebis concupistis? concordiae causa*

CON-

concessimus. Decemviroſ desideraſtis? creari  
paſſi ſumus. Decemvirorum vos pertaſum eſt?  
coſginus abire Magiſtratuſ.

Jubes eſſe liberos? erimus. Jubes, queſ Ex Plinio.  
ſentimus, proſerre in medium? proſeremus.

At quomodo objecit? non poſum dicere. Formu-  
Quid ergo eſt? primum magnitudo periculi lae Sub-  
&c. At quis erat procurator? credo &c. jeſtio-  
Nota tres präcedentes figuræ uſurpan- nis Ci-  
tur maxime cum vehementius urgendus eſt ceroni-  
adversarius. anæ.

### §: II.

#### De Anteoccupatione, Correctione & Du- bitatione.

##### ANTEOCCUPATIO.

A nteoccupatio eſt figura, qua id occupat Quid eſt  
Orator, quod ab Adversario poſſet ob- Anteoc-  
jici. cupatio?

Queret quispiam, quid? illi ipſi ſummi Exem-  
Viri, quoram virtutes literis prodiſtæ ſunt, pla ex  
iſtane doctrina, quam tu laudibus effers, eru- Cicero-  
diti fuerunt? Difficile hoc eſt de omnibus ne.  
conſirmare; ſed tanen eſt certum quid re-  
ſpondam. Ego multos homines excellenti  
animo ac virtute fuifſe, & ſine doctrina, na-  
turæ iſpius habitu prope divino, per ſe iſpos  
& moderatos & graves extitifſe fateor; eti-  
am illud adjungo, ſeptius ad laudem atque  
virtutem naturam ſine doctrina, quam ſine  
natura valuiſſe doctrinam. Atque idem ego  
contendo, cum ad naturam eximiam atque  
illuftrēm acceſſerit ratio quædam, conſirma-  
tioque doctrinæ; tum illud nescio quid prä-  
cla-

*c*arum ac singulare solere existere. Pro Ar-  
chia Poëta Nro 15.

Plura, eaq*ue* eximia hujus figuræ exem-  
pla vide Pro Cælio Nro 39. Pro Rabirio  
Nro 1. Pro Sextio Nro 4. Pro Lege Mani-  
lia Nro 22. Verrina VII. Nro 2.

*Ex Car.* At enim Equitum peditumque multitudo  
vos commovet? Testis adversus multitudinem  
invitti Macedonum roboris Granicus annis,  
& Cilicia inundata cruento Persarum, & Ar-  
bela, cuius campi devictorum a nobis ossibus  
strati sunt.

*Ex Pli-* Sed parum est, ut in curiam venias, nisi  
*nio.* & convokes. Ut interfis Senatui, nisi & præ-  
sideas. Vis illud augustissimum Consulum tri-  
bunal aliquando Majestati tuae reddere?  
Ascende. Vis constare reverentiam Magi-  
stratibus, legibus, auctoritatem, modestiam  
postulantibus? adi.

*Formu-* Forsttan quæretis? Forte dicet quis? Eti-  
*la Cice-* am dicere audebis? Ac etiam sunt qui di-  
*roni- z-* cant. Reprehendo igitur? minime vero.

*ne hu-* Nota: hæc figura ad solide aliquid con-  
*gus fi-* firmandum, vel refutandum plurimum valet.

### C O R R E C T I O.

*Quid est* Correctio est figura, qua Orator dictam  
*Corre-* sententiam, aliâ magis idoneâ corrigit.

*Etsi?* Caius Cœsar adolescens, pene potius puer,  
*Exem-* incredibili ac divina quadam mente, atque  
*pli ex* virtute, tum maxime, cum arderet furor An-  
*Cicer- tonii.... firmissimum exercitum comparsuit:*  
*ne.* Patrimonium effudit. Quamquam non sumus  
usi eo verbo, quo decuit; non enim effudit,  
sed in salute Reipubliee colocavit. Philip:  
III. Nro 3. Item

Item Philip: II. Nro. 42. *Hæc ut colligeres, homo amentissime, tot dies in altera villa declamasti. Quamquam tu quidem, ut tui familiarissimi dictitant, vini exhalandi, non ingenii acuendi causâ declamitas.*

Et pro Ligario Nro 24. *Quæro, quid facturi fuistis? Quamquam quid facturi fueritis, non dubitem, cum videam, quid feceritis.*

*Orbitas quoque mea, quod sine liberis sum, spernitur, sed erro. In vobis liberos, parentes, consanguineos habeo. Vobis salvis orbus esse non possum.* Ex Curatio.

*Quamquam quid loquor? Sed quid ego de illis omnibus? Quas illæ leges? si leges nominandæ sunt. &c.* Formular Cor- rectionis Cicero- nianæ

### DUBITATIO.

Dubitatio est figura, in qua Orator quasi fluctuans, fingit nescire se, quid sibi agendum, dicendumve sit. Quid est Dubita-  
tio?

*Quid primum quærar? aut unde potissimum exordiar? aut quod, aut a quibus auxilium petam? Deorumne immortalium? Populine Ram: vestramne, qui summam potestatem habetis, hoc tempore fidem implorem?* Exempla ex Cicerone.

Item pro Quintio Nro 56. *Quo te nomine appellemus? num malitiosum? negas. Fraudulentum? id quidem arrogas tibi, & præclarum putas. Audacem? cupidum? perfidum? vulgaria, & obsoleta sunt, res autem nova & inquidita.*

Plura hujus figuræ exempla vide Verri- na VI. Nro 88. Verrina II. Nro 37. Philip: XI. Nro 19. Pro Cluentio Nro 4.

*Apud vos quemadmodum loquar, nec confundamur.* Ex Livia.

filium, nec Oratio suppeditat. Quos, nec quo nomine quidem appellare debeam, scio. Civis? qui a Patria descivisti. Milites? qui Imperium auspiciumque abnuiisti. Sacramenti religionem rupisti. Hostes? Corpora, ora, vestitum, habitum Civium agnoeo. Facta, dicta, consilia, animos, hostium video.

*Ex Cur-  
tio.* Sed jam non verba punientia sunt, linguae temeritas pervenit ad gladios . . . Quo me conferam, milites? cui caput meum credam? Uide praesidium petierani, periculum extitit. Quam feliciter in acie occidisse, potius hostis praedax quam Civis vittima.

*Ex Pli-  
nio.* Initium mirer, an finem multum est, quod perseverasti, plus tamen, quod timuisti, ne perseverare posses.

*Formulæ* Quo te nomine appellemus? Quid ergo dubitum est? Vereor me hercule. Illud vero quid sit? cetero. Quid argam, Judices? Quo accusationis meæ. &c. anæ.

Usus hujus figuræ in omni genere dicendi amplissimus eit. In genere Exornativo, quando ea rerum gestarum, aut virtutum aliquujus & ornamentorum libertas, & magnitudo occurrit, ut Orator singat nescire, unde potissimum debeat ordiri, & quid primum dicere, In genere Judiciali, cum indignitas aliquujus facinoris est exaggeranda, aut multitudo vitiorum redarguenda. In genere Deliberativo, quando rei gerendæ tot occurserunt rationes, ut quam primo loco ponat, fateatur Orator, se omnino nescire.

### §. III.

*De Communicatione, Apostrophe & Pro-  
popœja.*

COM-

## COMMUNICATIO.

**C**ommunicatio est figura, qua Orator, eosdem ipsos, apud quos, vel contra quos dicit, consultit ac compellat. Quid est  
Communi-  
catio?

*Nunc ego, judices, jam vos consulto, quid Exempta  
mihi faciendum putetis; id enim consilii mihi ex Cice-  
proposito taciti dabitis, quod egomet mihi necesse  
fario capiendum intelligo. Verr: II. Nro 32.*

Et pro Rabirio Nro 22 *Tu denique, Labi-  
enel: quid sae res tali in re ac tempore? quam  
tandem auctoritatem, quam vocem, cuius se-  
tiam sequi, cuius potissimum in imperio pare-  
re velles?*

Ivenies alia hujus figuræ exempla: Pro Cæcili: Nro 32. 35. Pro Quintio Nro 54. Pro Sextio Nro 43. 81. Pro Domo sua Nro 139. Philip: II. Nro 34.

*Nun illam auctoritatem ejus literæ ha-  
buerant? Ego ipse quoties, quæ audieram, de-  
tuli, cum ludibrio crudelitatis repulsus sum.  
Si & cum indubius, invisi, & cum tacerimus  
suspecti sumus; quid facere nos oportet? Fi-  
nem facio dicendi, quoniam ultima verba gra-  
via sunt auribus vestris.* Ex Cura-  
tio.

Fortasse sufficit tibi tertius consulatus? id nobis tanto minus sufficit.

*Quid tu, Vir optime? ecquid habes, quod Formu-  
dicas? auicula mihi, vide, ne tibi desis. Si la Com-  
hæc gesta non audiretis. sed pitt'a videretis &c.* munica-  
tionis  
Cicer:

Hæc figura plurimum valet, cum causæ no- stræ confidimus, & adversarium refellimus.

## APOSTROPHE.

Apostrophe est figura, qua Orator convertit *Quid A-*

*postrophe?* tit Orationem suam, vel ad DEUM, vel ad Ju-  
dices, vel ad Adversarios, vel etiam ad res  
inanimales.

*Exempla*  
*ex Cicerone.*

*O Dii immortales! Vos enim hæc audire  
cupio: Clodius vestra Sacra curat? Vestrum  
Numen horret: res omnes humanas religio-  
ne vestra contineri putat? Hic non illudit  
authoritati horum omnium, qui adjunt, sum-  
morum virorum? Non vestra Pontifices gra-  
vitate abutitur? ex isto ore religionis ver-  
bum excidere, aut elabi potest? Pro Domo  
sua Nro 104.*

Item Verr: VII. Nro 122. ad Judices: *Per  
Deos immortales, Judices! quo tandem ani-  
mo sedetis? aut hoc quem admodum auditis?  
Utrum ego despicio, & plus, quam satis est, do-  
leo in tanta calamitate miseriaque sociorum?  
An vos quoque hic acerbissimus innocentium  
cruciatus & mæror pari sensu doloris afficit?*

Item pro Ligario Nro 9. ad Adversarios:  
*Quid enim, Tubero, tuus ille distictus in acie  
Pharsalica gladius agebat? qui sensus erat ar-  
morum tuorum? quæ tua mens, oculi, ma-  
nus, ardor animi? quid cupiebas, quid opta-  
bas?*

Item pro Milone Nro 85: *Vos enim jam  
Albani tumuli atque luci, vos, inquam, implor-  
o. atque testor: vosque Albanorum obrutæ  
aræ, sacrorum Populi Romani sociæ, & æqua-  
les .... vestræ tum aræ, vestræ religiones vi-  
guerunt, vestra vis valuit &c.*

Plura ejus figuræ exempla vide Catilin:  
I. Nro 33. Pro Cælio Nro 59. Philip: II. Nro  
33. 82. Pro Ligario Nro 6. Pro Muren: Nro  
78. Verrina I. Nro 35. Pro Roscio Ameri-

no Nro 144. Pro Balbo Nro 13. Verr: VII.

Nro 170. Philip: II. Nro 32.

Jupiter optime, maxime, Junoque Re-Ex *Livio.*  
gina, ac Minerva cæterique Dii, Deæque; qui  
Capitolium Arcemque incolitis; siccine ve-  
strum militem ac præsidem suis vexari ab  
inimicis? Hæc dextra, quæ Gallos fudi a De-  
lubris vestris, jam in vinculis & catenis erit?

Ergo, Charissime Pater, & propter me mo-*Ex Curtio.*  
rieris & mecum? ego tibi vitam adimo: ego  
senectutem extinguo. Quid me procreabas in-  
felicem, aversantibus Diis? an ut hos ex me  
fructus perciperes, qui te manent? Nescio,  
Adolescentia mea miserior sit, an senectus  
tua.

Valet hæc figura, ut ex adductis exem-  
plis patet, tum ad increpandos acrius ad-  
versarios, tum ad commiserationem commo-  
vendam.

### PROSOPOPÆJA.

Prosopopœja est fictio personæ, seu figu-*Quid Pro-*  
ra, qua Orator Personæ absenti, vel mortuæ,  
aut etiam rei sensu carenti sermonem tri-*popopœja.*  
buit.

Sic Cicero Milonem absentem, cum Pa-*Exempla*  
tria & secum loquentem inducit Nro 93. *ex Cicero.*  
Me quidem, judices, examinant, & interimuntne,  
hæc voces Milonis, quas audio hisstidue, & quæ  
bus intersum quotidie. Valeant, inquit, Ci-  
ves mei, valeant, sint incotunes, sint florantes,  
sint beati: stet hæc urbs præclara, n. n.  
que Patria charissima, quoquo modo merita  
de me erit. Tranquilla Republica Civies mei,  
quoniam mihi cum illis non licet, sine me  
*ipsi.*

*ipſi, ſed per me tamen perſtruantur. Ego cedam, atque abibo: ſi mihi Republicā bonū frui non licuerit, at carebo mald.*

Item in Antonium. Brutum mortuum ſic loquentem inducit: *Quodſi nunc ille Brutus revivifcat, & hic ante uestros pedes adſit, nonne hac uteretur oratione: Ego Reges ejeci, vos tyrannos introducitis? Ego libertatem, quæ non erat, peperi; vos partam ſervare non vultis?*

Denique rebus etiam inanimatis & ſentū carentibus ſic sermonem tribuit Catilin: I. Nro 18. *Quæ (Patria) tecum Catilina ſic agit, & quodammodo tacita loquitur: Nullum jam tot annos facinus extitit, niſi per te, nullum flagitium ſine te; tibi uni multorum Civium neces, tibi vexatio, direptioque ſociorum impunita fuit ac liberia. Tu non ſolum ad negligendas leges & queſtiones, verum etiam ad evertendas, perfringendasque valuiſti. Superiora illa, quamquam ferenda non fuerunt, tamen, ut potui, tuli; nunc vero me totam eſſe in metu propter te unum: quidquid increpuerit, Catilinam timeri: nullum vidéri contra me conſilium iniri poſſe, quod a tuo ſcelere abhorreat; non eſt ferendum. Quamobrem diſcede, atque hunc mihi timorem eripe. Si verus eſt, ne opprimar: ſin falsoſus, ut tandem aliquando timere deſinam.*

Similia plurima huius figuræ exempla vi-de Pro Murena Nro 38. 45. Pro Plancio Nro 12. In Pison: Nro 59. Pro Cælio Nro 33. 36. Verrina IV. Nro 19. Catilin: I. Nro 27. & 28.

Simililiter Livius inducit strenuum militem, ſic jam post mortem loquentem: *Ego*  
*ter*

ter & vicies cum hoste per provocationem pugnavi; ex omnibus, cum quibus manum conferui, spolia retuli, insigne corpus honestis cicatricibus, omnibus adverso corpore exceptis, habeo. Ego hoc ferro saepe vexatum corpus, vetus miles adolescentibus ostendi.

Nota hæc figura non vulgarem eloquentiae vim habet ad objurgandum, laudandum & miserandum, ad quam etiam reducitur Dialogismus, seu duarum, aut plurium personarum inter se collocutio. Qualis est apud Ciceronem Pro Quintio Nro 71. 77. & Verr: VII. Nro 109.

## §. IV.

*De Hypotyposi. Ethopæja & Suslentatione.*

## H Y P O T Y P O S I S.

**H**ypotyposis, est tam viva rei alicujus descriptio, ut cerni oculis potius, quam audiri, vel legi videatur. *Quid est Hypotyposis?*

*Ipsæ inflammatus scelere & furore in forum venit, ardebat oculi, toto ex ore crudelitas eminebat. Expeſiabant omnes, quo tandem progressurus, aut quidnam acturus es-ſet; cum repente hominem corripi, atque in foro medio nudari, ac deligari, & virgas expediri jubet. Clamat ille miser, se Civem esse Romanum &c.* Verrina VII.

Item Philip: II. Nro 7. Ponite igitur ante oculos miseram illam quidem, & fleabilem speciem, sed ad incitandos animos vestros necessariam; nocturnum impetum in urbem Asiae clarissimam, irruptionem armatorum in Tremontii domum: cum miser ille prius latronum

M

gla-

*Exempla ex  
Cicerone.*

gladios videret, quām, quæ res eſset, audīſſet,  
ſerentis introitum Dolabellæ vocem impuram,  
atque os ilius infame, vincula, verbera, equu-  
leum, carnificem, tortoremque Samarium &c.

Plura, illaque elegantissima Hypotypoſis exempla vide Pro Roscio Amerino Nro 98. Pro Milone Nro 28. Philip: II. Nro 105. Verrina III. Nro 67. 141. Verr: IV. Nro 108. Verr: VI. Nro 74. Verr: VII. à Nro 26. ad 29. & Nro 105. 141. denique in Oratio-  
ne pro Murena illustris est, eademque ve-  
hementissima gemina hypotyposis Nro 85.  
& 188.

*Ex Licio.* Omnes rapiunt; spoliant, verberant, vul-  
nerant, occidunt, quotidie capitur urbs nostra,  
quotidie diripitur, dies noctesque omnia pa-  
ſum mulierum puerorumque, qui rapiuntur,  
atque asportantur, ploribus sonant! Mi-  
retur, qui ſciat, quomodo aut nos ad pa-  
tiendum ſufficiamus, aut illos, qui faciunt,  
nondum tantarum injuriarum ſatietas ce-  
perit.

*Ex Cur-  
tio.* Facebant totis campis opes regiae. Illa  
pecunia ſtipendio ingenti militum præpara-  
ta: ille cultus tot nobilium virorum, tot il-  
lustrium ſeminarum: aurea vasa, aurei fræ-  
ni, tabernacula regali munificentia ornata,  
vehicula a suis deſtituta, ingentis opulentiae  
plena... Non ſufficiebant prædantium manus  
prædae.

*Ex Pli-  
nio.* Videres rēferta teſſa, oppletas undique  
vias, alacrem hinc atque inde populum, u-  
bique par gaudium, paremque clamorem.

Hæc figura mirum in modum valet, in  
narrationibus in descriptionibus locorum, re-  
rum & personarum.

Ero.

## ETOPÆJA.

Etopæja est figura, qua Orator vitam, personam & indolem alicujus, quibusdam si-  
gnis ita describit, ut in cognitionem ejus-  
dem morum deducat.

Quorum si nondum scelerâ vulneraque  
inusta Republicæ vultis recordari, vultum atque incessum animis intueamini, facilius facta eorum occurent mentibus vestris, si ora ipsa oculis proposueritis. Alter unguen-  
tis affluens, calvistrata coma.... Alter o-  
Dii boni, quam teter incedebat, quam trucu-  
lentus, quam terribili asperctu! &c. Pro Sex-  
tio Nro 19.

Et pro Roscio Amer: Nro 135. Ipse ve-  
rò quemadmodum imposito, & dilibuto ca-  
pillo passim per forum volitet, cum magna  
caterva togatorum; videtis Judices, ut om-  
nes aspiciat, ut hominem præ se neminem  
putet, ut se solum rarum, solum potentem  
putet.

Plura hujus figuræ exempla vide Pro  
Comædo Nro 20. In Rullum Nro 13. Post  
reditum in Senatu Nro 12. Verrina VII.  
Nro 27.

Me jam non eundem, sed umbram no- Ex Li-  
menque relitum videtis. Vires corporis effæ- vio.  
tæ, sensus oculorum atque aurium hebetes,  
memoria latet, vigor animi obtusus.

Ipse occursu visuque terribilis: superbia Ex Fl-  
in fronte, ira in oculis, saamineus pallor in mo-  
ore: in corpore impudentia, multo rubore  
suffusa. Non adire quisquam, non alloqui  
audebat: tenebras semper, secretumque cap-

Quid, est  
Etopæ-  
ja?

Exem-  
pla ex  
Cicerone.

tantem, nec unquam ex solitudine sua prodeuntem, nisi ut solitudinem faceret.

## S U S T E N T A T I O.

*Quid est Sustentatio?* Sustentatio est figura, qua Orator spensos tenet aliquamdiu Auditorum animos, donec aliquid inexpectatum subjungat.

Habes illustre figuræ hujus exemplum Verrina. VII. Nro 10. & 11. Res delata ad istum; ut par fuit, iussu ejus homines, qui nominati fuerant, comprehensi adductique Lilibœum: Domino denunciatum est, ut adesset: causa dicta damnati sunt . . . Etiamnum mihi expectare videmini, Judices, quid deinde scđum sit. Expectate facinus, quam vultis improbum, vincam tamen expectationem vestram; nomine sceleris conjurationis que damnati, ad supplicium traducti, ad patrum ciliugati, reperire multis hominum millibus inspectantibus, soluti sunt, & Leonidae illi Domino redditi.

Elegantissima est illa sustentatio, quæ dubitationem adjunctam habet, quæqué allatis multis rebus, iisdemque rejectis, novum tandem aliquid, & minime expectatum subjicit; quod videre est apud Ciceronem Philip: II. Nro 2. Quid putem, contemptumne me? Non video, nec in vita, nec in gratia, nec in rebus gestis, nec in hac mea metiocritate ingenii, quod despicere possit Antonius. An insenatus facillime de me detrahi posse credidi? Qui Ordo Clarissimus Civibus bene gestæ Reipublicæ, testimonium multis, mihi unicervatæ dedit. An decertare mecum voluit contentione dicendi? hoc quidem beneficium

cium est; quid enim plenius, quid uberius, quam mihi & pro me, & contra Antonium dicere? Illud profecto est: non existimavit, sui similibus probari posse, esse se hostem Patriæ, nisi mihi esset inimicus.

Habes alia Sustentationis exempla pro Roscio Amerino Nro 39. Pro Quintio Nro 66. In Rullum Nro 11. Pro Dejotaro Nro 26.

Cognitorem adscribit Sthemo, quem? co-  
gnatum aliquem, aut Propinquum? non. Ali-  
quem honestum hominem? ne id quidem. Formulæ  
sustenta-  
tionis Ci-  
ce. onianæ.

Item: Amandat hominem, quo? Litybœum  
fortasse? .. minime. Judices; Panormum igi-  
tur? .. Ne Panormum quidem. Quid igitur,  
quid putatis? &c.

### §. V.

#### De Apoſiopēſi, Præteritione & Licentia.

##### APOSIOPESIS.

**A**poſiopēſi est figura, qua Oratio interci-  
ditur, aliquujus gravioris affectū signifi-  
candi gratiā.

Sic Cicero ad Heren. *Tu, qui nuper alienæ domus... non ausim dicere, ne cum te digna dixero, me indigna dixisse videar.*

Et pro Cælio Nro 69. *Hic etiam miramur, si illam commentitiam pavidem, obſcenissi-  
ma sit fabula consecuta. Nihil est, quod in  
ejusmodi mulierem cadere non videatur; au-  
dita, & per vulgata, celebrata sermonibus  
res est. Percipitis animis, Judices, jam dudum,  
quid velim, vel potius, quid nolim dicere...  
quod etiam est factum, certe a Cælio non  
est factum.*

Ille

*Formulæ* Ille vero ... sed stomachari desinamus.  
*hujus* Item Si morem geſſeris, primum feres. Sin? ...  
*figuræ Ci-*  
*ceronia-* Sed non ero hodie aſperior. &c.  
*næ.*

## P R Ä T E R I T I O.

*Quid  
Præteri-  
tio?* Præteritio, (quæ Ciceroni videtur præ cæteris in deliciis & amore fuisse;) est figura, qua Orator simulat se vel nescire vel nolle dieere id, quod vel maxime dicit; minus in modum valet tam ad laudandum, quam ad vituperandum. Sic Cicero suum Pompejum magnifice laudat per præteritionem: *Itaque non sum prædicaturus, Quirites, quantas ille res, domi militiæque, terra marique, quantaque felicitate geſſerit, ut ejus semper voluntatibus non modo Cives aſſenſerint, socii obtemperarint, hostes obedierint; sed etiam venti tempeſtatesque obſecundarint. Hoc breviſſime dicam &c. Econtra Verrina III. Nro 32. 33. sic Verrem vituperat:*

*Itaque primum actum iſtius vitæ turpiſſimum & flagitioſiſſimum prætermittam; nihil u me de ſuæ pueritiae flagitiis audiet, omnia præteribo, quæ mihi turpia diſtu videbuntur, neque ſolum quid iſtum audire, verum etiam quid me deceat dicere, conſiderabo. Vos quoſo, date hoc, & concedite pudori meo, ut aliquam partem de iſtius impudentia reticeſſe poſſim.*

Habes alia hujus figuræ exempla. Verr: I. Nro 26. 29. Verr: II. Nro 14. Verr: III. Nro 75. 128. In Rullum Nro 21. Pro Flacco Nro 79. In Pifon: Nro 38. 87.

Vetera omitto, Porſenam, Gallos, Samni. Ex Livo. tes; a Punicis bellis incipiam: quot Clæſſes, quot

quot duces, quot exercitus priore bello amissi sunt? Jam quid hoc bello memorem? omnibus aut ipse adfui cladibus, aut quibus absui, maxime unus omnibus eas sensi.

Omittam Illyricos, Triballos, Bœotiam, Ex Cur.  
Traciam, Spartam, Peloponessum, quorum alia duttu meo, alia imperio auspicioque tio.  
perdonui. Ecce orsi bellum ab Helespon-  
to &c.

Sed jam hoc totum omitte. Sentio mo- Formula  
derandum esse orationi meæ, non tibi obji- præter-  
cio. Hic nolite expeditare, dum ego hæc cri- tianis Ci-  
mina. &c. Non versabor in uno genere. Nunc cur:  
agam modice, nec longius progrediar. Si-  
nите me hoc loco præterire. Possem multa  
dicere. Prætero; non dico, non coquemus.

## L I C E N T I A.

Licentia est præsumpta Orationis in di- Quid est  
cendo libertas; dum scilicet dicit aliquid Licentia?  
audacius apud eos, quos revereri & metue-  
re deberet.

Attende jam, Torquate, quām ego non Exempla  
defugiam autoritatem Consulatū tui. Ma- Ex Cice-  
xima voce, ut omnes exaudire possint, dico, rone,  
semperque dicam, adeste omnes animis, qui  
adestis corporibus, quorum ego frequentia  
magnopere lætor, erigite mentes auresque  
vestras, & me de invidiosis rebus, ut ille pu-  
tat, dicentem attendite. Pro Sylla Nro 33,

Et pro Domo sua: Quare Republicam, disrumpatur licet ista furia ( Clodium in-  
telligit ) atque audiatur hæc ex me, quoniam  
lacepsuit, bis servavi: & cum Consul togatus  
armatos vici: & cum privatus armatis effi- Plu-

Plura hujus figuræ exempla vide Pro Mil: Nro 33. Pro Sylla Nro 46. & 47. In Rull: Nro 23. Phil: X. Nro 8. Verr: VII Nro 153.

*Ex Livio.* Quem modo decoratum ovantemque vitoria incidentem vidilis, Quirites, eum sub furca vinclum inter verbera videre potestis? quod vix Albanorum oculi tam deformè spectaculum ferre possent. Glitter! colliga manus, quæ paulo ante armatae, Imperium Populo Romano pepererunt; i. caput obnubile liberatoris hujus urbis: arbori infelici suspende.

*Ex Curtio.* Tu hercule (si verum audire vis) Rex! hujus nobis periculi causa es; quis enim alius effecit, ut ad Philotam decurrerent, qui placere vellent tibi?

*Ex Plinio.* Absuefcat Imperator, cum Imperio calculum ponere, sic exeat, sic redeat, tanquam rationem redditurus. Præterea futuri Principes velint, nolint, sciant: Et c.

*Formulæ Licentiæ Cicer:* Læcessō vos, in concionem voce, Populo Romano disceptatore uti vale Erumpat enim aliquando vera, Et me digna vox. Equidem dicam ex animo, quod sentio. Vide, quid licentiæ Cesar, tua nobis liberalitas det, aut potius audacie.

Usurpatur hæc figura ad ostendendam fiduciam, ad objurgandum, ad insultandum Adversario. Interdum etiam assentationi deservit. Ut pro Marcello Nro 26.

Nunc cum omnium salutem civium, cum etiamque Rem publicam res tuæ gestæ complexæ sunt, tantum abes a perfectione maximorum operum, ut fundamenta, quæ cogitas, nondum jeceris.

## §. VI.

*De Concessione, Deprecatione, Imprecatione,*

## CONCESSIONE.

**C**oncessio est figura, qua Orator aliquid <sup>Quid est</sup> etiam iniquum causæ suæ videtur concedere, ut exinde acrius in adversarium <sup>Concessio?</sup> insurgat.

*Utrum quid agatur non vides? aut apud Exempli quos agatur? Agitur de parricidio, quod si ex Cicerone multis causis suscipi non potest. Apud ratione. homines autem prudentissimos agitur, qui intelligunt, neminem, ne minimum quidem maleficium sine causa admittere. Esto: causam proferre non potes; tametsi viciſſe debeo; de meo jure decedam, & tibi, quod in alia causa non concederem, in hac concedam, fretus hujus innocentia. Non quæro abs te, quare Patrem Sextus Roscius occiderit, quæro quomodo occiderit?*

*Et Verr: IV. Nro 46. Verum esto: eripe hæreditatem propinquis, da palæstritis, prædare in bonis alienis nomine Civitatis, verte leges, testamenta, voluntates mortuorum, jura vivorum, Num etiam Heraclium bonis privari oportuit?*

Plura hujus figuræ exempla vide Pro Quintio Nro 56. Verr: V. Nro 28. 219. Pro Domo sua Nro 43. Pro Murena Nro 41.

*Secedat nunc, avocet plebem, patet via. Ex Livio. Rapiant frumenta ex agris nostris, utantur annonæ; audeo dicere &c.*

*Quantalibet vis omnium gentium conspiret in nos, impleat armis virisque totum orbum.* Ex Curtio.

bem, classibus maria consternat; iniustas belluas inducat. Tu nos præstabis invictos.

**Ex Teron-** Persica frondem, & dic te dignorem,  
tio. qui Prætor fieres, quam Catonem. Item: Ti-  
bi si istud placet, profundat, perdat, pereat:  
nihil ad me.

**Formulæ** Eto: verum fac. Patior non moleste. Sit  
**Concessio-** ita Jane. Hoc do tibi. Tamen de meo jure  
**Cicer**: cedam. Ut tibi concedam hoc indignum esse.  
Verum quorū id tu tibi arrogas, & con-  
cedi postulas: concedamus.

Neta multam vim habet concessio, si cum  
Ironia jungatur; ut est Philin: II. Nro 5: Ab  
beneficio sum usus tuc? Quo? quod me Brun-  
dusii non occideris. Quod est aliud P. C. be-  
neficium latronum, nisi ut commemorare  
possint, iis se dedisse vitam, quibus non ade-  
merint . . . Sed sit beneficium? quandoqui-  
dem maius obtineri a latrone non potuit . .  
An de interitu Reipublicæ queri non de-  
bui &c.

**2do.** Delectat summopere Concessio, cum  
id, quod conceditur, Adversario nocet; ut pro  
Ligario Nro 2. Habes igitur, Tubero, quod est  
accusatori maximè optandum, confitentem re-  
um; sed tamen ita confitentem, se in ea par-  
te fuisse, qua te, Tubero, qua virum omni lau-  
de dignum Patrem tuum. Itaque prius de de-  
licto vestro fateamini, necesse est; quam Liga-  
rii ullam culpam deprehendatis.

### DEPRECATIO.

**Quid est** Deprecatio est figura, qua Orator ali-  
**Depreca-** cujs sive Dei, sive hominis opem, aut misé-  
rio? ricordiam implorat.

Quæ-

Quæ cum ita sint, primum, quod in tan-  
ta dimicazione capitum, famæ, fortunarum-  
que omnium fieri necesse est; ab Iove Opti-  
mo, maximo, cæterisque Diis, Deabusque im-  
mortalibus, quorum spe & auxilio multo  
magis hæc Respublica, quam ratione homi-  
num & consilio gubernetur, pacem ac ve-  
niam peto, precorque ab iis, ut hodiernam  
diem, & ad hujus salutem conservandam, &  
ad Rempublicam constituendam illuxisse pa-  
tiantur. Deinde vos, Quirites, quorum poten-  
tias maxima ad Deorum immortalium Nu-  
men accedit, oro atque obsecro, quoniam u-  
no tempore vita C. Rabirii, hominis miserri-  
mi, atque innocentissimi: salus Reipublicæ ve-  
stris manibus suffragiisque permittitur; qd-  
hibeatis iu hominis fortunis misericordiam,  
in Reipublicæ salute sapientiam, quam sole-  
tis. Pro Rabirio Nro 5.

Plura hujus figuræ exempla vide: Verr:  
VII. Nro 183. Pro Quintio Nro 10. Pro Ro-  
scio Amer: Nro 11. Pro Domo sua Nro 146.  
Pro Murena Nro 86.

Per Te, patriumque nomen, quod utri Ex Livio.  
nostrum sanctius sit, jam pridem sentis, ita  
me audias, precor, tanquam si voce & com-  
ploratione nocturna excitus mihi quiritanti  
intervenisses.

Per ego vos decora majorum, qui totius Ex Cur-  
Orientis regna cum memorabili laude tenue-  
runt, per illos Viros, quibus stipendum Ma-  
cedonia quondam tulit, per tot navium clas-  
ses in Græciam missas, per tot trophæa Re-  
gum oro & obtestor; ut nobilitate vestra  
Gentisque dignos spiritus capiatis: ut eadem

con-

186 ARTIS RHETORICÆ LIB: III.  
*constantia animorum, qua præterita tolerastis, experiamini, quidquid deinde fors tulerit.*

Adhibetur hæc figura potissimum in Perorationibus, quia nata est tota ad movendos affectus; ut videre est in Perorationibus Ciceronis pro Murena, pro Rabirio, Cælio, Cluentio, Dejotaro.

### IMPRECATIO.

*Quid est* Imprecatio est figura, qua Orator malum  
*Impreca-* alicui imprecatur,

*tio.* Dii te perdant, fugitive, ita non modo

*Exempla* ex Cicero. nequam & improbus, sed fatuus & amens es.

*ne.* Pro Dejotaro.

Et Jn Antonium Philip: XIII, Nro 48.

Quin tu abi in malam pestem, malumque cruciatum! ad te quisquam veniat?

*Ex Plinio.* Ereptum alienas pecunias eunt? Perdant,  
quas habent. Expellere penatibus gestiunt?  
Iuis exturbentur.

Valet hæc figura ad significandum odium  
& indignationem, varius tamen ab Oratori-  
bus, frequentius a Poëtis usurpatum.

### §. VII.

*De Antithesi, Exclamatione & Epiphonemate.*

#### ANTITHESIS.

*Quid est* Antithesis est figura, in qua vel verba ver-  
*Antithe- sis?* bis, vel sententiæ sententiis opponuntur. Spectat proinde tam ad Verborum,  
quam ad Sententiarum figuras.

*Eft*

*Exem-  
pla ex  
Cicer-  
o.*

*Est enim hæc non scripta, sed nata lex, quam non didicimus, accepimus, legimus; ve-rum ex natura ipsa arripuimus, hausimus, ne-expressimus; ad quam non docli, sed fæsti, non instituti, sed imbuti sumus. Pro Mil:  
Nro 10.*

*Et Catilin: II. Nro 25. Ex hac parte pugnat pudor, illinc petulantia: hinc pudicitia, illinc stuprum: hinc fides, illinc fraudatio: hinc pietas, illinc scelus: hinc honestas, illinc turpitudo: hinc continentia, illinc libido. Denique æquitas, temperantia, fortitudo, prudentia, virtutes omnes certant cum ini-quitate, cum luxuria, cum temeritate, cum vitiis omnibus.*

*Vide alia hujus figuræ illustria exempla Verrina VI. Nro 121. Pro Roscio Ameri-no Nro 13. Pro Cælio Nro 12. Pro Leg:  
Nro 15.*

*Quod ad me attinet, jam ætas senem in Patriam revertentem, unde puer profe-Ex Li-  
tus sum; jam secundæ, jam adversæ res, ita erudierunt; ut rationem sequi, quam fortuna malum.*

*Non de Tyranno, sed de Rege loquimur: non de Domino, sed de Parente; qui non crudelitatis, sed amoris excubii defenditur. Ex Pli-nio.*

*Ejusdèm etiam generis est memorabile illud dictum Augusti jam ætate proiecti ad nobiles quosdam juvenes, qui tumultuabantur: Audite, Juvenes, Senem, quem Juvenem senes audire.*

*Illustris est hæc figura, si e re nata ocurrat, nec studio longe accersita videatur.*

*Ex*

## EXCLAMATIO.

*Quid s<sup>e</sup> Exclamatio est figura, qua Orator vehementem aliquem affectum, cujuscunque tandem generis ille sit, significat.*

Nihil tam obvium apud Ciceronem, quam hæc figura; quare satis habebimus illustriora quædam illius exempla, quibus varios exprimit affectus, designare.

*Exemplum ex Cicero-Cicerone.* + Oratione prima in Catilinam per summam indignationem sic exclamat: *O tempora, o mores! Senatus nec intelligit, Consul videt: hic tamen vivit! Vivit? imo vero etiam in Senatum venit.* & ibidem Nro 9. *O dii immortales! ubinam gentium sumus? quam Rempublicam habemus? in qua urbe vivimus?*

Et pro Cælio: *Proh Dii immortales! cur interdum in hominum sceleribus maximis, aut connivetis, aut præsentis fraudis pœnam in dies reservatis?*

Misericordiam sic conciliat Pro Sylla: *O miserum & infelicem diem illum! quo Consul omnibus centuriis P. Sylla renunciatus est; o fallacem, o volucrem fortunam! o cæcam cupiditatem! o præpostaram gratulacionem! quam cito illa omnia ex lætitia & voluptate ad luctum & lacrimas redierunt!*

Et pro Milone: *O terram illam beatam, quæ hunc virum exceperit, hanc ingratam, si ejecerit, miseram, si amiserit!*

Odium & invidiam concitat Oratione pro Rescio Amerino Nro 146. *Per Deos immortales! quæ ista tanta crudelitas est? quæ tam sera inmanisque natura? quis unquam præ-*

*prædo fuit tam nefarius, quis pirata tam barbarus, ut cum integrum prædam sanguine habere posset, cruenta spolia detrahere mallet.*

Dolorem sic elicit in Antoni; *O miserum me! consumptis enim lacrymis, infixus tamen pectori hæret dolor.*

Ironiam jungit Exclamationi Oratione in Pisonem Nro 98. *O stultos Camillos, Curios, Fabricios, Scipiones, Marcellos! O amentem Paulum! rusticum Marium! nullius consilii Patres istorum amborum Consulum, qui triumpharunt.*

Et Philip: III. *O præclarum custodem ovium, et ajunt Lupum! Custosne urbis, an direktor & vexator eſet Antonius!*

*O Patria! ferrum, quo pro te armatus  
Ex Lihanc arcem defendere volebam, hosti minime parcens, quando Parens extorquet, recipie.*

*O novum, atque inauditum ad principatum iter! quanta Religio æquitatis? quanta nio.  
legum reverentia? o rem memoriae literisque mandandam!*

Nota: Exclamatione adjunctam ferme habet aliquam ex hisce interjectionibus: *O! heu! ah! vah! proh superi! proh superum, atque hominum fidem!* Persæpe tamen subintelligitur interjectio; ut: *Miserum me! Hoccine sacerdum! Veteres pro interjectione O! saepe adhibebant voces istas; Ædepol! Hercle! Mēhercule! Jupiter! Medius fidius! Me Caſtor!*

Exclamatione non solet nisi post rem aliquam insignem bene amplificatam & probatam

190 ARTIS RHETORICÆ LIB: III.  
tam adhiberi. Exclamare enim in rebus mi-  
nutis frigidum omnino est, ac puerile.

### EPIPHONEMA.

*Quid est Epiphonema?* Epiphonema est Exclamatio sententiosa, quæ fieri solet post rem aliquam insignem narratam & probatam.

Pro Milone Nro 9. Postquam laudavit adolescentis cuiusdam pudicitiam, qui Tribunum militarem Imperatoris propinquum, vim sibi inferentem interfecerat, subdit:  
*Exemplum ex Cicero.* Facere probus Adolescens periculose, quam perpeti turpiter maluit.

Ec pro Sextio Nro 86. Postquam docuit, oportere legibus ac judiciis vitam tueri, quod si fieri non possit, vim vi propulsandam, subdit: *Hoc sentire, prudentiae est; facere fortitudinis; sentire vero & facere, perfectae cumulataeque virtutis.*

Et Paradoxo I. Postquam parsimoniam multis extulit laudibus, concludit: *Dii immortales! non intelligunt homines, quam magnum vestigal sit parsimonia.*

*Ex Curia.* Adeo pavor etiam auxilia formidat. Item: Tantulo impedio ingens victoria stetit!

*Ex Plu.* Ita nemo existit, cuius virtutes nullo vitorio confinio laderentur Item. Adeo nulla magis omnibus displicant, quam quæ sic sunt, tanquam omnibus placeant.

Usurpatur potissimum hæc figura, in rebus singulari aliqua admiratione dignis.

### §. VIII.

*Usus figurarum in genere.*

*Item.* Usus figurarum debet esse parcus & mo-

& moderatus ne crebra hujusmodi ornamen-  
torum usuratio tedium generet, ac puerilitatem redoleat.

*2do.* Inter figuras, aliæ docent, aliæ de-  
lectant, aliæ movent magis.

Anteoccupatio, Subjectio, Concessio, Cor-  
rectio, Sustentatio, Antithesis, Communi-  
catio.

Apostrophe, Hypotyposis, Prosopopæja,  
Ethopæja, Hiperbole.

Exclamatio, Dubitatio, Obscuratio, seu  
Deprecatio, Imprecatio, Interrogatio, Prae-  
teritio, Licentia, Epiphonema.

*3to.* Quædam figuræ sunt, quæ sparsim  
adhiberi possunt in omnibus Orationis par-  
tibus, ut sunt: Communicationes, Apostro-  
phæ; aliæ sunt singularium Orationis parti-  
um magis propriæ; scilicet: quæ ad docen-  
dum valent, pertinent ad Exordium; quæ ad  
delectandum, pertinent ad Confirmationem  
& Confutationem; quæ ad movendum, per-  
finent ad Perorationem. Quæ tamen non  
ita scrupulose intelligenda sunt, ut non li-  
ceat aliquando ordinem hunc immutare.

*4to.* Nonnullæ figuræ sunt, quæ statim  
initio Orationis usurpantur, ut Interro-  
gationes, Apostrophæ. Nonnullæ ali-  
quam veluti præparationem requirunt, ut  
Exclamationes, Hypotyposes, Prosopopæjæ,  
& aliæ vehementiores, quæ non usurpantur,  
nisi post probatas & explicatas res graviores;  
quasque absurdum effet statim ab initio  
alicujus Orationis adhibere, nisi adhibendum  
sit aliquando Exordium ex abrupto.

Denique nulla re magis potest de recto  
figu.

figura ram usu judicari, quām frequenti Ciceronis lectione, qui figuras suis quibusque locis sic accommodat, ut ad eadem pertractanda, facta & nata quodammodo videantur.

## C A P U T IV.

### D E A M P L I F I C A T I O N E.

**C**um Eloctio Oratoria, non ornata tantum, sed rei etiam, de qua dicitur, accommodata, & numerosa esse debeat; fiat autem ornata per tropos & figuratas: accommodata per rationes & argumentationes; numerosa per amplificationes & periodos; ordo rei postulat, ut postquam de tropis, figuris, & argumentationibus in superioribus tractavimus, aliqua in sequentibus de Amplificatione adjiciamus. Quod autem Periodos spectat, harum struendi artificium in Classe humanitatis communiter tradi solet.

*Quid est Amplificatio?* Amplificatio, prout a Cicerone definitur, *Est gravior quædam affirmatio, quæ motu animorum conciliat in dicendo fidem,* Seu est vehementius quoddam, copiosiusque dicensi genus, quo rei vel dignitatem & amplitudinem, vel indignitatem & atrocitatem verborum & sententiarum pondere ita demonstramus, ut feriat animos, permoveat affectus, & memoriæ audientium penitus infideat.

*Quotuplex est Amplificatio.* Amplificatio duplex est, alia est amplificatio verborum, alia rerum.

§. I.

## §. I.

*De Amplificatione Verborum.*

**V**erba, quibus amplificatio constare debeat, Quibus  
verbis  
consta-  
re debet  
at Am-  
plifica-  
tio? hæc præterim recenset Tullius Libr: Partitionum Oratoriarum Nro 53. Est igitur amplificatio, gravior quædam affirmatio, quæ at Am-  
motu animorum conciliat in docendo fidem: Ea plifica-  
tio? & verborum genere conficitur & rerum. Ver-  
ba ponenda sunt, quæ vim habeant illustrandi,  
nec ab usu sint abhorrentia, gravia, plena, so-  
nantia, superlata, imprimisque translata.....  
Augent etiam relata verba, iterata, duplicata,  
& ea, quæ ascendunt gradatim ab humilioribus  
verbis ad superiora &c. De his operæ preti-  
um est, pauca dicere, & singula illustrioribus  
quibusdam exemplis commendare.

*Amplificatio per verba graviora & illustriora.*

Amplificatio per verba graviora & illus-  
triora fit, cum adhibentur verba splendida,  
quæ rem significantius exprimant. & in qui-  
bus plenum quiddam, numerosum & sonans  
esse videatur. Sic Cicero; brevem hanc sen-  
tentiam: *Memoria posteritatis, brevitatem* Quomo-  
do fit  
Ampli-  
ficatio  
per ver-  
ba gra-  
viora  
& illu-  
stria? *vitæ nostræ consolatur; pro Milone Nro 97.* sic gravioribus & illustrioribus verbis ampli-  
ficat: *Ex omnibus præmiis virtutis, si eſſet*  
*habenda ratio præriorum, amplissimum eſſe*  
*præmium gloriam, eſſe hanc unam, quæ brevi-*  
*tatem vitæ, posteritatis memoria consolareſtur,*  
*quæ efficeret; ut absentes adſtemus, mortui*  
*viveremus: hanc denique eſſe, cujus gradibus*  
*etiam homines in cœlum videantur ascendere.*

N<sup>o</sup> 2

Si.

Similiter hanc: *Cupio, ut me laudes, sic amplificat ad Lucejnm: Ardeo cupiditate incredibili, neque, ut ego arbitror, reprehendenda, nomen ut nostrum, scriptis illustretur & celebretur tuis.*

Porro verba illa graviora sunt, quæ maiorem vim virtutis alicujus, aut vitiī ostendunt, ut charitas & pietas, gravius aliquid sonant, quam amor & benevolentia. Item raptor, latro, prædo, parricida, gravius sonant quam fur, homicida &c. Sic Cicero Lib: I. Epi: 9. *Perjucundæ mihi fuerunt literæ tuæ, ex quibus intellexi, te perspicere meam in te pietatem; quid enim dicam benevolentiam, cum illud ipsum sanctissimum & gravissimum nomen pietatis, levius mihi meritis erga me tuis esse videatur?*

Et in Verrem *Non enim surem sed rapto-rem, non adulterum, sed expugnatorem pu-dicitæ, non sacrilegum, sed hostem sacro-rum, Religionumque, non siccariū, sed cru-delissimum carnificem Civium sociorumque, in vestrum judicium adducimus.*

### *Amplificatio per verba Superlata.*

*Quomo-do fit ampli-ficatio per ver-ba Su-perla-ta.* Amplificatio per verba superlata fit, cum adhibentur ejusmodi verba, quæ veritatem superant, sive plus dicunt, quam res in se esse possit.

Ut Cicero pro Lege Manilia Nro 28.

*Qui extrema pueritia, miles fuit summi Imperatoris; ineunte adolescentia, maximi ipse exercitus Imperator; qui saepius cum hoste conflixit, quam quisquam cum inimico concertavit, plura bella gessit. quam cæteri*  
*lege-*

legerunt, plures Provincias confecit, quam  
alii concupiverunt. Cujus adolescentia ad  
scientiam rei militaris, non alienis præce-  
ptis, sed suis imperiis, non offensionibus bel-  
li, sed victoriis, non stipendiis, sed triumphis  
est erudita.

In quo exemplo vide, quam copiose,  
quam graviter amplificet Cicero brevissimam  
hanc sententiam: *Pompejus fuit rei milita-  
ris peritisimus.*

Plura similia exempla vide In Pison: Nro  
53. Pro Milone Nro 105. Pro Archia Nro 19.  
Pro Marcello Nro 8.

### *Amplificatio per verba Translata.*

Amplificatio per verba translata fit, cum adhibentur ejusmodi verba, quæ a propria significatione ad alienam propter similitudinem transferuntur.

Sic Cicero hanc sententiam: *Nemo po-  
test res tuas gestas satis laudare,* amplificat per verba translata Oratione pro Marcello Nro 4. *Nullius est tantum flumen ingenii,  
nulla dicendi, aut scribendi tanta vis, tanta-  
que copia, quæ non dicam exornare, sed  
enarrare C. Cæsar, res tuas gestas possit.*

Similiter hanc sententiam: *Sola virtus est  
stabilis.* Philip: 4. Nro 13. sic amplificat: *Virtus est una altissimis defixa radicibus,  
quæ nunquam vi labefactari potest, nunquam  
dimoveri loco.*

Plura hujusmodi exempla vide superius  
sub Tropis Metaphora, & Allegoria.

*Am-*

*Amplificatio per Repetitionem.*

*Quamodo fit Amplificatio per Repetitionem?* Amplificatio per Repetitionem fit, dum eadem verba, aut ornatūs, aut vehementiores motūs excitandi causa, iterantur. Sic Cicero Pro Mil: Nro 91. *Excitate, excitate eum, si potestis ab inséris. Item: Matrem tuam occidisti; quid dicam amplius? Matrem tuam occidisti.*

Et pro Roseio Amerino: —,, Accusant ii, qui „ in fortunas ejus invaserunt; causam dicit is, „ cui præter calamitatem nihil reliquerunt. „ Accusant ii, quibus occidi Patrem Sexti Ro- „ scii, bono fuit; causam dicit is, cui non mo- „ do luctum mors patris attulit, verum etiam „ egestatem. Accusant ii, qui hunc ipsum ju- „ gulare summe cypiebant; causam dicit is, qui „ etiam ad hoc ipsum judicium cum præsidio „ venit, ne hic ibidem ante oculos vestros tru- „ cidetur. Denique accusant ii, quos populus „ pescit; causam dicit is, qui unus relictus ex „ illorum nefaria cæde restat. —.

Similia alia exempla vide supra, ubi de figura Repetitionis tractatur.

*Amplificatio per Periphrasim, seu Circumlocutionem.*

*Quamodo fit Amplificatio per Periphrasim?* Amplificatio per Periphrasim fit, cum longiori verborum ambitu, circuituque effe- tur id, quod brévius ac simplicius dici pos- terat. Sic Cicero Philip: II. —,, Tu ingredi il- lam domum ausus es? Tu illud sanctissi- sim? „ mum limen intrare, tu illarum ædium Diis „ penatibus, os illud importunissimum ostendere. —.

Et

Et Pro Milone cum brevius potuisset dicere, Clodium a Milone fuisse occisum; maluit illud hac verborum circuitione efferre: —  
 „ In quos incensos ira, vitamque Domini de-  
 „ sperantes, cum incidisset, hæsit in pænis, quas  
 „ ab eo servi fideles, pro Domini vita expe-  
 „ tierunt. —

Nota: ad hoc amplificationis genus refer-  
 tur etiam amplificatio per verba synonyma,  
 sive idem sere significantia: Ut Cicero — „ An  
 „ vero judices, vos soli ignoratis, vos hospites  
 „ in hac urbe versamini? vestræ peregrinantur  
 „ aures, neque in hoc pervagato Civitatis fer-  
 mone versantur. —

Et Catil: I. Nro 10. — „ Quæcum ita sint, Ca-  
 „ tilina, perge, quo cœpisti, egredere tandem  
 „ aliquando ex urbe, patent portæ; proficisci-  
 „ re... nobiscum versari jam diutius non po-  
 „ tes; non feram, non patiar, non finam. —

Plura exempla vide supra, ubi de Syno-  
 nymia, tractatur.

## §. II.

### *De Amplificatione Rerum.*

Hactenus de verbis egimus, ex quibus am-  
 plificatio constat; reliquum est, ut de  
 rebus, seu de locis, ex quibus eruitur am-  
 plificatio, dicamus. Nam ilia etsi ex omni-  
 bus tum intrinsecis, tum extrinsecis locis  
 peti possit; potissimum tamen fit, *imo*. Per  
 congeriem Definitionum, seu per Definitio-  
 nes congregatas. *2do*. Per congeriem Ad-  
 junctorum. *3to*. Per congeriem seu Enume-  
 rationem partium. *4to*. Per congeriem cau-  
 fa-

farum & effectum. 5to. Per congeriem consequentium. 6to. Per congeriem Similium, Comparisonum, Exemplorum. 7mo. Per Contrariorum, Dissimilium & inter se pugnantium confictionem. Denique per Incrementum. Singula hæc capita singillatim persequamur.

*Amplificatio per congeriem Definitionum.*

*Quid est  
Amplifi-  
catione per  
congeriem?*

*Definitio-  
num?*

**A**mplificatio per congeriem Definitionum est illa, in qua variæ ejusdem rei definitiones coæervantur.

Sic Cicero Curiae & Senatus Romani Majestatem amplificat per definitiones congregatas Pro Milone Nro 90. — „Quo quid mi-  
„serius, quid acerbius, quid inquietuosius vidi-  
„mus? Templum sanctitatis, amplitudinis, men-  
„tis, consilii publici, caput urbis, aram fo-  
„ciorum, portum omnium gentium, sedem ab  
„universo Populo Romano concessam uni or-  
„dini inflammari, excindi, funestari. —

Et Oratione pro Cquentio amplificat, leges summa religione esse colendas, coacer-  
vando varias legum definitiones: Nam sunt  
fundamentum libertatis, fons æquitatis: mens,  
& animus, & consilium, & sententia Civita-  
tis posita est in legibus.

Similiter vitandam esse prodigalitatem, teu ut Tacitus loquitur prodigentiam, probabis per congregatas ejusdem Definitiones. — „Prodigalitas est Patrimonii fortunarumque  
„imprudens, ac immoderata largitio: est im-  
„modica liberalitas, aut potius malus libera-  
„litatis usus, est paupertatis, inopieque pa-  
„rens: est flagitiorum, furtorum, rapinarum,

se-

„ seditionum conjurationumque fax quædam,  
 „ illicium & origo: est opum vortex, familia-  
 „ rum ruina, Reipublicæ detrimentum, hone-  
 „ statis & famæ pernicies. Prodigalitas est,  
 „ quæ scit perdere, donare nescit, cuius bene-  
 „ ficia non virtus, non decorum, non benigni-  
 „ tas, sed casus & fortuna regunt: quæ disji-  
 „ cit projicitque potius, quam donat, aut bene-  
 „ facit: quæ fraudi, silentioni ac sceleri to-  
 „ tum, virtuti largitur nihil: quæ Patrionia,  
 „ collectasque diu a Majoribus opes abligu-  
 „ rit, quæ ex opulentis inopes, deinde mendi-  
 „ cos: tum Catilinario exemplo, fures, raptor-  
 „ res, sicarios, seditiosos, & incendiarios fa-  
 „ cit &c. —

Plura exempla vide Lib: I. ubi agitur  
 de Definitione in locis intrinsecis.

*Amplificatio per congeriem Adjunctorum.*

Amplificatio ab Adjunctis est ea, quæ duci-  
 tur ab omnibus seu rerum, seu personarum,  
 seu locorum circumstantiis simul coacervatis.

Quid est  
Amplifi-  
catio ab  
Adjunc-  
tis?

Sic Cicero Catilinaria III Nro 13. ab Ad-  
 junctis personarum, Conjuratos sceleris reos  
 arguit: — „ Ac mihi quidem, Quirites, cum illa  
 „ certissima sunt visa argumenta atque indicia  
 „ sceleris, tabellæ, signa, manus, denique unius  
 „ cujusque confessio; tum multo illa certiora,  
 „ color, oculi, vultus, taciturnitas; sic enim  
 „ obstuperant, sic terram intuebantur, sic fur-  
 „ tim nonnunquam inter se aspiciebant, ut non  
 „ jam ab aliis judicari, sed ipsi a se vide-  
 „ rentur. —

1742

Habes etiam illustre comitantium adjun-  
 ctorum exemplum Oratione pro Mil: Nro 54.

Si

Si hæc non gesta audiretis, sed picta videbatis; tamen apparebat, uter esset insidior: uter nihil cogitaret mali, cum alter veheretur in rheda penulatus, una sederet uxor, quid horum non impedittissimum? vestitus? an vehiculum? an comes? quid minus promptum ad pugnam? cum penula irreitus, rheda impeditus, uxore pene constriktus esset? Videte nunc illum, primum egredientem è villa subito. Cur? Vepperi; quid necesse est? tarde; qui convenit, id præsertim temporis? Divertit in villam Pompeji. Pompeium ut videre? sciebat in Alsiensi esse. Villam ut perspicceret? millies in ea fuerat. Quid ergo erat moræ & tergiversationis? dum hic veniret, locum relinquere noluit. Age nunc iter expediti latronis, cum impedimentis Milonis comparete. Semper ille antea cum uxore, tum sine ea; nunquam non in rheda; tum in Equo: Comites Græculi, quoque ibat, etiam cum in castra Etrusca properabat; tum nugarum in comitatu nihil. Milo, qui nunquam, tum casu pueros Symphoniacos uxoris ducebat, & ancillarum greges. Ille, qui semper secum scorpa, semper excoletos, semper lupas ducebat; tum neminem, nisi ut virum à viro lectum esse dices. Cur igitur vidxis est? quia non semper viator à latrone, nonnunquam etiam latro à viatore occiditur: quia quanquam paratus in imparatos Clodius, tamen mulier incederat in viros.

In quo exemplo vide, quam solide probat, quam copiose ab adjunctis personarum, locorum, temporum amplificat Cicero Miloni à Clodio structas fuisse insidias. Plu-

Plura ejusmodi exempla vide Pro Sylla  
Nro 52. Pro Flacco Nro 99. Philip: II. Nro  
63, 66. Verr: VII. Nro 160.

Et in nostra Rhetorica Libro I. ubi tracta-  
tur de Adjunctis.

*Amplificatio per Congeriem, seu Enumera-  
tionem Partium.*

Amplificatio per enumerationem partium fit, dum totum aliquod in suas partes distri-  
buitur, seu dum rei alicujus partes vel omnes,  
vel præcipue quædam singillatim enum-  
rantur.

Sic Cicero. Oratione in Pisonem Nro 96.  
magna sermonis ubertate ostendit, Pisonem  
mortaliū omnīū sententiis esse damnatum:  
,, An ego expectem, dum de te quinque & septu-  
,, aginta tabellæ diribeantur, de quo jam pri-  
,, dem omnes mortales omnium generum, æta-  
,, tum, ordinum judicaverunt? Quis enim te a-  
,, ditu, quis ullo honore, quis denique communi-  
,, salutatione dignum putet? Omnes memoriam  
,, consulatūs tui, facta, mores, faciem denique ac  
,, nomen à Republica detestantur: Legati, qui una  
,, fuere, alienati: Tribuni militum, inimici: Cen-  
,, turiones, & si qui ex tanto exercitu reliqui mi-  
,, llites existunt, non dimissi abs te, sed dissipati,  
,, te oderunt, tibi pestem exoptant, te execran-  
,, tur. Achaja exhausta, Thessalia vexata, lace-  
,, ratæ Athenæ, Epirus excissa, Locri, Photii,  
,, Bæotii exusti: Macedonia condonata barbaris,  
,, Ætolia amissa, Dolopes finitimique Montani,  
,, oppidis atque agris exterminati: Cives Roma-  
,, ni, qui in illis locis negotiantur, te unum, so-  
,, lum suum depeculatorum, vexatorem, prædo-  
,, nem, hostem venisse senserunt. Plu-

*Quid est  
Amplifi-  
catio per  
enum-  
erationem  
Partium?*

Plura exempla vide inter locos intrinsecos,  
ubi de enumeratione partium tractatur.

*Amplificatio per Congeriem Causarum &  
Effectuum.*

*Quid est*

*Amplifi-  
catio per  
congeriem  
causarum  
& effectu-  
um?*

Amplificatio per congeriem causarum & effectuum est illa, in qua multæ simul unius rei causæ, & effectus congregantur. Ut si dicas

¶ cum Cicerone: —,, Quæreris multis modis ve-  
um? „ xatam esse Provinciam, sed ad causas calamiti-  
tatis attende: vigebat in ea ambitus, luxuria  
„ dominabatur, segnes erant magistratus, po-  
„ pulus ipse molli otiosaque segnitie diffusus.  
„ Expecta igitur damna longe graviora. Ex-  
„ haerientur pecuniae, jacebit spreta Religio,  
„ fures impune grassabuntur &c. —.

Pariter Eloquentiae dignitatem per con-  
geriem effectuum amplificat Libr: I, de  
Oratore Nro 30. 31. 32.

—,, Neque vero mihi quidquam præstabilius  
„ videtur, quam posse dicendo tenere hominum  
„ cætus, mentes alicere, voluntates impellere,  
„ quo velit; unde autem velit deducere. Hæc  
„ una res in omni libero populo, maximeque  
„ in pacatis tranquillisque civitatibus præcipue  
„ semper floruit, semperque dominata est . . . .  
„ Quid tam porro regium, tam liberale, tam  
„ munificum, quam opem ferre supplicibus, exci-  
„ tare afflictos, dare salutem, liberare periculis,  
„ retinere homines in civitate &c.—.

Plura exempla vide libr: I. hujus Rhetori-  
cæ, ubi agitur de Causis & Effectis.

*Amplificatio per Congeriem Consequentium.*

*Quid Am-  
pli-*

Amplificatio per congeriem consequentium  
est illa, in qua plura acervatim ponuntur ex  
eadem re consequentia. Ha-

ficatio  
per con-  
geriem  
conse-  
quen-  
tium?

Habes egregium exemplum consequenti-  
um Oratione pro Marco Marcelllo. Ubi Cice  
ro monet Cæfarem ne putet se satis Patriæ,  
satis gloriæ vixisse, priusquam curet ordina-  
re & constituere Rempublicam; quod ampli-  
ficat à consequentibus; nempe constituta Re-  
publica, sequetur pax & otium, Cæfarem ve-  
ro sequentur gloria immortalis, præclara  
Posterorum de eo judicia &c.

— „ Hæc igitur tibi reliqua pars est, hic restat  
„ actus, in hoc elaborandum est, ut Rempubli-  
„ cam constituas, eaque tu imprimis cum summa  
„ tranquillitate & otio perfruare.... Nec vero  
„ hec tua vita dicenda est, quæ corpore & spi-  
„ ritu continetur. Illa inquam, illa vita tua est,  
„ quæ vigebit memoria sæculorum omnium,  
„ quam posteritas alet, quam ipsa æternitas  
„ semper tuebitur. Huic te ostentes oportet, quæ  
„ quidem, quæ miretur, jam pridem multa ha-  
„ bet; nunc etiam, quæ laudet, expectat. Obstu-  
„ pescient posteri certe: Imperia, Provincias,  
„ Oceanum, Nilum, pugnas innumerabiles, in  
„ credibiles victorias, monumenta, munera, tri-  
„ umphos audientes & legentes tuos, sed nisi hæc  
„ urbs stabilita tuis consiliis & institutis erit;  
„ vagabitur modo nomen tuum longe lateque;  
„ sedem quidem stabilem & domicilium certum  
„ non habebit. Erit inter eos etiam qui nasce-  
„ tur, sicut inter nos sicut magna dissensio, cum  
„ alii laudibus ad Cælum res tuas gestas esse-  
„ rent, alii fortasse aliquid requirent, idque vel  
„ maximum; nisi belli civilis incendium salute  
„ Patriæ restinxeris, ut illud sati fuisse videa-  
„ tur, hoc consilji. Servi igitur iis etiam judi-  
„ cibus, qui multis post sæculis de te judica-  
„ bunt,

„ bunt, & quidem haud scio, an incorruptius,  
 „ quam nos; nam & sine amore, & sine cupiditi-  
 „ tate, & rursus sine odio & sine invidia ju-  
 „ dicabunt.

Plura consequentium exempla vide Pro Milone Nro 61. 78. Pro Flacco Nro 99. Et Philippica septima pene tota negat Antonium admissum esse in civitatem, idque probat & amplificat ex iis malis, quæ secum esset in urbem importaturus.

*Amplificatio per Congeriem Similium, Comparationum & Exemplorum.*

*Quid est Amplificatio per Congeriem Similium, Comparationum & Exemplorum?* ea, in qua plures ejusdem rei comparationes, similitudines, pluraque exempla coacervantur.

*Similium & Comparationum Exemplum?* Habet illustre similitudinis & comparationis exemplum Oratione pro Roscio Amerino Nro 56. Ubi accusatores comparat cum anseribus & canibus:

*Anseribus cibaria publice locantur, & canes aluntur in capitolio, ut significant, si fures venerint; at fures internoscere non possunt, significant tamen, si qui noctu in Capitolium venerint; & quia id est suspicuum, tametsi bestiae sunt, tamen in eam partem potius peccant, quæ est cautor. Quodsi luce quoque canes latrent, cum Deos salutatum aliqui venerint, opinor, iis crura suffringantur, quod acres sint etiam tum, cum suspicio nulla sit. Simillima est accusatorum ratio: alii vestrum anseres sunt, qui tantummodo clamant, nocere non possunt; alii canes, qui latrare & mordere possunt. Cibaria vobis*

bis præberi videmus, vos autem debetis maxime impetum in eos facere, qui merentur. &c.

Egregia est etiam illa apud Tertullianum ad probandam corporum nostrorum resurrectionem, per conglobatas similitudines & comparationes amplificatic:

*Lux quotidie imperfecta resplendet & nebræ pari vice decadendo succedunt; sidera defuncta reviviscunt: tempora ubi finiuntur, incipiunt; fructus consumuntur & redunt. Certe semina non nisi corrupta & dissoluta fæcundius surgunt, omnia pereundo servantur, omnia de interitu reformatur. &c.*

Vide etiam Orationem pro Plancio Nro 51. Ubi probat Exemplorum collectione nihil esse quod Laterensis doleat, quod in petitione Ædilitatis repulsam passus fuisset. Et pro Roscio Amerino Nro 66. probat Orestis exemplo eos exagitari furiis qui paricidium admiserunt. Vide etiam Libr: I. hujus Rheticæ, ubi tractatur de Similitudine & Comparatione.

### *Amplificatio per confictionem Contrariorum.*

Amplificatio per congeriem Contrario-  
rum & inter se pugnantium est illa, in qua Quid est  
plura contraria per Antitheses opponuntur. Ampli-  
ficatio per con-  
geriem Con-  
trario-  
rum?

Talis est illa Ciceronis in Catilinam: *Hoc vero quis ferre possit, inertes homines fortissimis insidiari, stultissimos prudentissimis, ebriosos sobrios, dormientes vigilantibus.*

Item illud ejusdem Ciceronis in Pisonem & Gabinium Consules:

*Qui*

*Qui latrones igitur, siquidem vos Consules? qui prædones? qui hostes? qui tyranni nominabantur? Magnum nomen est, magna species, magna majestas Consulis. Non capiunt angustiæ pectoris tui, non recipit levitas ista, non egestas, non infirmitas ingenii sustinet, non insolentia rerum secundarum tantam personam, tam gravem, tam severam &c.*

Plura Contrariorum exempla vide Oratione pro Röscio Amerino Nro 75. 88. Pro Cælio Nro 12. Catil: II. Nro 25. & in Nostra Rhetorica Lib: I. ubi tractatur de Contrariis & Repugnantibus.

### *Amplificatio per Incrementum.*

*Quid est Amplificatio per incrementum?* Amplificatio per incrementum est ea, in qua Oratio veluti per gradus videtur augeri & ascendere, donec ad summum per-

*crimen*

*venerit.*

*Ita Tullius Verris crudelitatem eo per incrementum deducit, ut verba explanando criminis non ulterius suppeditent Nro 5.—, Fa- „, cinus est vincire Civem Romauum; propé par- „, ricidium, necare; quid dicam in Crucem tol- „, lere? Nihil addi jam videtur ad hanc amen- „, tiam, improbitatem, crudelitatemque posse, & „, recte videtur, nam si cum aliorum improbita- „, te certet, longe omnes multumque superabit, „, sed secum ipse certat, idque agit, ut semper „, superius suum facinus, novo scelere vincat.*

*Et Nro 116. Verr: VII. In eundem Verrem dicit: *Levia sunt hæc in hoc reo crimina . . . Non vult Populus Romanus obsoletis criminibus accusari Verrem, nova postulat, inaudita desiderat. &c.**

Plu-

Et pro Quintio Nro 48.— „ Ad hæc extrema  
„ & inimicissima jura tam cupide decurrebas,  
„ ut tibi nihil in posterum, quod gravius at-  
„ que crudelius facere posses, reservares. Nam  
„ quid homini potest turpius, quid vero misé-  
„ rius, aut acerbius usuvenire? quod tantum  
„ evenire dedecus, quæ tanta calamitas inve-  
„ niri potest? Pecuniam, si cuipiam fortuna  
„ ademit, aut si alicujus eripuit injuria, tamen,  
„ dum existimatio est integra, facile consola-  
„ tur honestas egestatem. At non nemo ab  
„ ignominia affectus, aut judicio turpi convictus  
„ bonis quidem suis utitur; alterius opes ( id  
„ quod miserrimum est ) non expectat; hoc ta-  
„ men in miseriis adjumento & solatio subleva-  
„ tur. Cujus vero bona venierant: cuius non  
„ modo illæ amplissimæ fortune, sed etiam vi-  
„ etus vestitusque necessariiis sub Præcone cum  
„ dedecore subjectus est: is non modo ex nu-  
„ mero vivorum, sed, si fieri potest, infra etiam  
„ mortuos amandatur. Etenim mors honesta  
„ saepe vitam quoque turpem exornat; vita tur-  
„ pis ne morti quidem honestæ locum relinquit.

Plura hujusmodi exempla vide Verr: VI.  
 Nro 88. Philip: II. Nro 62. 99.

### §. III.

#### *Quid in Amplificatione vitandum?*

Duo sunt imprimis vitia, ac veluti scopuli quidam, in quos incurrere solent Tyrones, dum Orationem amplificant. Primus scopulus est illorum, qui minutissima quæque singillatim, exiliter, & perexigue consequuntur;

O

quod

quod certe est in Oratore vitium vel maximum. Ut recte monet Cicero: In amplificationibus nihil est nimis tenuiter enucleandum, quia hic locus grandia potius, quam exilia minataque requirit.

Alter scopulus est illorum, qui ad explendum Orationis numerum, nihil nisi vacuas voices, & inanem verborum sonitum in illam infarciunt. Hoc vulgare vitium fugies, si nihil prorsus dicas, quod vim & pondus non addat Orationi. *Quid est enim tam furiosum?* inquit Cicero Libro I. de Oratore, *quam verborum vel optimorum sonitus inanis nulla subiecta sententia?*

Quamquam, ut dicam id, quod res est, si Tyroni peccandum sit in alterutram partem, malim, ut peccet potius ubertate copiaque verborum, quam eorundem jejunitate atque inopia. Quia, ut optime notat idem Cicero, nimia hæc & redundans verborum uertas, & quasi luxuries, stylo atque exercitatione brevi depascetur.

### FINIS LIBRI TERTII



AR-

ARTIS RHETORICÆ  
LIBRI III. TABULA III.  
ELOCUTIO

Inferenda Pag: 141.

Est idoneorum verborum & sententiarum ad res inventas accomodatio.  
Consistit in Tropis, Figuris verborum & sententiarum; ac Amplificatione.

**TROPI**

**FIGURE VERBORUM.**

Tropus in genere, est verbi vel Orationis à propria significacione ad aliam, cum virtute quadam ac dignitate translatio.

Pag: 142.

Tropi duplexes sunt alii in uno verbo, alii in pluribus sunt. In uno verbo sunt 7. Scilicet: Metaphora, Synecdoche, Metonymia, Antonomasia, Catachresis, Metalepsis; Onomatopœja. In pluribus verbis sunt 3. Allegoria, Hyperbole, & Ironia.

Pag: 153.

**Metaphora.** Est translatio vocis à propria significacione ad alienam.

Pag: 142.

**Fit modis 4.** 1. A re animata ad rem aliam animatam.  
2. A re inanimata ad rem inanimatam.  
3. A re inanimata ad rem animatam.  
4. A re animata ad rem inanimatam. Pag: 143.

**Synecdoche.** Est deductio unius ex alio. Pag: 145

**Fit modis 8.** 1. Ponit partem Pro toto. 2. Totum pro parte 3. Unum pro pluribus. 4. Plures pro Uno. 5. Speciem pro Genere 6. Genus pro Specie. 7. Materiam pro re. 8. Anteced: pro Consequente. Pag: 146.

**Metonymia.** Est tropus, quo unum ex alio intelligitur.

**Fit modis 5.** 1. Ponit causam pro Effectu. 2. Effectum pro causa. 3. Continens pro contento. 4. Possessorem pro re possessa. 5. Signum pro re Signata. Pag: 147.

**Antonomasia.** Est tropus, in quo pro vero nomine ponitur aliquid rei per excellentiam conveniens. Pag: 148.

**Catachresis.** Est abusio vocis, quando vocabulo alieno proinde ac proprio utimur.

**Metalepsis.** Est tropus, quo ex una significacione ad aliam, velut per gradus, ascendimus. Pag: 149.

**Allegoria.** Est plurimum metaphorarum continuatio P: 149.

**Hyperbole.** Est tropus, quo rēs plus æquo vel augeatur, vel minuitur. Pag: 149.

**Ironia.** Est tropus contrarium significans, cum illusione. Pag: 151.

**Metaphora & Metonymia** multū conferunt ad laudem vel vituperium.

**Ironia.** Adhibetur vel dum ipsum Adversarium irridemus, vel dum ne ipsius argumenta valeant ea in risu convertimus.

**Allegoria.** Dūmmodo non sit nimia, summopere delectat.

**Antonomasia.** Adhibetur vel propter vocis aliquas penuriam, vel propter vocis Ornatum.

**Hyperbole.** Adhibetur vel ut siquid ultra condignum augeatur, vel infra condignum minuitur. Pag: 153.

Non debent studiose queri, sed ipsimet naturaliter in Orationem influunt est necesse; Multaque plura sunt sine tropis, quam cum illis effienda. Cavendum vero maxime, Ne tota Oratione sub Allegoriis proferatur. Curandum autem, ut allegoria sibi constet; id est, ut quo genere cæperis translationem, eodem & finias; vitiosum enim esset si initium translationis ab incendio sumptum, tempestate & fluctibus terminaretur. Pag: 153.

**Usus Troporum in genere.**

Vitanda in usu Troporum.

**FIGURE SENTENTIARUM.**

Figurae Sententiarum, sunt illa Orationis ornamenta, in quibus juxta Quintilianum maxime Elocutio sita est, quæque non in verbis, sed in ipsis sententiis collectam habent suam dignitatem. Numero sunt 21.

**Interrogatio.** Est vehemens, non tam seiscitandi, quam instandi potius & urgendi causa suscepit percontatio.

Pag: 164.

**Responsio.** Est figura, qua aliquid interroganti, aliud, quod utilius est, respondetur.

Pag: 166.

**Subiectio.** Est figura, qua Orator vel interrogat se ipsum, & sibi responderet, vel interrogat alium & non expectato ejus responso, aliquid de suo addit.

Pag: 166.

**Anteocupatio.** Est figura, qua id occupat Orator, quod ab Adversario posset obici.

Pag: 167.

**Correctio.** Est figura, qua Orator, dictam a se sententiam, alia magis idonea corrigit.

Pag: 168.

**Dubitatio.** Est figura, in qua Orator, quasi fluctuans flingit nescire se, quid sibi agendum dicendum ve sit.

Pag: 169.

**Communicatione.** Est figura, qua Orator eosdem ipsos, atque quos vel contra quos agit, consultat ac compellat.

Pag: 171.

**Apostrophe.** Est figura, qua Orator convertit Orationem suam vel ad Deum vel ad Judices vel ad Adversarios vel etiam ad res inanimates.

Pag: 172.

**Propositio-pa.** Est fictio personæ seu figura, qua Ora personæ absenti, vel mortuæ, aut etiam rei sensu carenti sermone tribuit.

Pag: 173.

**Hypotyposis.** Est tam viva rei alicuius descriptio, ut certi oculis potius, quam audiri vel legi videatur.

Pag: 175.

**Etopæja.** Est figura, qua Orator vitam personam & indolem alicuius quibusdam signis ita describit, ut in cognitionem ejusdem morum deducatur.

Pag: 177.

**Insinuatio.** Est figura, qua Orator supenos tenet aliquando Auditorum animos, donec aliquid inexspectum subiungat.

Pag: 178.

**Apositio-pefis.** Est figura, qua Oratio interciditur alicuius gravioris affectus significandi gratia.

Pag: 170.

**Præterito.** Est figura, qua Orator simulat se vel nescire, vel nolle dicere id quod vel maxime dicit.

Pag: 180.

**Licentia.** Est præsumpta Oratoris in dicendo libertas dum licet dicit aliquid audacius apud eos, quos revereri & metuere deberet.

Pag: 181.

**Concessio.** Est figura, qua Orator aliquid, ut ex parte iniquum videatur concedere, ut extineat aeris in adversarium insurgat.

Pag: 182.

**Deprecatio.** Est figura, qua Orator alicuius five Dei, si ve hominis opem aut misericordiam implorat.

Pag: 184.

**Imprecatio.** Est figura, qua Orator malum alieni impetratur.

Pag: 186.

**Antithesis.** Est figura, in qua vel verba verbis, vel sententiæ sententiæ opponuntur. Spectat prædictum ad verborum, quam ad sententiæ figuram.

Pag: 186.

**Exclamatio.** Est figura, qua Orator vehementer aliquem affectum, cuiuscunq; tandem generis ille sit, significat.

Pag: 188.

**Epiphonema.** Est exclamatio sententiosa, qua fieri solet post rem aliquam insignem narratam & probatam.

Pag: 190.

**AMPLIFICATIO.**

Amplificatio prout à Cicerone definitur, est gravior quedam affirmatio, quæ motu animorum conciliat in dicendo fidem. Est duplex, alia verborum, alia rerum.

Pag: 192.

**Amplificatio per Verba graviora & illustriora.** fit, cum adhibentur verba splendida, quæ reu significantius exprimant & in quibus plenum quiddam, & numerosè sonans esse videatur. Porro verba illa graviora sunt, quæ maiorem vim virtutis alicujus aut vitii ostendunt.

Pag: 193.

Amplificatio per verba superlata fit, cum adhibentur ejusmodi verba, quæ veritatem superant, sive plus dicunt, quam res in se esse possit.

Per verba translata fit, cum adhibentur ejusmodi verba, quæ a propria significacione ad alienam, propter similitudinem transferuntur.

Pag: 195.

Amplificatio per Repetitionem sic, dum eadem verba, aut ornatæ, aut vehementioris ingens excitandi causa iterantur.

Per Periphrasis seu circumlocutionem fit, cum longiori verborum ambitu, circuituque effertur id, quod brevius dici poterat.

Pag: 196.

Amplificatio per Congeriem Definitionem est illa, in qua variae ejusdem redefinitiones coacervantur.

Pag: 198.

Per congeriem Adjunctorum est ea, que ducit ab omnibus seu rerum, seu personarum seu locorum circumstantijs simul coacervatis.

Pag: 199.

Per Enumerationem partium fit, dum rei alicuius partes vel omnes, vel præcipue quædam singillatim enumerantur.

Pag: 201.

Amplificatio per Congeriem Causarum & Effectum est illa, in qua multæ similiunitates rei causæ & effectus conglobantur.

Pag: 203.

Per congeriem Consequentium est illa, in qua plura acervatim ponuntur ex eadem re consequentia.

Pag: 203.

Amplificatio per Congeriem similiunitatis Comparationum & exemplorum est ea, in qua plures & ulti rei comparationes similiunitates, pluraque Exempla coacervantur.

Pag: 204.

Amplificatio per congeriem Contrariorum & inter se pugnantium est illa, in qua plura contraria per Antitheses opposuntur.


Pag: 205.

Amplificatio per incrementum est ea, in qua Oratio veluti per gradus videtur ascendere, donec ad summum pervenerit.

Pag: 206.

Duo in Amplificatione maximè cavenda 1. Ne minutissima quæque singillatim, exiliter, & per exiguae tractetur. 2. Ne inanis verborum sonitus as vacua omnino voces ad expletandum Orationis numerum coacerventur P. 208.





# ARTIS RHETORICÆ

*LIBER QUARTUS*

*De diversis Orationum Generibus.*

**H**aec tenus de præceptis Orationis, quæ ad quodlibet argumenti genus facile possunt accommodari, suse satis dictum est in generis sequitur, ut singulas Orationum formas ac species recenseamus. Neque enim satis esse censuimus generatim atque universe indicare fontes, unde manat omnis Oratio, nisi etiam singulas, singularum vias indica Tyronibus singillatim aggrederemur.

Omnes itaque, quæ passim haberi solent, Orationes ad tria dicendi genera revocantur. Scilicet: ad Demonstrativum, Deliberativum & Judiciale. Ad genus Demonstrativum revocatur Laus vel vituperium; ad Deliberativum falso, vel dissensio; ad Judiciale Accusatio vel Defensio.

O2

CA-



## C A P U T I.

### DE ORATIONIBUS, QUÆ PERTINENT AD GENUS DEMONSTRATIVUM.

**A**D Genus Demonstrativum pertinent *imo* Oratio Panegyrica. *2do*. Oratio Natalitia, seu Genethliacon. *3to* Epithalamium, seu Oratio Nuptialis. *4to* Oratio funebris. *5to* Gratiarum actio, sive Eucharisticum. *6to* Epicinium, sive Oratio gratulatoria.

#### §. I.

##### *De Oratione Panegyrice.*

*Unde nomen Panegyrii?* Panegyricæ Orationes proprie dicebantur illæ, quæ magno apparatu habebantur olim in Panegyri, hoc est in publico solemnique Græcerum undique convolantium cætu, sive ad Iudos faciendos, sive ad Sacra nundinasque in aliquo emporio celebrandas. Harum porro Orationum initium, quo splendidius esset, sumi solebat a laude numinis illius, qui Iudis præesse credebatur; ut Iovis Olympii, in Iudis Olimpicis: Apollinis, in certamine Pythico &c. Deinde sequebatur laus Gentis, vel Urbis, ubi Iudi celeabantur. Denique Principis vel Magistratūs, qui certamini præerant, Pugiles, qui decertaverant, viatores præsertim, qui præmia tulerant, plena manu laudabantur.

Hæc erat ratio veterum illarum Orationum, quæ habebantur in Panegyri. Posterioribus

ribus vero temporibus, illæ etiam vocantur Orationes Panegyricæ, quæ in nobili quopiam confessu in laudem Principum, aut in Templis in laudem Sanctorum habentur.

## §. II.

*De inventionibus & fontibus Panegyrici.*

**S**eries in Panegyrico duplex servari potest, *Quæ series* Artificialis nempe, vel naturalis. Series *servari* artificialis servatur, cum indiscriminatim, & *solet in* confuso temporis ordine, omnia in Panegy- *Panegy-*  
*rico?* *rico?* *Quid ser-*  
artificialis dicenda ad certa quædam capita ex *es arti-*  
arte revocantur. Sic Cicero Pompeji laudes *ficialis?* *refert: ad scientiam rei militaris, ad virtutem, ad au-*  
*toritatem, ad felicitatem.* Sic e-  
tiam Curtius Alexandrum Magnum laudat  
ex hoc dupli capite: *Virtute scilicet & for-*  
*titudine: Fatendum est, inquit, cum pluri-*  
*mum virtuti debuerit, plus debuisse fortunæ,*  
*quam fatus omnium mortalium in potestate*  
*habuit.*

Series naturalis ea dicitur, in qua tem *Quid ser-*  
poris ac Historiæ ordo servatur. Hæc series *es natu-*  
dividitur in tria tempora; scilicet, in illud *ralis?*  
quod vitam alicujus antecessit, illud, quo  
quis vixit, illud quod post mortem est con-  
secutum; si is de quo fit Panegyricus jam  
naturæ concederit.

Hic naturalis ordo perfacilis est; sed vul-  
garis ac plerumque languidus, nisi verborum  
sententiarumque floribus identidem asperga-  
tur, & acutis saepius excitetur sententiis,  
uti factum est a Plinio in nobili illo Trajani  
Panegyrico, in quem tanquam in eximium e-

xem-

xemplar intueri poterimus. Legi etiam poterunt duce orationes Juliani in laudem Constantini Imperatoris, quibus adde Panegyricos Claudiani, Synodii & aliorum, quos inter minime aspernandus Panegyricus Eudiodii, Theodorico Gothorum Regi dictus.

## §. III.

*De tempore, quod ortum antecessit.*

*Quid in illo tempore laudari potest?* In tempore ortum alicujus antecedente laudi potissimum solent Genus, ex quo, & Patria, in qua natus est, his addi etiam poterunt auguria, aut signa, si quæ forte natalem ipsius horam præcesserint.

*Quomodo ducitur dans a Generi?* Si Genus sit illustre, laudabis a splendore natalium majorumque rebus gestis, quæ sunt quædam virtutis quasi semina in nobilium animis insita. Dices Majorum virtutem in eum, quem laudas, cum sanguine pariter fuisse transmissam. Juxta illud Horatii: *Fortes creantur fortibus. &c. & aliud Claudiani: Nobilitas cunctis exordia pandit laudibus, atque omnes redeunt ad semina causæ.*

Sic Eumenius Orator, Constantinum vel sola nobilitate Imperium assequi debuisse, contendit: — „ Inter omnes participes Majestatis tuæ hoc habes, Constantine, præcipuum: „ quod Imperator es, tantaque est nobilitas „ originis tuæ, ut nihil tibi addiderit honoris „ Imperium... Non fortuita hominum consensio, non repentinus aliquis favoris evenitus te Principem fecit; Imperium nascendo meruisti... Accipe Imperator, accipe nostrorum sensuum confessionem. Dolemus, „ quod

„ quod Constantius excessit a nobis; sed dum te  
 „ cernimus, illum excessisse non credimus; idem  
 „ enim est, quem rursus in te colimus, aspectus,  
 „ eadem in fronte gravitas, eadem in oculis &  
 „ in ore tranquillitas. Sic est index modestiae  
 „ rabor, sic testis sermo justitiae &c.

Sic etiam Cicero Verr: II. Nro 52 hor-  
 tatur Glabronem Prætorem ad severitatem,  
 proposita ipsius Majorum laude: Circum-  
 flant te summæ authoritates, quæ te obli-  
 sci laudis domesticæ non sinant, quæ te dies  
 noctesque commoveant; fortissimum tibi Pa-  
 trem, sapientissimum Avum, gravissimum So-  
 cerum fuisse &c.

Ostendendum erit Oratori nobilitatem ni-  
 hil homini prodesse, nec ei quidquam de-  
 coris conferre, cui vera nobilitas, virtus sci-  
 licet propria non adsit, sine qua generis  
 splendorem non sustinet, nec illustrat, sed  
 ignobilem potius reddit & obscurum. Juxta  
 illud Marii in Jugurta: Majorum gloria po-  
 steris quasi lumen est, neque bona eorum,  
 neque mala in occulto esse patitur.

Et illud Minucii Felicis in Octavio: Omnes  
 pari sorte nascimur; sola virtute distingui-  
 mur.

Illud item Senecæ: — „ Non facit nobilem  
 „ atrium plenum fumosis imaginibus, Nemo in  
 „ nostram gloriam vixit; nec quod ante nos  
 „ fuit, nostrum est. Animus facit nobilem, cuī  
 „ ex quacunque conditione, supra conditionem  
 „ licet surgere. Et alibi: Eadem omnibus prin-  
 „ cipia, eademque origo, nemo altero nobilior,  
 „ nisi cui rectius ingenium, & artibus bonis  
 „ aptius. Qui imagines in atrio exponunt, &

„ no-

„ nomina familiæ suæ longo ordine ac multis  
 „ stemmatum illigata flexuris in parte prima  
 „ ædium collocant, noti magis, quam nobiles  
 „ sunt. Qui genus laudat suum, aliena laudat.

Nihil etiam magis pervulgatum, quam effatum illud Ulyssis in certamine cum Ajace:  
*Et genus, & proavos, & quæ non fecimus ipsi, vix ea nostra puto.*

Denique ne generis humilitas, quidquam de laudibus detrahatur; sint in promptu communia hæc exempla: Augustum Patre Avoque argentario, Agathoclem Siciliæ Regem Patre figulo, Ptolomæum primum Ægypti Regem Patre gregario milite, Demosthenem Patre gladiorum faðro natos esse.

Erit etiam in promptu magnifica illa Tullii vox, cum per contemptum novus Arpinas appellaretur: *Ego, inquit, meis majoribus virtute mea præluxi.* Denique usurpari poterit ingeniosum illud dictum Iphicratis, qui ex futoris filio factus Atheniensium exercitus Imperator, cuidam generis ignobilitatem sibi exprobranti facete respondit: *Meum genus a me incipit, tuum in te definit; meorum primus ego sum, tu tuorum ultimus.*

*Quomodo ad laudem à Patria ducendam potissimum faciunt Conditores, Heroes, Principes, laus à Pa. Viri rebus gestis illustres, leges, arma, mores, Cæli clementia, Templæ, fora, mænia, &c. Totum hoc laudis genus eleganter expressit Pacatus in oratione Theodosio dicta; dum Hispaniam in qua natus est, descripsit*

„ Primum tibi Mater Hispania est, terris  
 „ omnibus terra felicior, cui excolendæ atque  
 „ adeo ditandæ impensis, quam cæteris Gen-  
 „ tibus.

„ tibus Supremus ille rerum fabricator indul-  
 „ sit; quæ nec Austrinis obnoxia æstibus, nec  
 „ Arctois subjecta frigoribus, media sovetur  
 „ axis utriusque temperie. Adde tot egregias  
 „ Civitates, adde culta in cultaque omnia vel  
 „ fructibus plena, vel gregibus; adde aurife-  
 „ rorum opes fluminum, adde radiantium me-  
 „ talla gemmarum . . . Sint, ut scribitur Gar-  
 „ gara proventu læta triticeo; Mevania me-  
 „ moretur armento; Lidia prædicetur Paetolo;  
 „ Dum Hispania supra id, quid quid laudatur  
 „ affurgat: Hæc durissimos milites, hæc experi-  
 „ entissimos Duces, hæc facundissimos Orato-  
 „ res, hæc clarissimos Vates parit. Hæc Judicium  
 „ Mater, hæc Principum est; Hæc Trajanum il-  
 „ lum, hæc deinceps Adrianum misit Imperio;  
 „ huic Te debet Imperium. Cedat his terris  
 „ Terra Cretenis partus Jovis gloriata cuna-  
 „ bulis, & geminis Delos reparata numinibus,  
 „ fidem constare nescimus auditis; Deum dedit  
 „ Hispania, quem videmus.

Ostendet Orator Patriæ nobilitatem ni- *Quid fam*  
 hil, aut parum omnino ad laudem cuiusquam *Ita opns*  
 conferre, cum hæc plerumque sit fortis & *est si ejus*  
 fortunæ arbitrium, non argumentum virtutis. *qui lau-*  
 Dicit cum Zenone Viro Sapientissimo: *Non Patria*  
*quærendum an ex illustri Patria oriundi fue-* *datur,*  
*rint homines, sed an ea digni vixerint. Ma-* *sit igno-*  
*gnæ Urbes plerumque parvos Cives habent;* *bilis &*  
*parvæ magnos, In sylvis relictus & enutri-*  
 tus Romulus, Urbium omnium Reginam Ro-  
 manam condidit, quam everttere voluit in ma-  
 xima urbe genitus Catilina. Concludet deni-  
 que non homines factos esse illustres ex sua  
 Patria, sed per Viros bonos, & virtute ac  
 eru-

eruditione præstantes Patriam quamque nobilitatam esse.

Sic ingeniose Themistocles, Seriphio cùdam sibi exprobanti, quod non propter se sed propter Athenas fuisse honoratus, respondit: *Neque tu si Atheniensis essem, clarsus extitisses, neque ego si Seriphius essem, i. obilis.*

Et illud memorabile Anacharsis, qui a Græco quodam barbarus ac Seytha per contemptum appellatus, perquam ingeniole respondit: *Mili quidem Patria probro est; tu vero Patriæ.*

Faciet quoque mirum in modum illa Ausonii sententia de Severo Imperatore, qui natus erat in Africa:

*Punica origo illi; sed qui virtute probaret,*  
*Non obstat locum, dum valet ingenium.*

*Quomodo ducitur Iaus ab Auguriis & signis?* Si quid forte singulare contigerit, quo pueri futura claritas & amplitudo quomodocunque portendi videatur, id in laude ponendum erit. Hujusmodi est fax illa, quam utero se gestare somniavit Hecuba, dum prægnans Paridem, alvo contineret. Item vitis illa, quam in somnio vidit Astyages, quæ palmitibus Asiam obumbraret; unde Cyri magnitudinem præfigiri ab Ariolis responsum est. Item die, quo Plato Philosophorum Princeps natus est aureum imbre de Cælo cecidisse veteram monimenta testantur. Sint sane hæc commentitia. At siquidem licet profanis sacra jungere: id genus erit illud examen apum, quod in nascentis D. Ambrosii labris confidisse dicitur. Pia pariter Divi Dominici Mater visa sibi in somnis uterum gestare cane-

gra-

gravem; quo futura tam Sancti viri vigilantia, concionandique vis acerrima portendebatur. His adde venerandam Sanctissimi Nominis IESU effigiem in pectore Matris Sancti Stanislai Kostcæ conspectam.

## §. IV,

*De iis, quæ in vita ipsa laudari possunt.*

**H**æc vera, ac propria laus est, quam quisque vivendo sibi comparat; nam hæc, quæ vitam antecedit, ab aliis accipitur; quæ autem eandem est sequentia, ab aliis adhuc speratur. In id itaque incumbendum erit Oratori, ut hanc præcipuam Panegyrici partem, pro rerum in vita gestarum copia amplificet, & pro earundem dignitate exornet. Ac impribus ea duntaxat in materiam laudis erunt sumenda, quæ cuique pro sua ætate, statu, & conditione competit. Sic puero maxime convenient:

Ingenii puerilis alacritas, docilitas, semina quedam & principia virtutum; desiderium rerum magnarum, corporis decor, sermonis assabilitas &c.

*Laus  
Pueri.*

*Laus  
Ad te-  
scientis*

Adolescenti maxime convenient studium virtutis & sapientiae; quare in ejus laudem afferatur: apud quos egerit, quibus usus fuerit Præceptoribus, quibus æqualibus, quibus studiis, quibus artibus ac disciplinis, quaque aptitudine & dexteritate vacaverit &c.

Virili ætati convenienti prudentia, fortitudo in adeundis periculis, & laboribus sufflentis, magnitudo animi, præclare facta, prudenter tum privatim, tum publice dicta, constantia fidesque in promissis &c.

*Laus  
Viri.  
Se-*

*Iaus* Senectuti conueniunt: longus rerum usus,  
*Sens.* experientia, consilium, vitæ integritas, comi-  
 tas, morumque dulcedo &c.

*Quæ* In genere tria in hominis cujusque vita  
*laud ri* præcipuum laudem merentur. Virtutes sci-  
*sal nt* licet, scientiæ & honores seu dignitates.  
*in n. a?*

*Cuae-* Primum ut par est locum obtinet Reli-  
*n m* gionis pietasque in DEUM, in Patriam, in Pa-  
*Virtu-* rentes.

*tes snt*

*tilma-*

*z me ce-*

*le ran-*

*aw?*

### *Laus Religionis petitur.*

*imo.* Ab eo, quod bene sentiat quispiam  
 de existentia & cultu DEI.

*2do.* Quod Sapienter de Divina Provi-  
 dentia seu administratione hujus universi ju-  
 dicet.

*3to.* Quod res Divinas complectatur, gra-  
 tiamque DEI & auxilium in omnibus sibi  
 conciliet.

*4to.* Quod Soli DEO omnia sua bona in  
 acceptis referat.

*5to.* Quod Sacras Ceremonias & ritus  
 Religionis magni faciat, & cum reverentia u-  
 surpet.

*6to.* Quod DEUM templis & donariis co-  
 lat, magnoque ardore pro modo suo ipsius glo-  
 riæ amplificandæ ubique accendatur, preces  
 & vota nuncupet.

*7mo.* Quod Personas DEO Sacras honore  
 & reverentia prosequatur.

Exemplum hujus invenies in Panegyrico  
 Plinii Nro 52 qui postquam merita Princi-  
 pis sui Trajani recensuit, subdit:

*Horum unum si præstitisset alius, illi jam*  
*dudum radiatum caput, & media inter deos*  
*sedes*

sedes auro staret aut ebore, auguſtioribus-  
que aris & grandioribus viſtimis invocare-  
tur. Tu detubra nonniſi adoraturus intras,  
tibi maximus honor excubare pro templis,  
poſtibusque praetexi. Sic fit ut dei ſummuſ  
inter homines fastigium ſerves, cum deorum  
ipſe non adpetas. Quod Deus aliquis haberi  
fugis, DEI vices in terris agentem te vene-  
ramur. &c.

Similiter Māmertinus Oratione 2. laudat  
Maxim:— „Nam primum omnium quanta ve-  
„ſtra erga DEUM pietas, quam aris, ſimulacris,  
„templis, donariis vestrīs, denique nominibus  
„adscriptis, adjunctis imaginibus ornaſtis,  
„ſanctioresque feciſtis exemplo vestræ vene-  
„rationis; nunc enim vere homines intelli-  
„gunt, quæ ſit DEI potestas, cum tam im-  
„pene colitur a vobis — .

Et Ausonius in laudibūs Gratiani Impera-  
toris ponit:— „Nullum tu unquam diem ab  
„adolescentia tua, niſi adorato DEI numine, &  
„reus voti, illicè absolute egiſti, totis mani-  
„bus, mente pura, immaculabili conſcientia,  
„& quod in paucis eſt, cogitatione ſincera &c.

Plura exempla nihil opus eſt congerere,  
cum pleni ſint hujusmodi tum antiquiorum,  
tum recentiorum Authorum libri. Concludo  
materiam hanc exemplo Ciceronis in Verr:  
*Omnes religione moventur. & Deos Patrios,*  
*quos a majoribus acceperunt, colendos ſibi*  
*diligenter, & retinendos arbitrantur; nimi-  
rum religionē vita conſtat &c.*

Post Religionem, primum laudis & hono-  
ris locum habere Patriam clare pronunciat  
Plato Lib: 9. de Legibus. Itaque:

*Lauds*

*Laus pietatis in Patriam petitur.*

*imo.* Ab eo, si quis eam velut communem omnium Parentem respiciat.

*edo.* Si commune ipsius bonum suo privato præferat.

*3tio.* Si ejus periculis magis, quam suis moveatur.

*4to.* Si pro ea tuenda honorum omnium, imo vitæ etiam sive discrimen subeat. Hinc facile patet, quam multæ, quam illustres a pietate in Patriam laudes deduci possunt; quot enim beneficia conferre licet in eam, tot laudes ab eadem colligere justum est. Multus est in his Valerius Maximus Lib: 5. Cap: 6. Cujus exempla utpote prolixiora non ponimas. Sufficiat unum Ciceronis Lib: 1mo Officiorum:

*Illa enim est communis omnium, antiquissima & sanctissimæ Parens, omnes omnium charitates complexa, Dea quædam mortalium, quam observare magis & colere debeant, quam Matrem: pro qua nemo bonus dubitet mortem oppetere, si modo sit ei profuturus.*

A Patria proximum pietatis gradum suo sibi jure vindicant Parentes.

*Laus pietatis in Parentes petitur.*

*imo.* Ab amore erga illos.

*edo.* Ab honoribus illis exhibitis.

*3tio.* A periculis eorum causa perlatis.

*4to.* A desiderio & votis pro illorum longiori vita nuncupatis. Ab hoc capite sic suum Trajanum laudat Plinius.

*At,*

At, quo temperamento, Lii boni, potestatem tuam fortunamque moderatus es? Imperator titulis & imaginibus & signis, ceterum modestia, labore, vigilancia Dux, & legatus, & miles; cum jam tua vexilia, tuas Aquilas, magno gradu anteires, neque aliud tibi ex illa adoptione, quam filii pietatem, filii obsequium adsereres, longamque huic nomini aetatem, longam gloriam precarere. Te providentia Deorum primum in locum provexerat, Tu autem in secundo resistere, atque etiam senescere optabas. Privatus videbaris, quamdiu Imperator & alius esset. Audita sunt vota tua, sed in quantum optimo illi & sanctissimo seni utile fuit, quem Dii caelo vindicarunt. Quem tu lacrimis primum, ita ut filium decuit, mox templis honestasti, non imitatus illos, qui hoc idem, sed alia mente fecerunt. Dicavit Cælo Tiberius Augustum, sed ut Majestatis numen induceret; Claudium Nero, sed ut irriteret; Vespasianum Titus, Domitianus Titum; sed ille ut DEI filius, hic ut frater videretur. Tu sideribus Patrem intulisti, non ad metum Civium, non in contumeliam Numinum, non in honorem tuum.

Laudari etiam poterit, maxime in viris Principibus clementia, de hac agit Seneca:

Nullum clementia ex omnibus magis, quam Regem decet; ita enim virtutes magnis viris decori gloriæque sunt, si illis salutaris potentia est. Nam pestifera vis est, valere ad nocendum. Illius demum magnitudo stabilis fundataque est, quem omnem tam supra se esse, quam pro se sciunt &c.

To-

Totus est in extollēnda hac Cæsar's virtute Cicero Oratione pro Marcello.

Laudabitur liberalitas atque beneficētia, qua nimirum una Reges ac Principes proprius ad Deum possunt accedere. Huc servit illud Svetonii de Tito Imperatore, qui nihil cuiquam, quod concedi fas esset, abnuebat: *Negas*, inquit Svetonius, oportere quemquam a Principe tristem discedere. Idem Imperator, cum aliquando inter cænandum diem illam beneficio vacuam abiisse meminisset, conversus ad amicos inquit: *Amici, diem perdidimus*. Commendari poterit aurea illa Scytharum Legati ad Alexandrum vox: *Si Deus es, tribuere hominibus beneficia debes, non sua eripere*.

Celebrabitur denique Magnitudo animi excelsi, nihil extimescentis, prudentia in consiliis capiēndis, celeritas in exequendis, in adversis æquanimitas, & robur mentis imperterritæ.

Atque ut huic capiti finem imponamus, nullius unquam virtutem splendidius ac magnificenter fuisse laudatam existimo, quam Catonis, ad quam unam certatim celebrandam summa quæque ingenia conspirasse videntur. Duo hic exempla adjungo. Et primum quidem ex Paterculo Libr: 2do. *Homo*, inquit, *virtuti simillimus & per omnia ingenio Diis, quam hominibus propior, qui nunquam recte fecit, ut facere videretur, sed quia aliter facere non poterat*. Alterum ex Salustio in bello Catilinario: *Cato non divitiis cum divite, neque fatione cum falso; sed cum strenuo, virtute: cunct modesto, pudico*.

DE DIVERSIS ORATION: GENER: 223  
dore; cum innocentia abstinentia certabat;  
esse, quam videri, bonus malebat, ita, quoni-  
mus gloriam petebat, eo magis aſſequebatur.

*Laus eruditionis & scientiæ.*

Petitur 1mo. Si liberalium artium disciplinis sit instructus is, qui laudatur.

2do. Si literis & literatis faveat, & patrocinetur. Ex utroque hoc Capite sic suum Trajanum laudat Plinius: — „ Quid memorem „ iam? quid mores juventutis, quam princi- „ paliter formas? quem honorem dicendi Ma- „ gistris, quam dignitatem Sapientiæ doctori- „ bus habes? Sub te spiritum & sanguinem, & „ Patriam receperunt studia, quæ priorum „ temporum immanitas exiliis puniebat; cum „ sibi vitiorum omnium conscius Princeps, ini- „ micas vitiis artes non odio magis, quam re- „ verentia relegaret. At tu easdem artes in „ complexu, auribus, oculis habes; præstas e- „ nim, quæcunque præcipiunt, tantumque eas „ diligis, quantum ab illis probaris. &c. —

Huc etiam pertinet illud Senecæ Epis-  
to: 88.

Quare liberalia studia dicta sunt? vides:  
quia homine libero digna sunt. — Cæterum  
unum studium vere liberale est, quod libe-  
rum facit. Hoc Sapientiæ, sublime, forte, ma-  
gnanimum. Cætera pusilla & puerilia sunt.

*Laus ab honoribus.*

Petitur 1mo. A modestia, quæ inter ho-  
nores observatur.

2do. A svavitate morum in honoribus.

3to. A modo obtinendi honores.

4to. Ab honorum etiam promeritorum contemptu.

Pro exemplo sit illud Plinii de Trajano.

Nonne tot, tantisque meritis novos aliquos honores, novos titulos merebare? At tu etiam nomen Patris Patriæ recusabas, Quād longa nobis cum modestia tua pugna? quam tarde vicimus? Nomen illud, quod alii primo statim principatus die, ut Imperatoris & Cæsaris receperunt, tu usque eo distulisti, donec tu quoque, beneficiorum tuorum parcissimus æstimator, jam te mereri fatereris. Itaque soli omnium contigit tibi, ut Pater Patriæ es, antequam fieres. Eras enim in iudiciis nostris, nec publicæ pietatis nerebat, quid vocarere, nisi quod ingrata sibi videbatur, si te Imperatorem potius vocaret & Cæsarem, cum Patrem experiretur. Quod quidem nomen, qua benignitate, qua indulgentia exerves! ut cum civibus tuis, quasi cum liberis parens vivis! ut reversus Imperator, qui privatus exieras, agnosceris! Eosdem nos, eundem te putas, par omnibus, & ob hoc tantum cæteris major, quo melior &c.

### §. V.

*De tempore, quod mortem subjequitur.*

Quæ in hoc tempore, ab Oratore consideranda sunt in hoc tempore ab O-

rato: rando:

1mo. Genus ipsum mortis, si quis pie ac fortiter, ut sapientem ac probum decet, obierit.

2do. Causa mortis, si quis honestis ac utilibus animi corporisque laboribus & curis,

sibi

sibi ipse mortem acceleraverit: si pro Patria, aut quod magis est, pro Religione pugnans, occubuerit.

*3to.* Pompa funebris & honores habitu mortuorum: ut quod uniusdem eti Phalereo statuae trecentae & sexaginta fuerint Athenis positae.

*4to.* Proles, si quae relicta est, honeste & religiose educata. Ut Divus Ambrosius in funere Theodosii Magni: *Ergo, inquit, tantus Imperator recessit a nobis; sed non totus recessit: reliquit enim liberos, in quibus eum debemus agnoscere, & in quibus eum cernimus Etc.*

*5to.* Mæror & luctus bonorum. Eximum ex hoc ultimo motivo habes exemplum Curtii Lib: 10 insolitum omnium Ordinum, mærorum, & acerbissimam in morte Alexandri Militum complorationem describentis:

*Suprema hæc vox Regis fuit, & paulo post extinguitur. Ac primo ploratu lamentisque & plancibus teæ Regia personabant; mox velut in vasta solitudine omnia tristi silentio torpebant ad cogitationes, quid deinde futurum esset, dolore converso. Nobiles pueri custodiæ corporis ejus assueti, nec doloris magnitudinem capere, nec se ipsos intra vestibulum Regiae continere potuerunt, vagique ac furentibus similes, totam urbem ludu ac mærorum compleverant.... Nec poterant viæ a vidoribus in communi dolore discerni. Persæ justissimum ac mitissimum dominum: Macedones optimum ac fortissimum Regem invocantes, certamen quoddam mærorum edebant. Nec mæstorum solum, sed atiam*

etiam indignantium voces exaudiebantur: tam viridem & in flore atatis fortunæque invidia deorum erectum esse rebus humanis. Vigor ejus, & vultus edacentis in prælium milites, obfidentis urbes, evadentis in muros fortis viros pro concione donantis, occurrebant oculis. Persæ, comis more suo detonis, in lugubri ueste cum conjugibus ac liberis, non ut victorem & mox hostem, sed ut gentis suæ justissimum Regem, vero desiderio lugebant. &c.

Nota: Præter enumerata, ex quibus laudes variae duci possunt, capita; solent a pluribus & magnis Oratoribus, in laudum loco ponи pulchritudo, robur, sanitas corporis, divitiae; &c. quæ quidem in se veram laudem non habent, utpote quæ soli & uniti virtuti debetur; virtus tamen in eorum usu ac moderatione maxime cernitur. Unde non inscite dictum est ab Eumenio in Panegyrico Constantini Magni:

*Naturam ipsam magis mentibus domicilia magna metari, & ex vultu hominis decorque membrorum colligi posse, quantum cœlestis Spiritus intrarit habitator.*

Similiter de Theodosio Magno dixerat Pacatus: *Virtus tua meruit Imperium, sed virtuti addixit forma suffragium, illa præstítit, ut oporteret te Principem fieri, hæc, ut deceret.*

Porro a divitiis, poterit laudari quispiam, si imo: eas possideat, non ab illis possideatur. 2do. Si iis utatur non ad perfruendas voluptates, sed vel ad usus vitæ honestos, vel ad juvandos amicos, vel ad egenorum ino-

inopiam sublevandam, ut faciebat Trajanus,  
de quo ait Plinius:

*Nihil magis tuum credis, quam quod per  
amicos habes.*

Laudari etiam a quibusdam solet parcus  
& modestus vestium ornatus, & corporis cultus. Hic tamen si in plus æquo nitidorem  
& delicatum degeneret, recte ab Augusto  
Cæsare superbiæ vexillum, & luxuriæ nidus  
appellatur. Contra quem sic insurgit Seneca  
Libri de brevitate vitæ Cap: 12.

*Quibus apud tonsorem multæ horæ trans-  
mittuntur, dum decerpitur, si quid pro-  
xima nocte succrevit, dum de singulis ca-  
pillis in consilium itur; dum aut disjecta  
coma restituitur, aut deficiens hinc atque  
illinc in frontem compellitur: quando ira-  
scuntur, & excandescunt, si quid ex juba  
sua decisum est; si quid extra ordinem ja-  
cuit, nisi omnia in annulos suos recide-  
runt. Quis est istorum, qui non malit Rem  
publicam turbari, quam comam suam? qui  
non solicitior fit de capitis sui decoro,  
quam de salute? qui non comptior esse  
malit, quam honestior? &c.*

### §. VI.

*Animadversiones quædam circa Personarum  
laudationem.*

**Q**uinque hæc circa Personarum laudationem Quænam-  
observan-  
da sunt  
**animadvertenda** veniunt:

*imo. Ne ad ementitas, fictitiasque lau-  
des recurramus, quæ scilicet non splendo-  
rem afférunt orationi, sed in veris etiam circa Per-  
sonarum  
laudatio-  
nem?  
fidem derogare solent; ut olim contigit im-  
pru-*

prudenti Poëtæ, qui versibus celebrare veritus non fuit, hyacinthinas Stratonices Seleucii Syriæ Regis uxoris comas, quam non deformem modo, sed calvam prorsus fuisse, nemo nesciebat. Poterit hoc illustrari exemplo Lisippi, qui Alexandrum sapienter effinxit hastam manu tenentem; reprehendens Apellem, quod eundem fulminantem depinxisset, & ita veris ac propriis spoliaasset insignibus, dum ornaret falsis.

*2do.* Cavendum est, ne in meliorum copia, res viles, & facta leviora commendemus; turpius enim est exigue frigideque laudari, quam vituperari graviter.

*3to.* Observandum diligenter, ut non communes ac pervagatas, sed proprias cuique laudes præcipue consectemur; quapropter plane perspecta debent esse oratori, quæ propria sunt illius, quem laudat. *Quomodo enim,* dicit Aristoteles, *laudabimus Athenienses, si lateat nos navatae prælium ad Salaminam, vel pugna in Marathone.*

*4to.* Haberi debet ratio diversitatis rerum ad delectationem excitandam, quod fiet jungendo parva magnis, læta tristibus, incredibilia probabilibus, utilia honestis. Exempla suppeditabunt Orationes Pro Archia Poëta, Pro Marcello, Vatiniana &c.

*5to* Narratio sumnum delectum habere debet rerum, quæ commendantur, nec est sejungenda ab aliis partibus, sed per totam Orationem diffundi debet, prout observare licet in Panegyrico Ciceronis pro Marcello, & Plinii in laudem Trajani.

## §. VII.

*Laus rerum inanimatarum.*

**E**x iis, quæ de personarum laudatione dicta, & quibusdam exemplis illustrata sunt, aut difficilis erit conjectura de illis, quæ quasi persona sunt, & quas quasi personas tractari posse, probant innumera probatissimorum Authorum exempla, a quibus, (ne opusculum hoc ultra justos limites protendatur:) citandjs supersedemus; satisque Tyronum utilitati judicamus, brevem singularum Synopsis exhibere.

*Laus virtutis petitur.*

*1mo.* Ab eo, quod bonis corporis longo præstat.

*2do.* Quod rebus omnibus ornamentum & decus afferat.

*3to.* Quod sit bonum constans ac perpetuum, nec imperio fortunæ subiectum.

*4to.* Quod sola in hac vita felicitatem veram stabilire possit.

*5to.* Quod finita etiam hac mortali vita, illa vivat, splendeat, & remuneretur.

*Laus Artis & Scientiæ petitur.*

*1mo:* Ab inventione & illius usu.

*2do.* Ab utilitate & multitudine rerum, quas complectitur.

*3to.* A dispositione præceptionum apta, prudenti & clara.

*4to.*

*4to.* A victoriis, quas reportavit, ut vg. Eloquentia, si moveat, persvadeat, & in animis hominum dominetur.

*5to.* Ab eo, quod soli sapientes administratione rerum digni sunt.

*Laus Regionis petitur.*

*1mo.* Ab ejus Antiquitate.

*2do.* Ab ejus Nobilitate.

*3to.* Ab insigni aliqua virtute, propter quam celebratur.

*4to.* Ab illustribus Viris, quos genuit, vel a quibus fundata est.

*5to.* Ab aéris temperie.

*6to.* Ab amplitudine, situ, amoenitate, & salubritate.

*7mo.* A fluminibus, lacubus, mari, urbium frequentia, celebritate, fertilitate.

*8vo.* Ab animalibus, mineralibus, divitiis, quibus abundat.

*9no.* Ab administratione Principem, incolarum pietate, fortitudine, studiis, & humanitate.

*Laus Urbis petitur.*

*1mo.* Ab ejus Amplitudine.

*2do.* A Munitionibus.

*3to.* Ab aedificiis, situ, figura.

*4to.* A Civium moribus, & multitudine.

*5to.* Ab Academiis, & Templis.

§. VIII.

*Oratio Natalitia, seu Genethliaca.*

*Quid sit  
Genethlia-  
cas?* **G**enethliacus, vel Genethliacum, est Oratio

*Exo-*

*Exordium* dicitur ab aliqua circumstan- Quæ ejus  
tia loci, temporis, aut personæ. Item a vo- Disposi-  
tis publicis, precibus, sacrificiis, quæ nati-  
vitatem præcesserunt.

*Confirmatio* continebit *imo*. Commemo-  
rationem Majorum, & laudes Parentum, quæ  
jure quodam hereditario pertinere viden-  
tur ad prolem.

*2do.* Spem, quam præbet puer vitæ ali-  
quando cum laude peragendæ.

*Epilogus*, seu peroratio continent ut plu-  
rimum vota, & preces ad Deum, ut infanti  
fauste, feliciter, prospereque eveniant omnia,  
utque in Patriæ decus, & Parentum orna-  
mentum adolescat.

Pro exemplo sit, brevis hæc Oratiuncu-  
la in natali cuiuspiam Principis:

Si quantæ sunt in utroque Parente tum  
ingenii, tum virtutis dotes, tantas postmo-  
dum in puerο visuri sumus, quis omnibus  
retro sæculis Princeps major meliorque sur-  
rexit? Si Patris vigilantiam obtinet, quis  
solertior? Si Matris dignitatem, quis spe-  
ctabilior? dum illius clementiam referet,  
quem non vincet officiis? dum hujus mode-  
stiam imitabitur, cui non occurret augustus?  
Accedet ad Patris fortitudinem? cuncta suo  
adjunget imperios; succedet pietati Matris?  
nullum non rapiet virtutis exemplo. Utrius-  
que demum retinebit indolem? Videbimus  
gravitatem urbanitate, modestiam principatu,  
majestatem popularitate conditam; denique  
quidquid uterque nobilitatis & gloriæ, quid-  
quid amplitudinis & famæ continet, in hoc  
uno collectum deprehendemus. En jam vi-  
gor

*gor eminet in vultu, Principemque spirat ad-huc infans: jam affusus genis lèpos & dignitas, jam fulgor inditus oculis celeste quiddam sapit. Cernitur uterque Parens unius in ore: caput excelsum attollit, quasi toto, vel in cunis jacens, Regno emineat: figit obtutus imperterritos, quasi Gentes jam nutu terreat, suo brevi ferro domandas: manus explicat audaces, quasi sceptris jam-jam aptandas: tenera exercet brachia, quasi præludat hostium fatis &c.*

## §. IX.

*Oratio gratulatoria, seu Epivinium.*

*Quid sit Epicinum?* Epicinum est Oratio gratulatoria, quæ adhibetur in quovis felici eventu.

*Quæ eius*

*Dispositio?*

Exordium duci potest a causis publicæ lætitiae, vel a mutatione fortunæ in meliorum statum. Exempli loco erit Exordium Catilinariæ II. „ Tandem aliquando Catilinam „ furentem audacia, scelus anhelantem, pe- „ stem Patriæ nefarie molientem, vobis atquè „ huic Urbi ferrum flammamque minitantem „ ex urbe vel ejecimus, vel emisimus &c.

*Confirmatio* plures pro dicendi argumen-to, & dicentis judicio poterit habere partes. Sic si instituenda sit Oratio de vi-ctoria reportata, Confirmatio continebit laudes victoris, qui debellatis hostibus, timore populos, direptione Urbes, vastitate Pro-vincias, ruina Patriam liberavit; hinc cum laude numerabuntur præclare gesta, expli-cabuntur virtutes Imperatoris, Ducum, Ex-ercitus: addetur narratio victoriae, quæ am-pli.

plificabitur per Hypotyposes, descriptiones, comparationes, & præcedentis fortunæ cum præsenti collationes.

*Epilogus* totus erit in votis & precibus pro felici rerum successu.

Præ exemplo sint pauca hæc excerpta ex Oratione Pacati Theodosio Augusto dicta, in qua funestam Galliæ laborantis imaginem subiicit oculis, multisque describit tristes casus & gravissima pericula, quibus virtute tanti Imperatoris defuncta est Patria, ut ejus triumphi gloriam illustriorem reddat.

Quis se nobis calamitate contulerit? Quid ego referam vacuatas municipibus suis ci-vitates: impletas fugitivis nobilibus solitudi-nes? Quid perfundorum honoribus summis virorum, bona publicata, capita diminuta, vitam ære taxatam? Vidimus redactas in nu-merum dignitates, exutos trabes Consula-tus, senes fortunarum superstites, & infan-tium sub ipso, lictore ludentium flendam se-curitatem; cum interim miseri, vetabamur agere miseros, imo omnes cogebamur men-tiri beatos... Conportabantur spolia Pro-vinciarum, exuviae exulum, bona perempto-rum; hic aurum Matronarum manibus ex-tractum; isthic Dominorum, cruento perfusum appendebatur argentum, numerari ubique pecuniæ, fisci repleri, æra cumulari, vasa concidi. Cuivis ut intuent, non illud Imperatoris domicilium, sed latronis receptacu-lum videretur. &c.

Infert deinde Galliam sic miseram ac op-pressam à tam immanni, crudelique tyrannide liberasse, quanta gloriæ seges Theodosio messisque triumphorum.

S. X.

## §. X.

## Oratio Eucharistica.

*Quid Eucharisticon est?* **E**ucharisticon est oratio, qua ob acceptum insigne aliquod beneficium gratias agimus.

*Quo eis dispositiō?* **E**xordium versari debet in aperto quodam candidoque dicendi genere, quod magnam grati animi foras quodammodo erumpere gestientis significationem contineat.

**C**onfirmatio significabit *imo.* Lætitiam obortam ex accepto beneficio. *2do.* Accepti beneficii magnitudinem amplificabit, idque quadruplici potissimum *ex capite.*

*imo.* A Persona, quæ gratificatur, nempe si sit Rex, si in amplissimo dignitatis gradu collocata; inde enim augetur beneficii magnitudo.

*2do.* A Persona, cui gratificatur; nempe si beneficium sit egenti collatum, si immenti, si ad plures pertineat.

*3to.* A re, qua gratificatur: si honesta, si opportuna, si exoptata, si difficilis.

*4to.* A ratione, modo, & tempore, quo confertur beneficium; nempe si non ægre, sed libenti animo, si non rogatu alieno, sed sponte, si non redditum sit, sed datum beneficium: si non tarde, sed ipsa opinione citius.

**E**pilogus memorem animum pollicebitur. Exemplo esse poterunt duæ exquisitæ Ciceronis, post reditum ab exilio Orationes; una ad Quirites, alia ejusdem argumenti ad Senatum.

Hic

Hic in gratiam Tyronum, ut sciant sublimes quandoque cogitationes, in humili etiam stylo, recte ac candide exprimi posse; quædam ex Ausonii Oratione, Gratiano Imperatori dicta, subjicio; sic ille nude ac simpli- citer exorditur:

Ago tibi gratias, Imperator Auguste: si possem etiam referrem, sed nec tua fortuna desiderat remunerandi vicem; nec nostra suggerit restituendi facultatem. Privatorum ista copia est, inter se esse munificos. Tua beneficia, ut maiestate præcellunt, ita mutuum non reposcunt. Quod solum igitur nostræ opis est, gratias ago; verum ita, ut apud Deum fieri amat, sentiendo copiosius, quam loquendo. Ago igitur gratias, Optime Imperator, ac si quis hunc sermonem meum iisdem verbis tam sc̄epe repetitum, inspicie loquentis affignat, experiatur hoc idem prosequi, Et nihil poterit proferre facundius.... Ago tibi gratias, Imperator, si mereri me credidisti; Et plures habeo gratias, si tantum amasti, ut me Consulem faceres etiam non merentem. Quid quod nihil speranti mihi de honoris augmento perfertur nuncius, Consulem me creatum sine impendio, quod jam diu paucis, sine labore, quod nunquam: sine petitio- ne, quod nemini. (Subintellige concessum) Concludam deinceps Orationem meam, piissime Auguste, sermonis magis fine, quam gracie, namque illa perpetua est Ec.

## §. XI.

*Artificium Orationis in adventu Principis, aut cuiuspiam in dignitate constituti.*

*Exor*

*Quæ sit e-  
ius Dispo-  
sitione?* Exordium duci poterit ab expectatione & votis Populi, item a communi gaudio ex ejus adventu.

*Confirmatio* Continebit descriptionem apparatus, ejusque circumstantias: insignes comparationes & similitudines, quibus persona adveniens commendatur. Plausus & faustas acclamations. Crebram Apostrophen ad Cives, ad domos, templam, &c.

*Epilogus* Animos, fortunas, opesque devovebit. Pro exemplo sit excerptum ex Pato in adventu Theodosii Imperatoris.

*Iam quocunque tulisses gradum, sequi, circumferare, praecedere, vias denique, quibus ferebaris. obstruere: nullus cuiquam sui, Tuique respectus: blandam Tibi faciebat injuriam. Quid ego referam pro mænibus festum liberæ nobilitatis occursum? conspicuos veste nivea Senatores? reverendos municipali purpura Flamines? insignes apicibus Sacerdotes? Quid portas virentibus fertis coronatas? quid aulæis undantes plateas, accensisque funabulis audum diem? quid effusam in publicum turbam domorum, gratulantes annis senes: puerostibi longam servitutem voventes, Matres lœtas, Virginesque securas? Sc.*

### §. XII.

#### *Artificium Orationis funebris.*

*Quæ ejus  
Disposi-  
tio?* Exordium doloris plenum esse debet, duci autem poterit.

*imo.* Ab exclamacione; tale est exordium bre-

brevis illius, sed perelegantis Tullianæ in morte Crassi Oratoris clarissimi.

*O fallacem nostram spem, fragilemque fortunam, & inanes nostras contentiones, quæ in medio spatio sœpe franguntur, & corrunt, & ante in ipso cursu obruuntur, quam portum conspicere potuerunt! &c.*

*2do. Duci poterit a descriptione funebribus apparatūs, vel ex mæsto audientium silencio.*

*3to. Duci poterit a circumstantiis, quæ forte laudandi mortem circumstetere; sic Theodosii Imperatoris laudationem funebrem orditur D. Ambrosius.*

Hoc nobis motus terrarum graves, hoc juges pluviae minabantur, & ultrà solitum caligo tenebrosior denunciabat: quod Clementissimus Imperator Theodosius recessus esset è terris. Ipsa igitur recessum ejus elementa mærabant. Cælum tenebris obdutum, aér perpeti horrens caligine, terra quatiebatur motibus, replebat aquarum alluvionibus. Quidni mundus ipse defleret, eum Principem continuo esse rapiendum, per quem dura mundi istius, temperari solerent.

*Confirmatio tribus constabit partibus; nempe: Laude mortui: Consolatione Parentum & affinium: Adhortatione ad superstites, ut in mortui vitam atque virtutes tanquam in exemplar intueantur. Vide quam eleganter, licet breviter hæc tria expressebit Cicero Philippica XIII. Ubi Martiam legionem, quæ in prælio Mutinensi fortiter pugnare cecidit, magnificentissime laudat.*

Illi impii, quos cœcidistis, etiam apud inferos pœnas parricidii luent; vos vero, qui extremum spiritum in victoria effudistis, piorum estis sedem & locum consecuti. Brevis autem vobis vita data est, at memoria bene redditæ vitæ sempiterna. Et post pauca. Sed quoniam, Patres Conscripti, gloriæ munus optimis & fortissimis Civibus monumenti honore persolvitur, consolemur eorum proximos; quibus optima hæc est quidem consolatio: Parentibus, quod tanta Reipublicæ præsidia genuerunt: Liberis, quod habebunt domesticæ exempla virtutis: Conjugibus, quod viris carebunt, quos laudare, quam lugere præstabit: Fratribus, quod in se ut corporum, sic virtutum similitudinem esse confident &c.

*Epilogus æternam mortuo felicitatem & memoriam precabitur.*

Nota: Nihil hic addimus de dispositione vituperationis, quam ad demonstratiūm dicendi genūs pertinere superius asseruimus; cum hæc alia præcepta non desiderat ab iis, quæ posuimus in laudationum industriis, & sicut hujus finis est, excitare motus in Auditore, qui ad virtutis imitationem ferunt, amoremque & benevolentiam concitent in eum, qui laudatur; sic illius finis est, excitare in Auditore detestationem viti, & conflare odium in illum, qui vituperatur. Illud tamen prudentis erit Oratoris & moderati, videre, ne naturâ potius, quam necessitate ad vituperandum incitatus fuisse videatur; id fieri, si nihil convitiorum effuderit temere, sed quidquid dixerit non à maledictis,

sed

sed a certis rationibus & veritate procedat. Exempla dabunt Seneca de ira, Cicero de crudelitate Verrina L. Item Pro Roscio Amerino. Pro Cluentio &c.

## C A P U T II.

### §. I.

#### *De Genere Deliberativo.*

**G**enus Deliberativum varium est & multiplex, *Quid, &*  
vocatur enim *imo.* suasorum vel dis- *quotu-*  
suasorum à suadendo vel dissuadendo. *2do* *plex est*  
Concionatorium, à concione, seu conuentu *genus*  
Populi, ad quem Orationes deliberativæ ha- *Deli-*  
bebantur, tum apud Romanos, tum apud Græ- *berati-*  
cos. *3to* Denique consultorium à consilio *vum?*  
dando.

Materia generis deliberativi est id omne, *Quæ e-*  
de quo haberi potest deliberatio, seu id, de *jus ma-*  
quo suaderi, aut dissuaderi potest. Ut enim *teria?*  
ait Cicero: — „ Tollitur omnis deliberatio, si in-  
„ telligatur, quidquam fieri non posse, aut im-  
„ ponatur necessitas. Neque enim quisquam de-  
„ liberat, qua ratione perpetuo victurus fit,  
„ quoniam intelligit sibi moriendi necessitatem  
„ incumberē, neque quisquam deliberat, quo-  
„ modo volare possit, scit enim sibi alas non  
„ adefie.

Status generis deliberativi, est consti- *Qui e-*  
tutio quæstionis vg. An res facienda sit *jus sta-*  
*nec ne?* *tus?*

*Generis deliberativi Argumenta duci solent.*

*Unde pertinetur e-  
ius Argumenta?*

- 1mo. Ab utili.
- 2do. Ab honesto.
- 3to A Possibili.
- 4to. A Necesfario.
- 5to. Ab Jucundo.

*Quid uti-  
le?* Utile continet bona omnia sive animi, sive corporis, sive fortunæ, quæ percipi possunt.

Ex hoc loco Catilina suos conjuratos hortatur apud Salustium:— „Nobis (inquit) est „domi inopia, foris æs alienum, mala res, „spes multo asperior. Denique quid reliqui „habemus, præter miseram animam? Quin „igitur expurgescimini? En illa, illa, quam „sæpe optastis, libertas; præterea divitiae, de- „cūs, gloria in oculis sita sunt. Fortuna ea „omnia victoribus præmia posuit. &c.

*Quid  
hone-  
stum?*

Honestum juxta Ciceronem dicitur illud, quod detracta etiam omni utilitate, per se ipsum laudabile sit & expetendum. Ut si quempiam hortemur, ut M. Atilii Reguli exemplo, malit ad mortem vel ad vincula reverti, quam datam hostibus fidem fallere.

*Quid  
possi-  
bile?*

Possibile continet circumstantias omnes, quæ rem, quam svades, facilem esse probant; de his circumstantiis vide locum ab Adjunctis.

*Quid  
necessa-  
rium?*

Necessarium complectitur ea omnia, quæ consecutura prævidentur ex re facta, vel non facta; hæc autem necessitas est cum adjunctione alicujus conditionis; non enim, ut superius innuimus, deliberatur de re aliqua absolute necessaria. Hujus loci magna vis est ad suadendum vel difluadendum. Multi siqui-

siquidem sunt animis adeo segnibus, ut tum quoque, cum aliquid honestum & utile esse norunt, tamen si illud sit cum magno labore coniunctum, facile terreantur. Apud tales ratio necessitatis est compendiosa via ad persuadendum. Ejusmodi est Ciceronis argumentum in Philip: IV.

*Agitur enim, non qua conditione vicitur; sed viatur ne simus, aut cum suppicio ignominiaque perituri?*

Jucundum dicitur omne id, quod honestam habet animi, vel corporis voluptatem. *Quid jucundum?* Hinc dicitur illud argumentum Ciceronis:

*Hoc velim tibi persuadreas, si rationibus meis a te provisum esse intellectero, magnam te ex eo, & perpetuam voluptatem esse capturum.*

Contrarium adhibetur in dissuasione, unde eius argumenta duei solent.

1mo. Ab incommodo & periculoſo.

2do. Ab inhoneſto & turpi

3to. Ab imposſibili, aut diſſicili.

4to. Ab inutili & noxiō.

Exordium in hoc genere adhibetur, tum ad authoritatem, tum ad attentionem Ora- tori conciliandam.

*Authoritas conciliatur.*

*Exor-  
dium  
Generis  
Delibe-  
ratiū.*

1mo. Modeſta ſui commendatione.

2do Amoris & animi grati ſignificatione.

3to. Desiderio bene conſulendi.

*Attentio conciliatur.*

1mo. Exposita rei magnitudine.

2do. Rei dignitate.

3to. Rei momento.

*Confirmatio.* Confirmatio in genere Deliberativo divedi solet in sua membra vg. in utile, possibile, facile necessarium, jucundum &c.

*Peroratio.* Peroratio generis Deliberativi duo continet *imo.* Sententiam de re, quæ in delibera-tionem venit.

*2do.* Motus pro rei honestate, pulchritu-dine, utilitate, quales sunt desiderii, spei, amo-ris, misericordiæ &c.

### §. II.

#### *De Oratione Commonitoria, Petitoria & Con-solatoria.*

*Quid Commo-nitio?* Commonitio, sive Oratio commonitoria est illa, per quam vel minus probos de vitio admonemus, vel ignoros, quid factò opus sit, docemus.

*Quæ ejus Di-spositio?* Exordium ejus fit plenum amoris, unde expedit aliquando fingere, tueri nos velle par-tes illius, quem admonere debemus, ut sci-lacet leniatur prius, quam moveatur.

Narratio rem clare subjiciat.

Confirmatio contineat argumenta ducta ab honesto, utili, & glorioso.

Peroratio denique exhortationem adhi-beat.

*Quid est Petitio?* Petitio est Oratio, qua aliquid postulamus vel pro nobis, vel pro aliis.

*Quod ejus Artifi-cium?* Ejus artificium complexus est Servius: Rhetorum, inquit, est in omni petitione hæc observare:

*1mo.* Ut facile præstari possit, quod peti-tur. *2do.* Ut sit justa petitio. *3to.* Ut habeat modum, & adhibeatur in illa moderatio. *4to* Ut sequatur expedita remuneratio.

Sci-

Scite omnino Orationis hujus artificium Quod  
tractat Scaliger Libr: 3. Cap: 123.

*Artifi-  
cium O-*

Consolator, inquit, aut est, major aut rationis minor, aut æqualis. Magnitudinem intelligo consolatur aut imperio, aut dignitate, aut opibus, aut toria? sapientia, aut ætate. Alter enim consolabitur Nasonem Livia; aliter Liviam Nasos. Hoc spectat ad imperium, dignitas autem etiam sine imperio esse potest. Veluti si Pater filium, Ciceronem Pompejus. Opibus: ut si e plebe quempiam Clientem suum Crassus. Sapientia: quemadmodum Polibium aut Matrem Seneca. De ætate non opus est exemplis. Major interponet auctoritatem, etiam objurgabit. Sapiens opponet etiam disputationem, sententiae huic crebriores. Minor ostendet affectum: sese id a sapientibus accepisse. Aequalis testabitur amicitiam, jus commune benevolentiae. Unde

Exordium pro mali varietate, & pro ratione personarum ducetur: vel a laude fortitudinis, vel à modestia & ingenii sui depresso ne, vel a commiseratione, vel à rationibus, quæ nos impulerunt ad consolationem hanc suscipiendam vg. ab affinitate, cognatione, amicitia, officio. Vel denique à Divina Providentia, cui nemo resistit sine crimine.

Confirmatio probabit: 1mo. Honestam & gloriosam esse in adversis animi fortitudinem. 2do. Utilem esse calamitatem ad morum nostrorum informationem. 3to. Felices eos esse, qui hujus vitae miseriis soluti sunt. 4to. Rerum caducarum & humanarum eam esse conditionem, ut non diu permaneant. 5to. Non paucos esse, qui eadem adversa fortuna utantur-

tur, eademque incommoda patientur. 6to. Adversis illustriorem animum fieri, juxta illud Senecæ: *Nondum se nosse cœpit, qui nondum cœpit esse missr.* 7mo. Denique mortem probis transitum esse ad felicem vitam.

Peroratio extollet doctrinam, virtutem, & magnitudinem animi illius, quem consolamur. 2do Ostendet inutilitatem & damnum, unde dolor augeatur, non corrigatur. 3to. Commendabit patientiam, quæ mitigat omnia.

Pro exemplo sit brevis hæc Liviæ Mariam consolantis adhortatio:

*Cogita, non esse magnum, se rebus prosperis fortē gerere, ubi secundō cursū vita procedit: nec gubernatoris quidem artem tranquillum mare & obsequens ventus ostendit: adversi aliquid incurrat oportet, quod animum probet. Proinde ne submiserris te, imo fige contra stibalem gradum, & quidquid onerum supra cecidit, sustine, primo duntaxat strepitu conterrita. Nulla re major invidia fortunæ fit, quam æquo animo. Pervinee quantum potes, imo plus, quam potes mollitiem animi tui, & ubertim fluentes lacrymas reprime, ne grandis pietas in nepotem, apud incredulos desperatio putetur in Deum. &c.*

### C A P U T III.

#### §. I.

*De Orationibus ad genus Judiciale pertinentibus.*

Ge-

**G**enus judiciale dicitur ex eo, quod in judiciis causisque forensibus versetur. Præter artem bene dicendi, complectitur præterea scientiam juris. Partes habet duas: accusationem & defensionem, quæ cum alia præcepta non desiderent, quam quæ habentus a nobis allata sunt: cumque veteram judiciorum ratio prorsus immutata jam sit; omisis, quæ ab antiquioribus de hoc gener singillatim præscribuntur; hæc pauca in genere sufficient.

Materia generis judicialis est id omne, *Quæ sit*  
quod sub litem cadit, & judicio potest de- *materia*  
terminari. Hoc autem est vel capitale, vel *Generis*  
*Judicia-*  
Civile. Capitale versatur circa crimina; Ci- *lis?*  
vile circa ius, quod defenditur.

Status generis judicialis est causee con-  
stitutio; nempe:

*1mo.* An factum sit aliquid?

*Quid est*  
*status?*

*2do.* Quid factum sit?

*3tio.* An recte & jure factum sit, an  
contra?

His addi possunt controversiae circa scri-  
pta, aut tabulas; nempe:

*1mo.* Cum defenditur, non id scriptum  
aut tabulas velle, quod vult ad-  
versarius.

*2do.* Cum scripto opponitur voluntas  
scriptoris.

*3tio.* Cum scripto aut tabulis contra-  
rium scriptum, aut tabulæ afférant.

*4to.* Cum ex eo, quod est scriptum, aliud  
non scriptum deducitur.

Even-

*Qui sunt evenientia? Eventus sunt signa, vel vestigia rei factæ, hæc autem sunt vel antecedentia, vg. minæ, contentiones, jurgia, prosecutio ad locum &c. vel concomitantia. ut clamor exauditus, verba notata, &c. vel consequentia, ut pallor in vultu, vulnera, mors.*

*Quod Ar- tificium? Exordium duci potest vel a miseriis tem- porum & corruptis moribus, vel ab infelicitate per- diuti hominis, vel a necessitate pri- niendi reum propter bonum publicum, vel a criminis gravitate.*

*Narratio robusta magis esse debet, quam ad pompam instituta.*

*In Confirmatione Crimina singula colli- guntur, acriter singula exponuntur, tabu- lœ proferuntur, testes inducuntur, expli- cantur facti circumstantiæ, proferuntur cau- fæ adjuvantes: intentio exaggeratur: le- viora argumenta præteritionibus subjici- untur.*

*Peroratio iræ, atque odii motus exci- tet.*

*Quod Ar- tificium? Defensio- nis? Exordium defensionis petitur à circum- stantiis locorum, ut apud Ciceronem pro Cæ- lio; vel circumstantiis personarum, ut pro- Sextio, Dejotaro, vel ab officiis collatis, ut pro Plancio, vel a persona, quæ defenditur, ut pro Archia, vel a clementia & humani- tate Judicum. &c.*

*Confirmationis in defensione potissima pars est confutatio; qui enim adversarium refellit, is æquitatem causæ suæ confirmat, hæc autem Consutatio maxime urgere de- bet præcipua accusationis capita, quibus sci-*

DE DIVERSIS ORATION: GENER: 247  
scilicet eversis, reliqua facile corruant. Vi-  
de, quæ de Confutatione dicta sunt Libr: II.  
Peroratio denique tota erit in precibus præ-  
eo, quem defendimus.

§. II.

*Usus Orationum Ciceronis in omni genere  
Causarum.*

IN GENERE DEMONSTRATIVO.

**O**ratio pro Marco Marcello gratulatoria  
est.

Pro Lege Manilia magna ex parte est  
laudatio.

Pro Archia Poëta partim est laudatio.

Oratio post reditum ad Quirites est gra-  
tiarum actio.

Post reditum ad Senatum similiter.

Philippicæ 2da & 4ta invectivæ sunt in  
Antonium.

Catilinariæ in Catilinam.

Actiones in Verrem vituperationes sunt  
Verris.

IN GENERE DELIBERATIVO.

**O**ratio de Provinciis consularibus deli-  
beratio est, ejusque status est conjectu-  
ralis.

Philippica ima deliberatio est magna ex  
parte, in qua quæritur: an omnia, quæ in Cæ-  
faris actis proferuntur, servanda sint jure?

Phi-

Philippica tertia suasoria est, & simul judicialis; agitur enim in ea de pœnis & de præmiis.

Philippica 5ta. Deliberatio est, in qua quæritur: an recte legati ad Antonium decernantur?

Philippica 6ta. Hortatoria est, ut Populus Romanus libertatem suam tueatur.

Philippica 7ma. Suasoria est belli.

Philippica 8va. Deliberatio est, in qua quæritur: an tumultus, an bellum sit appellandum? quod decernit Senatus de persequendo Antonio.

Philippica 9na. Deliberatio est, in qua quæritur: an, cum lex sit, ut in legatione interfectis statua ponatur, Sulpitio mortuo in legatione Antoniana, statua sit ponenda?

Philippicæ 10, 11, 12, 13, 14, similiter deliberationes sunt.

Oratio pro pace Suasoria est concordiae inter Cives Romanos.

Oratio pro Lege Manilia suasoria est belli.

Oratio de lege Agraria, Dissuasio est eiusdem legis.

Oratio pro Haruspicum responsis, Deliberatio est ad Senatum.

Divinatio in Verrem, Consultatio est, quæriturque, an Cicero, an Cæcilius agere debeat contra Verrem?

#### IN GENERE JUDICIALI.

**O**ratio pro Sextio defensio est, ejus status est juris, quæriturque, an vim publi-

DE DIVERSIS ORATION: GENER: 249  
blicam intulerit, negatur, imo probatur re-  
pulisse.

Oratio in Vatinium rejicit testimonium  
Vatinii contra Sextium.

Pro Cælio defensio est, ejus status est  
conjecturalis, quæriturque, an venenum Cæ-  
lius pararit Cl.

Pro Corne: Balbo defensio est, ejus sta-  
tus est conjecturalis, quæriturque, an licue-  
rit Pompejo: Balbum donare Civitate?

Orationes pro Rabirio, Ligario, Dejota-  
ro, Cluentio, Flacco, Murena, Sylla, Sex-  
tio Amerino & Comædo, Domo sua, Fonte-  
jo, Cæcinna Defensiones sunt.

Actio 2da & 3ta in Verrem Accusatio est.

### §. III.

#### *De Styli generibus.*

**S**tylus est illa bene ornateque dicendi <sup>Quid stylus?</sup> ratio, quam quisque Orator vel pro natu-  
ræ suæ vi ductuque, vel ex aliorum imita-  
tione sequitur.

Stylus triplex est: Infimus, mediocris & <sup>Quotuplex</sup>  
<sup>est stylus?</sup> summus, five sublimis.

Stylus infimus est ille, qui naturaliter <sup>Quid stylus?</sup> aquæ instar tranquillæ purus, limpidusque <sup>lus infi-</sup>  
fluit, nullibi tumescit, plane decurrit, co- <sup>mus?</sup>  
gicationes summa facilitate explicat. Or-  
namenta, nisi quæ sese ipsa offerunt, nulla  
adhibet, est ad docendum aptissimus, ad  
suadendam quamvis rem, & explananda ne-  
gotia ipsa sua facilitate, & dicendi ratione  
peridoneus

Sty-

*Quid stylus mediocris, qui īfimo est paulo  
überior, inferior sublimi, ornamentis ex  
arte Oratoria abundat, acutius cogitatis &  
dictis, modisque dicendi rarioribus & ele-  
gantioribus oblectatur; talem leges in Ora-  
toriis & Philosophicis Ciceronis Operibus:  
in omnibus fere ejusdem Ciceronis, Pliniique  
operibus: in elegantioribus Historiæ scripto-  
ribus.*

*Quid stylus summus, five sublimis ille est, qui  
vel pro rerum de quibus agit dignitate, vel  
animo graviter commoto, supra usitatiorem  
dicendi modum. & cogitationibus ac sen-  
tentias, & verbis modisque dicendi, & figu-  
ris ornamentisque Oratoriis elevatur, ma-  
gna in eo ubique omnia, & majestate plena  
sunt.*

Triplex hic dicendi stylus lectione magis.  
& imitatione Autorum, quam regulis & prae-  
ceptis acquiritur.

#### FINIS LIBRI IV.



AR.

# ARTIS RHETORICÆ

## LIBRI IV. TABULA IV.

Triplex Orationis Genus.

### DEMONSTRATIVUM

<i>Ad Genus Demonstrativum revocatur: Laus vel Vituperium</i>
Orationes in laudem Principum in nobili quopiam confessu, aut in Templis in laudem sanctorum dictæ, vocantur Orationes Panegyricæ. <i>Pag: 210.</i>
1mo. Tempus, quod ortum alicuius antecessit. 2do. Tempus, quo quis vixit. 3to. Tempus, quod vitam alicuius subsequitur. <i>Pag: 211.</i>
Genus ex quo, & Patria, in qua aliquis natus est. Laus Generis dicitur: A splendore Natalium, A Majorum rebus præclare gestis. <i>Ad Laudem a Patria ducendam potissimum faciunt: Conditoris, Heroes, Principes, Leges, Mores, Cœli temperies &amp;c.</i> <i>Pag: 212.</i>
Quodsi laudandus sit quipiam obscurum genere & ignobilis Patria natus; Ostendendum erit Oratori: Nobilitatem generis aut Particulae uirilis conferre illi cui vera nobilitas, virtus scilicet propria non adfit. <i>Pag: 213.</i>
Virtutes, Scientia, Honores. Laus virtutis præcipue dicitur: A Religione & Pietate in Deum, in Parentem & in Parentos. <i>Pag: 218.</i>
Laus Religionis in Deum pertinetur. <i>Pag: 219.</i>
1mo. Si is, qui laudatur, bene sentit de existentia & cultu Dei mundi judicet. 2do. Si sapienter de Dei Providentia sive Administratione humani faciat. 3to. Si res Divinas, Sacras Ceremonias, & Ritus Religionis magnificat, & cum reverentia usurpet. 4to. Si Deum extructis Templis vel alii donariis colat. Si Personas Deo Sacras, honore prosequatur. <i>Pag: 218.</i>
Laus Pietatis in Parentem petitur. <i>Pag: 220.</i>
1mo. Si eam velut Communem omnium Parentem respiciat. 2do. Si Commune ipsius bonum, suo privato, præferat. 3to. Si pro ea tua, honorum omnium imo vita etiam ipsius discrimen subeat <i>Pag: 220.</i>
Laus Pietatis in Parentes petitur. <i>Pag: 221.</i>
1mo. Ab Amore ega Parentes. 2do. Ab Honoribus illis exhibitis. 3to. A Periculis eorum causa perlatis. 4to. A Desideriis & votis, pro longiori illorum vita nuncupatis. <i>Pag: 221.</i>
Laudari etiam solent in viris maxime Principibus: Clementia, liberalitas & periculis æquanimitas, & robur mense inperterrita. <i>Pag: 221. 222.</i>
Laus scientie & pietatis. <i>Pag: 223.</i>
1mo. Si is, qui laudatur, literis & Literatis, favet. 2do. Si ipse Liberalium artium disciplinas fit instruens. <i>Pag: 223.</i>
Laus ab Honoribus ducitur. <i>Pag: 224.</i>
1mo. A modestia, quæ inter honores observatur. 2do. A Suavitate morum in honoribus. 3to. A Modo obtinendi honores. 4to. A Honorum etiam præmeritorum contemptu. <i>Pag: 224.</i>
1mo. Genus mortis: si quis pie ac fortiter, ut Virum probum ac sapientem decet, obierit. 2do. Causa mortis: si quis honestis & utilibus animi corporisque laboribus & curis sibi ipsi mortem acceleraverit, si pro Patria, aut pro Religione pugnans occubuerit. 3to. Pompa funebris & honores habiti mortuo. 4to. Proles, si quæ relata est, honeste & Religiose educata. <i>Pag: 225.</i>
Huc revocatur in specie. 1. Genethiacum sive Oratio natalitia. <i>Pag: 230.</i> Epicinium sive Oratio gratulatoria. <i>Pag: 232.</i> 3. Eucharisticum seu Oratio gratiarum auctoria. <i>Pag: 234.</i> Oratio Funebris <i>Pag: 236.</i>

### DELIBERATIVUM.

<i>Ad Genus Deliberativum revocatur: Suasio vel Diffusio.</i>
Genus Deliberativum varium & multiplex est, vocatur enim rimo. Suasorium vel diffusorium, a suadendo vel dissuadendo.
2do. Concionatorium, a Concione seu conventu Populi, ad quem Orationes deliberative habebant apud Romanos & Græcos.
3to. Consultorium à consilio dando. <i>Pag: 239.</i>
Materia Generis Deliberativi, est id omne de quo haberi potest deliberatio, seu id de quo suaderi aut dissuaderi potest.
Status Generis Deliberativi est constitutio quæstionis vg. An res facta sit nec ne?
1mo. Ab utili. 2do. Ab honesto. 3to. A Possibili. 4to. A Necessario. 5to. Ab Jucundo. <i>Pag: 240.</i>
Utile: Continet omnia bona five Animis five corporis, five fortunæ, quæ percipi possunt.
Honestum: Juxta Ciceronem dicitur illud, quod detracta etiam omni utilitate, per se ipsum laudabile sit, & expetendum.
Possibile: Continet circumstantias omnes que rem, quam suades, facilem esse probant.
Necessarium: Complectitur ea omnia, quæ probabiliter consecutura videntur ex re quipiam facta, vel non facta.
Jucundum: Dicitur omne id, quod honestam habet animi vel corporis volupatem.
Argum: 1mo. Ab Incommodo & periculo. 2do. Ab In honesto & turpi. 3to. Ab Impossibili & difficulti. 4to. Ab Inutili & noxio. <i>Pag: 241.</i>
Commonitio seu Oratio Commonitoria est illa, per quam vel minus probos de virtute admonemus, vel ignaros, quid factum opus sit, docemus. <i>Pag: 242.</i>
Petitio est Oratio, qua aliquid postulamus vel pro nobis vel pro aliis.
In petitiora Oratione servanda:
1mo. Ut facile præstari possit id, quod petitur. 2do. Ut sit justa petitio. 3to. Ut habeat modum & justam moderationem. 4to. Ut sequatur expedita remuneratio. <i>Pag: 243.</i>
Ad Genus Deliberativum revocatur etiam oratio Consolatoria. <i>Pag: 243. 244.</i>

### JUDICIALE.

<i>Ad Genus Judiciale revocatur: Accusatio vel Defensio.</i>
Genus Judiciale dicitur ex eo, quod in Judiciis causisque forensibus versetur. Præter artem bene dicendi, complebitur præterea scientiam juris. Partes habet duas, scilicet Accusationem & Defensionem. <i>Pag: 245.</i>
Eius Mater: Materia Generis Judicialis est id omne, quod sub item cadit, & Judicio dirimetur & determinari potest. Hoc autem est vel capitale, vel Civile. Capitale versatur circa Crimina, Civile circa jus, quod defenditur. <i>Pag: 245.</i>
Eius Status: Status Generis Judicialis est Causæ constitutio. Nempe: 1mo. An factum sit aliquid? 2do. Quid factum sit? 3to. An recte, & iure factum sit?
Eius Controversie & Tabula: Hic adduntur Controversiae circa scripta aut tabulas; Nempe: 1mo. Cum defenditur, non id scriptum, aut Tabulas velle, quod vult adversarius. 2do. Cum scripto opponitur voluntas scriptoris. 3to. Cum scripto aut Tabulis contrarium scriptum auf Tabulae afferuntur. 4to. Cum ex eo quod est scriptum, aliud non scriptum deducitur.
Eius Articulus Acci- Exordium dicitur vel a misericordiis temporum & corruptis moribus, vel ab insolen- tia perditi hominis, vel a necessitate pœnae propter bonum publicum, vel à criminis gravitate. Narratio, robusta magis esse debet, quam ad pompam instituta. In Confirmatione Crimina singula colliguntur, acriter singula exponuntur, tabulae proferuntur, testes inducuntur, explicantur facti circumstantiae, proferuntur causæ adjuvantes, intentione exaggeratur. Peroratio, iræ atque odii motus excitat. <i>Pag: 246.</i>
Eius Articulus Defen- Exordium Detentionis petitur, vel à circumstantiis locorum & personarum, vel ab officiis collatis, vel à Persona quæ defenditur, vel à clementia & humanitate Judicatur.
Eius Confirmationis in defensione potissima pars est Confutatio, qui enim Adversarium bene refellit, is æquitatem cause sue confirmat & evincit. Hæc autem confutatio maxime urgere debet præcipua accusationis capita, quibus scilicet everis, reliqua facile corruntur. Vide quæ dicta sunt de Confirmatione Libro II. pag 127.
Eius Styli: Peroratio tota sit in precibus pro eo, quem defendimus. <i>Pag: 247.</i>
Eius Infimus: Stylus, est illa bene ornatae dicendi ratio, quam quicunque Orator vel præuatoræ suæ vi ductuque, vel ex aliorum imitatione sequitur. <i>Pag: 248.</i>
Eius Mediocris: Et ille, qui naturaliter aquæ initia tranquillæ purus limpidosque fluit, nullibi tumescit, plane decurrit, cogitationes summa facilitate explicat; Ornamenta, nisi quæ sepe sponte offerunt, nulla adhibet.
Eius Summus: Mediocris ex arte Oratoria abundat acutius cogitat, modique di- cendi rarioribus & elegantioribus oblectatur.
Eius Sublimis: Ille est, qui vel pro rerum de quibus agit dignitate, vel animo gra- viter commoto, supra usitatiorem dicendi modum, & cogitationibus ac tentiis, & verbis modisque dicendi, & figuris Ornamentisque Oratorij elevatur. Triplex hic dicendi stylus lectione magis & imitatione Authorum, quam regulis & præceptis acquiritur. <i>Pag: 250.</i>
Memoria: Est firma rerum ac verborum recordatio. <i>Pag: 252.</i>
Vox. De hac dicit Cicero: Ad actionis usum & laudem, maximam sine dubio partem vox obtinet, neque tam resert, qualia sunt, quæ dicas, quam quo modo dicantur. <i>Pag: 254.</i>
Servanda in Voce. Vixit.
1mo. Sit facilius & urbana. 2do. Sit articulata, & legitimis interfunctionibus distincta. 3to. Sit firma, & pro rerum ac Argumentorum varietate diversa. 4to. In Exordio, nisi sit ex abrupto, sit demissior ac verecunda. 5to. In Narratione sit simplex & apta ad instar sermonis familiaris. 6to. In Confirmatione sit acutior. 7to. In Peroratione, quasi parta iam vixit sit alacrior & excitator. <i>Pag: 254.</i>
Vitanda in voce.
1mo. Extremæ Syllabæ non asperbeantur. 2do. Vitetur in diceudo cantus. 3to. Ne eadem tenore semper, & omnia pronunciatur. 4to. Ne supra vires vox intendatur. 5to. Ne longiori spiritu protrahatur. 6to. Ne nimium sit præcepit aut nimium tardior. 7to. Ne Oratio naribus potius, quam ore efferti videatur. <i>Pag: 255.</i>
Gestus. Vocem subsequi deoet gestus & varios animi sensus cum illa simul aperiuntur: Gestus est totius corporis motus & Conformatio.
Capit. Aptæ componendæ est, nec erigendum in altum, nec demittendum profunde; Eius enim demissio abjectionem animi, erexit arrogantiam significat.
Vultus. Est animi imago quedam, quæ pro rerum & affectuum varietate vultum in- duces modo hærem, mode mæstum, nunc blandum, nunc minacem, aliquando erectum, aliquando submissum.
Oculi. In Coelum sublati, animum à Superis aliiquid poscentem denotant. Demissi, animum cogitantem & meditantem produnt. Nictantes, malitiam argunt. Rigidi stuporem, semiclausi adulacionem vel infidias, torpentes, segnitiem exhibent.
Manus. In Exordio non stolidi solent extendi, sed ubi paululum effervesceré cœpit Oratio, manus pariter exeruntur cum illa, pariterque cum illa deponuntur. 2do. Pectori manus admovet, cum de se ipso loquitur Orator, at cum alloquitur alios, ad illos extendit. 3to. Manus sinistra nunquam sola gestum facit: dextæ fœ frequenter accommodat. 4to. Urgens crebra manus impressione, Supplicamus manibus elatis. Confirmamus manus pronis. 5to. Manus ori admota tacentis & silentium suadentis indicium est, sublata, admirantis. <i>Pag: 256. 257. 258.</i>

## LIBRI V. TABULA V.

Pronunciatio: Est vocis gestuumque pro rerum verborumque varietate apta conformatio.  
Ad recte pronunciandum tria concurrunt.

### MEMORIA.

Est firma rerum ac verborum recordatio. <i>Pag: 252.</i>
Artes juvandæ memoriae.
1mo. Est continuus labor, usus, & exercitatio.
2do. Est Ordo seriesque rerum.
3to. Multum referit, quo loco & quo tempore potissimum discas. Locus præstat a variis objectis, & prætereuntibus vacuis. Tempus maxime commendatur matutinum, & vespertinum ante somnum.
4to. Facit plurimum ad memoriam si scribatur Oratio: Scripta enim altius descendunt in animum, quam lesta tantum vel audita.
5to. Si longior Oratio memorie mandanda est, proderit plurimum per partes, non tamen nimis exiguae illam ediscere: Si præ nimio pudore metuere titubet vacillans Tyronis memoria, cogitet de humanitate Audientium, nec tam universos sibi proponat, quam singulos. <i>Pag: 253.</i>

### Vox.

De hac dicit Cicero: Ad actionis usum & laudem, maximam sine dubio partem vox obtinet, neque tam resert, qualia sunt, quæ dicas, quam quo modo dicantur. <i>Pag: 254.</i>
Servanda in Voce.
1mo. Sit facilius & urbana. 2do. Sit articulata, & legitimis interfunctionibus distincta. 3to. Sit firma, & pro rerum ac Argumentorum varietate diversa. 4to. In Exordio, nisi sit ex abrupto, sit demissior ac verecunda. 5to. In Narratione sit simplex & apta ad instar sermonis familiaris. 6to. In Confirmatione sit acutior. 7to. In Peroratione, quasi parta iam vixit sit alacrior & excitator. <i>Pag: 254.</i>
Vitanda in voce.
1mo. Extremæ Syllabæ non asperbeantur. 2do. Vitetur in diceudo cantus. 3to. Ne eadem tenore semper, & omnia pronunciatur. 4to. Ne supra vires vox intendatur. 5to. Ne longiori spiritu protrahatur. 6to. Ne nimium sit præcepit aut nimium tardior. 7to. Ne Oratio naribus potius, quam ore efferti videatur. <i>Pag: 255.</i>

### GESTUS.

Capit. Aptæ componendæ est, nec erigendum in altum, nec demittendum profunde; Eius enim demissio abjectionem animi, erexit arrogantiam significat.
Vultus. Est animi imago quedam, quæ pro rerum & affectuum varietate vultum indumentum modo hærem, mode mæstum, nunc blandum, nunc minacem, aliquando erectum, aliquando submissum.
Oculi. In Coelum sublati, animum à Superis aliiquid poscentem denotant. Demissi, animum cogitantem & meditantem produnt. Nictantes, malitiam argunt. Rigidi stuporem, semiclausi adulacionem vel infidias, torpentes, segnitiem exhibent.
Manus. In Exordio non stolidi solent extendi, sed ubi paululum effervesceré cœpit Oratio, manus pariter exeruntur cum illa, pariterque cum illa deponuntur. 2do. Pectori manus admovet, cum de se ipso loquitur Orator, at cum alloquitur alios, ad illos extendit. 3to. Manus sinistra nunquam sola gestum facit: dextæ fœ frequenter accommodat. 4to. Urgens crebra manus impressione, Supplicamus manibus elatis. Confirmamus manus pronis. 5to. Manus ori admota tacentis & silentium suadentis indicium est, sublata, admirantis. <i>Pag: 256. 257. 258.</i>





# A R T I S R H E T O R I C E

*LIBER QUINTUS*

## DE PRONUNTIATIONE.

Pronuntiatio est vocis gestuumque pro re-  
rum verborumque varietate, apta confor-  
matio. Quanta porro sit illius vis & utilitas,  
docet Tullius, cum ait: — „ Infantes & indi-  
sertos homines actionis dignitate Eloquen-  
tiæ sœpe fructum palmamque tulisse; disertos  
veto bene multos, actionis deformitate, in-  
fantes fuisse judicatos. Hinc pronuntiatio  
recte vocatur ab eodem Tullio: — Quædam  
corporis eloquentia: & alibi ad Brutum — „  
Sermo corporis, ab eodem appellatur.  
Ad recte pronuntiandum tria hæc omni-  
no concurrant necesse est: *imo*. Memoria *2do*  
*Vox. 3to Gestus.*

*Quid est  
Pronun-  
tiatio?*

Memoria est quasi fundamentum actionis,  
de cuius vi gratiaque multum depereat ne-  
cessè est, si memoriter non pronuntietur  
Ora-

Oratio, sique Orator non possit a commentariis oculos & vultum avertere.

## §. I.

## De Memoria.

*Quid est Memo- plex Memo- ria?* **M**emoria, prout est pars Eloquentiæ, definitur a Cicerone: firma rerum ac verborum recordatio.

*Quotu- plex Memo- ria?* Memoria duplex est, altera Naturalis, altera Artificialis. Prima a natura indita, altera artificio comparatur; Artificium autem memoriæ a veteribus traditum constat variis locis & imaginibus, loci, se habent instar chartæ, imagines vero instar scripturæ. Loci autem sunt fermè, Columnæ, statuæ, parietes, fenestræ, anguli, aliaque id genus. Imagines autem, ejusmodi sunt adhibendæ, quæ memoriam scriptorum facile refricare possint. *vg.* Si dicendum sit de re militari, vel de navigatione, vel de agricultura, vel de literis: rei militaris imago erit gladius, navigationis anchora, Agriculturæ spica, vel aratum, Literarum liber &c.

Verum, ut ingenue dicam, quid sentio, artificium illud, nonnullam forte habere poterit utilitatem ad multa singillatim vocabula ex ordine proferenda, ast ad singula continuæ Orationis verba perdiscenda, parum oppido, vel nihil omnino proderit: satius itaque erit videre, quo pacto juvari possit & augeri ea, quam a natura hauiimus, memoria.

Ar-

*Artes quibus juvari possit memoria.*

*Prima & præcipua ars juvandæ memoriæ est continuus labor, usus, & exercitatio. Ut observat Fabius; nihil est, quod magis cura augeatur, negligentiaque intercedat, quam memoria, quæ si excolatur quotidie, majorem in modum confirmabitur, & invalescat; fin vero negligatur, minuetur sensim & consenescet. Unde etiam monet Cicero: — „Ut quod singulis diebus dixerimus, audiverimus, egerimus, vesperi comemoremus.*

*2do. Juvandæ memoriæ ars est, Ordo seriesque rerum; nempe: unum facilius est retinere, quam plura, quæ autem apte intersese cohærent, ea quodammodo unum fiunt.*

*3to. Multum refert, quo loco. & quo tempore potissimum ediscas. Locus præstat a prætereuntibus vacuus, ne ea, quæ se foris in sensus ingerunt, memoriam impediant. Tempus autem commendatur matutinum, quanquam nec inutile erit ante somnum aliquid ediscere, ut scilicet noctu, vel lut in stomacho cibus, ita oratio in cerebro concoquatur.*

*4to. Facit plurimum ad memoriam, si scripta Oratio, scripta enim altius descendent in animum, quam lecta tantum, vel audita.*

*5to. Si longior Oratio memoriæ mandanda est, proderit per partes, non tamen nimis exiguae, illam editcere.*

*6to. Si præ nimio pudore metuere titubet vacillans Tyronis memoria, cogitet dehu-*

§. II.

*De V o c e*

**D**e hac dicit Cicero: — „Ad actionis usum  
„& laudem, maximam sine dubio par-  
„tem vox obtinet, neque tam refert, qualia  
„sunt, quæ dicas, quam quo modo dicantur.

*Observanda in voce.*

*1mo.* Sit facilis & urbana.

*2do.* Sit articulata, & legitimis interpun-  
ctionibus distincta.

*3to.* Sit firma, & pro rerum ac argumen-  
torum varietate diversa. Nempe in blandi-  
tiis & precibus lenis & tenera: in suasioni-  
bus, monitionibus, pollicitationibus, con-  
solationibus, gravis. In hortationibus for-  
tis: in iracundiae motu incitata: in misera-  
tionis motu, interrupta & flebilis: in timo-  
ris motu demissa, hæsitans, & abjecta: in  
voluptatis motu effusa, hilaris & tenera.

Præterea mutanda vox erit, pro variis  
Orationis partibus.

*In Exordio,* nisi forte indignatione con-  
stet, voce utendum est demissori ac vere-  
cunda. Ab exordio paulatim insurgit vox,  
ac in narrando quidem voce utimur aper-  
ta simplicique, ad instar sermonis familiaris.

*In confirmatione & argumentatione* voce  
utimur acriori.

*In*

*In Peroratione* demum, quasi parta vi-  
etoria vox solet esse excitator; ut ita ostendat  
Orator se niti bonitate causæ, magnamque  
fiduciam in Auditorum probitate prudenterque collocare.

*Vitanda in voce.*

- 1<sup>mo</sup>. Extremæ syllabæ non absorbeantur.
- 2<sup>do</sup>. Ne canere videamur.
- 3<sup>tio</sup>. Ne eodem tenore semper & omnia pro-nunciemus.
- 4<sup>to</sup>. Ne supra vires vox intendatur.
- 5<sup>to</sup>. Ne longiori spiritu protrahantur.
- 6<sup>to</sup>. Ne nimium sit præceps, aut tardior.
- 7<sup>mo</sup>. Ne naribus potius, quam ore efferti videatur.

§. III.

*De Gestu.*

**V**ocem subsequi debet gestus, & varios ani-mi sensus cum illa simul aperire.

*Gestus*, ut dicit Quintilianus, est totius corporis motus & conformatio. Quid fit gestus?

*De Conformatione totius corporis, hæc a probatis Authoribus præcipiuntur.*

1<sup>mo</sup>. Ut status corporis sit celsus & eretus; non tamen in statuæ morem obrigescat, quasi veru deglutisset, ut facete agebat Epictetus.

2<sup>do</sup>. Ne crebris & incompositis commotionibus vehementius agitetur; ad instar actuosi cuiusdam Oratoris, qui cum multum in dicendo concursasset; faceta hac ab ad-

R ver-

versario suo Virginio interpellatus est interrogacione: *Quot demum passuum millia declamasset?*

*De conformatione singularum corporis partium hæc habe:*

*Caput.* Caput apte componendum est; nec erigendum in altum, nec demittendum profunde; ejus enim demissio, abjectionem animi: erectio, arrogantiam significat. Modica interim capitinis demissio; tristitiam, luctum, pænitentiam perbelle designat, cavendum interim erit ab ejusdem jactatione.

*Vultus.* Vultus animi imago quædam est, oculi vero ejusdem indices. Quapropter pro rerum natura vultum indues modo hilarem, modo mæstum, nunc blandum, nunc minaceum, aliquando erectum, aliquando submissum.

*Frons* Frons ex profecta diffusaque hilaritatis indicitum est, contra vero severitas indicatur fronte corrugata.

*Supercilia.* Supercilia pro argumenti varietate modo sint immota, modo moveantur, nunc inæqualiter dissidente, nunc contrahantur.

*Oculi.* Oculos ipsa natura dicitat, ad res, de quibus loquimur, accommodandos esse, ne merito rideamur cum inepto illo Rhetore Nicostrato, qui cum diceret: *O Jupiter!* terram aspiciebat; cum vero diceret *O terra!* cælum intueri solebat. Unde:

Oculi in Cælum sublati animum a Superis aliquid poscentem significant: demissi, animum cogitantem & meditantem produnt: nictantes, malitiam arguunt: rigidi, stuporem,

rem: semiclausi adulationem & insidias; tor-  
pentes, segnitiem exhibent; de his corporis  
partibus sic agit Cicero pro Sexto:

*Tanta erat gravitas in oculo, tanta  
frontis contratio, ut illo supercitio, tanquam  
Rhædamantus ille niti videretur.*

Manus quomodo Orationi conformari de- Manus.  
beant, optime colligitur ex Fabio:

*Manus, sine quibus truncæ esset actio ac  
debilis, vix dici potest, quot motus habeant.  
Nam cæteræ partes loquentem adjuvant, hæc  
prope est, ut dicam, ipsæ loquuntur. An non  
his poscimus? pollicemur? vocamus? dimitti-  
mus? minamur? abominamur? timemus? in-  
terrogamus? negamus? gaudium, tristitiam,  
dubitatem, pœnitentiam, modum, copiam,  
numerum, tempus ostendimus?*

Cavendum nihilomininus est ut monet Ci-  
cero: ne nimiae sint digitorum argutiae, neve  
immodica sit illorum gesticulatio. Hoc vi-  
tio laboravit summus Orator Hortensius re-  
ferente Agellio: *Cum enim manus ejus in-  
ter agendum essent argutæ ad nodum & ge-  
stusæ; maledictis, compellationibusque pro-  
brosis jactatus est; multaque in eum, quasi  
in histriōnem, in ipsis causis atque judiciis  
ditæ sunt.*

Ut itaque & vitium manuum effugias, &  
earumdem retineas officium, En certas ea-  
rum & definitas ab Authoritatis leges, quas  
sequaris.

*imo.* Manus in exordio non statim solent  
extendi, sed ubi paululum effervescente cœ-  
pit Oratio, manus pariter exeritur cum illa,  
pariterque cum illa deponitur.

*2do.* Pectori manus admovetur, cum de se ipso loquitur Orator, at cum alloquitur alios, ad illos extenditnr.

*3to.* *Manus sinistra nunquam sola gestum facit,* inquit Fabius, *dextræ se frequenter accommodat.*

*4to.* Urgemus crebra manuum impressione: supplicamus manibus elatis, junctisque: confirmamus manibus pronis, gravi quodam & decenti motu depressis.

*5to.* Admirantium est manus tollere.

*6to.* Manus ori admota, tacentis & silentium suadentis indicium est.

Nota. Sunt, qui antiquo Areopagitarum more, omnem omnino ab Oratione gestum corporisque motum exclusum volunt, sive frigide ac oscitanter dicant, ut ubi Periclis instar tonare, irasci, fulgurare opus esset, ipsi nullos viriles igniculos jaciant; suasque Orationes lectoris in modum decurrant. Hi velim sibi applicent illa, quae in Marco Callidio perstringit Tullius. Cum enim jure jurando affirmaret Callidius, paratum sibi ab inimico quodam venenum; remque adeo atrocem, frigide, demissâ vultu, voce languidula ac sine ullo gestu referret, sic a Cicerone interpolatus est: *Tuus ille mirificus languor, mendacium clamitat, neque verò in vero criminis tantopere frigeres. &c.*

#### §. IV.

#### *Praxis Rhetorica.*

**C**um selegeris argumentum Orationis tuæ vel ad laudem, aut vituperium; vel ad suadendum.

dendum aut dissuadendum, vel ad accusandum, aut defendendum.

1mo. Percurses locos Oratorios tum intrinsecos tum extrinsecos, & ex iis aptiores ad rem tuam confirmandam usurpabis. Non tibi parum proderunt observationes in hoc libro superius allatæ de accomodatione locorum, & eorundem amplificatione.

2do. Consule varios argumentandi modos, & statue, quem adhibere velis ad locos Oratorios a te præelectos.

3to. Unamquamque argumentationis propositionem amplificabis, prout usus tibi fuerit, statuendo prius, quæ tibi amplificationis ratio placeat.

4to. Accomodabis figuræ, ad diversos argumenti status, nunc docendo, nunc deletando, nunc flectendo.

5to. Denique tecum ages de dispositione partium Orationis. *vg.* Unde ducas exordium? an sit addenda narratio vel non? aut quo artificio contexenda sit? quæ distributio, quæ divisio facienda? an præcedere debet confutatio, vel confirmatio? quæ argumenta discutienda sunt in initio, quæ in medio, quæ in fine? qui motus, seu affectus concitandi? qui stylus observandus sit? quæ idoneæ sunt transitiones ad præcipuas Orationis partes?

Hæc omnia & singula Oratoris munia suis in locis habes explicata.

Atque ut facilius rem conficias, in quovis argumento tractando Ciceronis Orationem tibi propone; quam quidem integrum non omnino imitaberis, sed in æconomia præcipuarum argumentationum, atque in styli

styli genere, figurarum ornatu, & transitio-  
num varietate conseruantur. *v.g.* Si aliquem  
defendis, lege Milonianam Orationem, & pro  
Sextio. Si inveheris in aliquem, consule  
Orationem contra Pisonem, & Philippicam  
secundam. Si reum accusas, lege Verrinas:  
si de re aliqua deliberas: vide Manilianam  
& pro Pace.

*Observa autem diligenter:*

*1mo.* Animo recte concipiendam esse quæ-  
stionem, quam velis discutere.

*2do.* Quæstionem in suas partes dividen-  
dam; ut intelligatur, quid probandum sit, quid  
amplificandum, quid prætermittendum.

*3to.* Revocanda esse in memoriam, quæ  
vel audita, vel a te lecta & notata fuerint ali-  
quando; ut, si ad rem tuam faciant, adhibeantur.

*4to.* Congesta materia Orationis, pergen-  
dum esse ad dispositionem, ac tandem ad Pro-  
nuntiationem Orationis, eo modo, quo huc-  
usque dictum est.

FINIS ARTIS RHETORICÆ.

A D.


MAJOREM DEI GLORIAM.



書寫於正德丙子年  
丁巳夏月於西山草堂

KSIĘGOZBIÓR  
MARCINA ZAMOYSKIEGO

2176 - KZ



cali puma interpresay  
yca

Barroco de Apurímac

2176-K2

